

MORALIA

S I V E

DE SANCTISSIMÆ EUCHARISTIÆ

E T

PŒNITENTIÆ SACRAMENTO

LIBER UNICUS

III. IN ORDINE

CONTINENS OPUSCULA SEX, NEMPE

- | | |
|---|---|
| <p>I. DE CULTU EXHIBENDO SACROSANCTÆ EUCHARISTIÆ.</p> <p>II. DE USU EUCHARISTIÆ, SEU AN CREBRIUS, VEL RARIUS SIT EA DANDA LATCIS.</p> <p>III. DE QUOTIDIANA CELEBRATIONE MISSÆ.</p> | <p>IV. DE UBERIORI FRUCTU SACRIFICII IN LOCO SACRO, QUAM IN CAPPELLA PRIVATA.</p> <p>V. MEMORIALE CONFESSARIORUM.</p> <p>VI. CONFESSARIUS RECIDIVI, SEU DE DANDA, AUT NEGANDA, VEL DIFFERENDA ABSOLUTIONE RECIDIVO.</p> |
|---|---|

AUCTORE

ANDREA HIERONYMO ANDREUCCI

E SOCIETATE JESU.



ROMÆ MDCCLXVI.

TYPIS, ET SUMPTIBUS GENEROSI SALOMONI.
SUPERIORUM PERMISSU.

III

ADMIRABILI S. ROSÆ

VIRGINI VITERBIENSI

EX TERTIO ORDINE S. FRANCISCI

ANDREAS HIERONYMUS ANDREUCCI SOC. JESU.



Communis Tibi, & mihi patria est, o admirabilis Sponsa Christi, S. ROSA: sed non idem mihi est, ac Tibi fuerit vitæ cursus. Tu quippe (*) ab ipsa infantia omni virtute enituiſti, facta perfectionis Magistra, cum vix loqui didiciſſes. Deinde charitate in Deum, & Proximum quamaxime incensa, piis adhortationibus, validisque argumentis, multos Hæreticos ad Fidem, & obedientiam Romani Pontificis reduxiſti: ut omittam jejunia, aliasque corporis voluntarias afflictationes, quibus Te ipsam Deo hostiam vivam offerebas, cæterisque Divinam Clementiam conciliabas. Tandem post exilium a patria, post ingesta convitia, & ludibria, aliasque

a 2

(*) Ex Brev. Rom.

que in iurias patienter pro Christo toleratas, ad beatam Patriam suspirans, decimo octavo Tuæ ætatis anno nondum exacto, sanctis operibus, & miraculis clara, ad Cœlum migrasti. Ipse vero, me miserum! quam longe ab hoc vitæ genere abfui! Nulla in me virtus agnoscitur, nihil hætenus pro Christo toleravi, nullum, aut certe exiguum ad salutem animarum laborem, ac sollicitudinem contuli, ætate jam senex, puer adhuc sum in via Domini, adeo ut apposite in me cadat illud *Isaïæ 65. Puer centum annorum morietur*. Quamobrem opem Tuam enixe efflagito, o admirabilis Sancta, ut cuius tam dissimilis tuo fuit vitæ cursus, sit saltem similis vitæ exitus, ita ut ipse tempus instanter operando redimens, Cœlestem etiam ipse per tuas ad Deum preces Patriam ingredi promerear. Hanc me in spem Tua in clientes, & cives perspecta benignitas erigit, & in hujus conceptæ a me spei significationem, studiorum meorum morales Lucubrationes Tibi præ cæteris inscribo, do, ac dedico; quibus si ipsa de Cœlo virtutem juvandi alios imperteris, & non satis æquam Censorum criticen averteris, uberiores mihi spem injicies, qui æternæ salutis per Tuas preces obtinendæ spem propositam habeo. Quidquid in re litteraria mihi præstiteris, spem meam augebit, fore ut majoris momenti opus impleas, nec velis in re omnium gravissima clientem Tuum, & civem deferere. Per ea quippe, quæ sunt præstita, discimus sperare quæ poscimus.

LAU.

LAURENTIUS RICCI^v

Præpositus Generalis Societatis JESU.

CUM Librum, cui titulus: *Moralia, sive de sanctissima Eucharistia, & Pœnitentiæ Sacramento Liber Unicus, III. in ordine*, a P. Andrea Hieronymo Andreucci Societatis nostræ conscriptum, aliquot nostri Theologi recognoverint, & in lucem edi posse probaverint, potestatem facimus, ut typis mandetur, si iis, ad quos pertinet, ita videbitur: cujus rei gratia has litteras manu nostra subscriptas, & Sigillo Officii nostri munitas dedimus. Romæ die 7. Augusti 1765.

Laurentius Ricci.

I M P R I M A T U R,

Si videbitur Reverendissimo Patri Magistro Sacri Palatii Apostolici.

D. J. Archiep. Nicomed. Vicesg.

Librum continentem sex Opuscula sequentia, nempe *De cultu Sanctissimæ Eucharistiæ exhibendo: An crebrius, vel rarius danda sit Laicis Divina Eucharistia: An expedit Sacerdotem quotidie celebrare: De ubertore fructu Sacrificii in loco sacro, quam in Cappella privata: Memoriale Confessariorum, seu de Ministro & Sacramento Penitentiae, res omnis Moralis in compendium redacta: Confessarius Recidivi, seu de danda, aut neganda, vel differenda Absolutione Recidivo*, Auctore P. Andrea Hieronymo Andreucci Societatis Jesu, quem Reverendissimus Pater Sacri Palatii Apostolici Magister mihi recognoscendum commisit, publici juris fieri posse dignissimum censeo; clarissimi namque ac doctissimi Auctoris Lucubrationes, ne dum Catholicæ Fidei, ac bonis moribus aptissime conformantur, sed plurima Reipublicæ litterarum proficua, & Curatoribus animarum necessaria continent.

Datum in Conventu S. Pauli ad Arenulam Urbis die 18. Februarii 1766.

Fr. Joannes Sinacori Sacræ Theologiæ Magister, ac Tertii Ordinis S. Francisci ex-Minister Generalis.

I M P R I M A T U R.

Fr. Thomas Augustinus Ricchinius. Ordinis Prædicatorum;
Sac. Pal. Apost. Magister.

I N D E X

OPUSCULORUM, ET QUÆSTIONUM.

OPUSCULUM I.

De cultu exhibendo Sacrosanctæ Eucharistiæ.

P A R S P R I M A.

De iis quæ ad cultum Eucharistiæ de præcepto servanda sunt.

- A**ssertio. *T*enemur exhibere interdum honorem aliquem Venerabili Eucharistiæ Sacramento. Pag. 2.
- Q**uæst. I. *An præceptum affirmativum, quod datur de honore Eucharistiæ exhibendo, obliget etiam Infideles?* ibid.
- Q**uæst. II. *Quando obliget tale præceptum, seu pro quo tempore determinato urgeat ejus obligatio?* 3.
- Q**uæst. III. *Quomodo veneratio, seu adoratio exhibenda sit Divino Sacramento?* 4.
- Q**uæst. IV. *Quale peccatum sit, hunc præcepto affirmativo de veneratione Sacramenti non satisfacere?* 5.
- Q**uæst. V. *Quoniam sint de præcepto, vel consuetudine Ecclesiæ constituta ad cultum Eucharistiæ?* ibid.

P A R S S E C U N D A.

De iis quæ ad cultum Eucharistiæ de præcepto vitanda sunt.

- Q**uæst. I. *An sit peccatum, & quale, confabulari de rebus indifferentibus coram SS. Sacramento venerationi exposito?* 9.
- D**ub. I. *An sit peccatum, quale, & quando, confabulari in Ecclesia sine tali circumstantia?* 12.
- D**ub. 2. *An liceat ministrare Eucharistiæ sine lumine?* 14.
- Q**uæst. II. *An supplex sacra debeat de præcepto esse munda?* ibid.
- Q**uæst. III. *An Equites ex Ordine militari decenter accedant ad Eucharistiæ accincti ense?* 15.
- Q**uæst. IV. *An peccent feminae accedentes ad Eucharistiæ cum ornatu superfluo, vel immodesto?* ibid.
- Q**uæst. V. *An reus Processioni Corporis Christi se immiscens, gaudeat immunitate?* 16.

P A R S T E R T I A

De iis quæ ad cultum Eucharistiæ de consilio servanda,
vitandave sunt.

- §. I. **V**isitatio, & adoratio quotidiana Eucharistiæ quanti facienda? Pag. 17.
 §. II. **D**educere Sacramentum, cum defertur ad infirmos, plium valde ac
salubre est. 18.
 §. III. **D**are elemosinam mulierculis cum onere, ut pro hoc, vel illo communi-
cent, non est expeditum. 19.
 Dub. 1. **E**xpositio Sacramenti valde frequens an expedit? Ibid.
 §. IV. **B**enedictioni Sacramenti intercessionum utilitas, & nonnullorum quo ad
hoc abusus. 20.
 Dub. 2. **A**n facere aliqua ad cultum Sacramenti ob consuetudinem sit lau-
dabile? 21.

O P U S C U L U M II.

De usu Eucharistiæ, seu an crebrius, vel rarius ea sit
danda Laicis.

P A R S P R I M A:

Quale sit, & quid statuat Decretum Sac. Cong. Concilii Tridentini
Interpretum hac de re editum anno 1679.

- §. I. **P**roponitur controversia de usu Eucharistiæ crebrius, aut rarius Laicis
concedendo. 22.
 §. II. **P**roponitur Decretum Sac. Cong. Concilii de Communionis quotidiana. 24.
 §. III. **A**notationes circa leges talis Decreti. 25.

P A R S S E C U N D A.

Proponitur, ac resolvitur Casus.

- §. I. **C**asus de concedente indifferenter personis laicis Communionem quoti-
dianam. 28.
 Quæst. unica. **A**n talis praxis sit obnoxia hallucinationi, ac periculo tum ir-
reverentia in tantum Sacramentum, tum damni spiritualis eorum ani-
marum. Ibid.
 §. II. **S**cholasticorum sententia in hac re. 29.
 §. III. **M**oralistarum sententia. 31.
 §. IV. **M**ysticorum sententia. 32.
 §. V. **S**anctorum praxis in hac re. 34.
 §. VI. **F**undamenta contraria evolvuntur. 36.

P A R S T E R T I A :

Proponuntur aliquot morales Regulæ servandæ a Confessario in concedendo crebrius, aut rarius Laicis sacram Communionem, ut sit fidelis dispensator, & prudens.

- §.I. **P**rima Regula ex S. Francisco Saleſio. 47.
 §.II. Secunda Regula ex Paulo Sengeri. 48.
 §.III. Tertia Regula ex Decreto ipſo, & ex communi Theologorum. 49.

A P P E N D I X

De Communione in Viaticum.

Quæſt.unica. An qui ſemel Viatico reſectus fuit, poſſit intra eandem ægritudinem iterum non jejunus communicare? 44.

O P U S C U L U M I I I.

De quotidiana celebratione Miſſæ.

- §.I. **P**roponitur quæſtio: an, & quatenus licitum, & conveniens ſit Sacerdoti Miſſam quotidie celebrare? 45.
 §.II. Proponitur, & reſolvitur caſus de Sacerdote quotidie celebrante, ac religioni id ſibi ducente. 46.
 §.III. Ad quid nobis datum ſit hoc Sacrificium? 47.

A D D I T I O.

- Quæſt.I. An, & quæ cenſura arceant Sacerdotem a jure ſacrificandi? 55.
 Quæſt.II. An qui per Contritionem perfectam reſpicit a peccato, ob quod erat percuſſus anathemate, licite prerogat Sacram, priuſquam ſit abſolutus a Confessario, vel a Judice fori externi? 56.

O P U S C U L U M I V.

De uberiori fructu Sacrificii in loco ſacro, quam in Cappella privata.

P A R S P R I M A.

Notiones de loco Sacrificii proponuntur. 57.

P A R S S E C U N D A.

Proponitur, & probatur uberior fructus Sacrificii in loco ſacro.

- §.I. **D**e uberiori fructu ex opere operato. 62.
 §.II. De uberiori fructu etiam ex opere operantis. 64.
 §.III. Non decet celebrare, vel celebrare ſacræ in Oratorio privato, niſi id rationabilis cauſa beneficit. 67.

Satisſe objectionibus. 68.

P A R S T E R T I A,

P A R S T E R T I A;

In qua selecta ad Confessarii munus spectantia cum adnotationibus
proponuntur.

BLENCIUS, 'SEU INDEX CENSURARUM, ALIARUMQUE
PŒNARUM CANONICARUM, RESERVATIONUM,
IMPEDIMENTORUM ETC.

I. <u>C</u> ausa Bulla Censura.	160.
II. <u>C</u> ausa Clementini, Papae reservati in Italia extra Urbem.	161.
III. <u>E</u> xcommunicationes, aliaeque censurae afficientes Confessarios in aliquibus casibus.	ibid.
IV. <u>D</u> elicta, quae Sancto Officio, vel Ordinario sunt denuncianda a scientibus illa extra Confessionem.	162.
V. <u>P</u> oenae nonnullae ex praescripto sacrorum Canonum aliquibus delictis annexae.	163.
VI. <u>V</u> ota, quorum dispensatio vel communi jure, vel consuetudine, reservata est Summo Pontifici.	165.
VII. <u>I</u> mpedimenta matrimonii.	ibid.
VIII. <u>F</u> orma integra Absolutionis ex Rituali Romano.	168.

P R A X I S

Pro Confessario infirmi extremo, vel gravi morbo
laborantis.

§. I. <u>Q</u> uomodo se gerat Confessarius, si vocetur ad infirmum graviter laborantem ob naturalem aliquem morbum, v. g. febrim?	168.
§. II. <u>Q</u> uomodo, si vocetur ad infirmum, qui graviter decumbat ex accepto vulnere?	172.
§. III. <u>Q</u> uomodo, si vocetur ad infirmum ita affectum, ut sensibus videatur plane destitutus, ac brevi moriturus?	173.

O P U S C U L U M VI.

Confessarius Recidivi, seu de danda, aut neganda,
vel differenda Absolutione
Recidivo.

§. I. <u>Q</u> uid sit, ac dicatur in acceptione theologica Recidivus?	175.
§. II. <u>Q</u> uid, & quomodo agere debeat Confessarius cum Recidivo, juncto nonnullis Auctoribus, qui scripserant saeculo XVII. jam elapso, & saeculo XVIII. adhuc labente?	180.
	§. III.

§. III. *Quid, & quomodo agendum sit Confessario cum Recidivis, juxta seriem
communem aliorum Doctorum sententiam?* 187.

§. IV. *Quenam ex relatis his duabus diversorum Doctorum sententiis in praxi
tenenda sit?* 187.

§. V. *Brevis conclusio totius Opusculi.* 193.



DE CULTU EXHIBENDO SACROSANCTÆ EUCHARISTIÆ

OPUSCULUM I.



Atholica Romanaque Fides cum nos doceat, in venerabili Eucharistiæ Sacramento illum eundem Deum præsentem esse, quem Pater æternus introducens in Orbem Terrarum, dixit: *Et adorent eum omnes Angeli Dei*: nostrum unusquisque factis intelligit, tanto huic Sacramento honorem quammaximum esse deferendum, illudque cultu, quem vocant, latriæ rite, ut par est, adorandum: præsertim intellectum cum firmet Tridentina Synodus *sess. 13. cap. 5. & can. 6. de Eucharistia*, & manifesta ratio, quam late prosequuntur Suarez *de Sacram. disp. 65. sect. 1.* ac Bellarminus *tom. 2. Controv. lib. 4. cap. 29.* prorsus idem evincat: siquidem Deo vero debetur adoratio latriæ, *Denter. 6. & Matth. 4. Dominum Deum tuum adorabis, & illi soli servies*: Christus autem, ut est in Eucharistia, sive in usu, sive extra, est Deus verus: igitur adorandus est cultu latriæ. Ubi animadvertas, non temere a me adjectum fuisse *ly rite*; nam ita huic Sacramento cultum huiusmodi deferre nos oportet, ut non solum Christus sub speciebus existens, sed etiam totum Sacramentum visibile, ut ex Christo, & speciebus constat, unico latriæ actu adorandum sit, & quidem non tantum interiori, sed etiam exteriori, & visibili cultu, ex Suarez *ibid.* ac Bellarm. *ibid.* Ut vero id ab omnibus expedite compositæque præstetur, visum est mihi nonnulla ex iis, quæ cultui erga Divinam Eucharistiam conferunt, quæque eidem officiant, paucis perstringere; etenim non levis momenti ad rem quamcumque peragendam arbitror, servanda, vitandaque prænocere. Cum autem ex Pontificiis sanctionibus *Cap. Sane, de celebr. Miss.* ad Parochos, aliosque Ecclesiæ Præsides spectet plebem suam frequenter edocere cultum ac venerationem augustissimo huic Sacramento debitam, videlicet, ut in eadem sanctione monet Honorius III. *ne propter incuriam Sacerdotum Divinæ indignatio gravis exardescat*; opportunum existimavi ad Parochos Opusculum hoc qualemque dirigere, ut quod religiose ipsi hætenus exequuntur, constanter urgeant, & ab huiusmodi promovenda Eucharistiæ veneratione nunquam animum remittant. Porro rem omnem tres in Partes distribuam. In I. agam de iis, quæ ad cultum Eucharistiæ de præcepto servanda sunt. In II. de iis, quæ sunt de præcepto vitanda. In III. de iis, quæ de consilio & æquitate servanda, quæque de consilio & æquitate vitanda sunt.

P A R S P R I M A

DE HIS QUÆ AD CULTUM EUCHARISTIÆ DE PRÆCEPTO
SERVANDA SUNT.

1. **S**IT assertio. Tenemur exhibere interdum honorem aliquem venerabili Sacramento; ac propterea non satis est ex Fide credere, illud cultu atque adoratione latræ dignum esse, sed insuper debemus eidem de facto cultum huiusmodi tempore opportuno præstare. Probo hoc tum auctoritate, tum ratione. Et quidem auctoritate; nam eximius Doctor Suarez *disp. 65. de Sac. sect. 1.* expressè asserit, dari præceptum affirmativum exhibendi interdum honorem aliquem huic Sacramento, quod, utpote affirmativum, licet semper obliget, non tamen pro semper, sed tempore opportuno; additque idem Auctor, non esse dubium, quin tale præceptum sit nobis impositum. Rationes; quia hoc Sacramentum nobis datum est, ut illud tractemus, & eo utamur; ergo tractandum est pro illius majestate, & dignitate: majestas autem, ac dignitas ipsius non solum exigit, ne unquam illi irreverentiam irrogemus, sed etiam ut interdum honorem illi & cultum exhibeamus. Huc accedit, quod, ut inquit Bellarminus, licet non sit primaria ratio institutionis Sacramenti, ut Christus ibi adoretur; tamen etiam ista ratio quædam fuit, ut haberemus Christum magis præsentem, & ut præsentem honoraremus; unde Eusebius Emisenus *hom. 5. de Pasch.* dicit, institutum esse Sacramentum hoc, ut cole-retur Christus jugiter per mysterium: ergo sicuti ex institutione Sacramenti ad finem nutriendi, & conservandi vitam spirituales, consequitur naturaliter præceptum affirmativum de sumptione Eucharistiæ, ex de Lugo *de Euch. disp. 16. sect. 1.* aliisque, ita ex institutione Sacramenti ad finem, licet non primum, honorandi Christum præsentem, consequitur præceptum de exhibendo interdum huiusmodi honore. Quod sane primis Ecclesiæ temporibus ita Fideles observarunt, ut non solum ipsum Sacramentum in omni præcipuo honore haberent, sed, teste Cardinali Baronio *ad annum Christi 57.* ipsum communem panem, quia ex eo Sacramentum conficitur, aliqua honoris significatione prosequerentur: unde scripsit Tertullianus: *Calicis, aut panis etiam nostri aliquid decuti in terram, anxie patimur.*

2. Dubitabis I. an tale præceptum obliget etiam Infideles? Re-præmit-tendo, aliud esse obligari lege, aliud a legis transgressione excusari: quo posito, dico, Infideles obligari lege, seu præcepto honorandi Christum in Eucharistia; nam tenentur legibus naturalibus, & Divinis, siquidem Deo, & rationi subduntur: eosdem tamen excusari aliquando ex eo, quod per acci-dens non fuerit illis in particulari sufficienter proposita veritas Catholica. Hinc tenemur eos corrigere (sicuti etiam ebrios, & amentes), quando pro tempore, & loco non exhibent honoris signa huic Sacramento, dummodo tamen id facere commode possimus, & adsit spes fructus. Ratio est; quia illa honoris omisso in tali, vel tali circumstantia, etiam facta ab Infideli, abso-

bfolute malum quoddam est, licet non imputetur illi per accidens ad culpam: ergo est materia correctionis, & consequenter &c. Vide Caitropol. *de correct. disp. 3. part. 4.* Opportune hic succurrit, quod narrat Ribera in *Vita S. Tereſiæ lib. 4. cap. 12.* scilicet sanctam eam Fœminam, quadam in urbe cum degeret, plures noctes ferme in omnes tranſegisse præ solitudine, ne occultus aliquis Infidelis ad Sacramenti locum minus reverens accederet; imo sæpius e lecto surrexiſſe, ut, si quem hujusmodi reperiret, ipsa corrigeret, & injuriam omnem a Sacramento propulsaret: usque adeo sanctæ Virgini infederat cura, ne quisquam ab officio erga tam venerabile Sacramentum discederet.

3. Dubitabis II. quando obliget tale præceptum, seu pro quo tempore determinato urgeat ejus obligatio? &c. designando cum Suarez *disp. 65. sect. 1.* duplex tempus: aliud in generali, aliud in particulari. Et primo quidem in generali, tunc ajo urgere tale præceptum, quando talis occurrit occasio exhibendi honorem Sacramento, ut eam prætermittere sit quidam virtualis contemptus, & moraliter existimetur irreverentia quædam, & non pura negatio, sed privatio, seu omiſſio honoris debiti, aut ablatio ejusdem. Explicatur hoc in exemplo Principis terreni; nam licet non teneamur semper illum positive honorare, tamen, si ille nobis obviam fiat, si illum conveniamus, si alloquamur &c. tenemur ei reverentiam exhibere, ita ut omiſſio talis reverentiæ, merito censeretur quædam inhonoratio: imo Lessius *de just. & jur. lib. 2. cap. 11. dub. 27.* putat, committi contumeliam interpretativam ab eo, qui, aliis honorantibus Principem prætereuntem, illum sine ullo honoris signo impudenter aspiceret. Pariformiter igitur, & multo majori ratione dicendum est, respectu Sacramenti; nam licet præceptum de ipsius veneratione, utpote affirmativum, non urgeat pro semper, tamen nefas esset eam venerationem omittere in ejusmodi opportunis circumſtantiis. Adde, quod, si publice in talibus opportunitatibus omitteretur veneratio, haberetur peccatum etiam ratione scandalii: imo, si frequenter id fieret, suspicionem posset alicujus infidelitatis, vel erroris generare, ex Suarez *loc. cit.* Deinde in particulari, tunc ajo circumſtantias opportunas exigentes Sacramenti venerationem occurrere, ac propterea tunc in particulari urgere præceptum venerationis I. quando accedimus ad sacrificandum: II. quando quis sacram Communionem suscipere vult: III. quando de Sacramento proponitur ab Ecclesia adorandum, v. g. cum elevatur in Miſſa &c. IV. quando cumque Sacramentum nobis præſens fit, ut cum in publicis Processionibus per vias circumagitur, vel ad infirmos deportatur, vel in aliis ſimilibus caſibus nobis occurrit. Et quidem hæc ſpecialiter tempora designantur non ſolum ex ratione, quam ſingulis designatis temporibus annectit Suarez *loc. cit.* ſed etiam ex auctoritate Patrum idem ſentientium, ex praxi Eccleſiæ, & ex ſanctionibus canonicis, præſertim in *Cap. Sane, de celebr. Miſſ.* aliisque juriſ: unde Odo Parisienſis in *Synodiciſ Conſtit. cap. 5.* expreſſe ait: *Frequenter monentur laici, ut, ubicumque viderint deſerri Corpus Domini, ſtatim genua ſteſiant tanquam Domino Creatori ſuo, & ſanctis manibus, quædaſque tranſierit,*

4 DE CULTU EXHIBENDO SACROS. EUCHAR.

orient : quæ sane monitio Deo quam grata sit, ex eo Parochi facile colligent, quod Angelorum exercitus in Eucharistiæ mysterio, uti testantur S. Chrysostomus, & S. Gregorius apud Salmeronem *lib.9. tract.2.* Christo militant, disponendo scilicet mentes hominum ad reverentiam, & summum cultum præstandum ipsi Domino in mysterio contento.

4. Dubitabis III. quomodo veneratio, seu adoratio exhibenda sit Divino Sacramento? & supponendo ex Lessio de *Just. lib.1. c.28. d.1.* adorationem proprie nihil aliud esse, quam honorem externo corporis gestu exhibitum, ut genuflexione, capitis apertione, inclinatione, corporis in terram prostratione &c. his enim, & similibus modis alios honoramus; testamur enim nostram submissionem, & alterius excellentiam. Itaque adoratio proprie consistit in externo illo gestu, quatenus est signum internæ æstimationis, reverentiæ, & submissionis erga alterum, & consequenter illius quoque excellentiæ. Notandum tamen est I. quod, si per externam illam submissionis notam intendat quis alteri se submittere tanquam Deo, & testari ejus Divinitatem, erit cultus patriæ: si intendat alteri se submittere tanquam amico Dei, erit cultus dulciæ &c. unde adoratio non solum supponit actum, & affectum internum, sed ab eodem diversificatur, & ab eodem provenit, ut sit cultus patriæ potius, quam dulciæ &c.

5. Notandum etiam est II. quod signum externum, v.g. genuflexio, habet ex duplici capite esse signum reverentiæ, & æstimationis internæ: 1. ex eo quod talis nota sit vel per legem, vel per consuetudinem patriæ inducta ad significandam reverentiam: 2. ex eo quod homines hic & nunc interpretentur, ejusmodi notam, seu actionem, fieri ex quadam interna reverentia, & æstimatione personæ; quæ tamen interpretatio videtur inniti aliqua patriæ consuetudine.

6. His positis ac notatis, dico sic. Tenemur exhibere reverentiam atque adorationem Eucharistiæ hoc modo: scilicet honorando illam non solum spiritu, seu interno affectu, v.g. per actus fidei Divinæ, spei, charitatis, poenitentia &c. sed etiam externo corporis gestu, aliisque signis adhibitis ex intentione testificandi nostram submissionem Deo Homini vero ibidem latenti ac præsentis: unde S. Cyrillus Hier. *Catech.5. mystag. Accede*, inquit, *pronus adorationis in modum, & venerationis.* Hæc autem externa signa ea esse debent, quæ vel lex, vel consuetudo ad reverentiæ significationem instituit, quæque homines hic & nunc interpretantur ad reverentiæ significationem fieri. Ad cavendam vero superstitionem, recte monet Suarez, publice servandos esse uniuscujusque Ecclesiæ usus: secreto vero unusquisque illis actibus uti potest, qui & nullo modo indecentes sint, & ad humilitatem, & reverentiam ostendendam, & unicuique ad devotionem excitandam accommodati videantur. Præclarum hac in re, sicut cæteris piis in rebus, nobis reliquit exemplum fel. record. Card. Ptolemæus, qui, sicut refertur in ejus Oratione funebri, ut *Sanctissimum Christi Corpus venerari de die possit, veritus, ne si in Odium diverteret, molestiam domesticis asferret aliquam, genibus ante cubiculi fenestellam positis, unde in proximam adem Virginis, a*
Via

Via dicta, prospectus erat, latentem Deum adorabat, nunquam sane ingeniosior, quam cum ita pius.

7. Dubitabis IV. quale peccatum sit, huic præcepto affirmativo de veneratione Sacramenti non satisfacere? *Re.* per se loquendo, esse peccatum mortale. Ratio est; quia omne peccatum, quod est contra graves virtutes, v. g. theologicas, vel religionis virtutem, vel iustitiam, vel charitatem proximi &c. est per se peccatum mortale. Ita Azorius *tom. 1. lib. 4. Instit. moral. cap. 9. quæst. 8.* Sanchez *lib. 1. in Decal. cap. 1.* Tamburinus *lib. 1. cap. 1. §. 2.* alique communiter. Atqui non satisfacere præcepto affirmativo de veneratione Sacramenti est peccatum contra virtutem religionis; siquidem hæc obligatio venerandi Sacramenti nascitur ex intrinseca connexionione talis actus cum honestate talis virtutis, supposita institutione Sacramenti. Ergo non satisfacere tali præcepto est per se peccatum mortale. Hinc gravissime se offensum ostendit Deus in hominem, qui cultum ac venerationem ab hoc Sacramento contendebat remove; nam Thomas Waldensis, testis oculatus, *tom. 2. cap. 63.* scribit, Sartorem quemdam hæreticum, publice in Ecclesia S. Pauli Londini in iudicio coram Archiepiscopo, & aliis Prælati constitutum, dixisse, digniorem esse araneam cultu ac reverentia, quam Eucharistiam, & continuo de alto recti culmine horribilem araneam directo filo ad os ejus properasse, ac vix multorum manibus prohibitam, ne ingrederetur. Ita apud Bellarminum.

8. Advertas, me dixisse, per se esse peccatum mortale non satisfacere præcepto &c. nam per accidens est dumtaxat veniale, omittere talem venerationem ob negligentiam aliquam, secluso formali contemptu, & scandalo. Ratio est; quia parvas materię facit, ut talis omissio, licet de se sit gravis, tamen non semper habeat gravem deordinationem. Ita Suarez *de Sacram. disp. 65. sect. 1.* ubi recte addit, posse dari casum, ut talis omissio, nulla sit culpa, v. g. si vel propter naturalem inadvertentiam, vel ob urgentem necessitatem involuntaria censeatur. At caveant Christiani, ne facile sibi persuadeant, ibi esse parvitatem materię, ubi revera ex communi sensu timoratorum virorum adest gravitas; imo curent imitari nunquam satis laudatum Sanctum Carolum, qui, ut habetur *lib. 8. cap. 4. Vita ipsius*, nihil, quod ad Divinum cultum pertineret, minimum esse, aut parvi faciendum, exilimabat, licet illud minimi a vulgo fieret, aut negligeretur.

9. Hæc quidem de præcepto naturali ac Divino adorationis ac venerationis erga tam ineffabile Sacramentum. Superest autem illud advertendum, aliqua esse de præcepto, vel consuetudine Ecclesię instituta, quammaxime conducentia ad reverentiam & cultum tanti Sacramenti, quæque propterea omnino servanda sunt. Hæc porro statim subjicio. I. Admirabile hoc Sacramentum asservandum est clave obferatum in Sacratio cuiuslibet Ecclesię Parochialis sub fideli custodia, ex Tridentino *sess. 13. cap. 6. de Eucb. & can. 7. & in Cap. Sane, de celebr. Miss. Cap. Statuimus, de custod. Euchar. &c.* Notentur ly clave obferatum, & ly sub fideli custodia, tum propter varias Constitutiones Ecclesiasticas, ac plura iterata Edicta Supremæ Inquisitionis, tum propter

zelum, quem unusquisque habere debet, ne Sacramento irreverentia irrogetur: qua in re videas egregium facinus apud Famianum Strada de *Bello Belgico decad. 1. l. 9.* ibi enim reperies virum, qui argenteam Pyxidem manu elata per media sacrilegorum arma asportavit, ut Sacramentum ab Hæreticorum contumeliis vindicaret. II. Quod nonnisi Summus Pontifex possit concedere licentiam asservandi hoc Sacramentum extra Ecclesiam Parochialem, & Religiosorum domum; siquidem frequenter alibi asservari non potest ea decentia & honestate, qua par est. Ita ex Castropalao de *Sacr. tract. 21. p. 8.* & ex Decreto Congregationis Card. quod referunt Praxis nova Episc. 2. p. cap. 3. Genuens. in *praxi Archiep. Neap. cap. 92.* Barbosa de *Potest. Episc. 2. p. allegat. 23. num. 8. &c.* Hinc neque de licentia Episcopis regulariter potest asservari Sacramentum Eucharistiæ in Sacellis privatis nobilium. An vero possit in aliquo casu Episcopus facere hanc concessionem ex recta ratione, interpretante voluntatem superioris, pendet ex eo, quod bene tractant Cajetanus, ac Sylvester *verb. Dispensatio*, & Suarez *lib. 6. cap. 14. de legibus*. Mihi certum videtur, id posse ab Episcopo concedi, tum quando necessitas magna id postulet, & sit in potentia adeundi Pontificem, tum quando alicubi ea vigeat consuetudo, quæ sane est optima legum interpret. III. Quod hoc ineffabile Sacramentum non asservetur in Choro Monialium, sed in Ecclesia exteriori, ex Decreto Concilii Tridentini *sess. 25. de Reg. cap. 4.* Imo Barbosa in *Collect. 5. v. Moniales*, refert, Sacram Congregationem censuisse, clavem custodiæ SS. Eucharistiæ non committi debere Monialibus, sed retinendam semper penes Sacerdotem, ad quem spectat illam ipsis administrare: quod item notavit Tamburinus *d. 24. de jure Abb. quest. 2. num. 5.* Quamvis vero non defuerit qui exstimmaverit, non fieri contra hanc legem, si Eucharistia asservetur a Monialibus tum in Ecclesia exteriori, tum simul in Choro, recte tamen improbat a Castropalao talis existimatio; siquidem finis intentus a Concilio videtur esse, ut auferatur consuetudo asservandi Eucharistiam extra Ecclesiam, quæ consuetudo olim invaluerat apud veteres Fideles, qui Eucharistiam domi retinebant, ac secum gestabant, prout de S. Satyro fratre scribit S. Ambrosius. IV. Quod hoc Sacramentum non deferatur publice sine lumine; ita ut graviter peccarent Parochi, ex Castropalao, si in hoc deficerent: tum quia id statuitur verbis satis gravibus, & ad finem pariter gravem augendi ex hoc apud omnes fidem, & devotionem, ex *Cap. Sanc. de celebr. Miss.* tum quia ibidem injungitur Prælati, ne hujus mandati differant graviter punire transgressores, si & ipsi Divinam, & Apostolicam velint esugere ultionem. Dixi, publice; nam tempore pestis, & cum infirmus longe abest ab Ecclesia, scilicet per leucam, inquit Castropalao, potest deferri in sinu Sacerdotis secreto. Item posse in necessitate omitti gestationem luminis, docet Gobatus *tract. 4. v. g.* si deferenda esset Eucharistia per urbes hæreticas. Certe S. Franciscus Salesius, ut accepimus ex ejus historia, priusquam crearetur Episcopus, solebat per tales urbes deferre sacram Hostiam, sub vestibus abditam, sine ulla alia exteriori cæremonia, nisi quod majori, quam alias, gravitate ac modestia incederet. V. Quod hoc Sacramen-

mentum, non in parietibus, ut olim, sed in tabernaculo affabre facto, ac decenter pro facultatibus Ecclesie intrinsece, & extrinsece ornato, cum serena veite utrobique, necnon cum Pyxide argentea intrinsecus inaurata, & sub se corporalem Pallam benedictam habente, asservetur. Ita ex variis Ecclesie functionibus apud Pacem Jordanum *l. 8. tit. 3.* Hinc S. Carolus, ut habetur *lib. 8. Vitæ cap. 4.* severissime præcepit, ut Divina Eucharistia, non in parietibus, sed in Ara maxima in Ecclesiis Collegiatis, Parochialibus, & Monialium custodiretur. In Cathedralibus scilicet non est servanda in Ara maxima, propter functiones Pontificales, quæ sunt versis rebus ad Altare. VI. Quod ante hoc Divinum Sacramentum diu noctuque sit lumen accensum: id enim licet nullo communi iure scripto præceptum sit, ut inquit eruditissimus Castropalaus, tamen ex laudabili consuetudine legitime introducta observari debet, quoad fieri potest. Et quidem adeo observari debet, ut, hanc consuetudinem habere vim præcepti universalis, affirmet S. v. *Eucharistia*. Unde, nisi paupertas Ecclesie Parochialis excuset, juxta Hennum, peccaretur graviter, nisi lampas accensa servaretur, ob graviter culpabilem negligentiam, per integrum diem, vel per aliquot integras noctes, non autem per horam tantum. Putat autem talis Auctor, dari in casu paupertatis excusationem: quia in tali casu prævalet necessitas asservandi consecratas Hostias pro infirmis. Hæc autem obligatio afficit Sacristas, & in eorum defectu Rectorem Ecclesie, ex *Cap. m. c. de off. Sacrist.* apud Hennum *d. 16.* contra Quintanaduegnas. Qua in re optime atque erudite disserit Theophilus Raynaudus *tract. de Euchar. cap. 5. ad fin.* Et quidem sicuti ante arcam Testamenti semper lucebat candelabrum, *Exod. cap. 5.* ita par est, in signum venerationis; ac reverentiae, ut ante Divinum hoc Sacramentum diu noctuque lampas luceat: quod in diocesi præcepit mandavitque servari S. Carolus, & fere in omnibus synodiceis diocesum constitutionibus sancitur. VII. Quod hoc Sacramentum non deferatur ad infirmos, qui nequeunt illud suscipere, saltem ut ab iis adoretur, ex prohibitione S. Pii V. & Congregationis Concilii apud Tamburinum. Tamen si autem Delgadillo de hac prohibitione dubitet, tamen in praxi ita servandum esse docet de Lugo *l. 1. Resp. moral. dub. 1.* VIII. Quod hoc Sacramentum non exponatur venerationi publicæ in aliquibus particularibus Ecclesiis, v. g. Confraternitatibus, sine expressa Ordinarii licentia, ex Decreto Sacre Congregationis apud Nicolium *verb. Euchar.* Vide Dianam *coord. tom. 6. tract. 1. res. 31.* quo ad expositionem in Ecclesiis Regularium.

10. Præterea ex Pace Jordano *tract. 1. l. 3. tit. 3. de Euchar.* tenentur Episcopi in festo Corporis Christi solemnem Processionem, ad præscriptum, & normam Cæremonialis Episcoporum *part. 2. cap. 33.* singulis annis instituere, ac per se ipsos, nisi grave ac legitimum subsit impedimentum; sacratissimam Hostiam manibus devote ac reverenter gestare: imo, juxta citatum Auctorem, opus est, ut Episcopi, præter solemnem eam Processionem, curent, SS. Sacramentum decenter per totam Octavam publice in Altari proponi, dum Officia Divina peraguntur, quibus ipsemet Episcopus, inquit citatus

Au-

3 DE CULTU EXHIBENDO SACROS. EUCHAR.

Auctor, deberet interesse matutinis, ac vespertinis saltem horis, ut ad Pastoris exemplum Christiani omnes singulari ac rara quadam significatione gratos, & memores testentur animos erga communem Dominum & Redemptorem pro tam ineffabili, & plane Divino beneficio, quo mortis ejus victoria, & triumphus representatur. Tridentinum sess. 13. c. 5. de Eucharistia.

11. Res hujusmodi conducentes ad cultum SS. Sacramenti, incredibile est, quanti fecerit, & quam studiose eas servaverit Augustissima Imperatrix Eleonora Neoburgica, invictissimi Imperatoris, Regisque Catholici Caroli VI. Mater, omnibus prorsus virtutibus, ac praesertim pietate ornatissima. Hæc quippe Princeps Fœmina magnopere curabat, ut supellex omnis, Sacramenti usui, ac ministerio destinata, pretiosa esset, elegans, ac nitidissima. Vidisses Reginarum, Regum, atque Imperatorum Matrem, & Conjugem, jam acu pingere, jam sericis vestibus aureos, argenteosque sterculos intexere, jam linea Altarium tegumenta scite abstergere, ac perpolire, ut Austriæ, Hungariæ, aliarumque provinciarum Tempia haberent abunde, quæ in Eucharistiæ cultum & ornatum conferrent, adhiberentque. Nescias, tali spectaculo magis ne Cælum plauderet, an tellus superbiret. Et hæc quidem, ut supellectili sacræ candor æque inesset, ac nitor. Ut vero ante Divinam Eucharistiam continue lampas lucesceret, negotium dederat constitutis ad id viris, ut sedulo providerent, ne ardens unquam flamma deficeret; quinimo aliquarum ipsa lampadum curam ad se avocaverat: ex quo factum est, ut intempesta nocte vigilem Imperatricem clam nonnulli intuentes, conspexerint, post aliquas ante Eucharistiam porrectas preces, ipsam regali manu oleum lampadius infundere, vitrum tergere, ellychnium componere, ac demum scopis pavementum evertere. Tunc scilicet Mulierem fortem dixeris quammaxime se probasse, cum operata consilio manuum suarum, Regiam atque Imperialem Majestatem longe infra Divinam esse, & sentiret, & demonstraret. Processioni Corporis Christi, in qua Divinuta Sacramentum per vias, & loca publica circumfertur, reverenter intererat pedes, cereum accensum manu præferens; nec solemniori dumtaxat ejus diei Processioni, sed omnibus, quotquot per Octavam circumlato Sacramento Viennæ instituebantur, supplicationibus aderat, nunquam patiens, aut ceteros exemplo suo destitui, aut se tantorum bonorum communionem fraudari. Habent Ecclesiarum Præsides in Principe Fœmina omnium maxima, quod admirentur, habent quod imitentur. Non pigeat Episcopos, & Parochos eo contendere, quo sancte prævit Augusta. Vid. Ceva in *Vita* cap. 21.



PARS SECUNDA .

DE IIS QUÆ AD CULTUM EUCCHARISTIÆ DE PRÆCEPTO
VITANDA SUNT .

12. **C**asus est . Parochus cum viderit aliquos obloquentes in Ecclesia coram SS. Sacramento publicæ venerationi exposito, acriter eos, æ paterne correxit, enunciando, ipsos reos fore culpæ mortalis, si ita obloqui pergerent: quæ correctione illi perterriti, sicuti à locutione tunc abstinuerunt, ita deinde Theologum interrogarunt, an vere sit reus culpæ mortalis, qui confabulatur in Ecclesia coram SS. Sacramento venerationi exposito de rebus indifferentibus? Queritur proinde, quid respondendum sit?

13. Pro resolutione adducam primo rationes pro parte negativa; deinde proferam, quid sentiendum sit; postremo rationibus adductis satisfaciam. Et primo quidem videtur, quod confabulari in Ecclesia coram SS. Sacramento &c. de rebus indifferentibus non sit peccatum mortale. Ratio est I. quia peccatum mortale non est asserendum sine gravi causa: unde Gabriel in 4. dist. 5. art. 2. sapienter monet, quod *Theologi non debent esse faciles ad asserendum, aliquas actiones, vel omissiones, esse peccata mortalia*: imo S. Thomas quodlib. 9. q. 7. art. 5. ita pronunciat: *Periculose determinatur, aliquid esse peccatum mortale, nisi expressa veritas habeatur*: præsertim cum tritum sit apud Doctores axioma: quod nulla lege statuitur, id nos asserere non debemus: ex Can. Legatur 24. q. 2. & Cap. 2. de transf. Episcop. cum autem nulla lex sub gravi culpa vetet confabulationes ejusmodi coram Sanctissimo, nec expressa veritas habeatur affirmandi, tales confabulationes esse peccatum mortale, sequitur, illas non esse peccatum mortale.

14. II. Quia, sicuti ratio blasphemix, ex Sanchez l. 1. mor. c. 32. ita ratio irreverentiæ non est tam desumenda ex natura actionis secundum se sumptæ, quam ex respectu ad Judicium commune hominum interpretantium, vel non interpretantium, hic & nunc Deum vilipendi, vel gravi contumelia affici: cum autem actio confabulandi nec secundum Judicium commune hominum habeat esse quid graviter irreverens, & contumeliosum Deo, sequitur, quod non sit graviter peccaminosa: quinimo ex consuetudine introducta confabulandi, cum homines communiter interpretentur, per eam actionem, nullam fieri irreverentiam, nullum fere ea actio erit peccatum.

15. III. Quia, si confabulari coram SS. Sacramento esset peccatum grave, multo magis tale esset, aliquid indecens per se agere circa hoc Sacramentum vel immediate, ut effundendo illud, aut proficendo in terram, vel mediate, ut immunde habendo vasa, aut vestes, & res alias ad cultum hujus Sacramenti deputatas; item possent peccati argui, qui accedunt ad illud suscipiendum accincti ense; item feminæ, quæ ad Eucharistiam suscipiendam accedunt sumptuosis vestibus, ac parum ad modestiam compositis. Hæc autem non censentur esse peccata; tum quia lex prohibens effusionem &c. & im-

munditiam vestium &c. est lex dumtaxat pœnalis, imo ejus pœnæ non sunt ferre in usu, neque incurruntur ex obligatione, donec a Superiore non imponantur, ut notat Suarez; tum quia Doctores, v. g. Diana *par. 3. tit. 2. resol. 30. &c.* sequentes Joannem Sanchez, ajunt, esse decens, quod Equites Hierosolymitani, alique ex Ordine Militari accedant ad Communionem cum armis ad latus accinctis; Tamburinus vero in *trakt. de Eccl. præc. cap. 10.* non audet condemnare peccati eas fœminas, si ea ornamenta in tali circumstantia adhibeant absque ullo sine pravo, sed more patriæ &c.

16. Nihilominus dicendum est cum distinctione. Vel enim talis confabulatio de rebus indifferentibus coram SS. Sacramento fit ex directâ ac formali intentione irreverentiæ, & ad significandum, non oportere differentiam facere inter talem circumstantiam, & aliam quaecumque communem: vel fit quasi materiali voluntate, ut sic dicam, volendo scilicet illam confabulationem, & consequenter, per se loquendo, ac seclusa ignorantia, vel alia causa excusante, volendo quidquid est connexum cum tali confabulatione, licet id directe non intendatur.

17. Hac distinctione præmissa, dico I. Confabulatio coram SS. Sacramento facta primo modo, ex tali directâ intentione est intrinsece mala, & est culpa mortalis, ac gravissima. Ita Suarez *tom. 1. de Relig. lib. 3. cap. 1.* & comm. Ratio est; quia, quod procedit vel ex contemptu, vel ex odio ipsius Dei, est peccatum semper gravissimum: cum autem talis confabulatio, facta ex tali directâ intentione, procederet ex contemptu Dei latentis in Sacramento, sequitur &c. Hinc S. Thomas⁷ gravius atque enormius judicat peccatum illius qui projiceret hoc Sacramentum, in lutum, quam illius qui cum conscientia peccati mortalis ad hoc Sacramentum accedit: & rationem dat *3. p. q. 80. art. 5.* quia ille hoc faceret ex intentione injuriam faciendi huic Sacramento, quod non intendit peccator indigne Corpus Christi accipiens.

18. Dico II. Confabulatio facta secundo modo, & sine necessitate coram Sanctissimo Sacramento, est peccatum, & habet malitiam sacrilegii; non est tamen hæc malitia semper mortalis, sed potius frequenter est venialis, nisi specialis prohibitio Ecclesiæ interveniat, & nisi sit tam longa confabulatio, tam audax, tam strepitosa, ut prudenti judicio gravem injuriam Sacramenti continere censeatur. Ita colligitur ex Suarez *tom. 1. l. 3. de Relig. cap. 7.*

19. Probo I. esse peccatum; nam talis actus licet de se non sit malus, nec sit specialiter prohibitus fieri coram Sanctissimo ex jure positivo (in jure enim solum reperio prohibitiones generales confabulandi in loco sacro, quæ an sint veræ, & rigorosæ prohibitiones pro omni circumstantia, infra attingam *num. 25.*) tamen factus ex voluntate, & sine necessitate coram illo, continet virtuale contemptum illius, ut infra ostendam *n. 22.* & ideo non fit sine ejus irreverentiæ; unde ex natura rei, & independenter ab intentione operantis, atque a prohibitionem positiva Ecclesiæ, talis confabulatio est peccatum: habet vero malitiam sacrilegii; siquidem omnis injuria, omnis irreverentia, omnis temeratio Sacramentorum, sacrilegium est, ex communi apud Lessium *l. 2. de just. c. 45. dub. 3.*

20. Confirmatur I. ex auctoritate S. Thomæ in 1. *Corinth.* 2. *lect.* 4. exponentis verba : *Numquid domum non habetis ad manducandum ?* ubi S. Doctor ait , non esse licitum , donum Dei , quæ est deputata sacris usibus , communibus usibus applicare ; sentitque , ex natura rei , & ex ipso virtuali contemptu qui fit Ecclesiæ , esse illicitum , extra necessitatem , in eadem communes ejusmodi actiones etiam si indifferentes exercere : ergo a fortiori erit illicitum eandem exercere in loco sacro coram SS. Sacramento : ac proinde peccatum erit confabulari &c. II. ex auctoritate Suarez *tom.* 1. *de Religione* l. 3. c. 3. ubi docet , quod *omnes actiones , quæ ex natura rei vel Divina Officia de se impediunt , vel habent indecentiam in Ecclesia , habent specialem malitiam sacrilegii , si in illa fiant* : ergo eandem malitiam habebit confabulatio , si extra necessitatem fiat in Ecclesia coram Sanctissimo ; imo potiori jure , propter circumstantiam præsentis tam venerabilis Sacramenti .

21. Superfunt duo enodanda ad plenam assertionis hujus probationem . I. Quare in confabulatione sic facta contineatur virtualis contemptus ? II. Quare talis contemptus in eadem non reperitur , si fiat ex necessitate ? R. ad I. rationem esse ; quia , quando actus aliquis de se non malus , tamen improporcionatus non solum negative , sed positive , & contrarie dignitati ac reverentiæ debetur alicui loco , vel personæ , sit coram ipsa , aut in ipso , nulla urgente necessitate , tunc , juxta naturale ac prudens judicium , detegitur in tali actu quidam contemptus talis personæ , aut loci . Contat hoc ex illo Sancti Pauli 1. ad *Cor.* c. 11. *Aut Ecclesiam Dei contemnitis ?* ubi Sanctus Thomas ait : *Contemnebant , dum , præsentem conventum Fidelium , in loco sacro convivia celebrabant* . Expendas hic , convivia , & confabulationes , esse quid indifferens , & differre inter se , secundum plus , & minus : unde &c. R. ad II. rationem esse ; quia , interveniente necessitate , cessat juxta naturale ac prudens judicium contemptus , & irreverentia ; siquidem quod fit ex necessitate , non censetur moraliter fieri ex irreverentia : sicuti David licuit comedere panes sanctos propter necessitatem ; quod sine illa non liceret , etiam ex natura rei , supposita sanctificatione talium panum .

22. Probo jam II. partem assertionis , nempe tale peccatum frequenter esse veniale , nec habere malitiam gravem sacrilegii , nisi &c. Nam toties sacrilegium in sua ratione non est peccatum grave , quoties vel materia est parva , vel opus , quod fit , non habet specialem repugnantiam , sed solum generalem cum sanctitate loci , & temporis , & personæ &c. vel fit ex quadam non crassa inadvertentia , & inconsideratione . Ita ex *Lessio de just. lib.* 4. *cap.* 45. *dub.* 4. Cum autem frequenter contingat , quod talis confabulatio vel sit brevis , nec valde strepitosa , vel fiat ex quadam non crassa inadvertentia &c. & ipsa de se non habet specialem repugnantiam , sed solum generalem cum reverentia debita tanto Sacramento , sequitur , quod frequenter tale peccatum confabulandi de rebus indifferentibus in Ecclesia coram SS. Sacramento , sit dumtaxat veniale , & habeat venialem malitiam sacrilegii .

23. Advertas tamen illas particulas , nisi &c. nam , si adsit speciale præceptum Ecclesiæ , constitutum v. g. in aliqua diocesana Synodo , specialiter

DE CULTU EXHIBENDO SACROS. EUCHAR.

vetans ejusmodi confabulationes, tunc facilius poterit esse sacrilegium grave confabulatio coram Eucharistia, facta sine necessitate, etiam si fuerit brevis. Ratio est; quia tunc licet materia, nude sumpta, sit levis, tamen ex gravitate finis a legislatore intenti poterit esse gravis, ex Suarez *to. 5. de conf. disp. 4. sect. 6.* quamvis non facile damnandos iudicem de peccato gravi transgredientes rem de se levem; tum quia illi non raro ignorant, vel etiam credunt, sinem intentum a superiore non esse magni momenti; tum quia ejusmodi præcepta gravia de rebus secundum se levibus nonnulli Doctores putant esse tantum comminatoria, ut videre est apud Layman *de leg. c. 14.*

24. Item, si confabulatio sit longa, & strepitosa taliter, ut prudenti iudicio censetur continere gravem injuriam Sacramenti, tunc certe erit sacrilegium grave, juxta dicta &c. Habebit etiam annexum peccatum scandalum. Imo Suarez *t. 1. de Rel. l. 3. cap. 6.* putat, tunc directe committi irreligiositatem aliam distinctam a sacrilegio, & ejusdem rationis cum ea, qua Christus Dominus in se ipso offenderetur; concomitanter vero committi sacrilegium: quamvis non recedendum censcam a communi sententia docente, irreverentiam factam Eucharistia, non habere speciem irreligiositatis, sed esse proprie sacrilegium, ex Cajet. *2. 2. quæ 99. art. 1. Less. lib. 2. de just. cap. 45. dub. 3. aliisque*; tametsi illud sacrilegium sit in suo genere omnium gravissimum, ex Caltrop. *t. 3. disp. 2. de Sacril.* Hinc venerabilis Dei Servus Fr. Joseph a S. Maria de Sebastianis ex Ordine Carmelitarum discalceatorum, Episcopus Typhernas, cum quasdam nobiles feminas obloquentes viderit ante Divinam Eucharistiam publicæ venerationi expositam, acriter e solio Pontificio eas reprehendit: cumque illæ vel contumaciter in incepto persisterent, vel non statim dicto audientes fuerint, integerrimus ac zelantissimus Pastor pro imperio mandavit, ne impertiretur populo innumerabili a Sacerdote, augustissimum Sacramentum attollente, pax & venia, sed confestim in tabernaculo Divina Eucharistia clauderetur, ut ea iustæ indignationis specie, quantæ esset in Deum offensæ ejusmodi irreverentia, patefieret, ut in *ejus Vit. l. 4. c. 4.* Unde primum est conjectura assequi, quam grave peccatum sit confabulationes illas coram Venerabili habere, quæ sint fœdæ, turpes, & inhonestæ. Has profecto non solum coram Eucharistia, sed in Templo quocumque prohibent specialiter sacre leges in *Cap. Decet, de imm. Eccl. in 6.* ubi habetur: *Cessent vana, & foris sedata, & profana colloquia, cessent confabulationes quælibet*: ac propterea Suarez censet, tales confabulationes, seu prava colloquia habita in Ecclesia quacumque, non excusari a nova malitia gravi contra prohibitionem Pontificiam in *di. Cap. Decet*; quia ejusmodi colloquia ibi cum exaggeratione prohibentur.

25. Dubitabis, an, sicuti confabulatio de rebus indifferentibus facta sine necessitate coram Eucharistia est peccatum, ut diximus, ita etiam sit peccatum confabulatio facta in quovis Templo sine tali circumstantia? R. talia colloquia non prohiberi jure positivo Ecclesiastico in *di. Cap. Decet*, nisi habeantur illo tempore, quo Divinis Officiis attendendum est, vel quo alii ad hoc ibi assistunt, qui nostris confabulationibus impediuntur, ex Suarez *l. 3. de Relig. cap. 6.*

cap. 6. Unde colloquia facta his temporibus, erunt peccatum contra jus non solum naturale, sed etiam positivum: & quidem, si fuerint tantum otiosa, erunt solum veniale, etiam prout sunt contra jus positivum. At vero extra hæc tempora erunt peccatum solum, quando ratio naturalis dictaverit, ea hic & nunc dedecere, vel non dedecere reverentiam debitam Ecclesie, nisi aliunde, v. g. ex otiositate, habeant malitiam. Admittimus autem, dari casum, quo recta ratio dicat, colloquia indifferentia nullatenus dedecere locum sacrum; quia non tenemur semper esse in Templo, & uti illo ut Templum est, ex Suarez *loc. cit.* & Castropalao de *rever. loc. sac. disp. m. p. 4.* Contendimus vero, quod ejusmodi colloquia, juxta naturalem rationem, semper extra necessitatem dedecant reverentiam debitam Eucharistie expositioni publicæ; siquidem illa ad finem venerationis exposita est; hæc vero colloquia & sunt improporcionata, & de se impeditiva venerationis: ideoque illa habere, est quidam virtualis Eucharistie contemptus, juxta dicta; ac propterea est, juxta pariter dicta, peccatum habere talia colloquia in tali circumstantia.

26. III. Neque obstant rationes in contrarium adductæ. Non obstat prima: siquidem verum quidem est, non esse asserendum peccatum sine gravi causa, & sine lege; at in casu adest lex, & consequenter adest ratio illud asserendi: nam lex naturalis dicitur, supposita veritate hujus Sacramenti, & supposito fine venerationis, ad quam illud exponitur, ne fiat aliqua actio improporcionata, & de se impeditiva venerationis debitæ, sine necessitate; quæ quidem actio si fiat, erit irreverentia in rem sacratissimam, & consequenter peccatum in specie sacrilegii: non semper tamen erit peccatum grave; nam peccatum sacrilegii est quidem ex genere suo mortale, quia excellenti virtuti opponitur, qualis est religio; per accidens tamen est veniale in multis casibus, si non committatur ex formali contemptu rei sacræ, in quo casu semper est mortale. Ita Valentia 2.2. *disp. 6.* Lessius *l. 2. de just. cap. 45. dub. 4.* Castropalaus, Bonacina, alique communiter.

27. Non obstat secunda: nam irreverentia dicitur inesse alicui actioni ex triplici præsertim capite: 1. ex eo quod sit prohibita a lege ex intentione conservandi debitum cultum ac venerationem rei sacræ: 2. ex eo quod homines interpretentur, exercitium ejusmodi actionis fieri ex quodam contemptu: 3. ex eo quod talis actio ex natura sua repugnet reverentiæ debitæ rei sacræ. Ita Gobat *tract. 4. cap. 23.* Jam vero confabulatio de rebus indifferentibus esse de se non repugnet reverentiæ debitæ Sacramento, tamen, cum aliquando prohibita sit a lege ex intentione conservandi debitum cultum rei sacræ, ut constat ex *Cap. Decet, de imm. in 6.* cum homines interpretentur, ejusmodi colloquia fieri ex quodam contemptu, seu vilipensione, ut constat ex lege urbanitatis, & consuetudine introducta apud cultos viros in circumstantia exhibendi adorationem, aut venerationem Regi, sequitur, quod ejusmodi confabulationi insit irreverentia; quæ quidem, cum sit circa rem gravem, est de se gravis. Neque valet effugium, quod nunc ex consuetudine confabulandi non censeatur amplius irreverentia confabulari; nam talis

talis consuetudo improbatur a majori ac saniori hominum parte ut manifestus abusus. Dixi, esto de se non repugnet reverentiæ debitæ Sacramento; nam id facile non concesserim: siquidem confabulatio de rebus indifferentibus, licet nude accepta non sit mala, est tamen improporcionata venerationi in tali circumstantia exhibendæ Sacramento; & consequenter, si fiat in tali circumstantia sine necessitate, sapit contemptum: unde ut circumvestita talibus circumstantiis, est de se repugnans reverentiæ debitæ Sacramento:

28. Non obstat tertia: nam actiones indecentes per se, utique sunt peccatum, si mediate, vel immediate exerceantur circa hoc Sacramentum. Sic peccatum est indigne ad ipsius sumptionem accedere: item illud aliis commendandum ministrare sine lumine accensio: nam licet contrarium doceat Diana *p. 10. tract. 16. resol. 80.* tamen jure contradicit Henao *de Eucharistia*, quando scilicet lumen omittitur ex culpabili negligentia, ac voluntarie, extra casum urgentis necessitatis; siquidem, si gravis est obligatio, inquit Henao, ne desit lumen coram Eucharistia, cur eadem obligatio non erit, cum ea ministratur, quippe militat potior, vel par ratio? Item peccatum est omittere deglutire Eucharistiam a Sacerdote acceptam, vel id deferre ad templum, quo suscipiendi sit extra Ecclesiam, ut docet idem Henao *disf. 16. de Eucharistia*. Item, ne peccetur, Eucharistia, quæ conservatur pro infirmis, non debet servari per multum tempus, sed ad summum per 15. dies, ex Innocentio IV. *Constit. 14. Sub Catholica*. Clemens autem VIII. statuit, renovandam eam esse singulis Dominicis, *Constit. 34. Sanctissimus*. Ad casus vero particulares in objectione allatos respondeo, & dico, me nolle quidem de iis loqui, quæ ad usum Eucharistiæ pertinent: sed, quoniam aliqui ejusmodi casus in objectione attinguntur, eos etiam enodabo.

29. I. Si quis negligenter effundat Sanguinem Christi (non est enim dubium, quod qui de indultia id faceret, gravissime peccaret), non facile excusatur ab aliqua culpa saltem veniali pro gravitate negligentia. Quamvis vero pœnæ contra tales negligentes statutæ in *Can. Si per negligentiam, de Consecr. dist. 2.* non sint latæ, sed ferendæ sententiæ, & jam per consuetudinem reservatum sit Ordinario ejusmodi negligentes punire; neque illi, donec pœna non imponatur, ullam subire pœnam teneantur, nisi ad satisfaciendum Deo pro qualitate culpæ, ut notant Suarez, & Castropalaus ex communis tamen non inde fit, quod per se peccatum non sit negligentiam in re tanta exercere. Etenim, præcindendo a gravissima quæstione inter Canonistas, an leges pœnales obligent in conscientia? certum est, adesse legem naturalem id prohibentem supposita institutione Sacramenti, ut videre est apud Suarez *tom. 1. de Rel. lib. 3.*

30. II. Velles sacras immundas ac sordidas ad usum & ministerium Eucharistiæ tenere, vetitum est pluribus Ecclesiasticis legibus; unde Gobattus ex Jordano, aliisque ait: *Qui præsumunt Sacristia, graviter peccant, si eorum culpa fiat, ut vestes & paramenta, ad usum & ministerium Eucharistiæ, sint valde immunda.* Quando vero ea immundities tam notabilis sit, ut respectu

talium officialium sit materia peccati gravis, non potest facile decerni, sed relinquendum est prudenti iudicio. Certe ex Concilio Rhemenſi apud Suarez habetur, quod *Altaria, in quibus Corpus Dominicum conservatur, Sanguisque ejus hauritur, mundissimis linteis, ac pallis sunt cooperienda. In Cap. autem Relinqui, de custod. Euchar.* Innocentius III. præcipit, ut Oratoria, Vasa, Corporalia, & vestimenta prædicta munda & nitida conserventur, subdicens rationem: *Nimis enim, inquit, videtur absurdum, in sacris sordes negligere, quæ dedecrent etiam in profanis.* Hinc Ecclesiarum Pastores in lustrando diocesim id potissimum observare solent, an ea quæ par est munditiæ supellex sacra custodiatur; quæ in re, sicut cæteris piis in rebus, præclarissima olim dedit exempla Eminentissimus Cardinalis Ursinus, deinde Benedictus XIII. P. M. is enim suis etiam impensis curavit, ut nitor ac mundities in omnibus Beneventani Archiepiscopatus Ecclesiis quammaxime eluceret.

31. III. Qui accedunt ad sumptionem Eucharistiæ accincti ense, quamvis excusentur, per se loquendo, a peccato, juxta Tamburinum *cap. 10. de Eccl. præcept.* tamen idem Auctor ibidem putat, vix fieri posse id sine peccato scandali in aliquibus regionibus; unde juxta hunc Auctorem alicubi per accidens vix eximuntur iidem a culpa: imo quamvis Diana *p. 3. tract. 2. resol. 30.* & Sanchez censeant esse decens, quod Equites S. Joannis, S. Jacobi &c. accedant ad sacram mensam accincti ense, quia arma sunt ejusmodi Ordinum insignia ad pugnandum contra infideles, tamen hæc decencia a Tamburino tunc solum admittitur, quando tales Equites publice in proprio Ordinis habitu ut tales communicant, non vero quando communicant ut privati juxta morem aliorum nobilium: ex quo inferes, ex hoc casu nihil esse contra nos.

32. IV. Mulieres, quæ ad sacram Eucharistiæ accedunt ornatu tali, qui sit juxta qualitatem personæ, & juxta communem modicum usum, etsi melius facerent accedendo ornatu dimissiori, tamen ex hoc præiſe capite non videntur peccati damnandæ: at, si accedant ornatu superfluo, & multo magis si accedant ornatu immodesto, non facile possunt a peccato excusari, etiam ratione irreverentiæ, quæ sit Christo Domino; nam ornatus superfluous in mulieribus non excusatur saltem a veniali, ut docent Sanchez *in Deral. lib. 1. cap. 6.* Castropalaus *tom. 1. tract. 6. disp. 6. p. 7.* Navarrus, Bonacina, alique: ornatus vero immodestus difficile vacat culpa gravi scandali. Cum autem fiat irreverentia Christo Domino, si quis ad eum accedat actualiter peccando sive venialiter, sive mortaliter, hinc est, quod tales mulieres peccant etiam ratione irreverentiæ, si accedant ornatu vel superfluo, vel immodesto. Neque contrarium censet Tamburinus; nam ipse eas excusat a peccato, quando talis ornatus sit modestus, & quando sit juxta earum statum ac qualitatem, & consequenter non sit superfluous: unde ipse omnino est in nostra sententia, ut legenti patet. Hinc sæpius Romæ plures Summi Pontifices, & præsertim Venerabilis Dei Servus Innocentius XI. mandarunt

Sacer-

16 DE CULTU EXHIBENDO SACROS. EUCHAR.

Sacerdotibus, ne Panem Angelorum darent mulieribus ad sacram mensam accedentibus cum tali vel superfluo, vel immodesto ornamento &c.

33. Ad calcem nota, confabulationes summopere vitandas esse etiam in Processionibus Corporis Christi, quæ modestiam, ac decorum ita exigunt, ut in itatu, in incessu, & in toto corporis habitu Christiana pietas, ac fides elucescat. Absint hinc tumultus, contentiones, cæteraque dedecentia illos, *qui sequuntur Agnum quocumque ierit*. Insigne hac in re documentum reliquit spectatissimus Galliarum Dynastes Anna Franciscus de Bobò, qui deinde Societati Jesu nomen dedit. Is quippe in gentilitio suæ familiæ opido Supplicationi Corporis Christi cum interset, a trepido repente nuncio cognovit, hostes cuncta miscere, & evertere, pecora abigere, agros depopulari. His auditis, ille pauca in rem præsentem mandans, cavit diligentissime, ne rumor hujusmodi spargeretur, & ne perturbatio Fidelium deducientium Eucharistiam pium agmen dissolveret. Meminerat nimirum, has Processiones ea dignitate esse peragendas, ut in his victrix veritas de mendacio, & hæresi triumphum agat: Trident. *sess. 13. cap. 5. de Euchar.* Meminerat, nihil esse in iis attendandum, quod vel Eucharistiæ debitam reverentiam impediat, vel supplicantium pietatem perturbet. Cujus rei argumento sit, non dæsse Auctores, qui putent, nefas esse reos illos detineri, seu ad carceres duci, qui cum aliis Processioni se immiscant, & per viam Sacramentum associant. Ita Tancredi, Felix Potestas *num. 623. de Imm.* alique. Quamquam id in jure cum non habeatur, spectanda est consuetudo, quæ merito potuit introduci. Ita Castropalaus *disp. un. p. 6. Suarez t. 1. de Rel. lib. 3. c. 9.*

34. Ex quibus omnibus satis, ut arbitror, evincitur veritas assertionis, ac resolutionis positæ: simulque apparent graviora, aut frequentius contingentia, quæ ad cultum Eucharistiæ de præcepto vitanda sunt. Illud ad extremum non prætermittam, tanti esse, ac fieri reverentiam erga Divinum Sacramentum, ut, si timor prudens adsit alicujus irreverentiæ circa ipsum, vel quia Sacramentum in manus infidelium timeatur adventurum, vel quia ab animali, aut igne consumendum, vel ab aliquo alio irreverenter tractandum sit, possit non solum Sacerdos, sed etiam, eo deficiente, laicus non jejunos illud sibi propriis manibus ministrare. Sic ex communi docent Vasquez *disp. 211. 4. 15.* Layman *l. 5. Summa tr. 4. cap. 6. &c.*



PARS TERTIA

DE HIS QUÆ AD CULTUM EUCHARISTIÆ DE CONSILIO
SERVANDA, VITANDÆ SUNT.

35. **A**liqua dumtaxat persequar; nam de consilio, optima quæque, exquisitissima, & innumera prorsus servanda essent ad cultum Eucharistiæ, nec tamen debito satisfaceret: unde rite canit Ecclesiæ: *Quantum potes, tantum aude: quia major omni laude, nec laudare sufficit*. Dico igitur I. Consilium pium est, ut unusquisque curet, quoad fieri potest, ne dies sibi elabatur, quo Divinam Eucharistiam in Ecclesiâ non adoraverit: nam, si Regina Saba a remotis partibus venit Hierosolymam, ut Regem Salomonem cognosceret, & honoraret; quanto magis debemus nos Ecclesiâ aliquam adire, ut ibi latentem Servatorem ac Dominum veneremur? Nonne *plusquam Salomon hic*? Certe id gratissimum esse Christo Domino, constat ex Vita S. Mariæ Magdalenz de Pazzis, cui ipse Dominus præcepit, ut per triginta vices in singulos dies Sacramentum in Ecclesiâ adoraret. Accedit huc honestas magna hujus actionis: nam si Rex aliquis clementissimus ac beneficentissimus se suis subditis sisteret, ut ab iis honoraretur, & in publica, ac maxima Regalis sui Palatii aula debitum honoris vestigal ab iisdem expectaret, quis, rogo, esset tam inurbanus, ut officium hoc declinaret? quis unquam suas esse partes non intelligeret, eo se conferre semel, iterum, ac tertio, dummodo libere pateret aditus, ut Regem omni prorsus observantiæ genere prosequeretur? Atqui plane sumus in casu. Adest nempe in Ecclesiâ Christus Dominus Reparator optimus, ideam qui pro nobis Hierosolymis passus est, idem qui factus est pro nobis obediens usque ad mortem, idem qui interpellat pro nobis ad Patrem; & quisquam erit, qui solum illum relinquat, ac plures elabi dies permittat, quibus eum non visitet atque adoret? Refert Historia Vitæ Joannis de Avila *cap. 15.* quemdam ex ipsius discipulis dixisse sapientissimo Doctori: *Utinam nobis liceret vivere, ac mori in Palaestina, ubi tot insignia extant monumenta vitæ, ac passionis Christi Domini!* Cui pius Doctor opportune reposuit: *Numquid non habemus apud nos Sanctissimum Sacramentum? Equidem hujus cum recordor, nihil aliud prorsus desidero.* Et sane non est, cur desideremus locum, aut tempora; cum in nostra urbe, & nostris temporibus Christum habeamus, quem præsentem adoremus, quem præsentem alloquamur, & a quo abundantioris gratiæ divitiis reportemur. Hæc siquidem est tertia ratio, cur tantum Sacramentum semel in die saltem veneremur, nempe utilitas, quæ inde in nos derivatur; quæ quidem tanta est, quanta esse dicitur accedenti cum fiducia ad thronum gratiæ. Propterea Sancti Dei in id quamaxime incubuere, ut frequenter, quoad fieri posset, huic Divino Sacramento venerabundos se sisterent. S. Thomas Aquinas, plurimis licet dissentus studiorum occupationibus, quinque in die Eccle-

Tom. III.

C

fiam

fiam adibat, ut Eucharistiam coleret. S. Franciscus Borgia quotidianæ huius Sacramenti adorationi adeo erat deditus, ut illud ubi affervaretur, instanti cælesti sentiret. Venerabilis P. Ludovicus de Ponte Societatis Jesu non solum magnam diei partem, sed integras interdum noctes vigil, & orans apud SS. Sacramentum agebat; atque hinc, opinor, eas mentis illustrationes impetravit, quibus cælestis sapientiæ referatissimos libros edidit, & ab-solutissimæ virtutis exempla reliquit. Utinam Sanctos hos Viros, aliosque imi-temur in cultu venerabilis Sacramenti!

36. Præterea opportunissimum est, ut quando casu aliquo graviter affligimur, quando injuriæ nobis irrogantur, non statim ab amicis levamen efflagitemus, aut de illatis injuriis apud illos conqueramur; nam, juxta S. Francis-ci Salecii sententiam l. 3. *Introd. cap. 3. certum est, ut plurimum peccare eum, qui de injuriis conqueritur*: sed illico ad Sanctissimum Sacramentum confugiamus, & ab eodem consilium, vires, atque opem imploremus, juxta Domini vocem: *Venite ad me omnes, qui laboratis, & onerati estis*: enimvero benignissimus ipse Dominus nos reficiet, ipse dabit auxilium in tempore opportuno. Locupletissimum hac in re testimonium refert S. Gregorius Nazianzenus in *Orat. 11. in laudem S. Gorgoniz*. Hujus S. Doctoris ipsissima verba exscribam: *Adversa corporis valetudine tenebatur* (soror videlicet Gorgonia), *graviterque laborabat, eratque insolens quoddam & prodigiosum morbi genus &c.* Desperatis omnibus auxiliis, *ad mortalium omnium Medicum confugit, atque intempesta nocte captata, cum morbus nonnihil remississet, ad Altare cum fide procumbit, eumque, qui super ipso honoratur, cum ingenti clamore invocans, omnibusque nominibus appellans, atque omnia ea, quæ unquam Dominus mirifice gesserat, velut in memoriam ei revocans, tandem pia & præclara quadam impudentia effertur: eam, quæ Christi simbria sanguinis profluvium compresserat, imitatur: quidque fecerit, audite. Cum caput suum pari cum clamore, lacrymisque (muliercula illius instar, quæ olim Christi pedes rigavit) Altari admovisset, nec se prius illud dimissuram esse denunciasset, quam suavitatem obtinisset &c. o rem admirandam! statim liberatam se morbo sentit, & corpore, & animo, & mente levis discedit, pro spei mercede id quod speraverat consecuta, & per animæ robur, corporis robur accipiens.*

37. Dico II. Optimum consilium est, ut omnes, ac præsertim e primaria nobilitate viri, Divinum Sacramentum comitentur, quando ipsum ad infirmos deferitur. Decet enim quammaxime nobiles viros, qui a Deo inter cæteros peculiari beneficentia distincti sunt, singulari erga ipsum Deum observantia & reverentia excellere; præsertim cum eorum pia facta plurimum valeant ad excitandam in plebe pietatem ac devotionem. Reges ipsi profecto, ac specialiter Austriaci, sapius exemplo, ac legibus consilium hujusmodi firmarunt. Summi Pontifices divitias ingentes ex Ecclesiæ thesauro erogarunt, ut omnes ad idem factitandum suaviter impellerent, quos inter novissime Innocentius XII. concessit Indulgentiam 5. annorum, & 5. quadragenaria-

genarum comitantibus Sacrum Viaticum: sex vero, si cum luminaribus id præstetur. Deus autem tam gratum id sibi esse non semel ostendit, ut Roldulpho Aultraco, atque Augulissimæ ejusdem Genti collatum idcirco Imperiale Diadema a Datore honorum omnium, jure quamplures deceant ac referant Historici. Imo, ut credere est, miraculo celeberrimo olim Deus testatus est, quam grata sibi esset hæc observantia. Nam Ulysippone in Lusitanæ principe civitate canis quidam, ac si esset ratione præditus, semper Divinum Sacramentum comitabatur, quoties ipsum ad infirmos deferretur; si forte, dato æris campani signo, clausum domus ostium reperiret, tandiu dominum urgebat, donec exeundi, ac suo muneri satisfaciendi copia fieret; si vero non ita recte riteque esset Processio disposita, ipse huc illuc discurrens videbatur eniti, ut ad iusti ordinis normam componeretur: si tandem quem vidisset tunc temporis aut oscitantem, aut dormientem, aut equitantem, ipse hominem aggrediebatur, ac latratibus eundem compellebat ad debitam Sacramento reverentiam exhibendam: nec ulla unquam vi, aut ratione a tam pio officio deduci, aut impediri potuit. Vide Jo: Eusebium *l. 9. cap. 94. Hist. natur.* Homines ab ipsis brutis officium discant.

38. Dico III. Consilium etiam est, ne mulierculis detur eleemosyna cum hoc onere, ut pro hoc, vel illo communicent. Nam, omnia quæstione, an Communio utiliter applicetur sive pro vivis, sive pro defunctis, de qua late Raynaudus in *Opus.* & in qua certum videtur, Communionem, ut est opus operatum, non posse pro aliis cum eorum utilitate applicari; posse tamen, ut est opus operantis: omnia, inquam, hac quæstione, erogatio ita onerata eleemosynæ non raro fovet muliercularum vanitatem, quæ in Sanctarum numero sic putant se haberi: fovet earundem pigritiem, quæ a domesticis debitis laboribus abinent, cum majus e re sacra lucrum se reportare cognoscant: demum exponit periculo irreverentiæ Divinum Sacramentum, quippe vel indispositæ, vel exigua prorsus dispositione, ejusmodi mulierculæ non raro accedunt ad sacram mensam, ut eleemosynæ lucrum faciant. Propterea auctor omnibus sum, ut fiat quidem eleemosyna ejusmodi mulierculis, sed sine tali onere. Idem prorsus censet Calvus in *cap. 7. l. 1. Reg. & merito.* 2. Viderint illi, ad quos spectat, ac serio considerent, an expediat frequens admodum Divinæ Eucharistiæ expositio, præsertim tenui apparatu, ac raris luminibus. Certe Raynaudus *tom. 15. ait, posita ea frequentia exponendi Divinam Eucharistiam, non modo timendum esse, ne mortales obvia quæque fastidire soliti, tantum Sacramentum minoris æstiment; sed etiam ne in gravi quapiam, & insolita occasione, deficiat modus permovendi populum, ac excitandi ad sensum pietatis necessitati congruentem, v. gr. si ingruat pestis, aut incursus hostium, nihil habet Ecclesia aptius ad plebem fidem excitandam, quam sacrum spectaculum Corporis Christi propalam exhibiti &c.* At hoc ipsum angustissimum spectaculum, si frequens sit, & passim exhibeatur, minus movet, quia ab assuetis non fit passio. Hactenus citatus Auctor. Equidem censco exponendam Divinam Eucharistiam eo luminum numero,

quem præscribunt Decreta Congregationis; præterea eo apparatus, & assistentium Clericorum cultu, qui tantam decet Majestatem: si autem alicubi id fieri nequeat, fortasse magis erit expediens, ne ibi publice exponatur. Vide Pacem Jordan. tom. 1. lib. 3. tit. 3. de Euchar. & Romanas Ordinationes in *Instructiōe Oratiōis* 40. horarum. Profecto cum Romæ anno 1593. sub Clemente VIII. vel initium, vel incrementum habuerit Oratio 40. horarum ante expositum Divinum Sacramentum, precandi constantia, modelitia, silentium, ac teneræ pietatis ardor in omnium extans ore, fuit indicant, quam vim habeat luminum, ornamentorum, & apparatus species ad per-movendos animos, atque ad fidem erga tantum Sacramentum excitandam: ex quo pronum est, unicuique conficere, ferventiori Eucharistiæ cultui non admodum consulere, qui raris ardentibus facibus, ac tenui ornamentorum, & apparatus dignitate, illam venerationi proponunt. Intellexit enim vero id spectatæ sanctitatis Fœmina B. Hyacintha de Mariscottis, Religiosa Professa S. Francisci, quæ Viterbii geniales ante quadragesimum Jejunium dies ad pietatem ut componeret, dabat quidem operam, ut in variis ejus urbis Templis Sacramentum exponeretur, ea tamen magnificentia, ac tanta lampadum, cereorumque copia, viris piis impensam prolixè conferentibus, ut splendor ingens exquisitæ pompæ sacrum quemdam horrorem perfunderet, & hominum animos in Dei cogitationem, amoremque suavissime raperet. Ut vero obstitueretur os loquentium iniqua, confectum mirabili providentia apparuit, quantam inde iniverit ipsa apud Deum gratiam; nam quodam die oleum cum penitus defecisset, quo ardentes tot lychni flammam nutrierent, imperato subsidio præsentì egeitati peropportune subventum est: siquidem ad crates accita præter expectationem Hyacintha, vas prægrande oleo plenum reperit, quo satis superque magnificentissimæ expositioni prospexit. Audiant hæc Ecclesiarum præsides, & meminerint, Deum, nullius egen-tem rei, voluisse propitiatorium de auro mundissimo, fortasse ut ipsi cognoscant, quam ingenti splendore velit, populo exhiberi illum, *quem proposuit propitiationem per fidem in sanguine ipsius*: nec paupertatem excusent; nam Religiosa Fœmina erat pauperrima. Deinde arguet Augustinus per hæc verba: *Multa superflua habemus, si nonnisi necessaria teneamus: nam, si inania queramus, nihil sufficit*. Adde, quod apud omnes, sed præsertim apud Ecclesiarum præsides, pro comperto illud esse debet, nempe recipi cum fœnore quicquid in Deum erogatur.

39. Ad extremum vitandus est abusus, qui irrepfit apud nonnullos quo ad Benedictionem Sanctissimi; nam solliciti quidem sunt non pauci, ut Ecclesiam adeant ad recipiendam, ut aiunt, Sanctissimi Benedictionem, quæ nimirum brevi tempore absolvitur, id quod nihil, aut parum pœnalitatis importat: at nunquam ferme eosdem videris in Ecclesia prolixius orantes, vel pias cohortantes audientes, vel peccatorum fordes per Penitentiam Sacramentum expiantes. Profecto laudandi sint ejusmodi homines in eo, quod, Benedictioni Sacramenti dum intersunt, actum fidei, ac religionis exer-cent;

cent; at reprehendendi sunt in eo, quod cetera Christianæ pietatis opera negligant, putentque, Deo satis & conscientiæ fecisse, variis cum interfuerint Benedictionibus, non intelligentes, quod, ut descendat super nos Benedictio Dei, debet a nobis ea conditio adimpleri, sub qua illam Israelitis promissit Moylès *Deuter. 28.* nempe: *Si audieris vocem Domini Dei tui, ut facias, atque custodias omnia mandata ejus &c. benedictus tu in civitate, & benedictus in agro &c.* Intelligent igitur universi, primum nobis incumbere custodire mandata Dei in purgandis animæ sordibus, in recipiendis Sacramentis, in addiscendis scitu necessariis ad salutem, in satisfaciendo per eleemosynam, & jejunium pro peccatis commissis, in orando Deum humiliter, ac perseveranter &c. Deinde, his rite peractis, descendet super nos Dei Benedictio, ad quam impetrandam plurimum sane valet precatio Sacerdotis attollentis Venerabile Sacramentum, ut constat ex eo, quod hæc sit in genere Sacramentalium, & ex eo quod Benedictio Sacerdotis novi Testamenti, juxta Cornelium a Lapide in *cap. 6. Num.* efficaciam quamdam habeat: unde a Sanctis Patribus, & Anachoretis olim Christiani etiam Principes benedictionem postulabant, magnumque ejus fructum experiebantur, ex Cornelio a Lapide *ibidem*.

40. Dubitabit hic aliquis, an etiã cavendum sit, ne quis Benedictioni Sacramenti ex quadam solum consuetudine intersit, sicuti etiam ne quis ob consuetudinem solum illud visitet, vel suscipiat? R. Facere ista circa Sacramentum ob consuetudinem solum, dupliciter potest contingere: 1. excludendo positive alios fines, v. gr. si visitans Sacramentum, diceret: ideo hoc facio, ut meæ satisficiam propensioni, non autem quia hoc est opus virtutis; imo non omitterem hoc facere, etiamsi id esset vitium, cum nihil aliud spectem, quam mihi indulgere; 2. habendo se negative circa alios fines, v. gr. si visitans Sacramentum, aggrediatur tale opus prompte ob consuetudinem, virtualiter dumtaxat, non autem actualiter reputans apud se reverentiam & cultum exhibendum Sacramento, quamvis a volitione talis reverentiæ, ac talis cultus ortum habuerit ea consuetudo. Jam vero, si commemorati actus exerceantur circa Sacramentum priori modo, utique erunt peccatum; & consequenter cavendum est, ne sic operemur ob consuetudinem: si autem exerceantur secundo modo, utique tales actus erunt laudabiles, quamvis laudabilius esset eos exercere ob reverentiam Sacramenti actualiter cognitam: consequenter cavendum erit a faciendo tales actus ob consuetudinem ea dumtaxat ratione, qua cavendum est, ne fiat opus bonum sine actuali devotione. Neque obstat, quod animarum moderatores reprehendant ejusmodi opera fieri ob consuetudinem; nam oportet eorum reprehensiones in sano sensu accipere: siquidem ipsi reprehendunt id tanquam quid minus perfectum, aut reprehendunt eos, qui talia peragunt cum voluntaria inconsideratione; non autem simpliciter reprehendunt eos, qui illa peragunt involuntaria inconsideratione ducti quodam hæritu, & consuetudine idem peragendi. Et in hoc sano sensu intelligendus est

22 DE CULTU EXHIBENDO SACROS. EUCHAR.

est S. Chrysostomus reprehendens *hom.61.* fuscipientes Eucharistiam ob consuetudinem, dicens: *Multos video Domini Corporis participationem temere sumentes, ut a casu, & consuetudine potius, quam cogitatione & mente. O consuetudinem! O presumptionem!* Et S. Bonaventura de *pr.ep. ad Missam cap.8.* Vide quod desideres, ne propter vanam gloriam, aut consuetudinem accedas. Ita Sanchez de *Sacram. disp.24.* Suarez de *Euchar. disp.1. sect.4. num. 8.*

41. Utinam hæc dixisse ad laudem & gloriam Sanctissimi Sacramenti, & ad animarum bonum, sit mihi meritum ad vitam æternam, & aliqua satisfactio pro irreverentia, qua tones ad Altare Dei Sacerdos indignus accessi!



DE USU E U C H A R I S T I Æ,

SEU AN CREBRIUS, VEL RARIUS EA SIT DANDA LAICIS

OPUSCULUM II.

P A R S P R I M A

QUALE SIT, ET QUID STATUAT DECRETUM SAC. CONGREGATIONIS CONCILII TRIDENTINI INTERPRETUM
HAC DE RE EDITUM ANNO MDCLXXIX.

§. I.

1.



Aro admodum contingit, ut succrescente Domini messe inimicus homo non superfeminet zizania. Hinc superioribus temporibus Divinæ Eucharistiæ usûs frequentior cum fuerit revocatus, eo processit nonnullorum tum nimis fervor, tum nimia frigiditas respectively, ut alii pro quotidiana danda laicis Communione mordicus stantes, prudentiæ Christianæ, justique temperamenti limites ver-

bis ac re transiverint; alii ex opposito contrarium sentientes, dum adversarios arguunt, a debitæ moderationis recto tramite aberraverint.

2. Et quidem, qui stabant pro quotidiana Communione, verbis primo lapsi sunt; etenim asseruerunt 1. Communionem quotidianam esse præceptam de jure Divino: 2. sufficere pro debita & congrua dispositione ad talem quotidianam Divini cibi usurpationem, esse in statu gratiæ, seu carere peccato mortali: 3. frequentem Confessionem, & Communionem, etiam in his qui gentiliter vivunt, esse notam prædestinationis: 4. non esse expectandum hac in parte judicium Confessarii, sed eo ipso quod absolutionem a mortalibus obtinuerit, posse quemlibet uti jure suo, & invito etiam ac dissuadente Confessario, ad Communionem accedere.

3. Factis porro non minus imprudentibus iidem errarunt; nam 1. cubantes in lecto, & non laborantes ulla gravi infirmitatis nota, sumebant Sacramentum Eucharistiæ: 2. Sacerdotes seculares, aut Regulares deferebant ad privatas domos vel secreto, vel argentea theca inclulum in crumena Divinum Sacramentum: 3. communicabant nonnulli feria 6. in Parasceve: 4. accipiebant in Communione plures Particulas, aut grandiores solito: 5. confitebantur peccata venialia simplici Sacerdoti non approbato ab Episcopo, vel Ordinario, fortasse ut scrupulosiores præmitterent hanc qualemcumque præ-

parationem quotidianæ Communioni. Hacufque procefferat discretionis fræno foluta devotio.

4. Qui autem nimium horum hominum fervorem improbabant, etiam ipfi medium non tenuere, fed a ratione verbis, ac factis aberrarunt: nam aiferuerunt 1. quotidianam Communionem univerfùm & absolute eife omnibus laicis interdicendam, præfertim vero negotiatoribus, & conjugatis: 2. Itatuendos eife certos dies, quibus generaliter fingulis menfibus, aut hebdomadis percipienda eiffet a negotiatoribus facra Euchariftia, vel ab eadem abftinendum: 3. non permittendum eife facris Monialibus, ut quotidie cœlefti epulo fe reficiant: 4. horum nonnulli, Bafanis erroribus adhærentes, cenfuerunt, arcendos eife a facra Communione, quibus noadum ineft amor Dei puriffimus, & omnis mixtionis expers: demum, ut verbis facta responderent, variis improprie modis repellabant Fideles a frequenti, & quotidiana Communione, v.g. nolendo eorum Confefiones audire, præcipiendo univerfùm, ne ita fieret, notam temeritatis, ac levitatis illis inurendo &c.

§. II.

5. **P**rovide his malis, & contentionibus occurrerunt Ecclefiæ Pastores per fua decreta, & ftatuta, ac præfertim occurrit Summus Pailor Chrifti Vicarius, qui aliquas ex enumeratis afectionibus damnavit, uti præfiterunt Innocentius XI. *prop. 56.* & Alexander VIII. *prop. 23.* Infuper Sacra Cardinalium Congregatio anno 1587. decrevit, perniciofas eife prohibitiones generales de quotidiana Communione, & obftare decretum Tridentini Epifcopo volenti præfcribere certa tempora, ut dies Dominicos, xv. & vi. feriam, quibus tantum liceat viris laicis fanctiffimam Euchariftiam fumere. Noviffime vero, nempe anno 1679. eadem Sacra Congregatio, annuente Innocentio XI. edidit fapientiffimum Decretum, quo coercuit tum nimium fervidos, tum nimium rigidos in ordine ad concedendam laicis Communionem quotidianam, & abufus, qui ex utraque diffidentium parte irrepferant, interdixit, atque ex fe penitus per fuam legem amovit.

6. Decretum itaque hoc, de quo meminimus, paffim circumfertur impreffum in recentioribus Moraliſtarum libris, ut apud la Croix *lib. 6. part. 1. num. 653.* apud Vivam in *expof. prop. 56.* Innocentii XI. apud Felicem Poteftatem in *Traff. de Euchar.* & apud alios. Illud vero fane folideque explicat Cardenas in *fua prima Crifi part. 3. difp. 66. cap. 1.* Equidem, ne longus fim, fummam illius tradam duas in partes diftributam: quarum altera exhibebit hujus decreti leges, quæ nimium rigidos, & defidentes a quotidiana Communione compefcunt; altera præferet leges, quibus nimium fervidi, & ftantes pro quotidiana Communionem, temperantur.

7. Et primum leges compefcentes nimium rigidos funt hujusmodi: 1. *Communionem quotidianam non eife univerfim prohibendam, imo ufum quotidianam Divinæ Euchariftiæ ex fe laudabilem eife, illumque, adhibito judicio ac prudentiæ temperamento, ubi viget, alendum.* 2. *Non eife generaliter ftatu-*

tuen-

tuendos dies in singulis hebdomadis, vel singulis mensibus, quibus dumtaxat liceat laicis negotiatoribus, vel conjugatis ad sacram mensam accedere: cujus rei optima innuitur ratio; quia nempe homines haud norunt conscientiarum recessus, ac dona gratiæ quibusdam personis collata, ob quæ alii frequentiori, alii minus frequenti Communione sunt reficiendi. 3. Parochorum, & Confessariorum iudicio relinquendum esse, ut ipsi, qui secreta cordium explorant, crebrius, aut rarius unumquemlibet ad Communionem admittant, prout in unoquoque cognoverint conscientia puritatem, frequentiam fructum, & ad pietatem processum. 4. Providendum esse a sacris Pastoribus, ut nemo a sacra convivio, sive frequenter, sive quotidie accesserit, repellatur. 5. Moniales petentes quotidianam Communionem, primum admonendas esse, ut diebus præscriptis a suo Instituto communicent, deinde permittendam Communionem quotidianam illis ex Monialibus, quæ fervore spiritus incaluerint, & quotidianam se dignas Communionem præstiterint. Hactenus leges compesccentes nimium rigidos.

8. Leges temperantes nimium fervidos sunt subsequentes. 1. Non esse universim Fidelibus omnibus præcipiendam quotidianam Communionem, nec generaliter statuendos dies, quibus laicis, præsertim negotiatoribus, sacra Communio permitti possit; cum neque Tridentinum hos dies præscripserit, & cum nihil certi de cuiusque dignitate, atque integritate, & consequenter de frequentiori, aut quotidiano vitalis panis esu possit constitui. 2. Redarguendos esse ab Episcopis, Parochis, seu Confessariis, asserentes, Communionem quotidianam esse de jure Divino. 3. Eucharistiam non esse deferendam ad infirmos, nisi cum forma decenti. 4. Servandum esse usum Ecclesiæ quo ad Communionem in feria vi. Parasceves. 5. Nemini tradendas esse plures Particulas, aut grandiores solito. 6. Non permittendum esse ab Ordinariis, ut Confessio venialium fiat simplici Sacerdoti, quinimo rigorose ab illis animadvertendum in contrasacientes, etiam Regulares, etiam Societatis Jesu. Præterea ex illis verbis: Frequens ad sacram alimoniam percipiendam accessus, Confessariorum secreta cordium explorantium iudicio est relinquendus: antiquatur, juxta Cardenas loc. cit. assertio docens, non oportere, ut Fideles sequantur consilium Confessarii in frequenti sacrae Communionis usurpatione: nam revera vix proderit manna celeste, & plus ex illo colligatur, quam sit mensura a Moyse præscripta.

§. III.

9. **H**IS igitur a Sacra Congregatione recte ac sapienter statutis legibus, aliqua sunt animadvertenda ab utraque dissidentium parte: quæ cum non animadvertantur, jam hi, jam illi perperam hoc decretum in rem suam trahunt. Animadvertendum igitur est 1. quod Sacra Congregatio permittens Confessariorum, ac Pastorum iudicio determinare in unoquoque Communionis frequentiam, summopere ab iisdem Confessariis, ac Pastoribus exigit dare operam, ut unusquisque digne ad sacram mensam accedat, ac præterea ut omnis irreverentiæ, & scandali suspicio in veri & immaculati Agni susce-

Tom. III.

D

ptio-

pitione tollatur. Constat hoc ex verbis decreti, & præsertim ex illis: *Det operam, ut unusquisque digne pro devotionis, & præparationis modo, crebris, aut rarius Domini Corporis suavitatem degustet.* Ex quibus fit, quod, quamvis Sacra Congregatio nolit, quemquam sive a frequenti, sive a quotidiana Communione repelli, non tamen idcirco, si pro aliquo tempore, & in aliqua regione, ut bene docuit Dicastillo *disp. 9. dub. 18.* sequerentur turbationes, & scandala, seu obloquutiones populi contra eos, qui communicant quotidie, & inde etiam alii, quibus clare appareat id non expedire, occasionem sumerent similis frequentię; non, inquam, idcirco non posset Episcopus, vel ejus Vicarius admonere Confessarios, ut hortentur suos pœnitentes ad minorem frequentiam pro tali tempore, donec sensim vel in totum, vel ex parte cessent ea inconvenientia: hæc siquidem videtur mens Sacre Congregationis, dum exigit, ut Pastores curent, ne irreverentię, & scandali suspicio resuletur ex frequentatione hujus Divini mysterii.

10. Animadvertendum 2. quod dignitas, & reverentia, in unoquoque requisita ad frequentandam quotidie Communionem, non resultat præcise ex statu gratiæ cum tenui quadam & superficiali devotione, ut probant de Lugo *disp. 17. de Euchar.* Segneri in *Paroch. instructo*, & Cardenas *loc. cit.* qui ex decreto antiquatam jam putat sententiam Joannis Sanchez in *Sel. dis. 22.* doctentis, sufficere carentiam lethalis ad quotidianam Communionem: sed resultat ex alia longe majori dispositione dignoscenda a Confessario in pœnitente, ut docet citatum decretum, ex conscientię puritate, frequentię fructu, & ad pietatem processu: nam aliud est id, quod requiritur ad recipiendum aliquem effectum hujus Sacramenti; aliud longe diversum, qualiter oporteat accedere ad Eucharistiam eos, qui quotidie communicant. Illud primum utique nil aliud petit, quam statum gratiæ; hoc vero secundum petit ex D. Thoma *quest. 80. art. 10. magnam devotionem, & reverentiam*: imo taliter hoc petit, ut Sacra Congregatio non præcise ad id quotidie communicantes hortetur, sed velit, ut, si quando se minus paratos senserint, a Communione abstineant, seque ad majorem præparationem accingant.

11. Cum autem difficile admodum sit, teste P. Paulo Segneri in *sua Paroch. instructo cap. 21.* dignosci a Confessario, an vere aliquis habeat talem requisitam præparationem, & an per frequentem Communionem proficiat, necne? sequitur, quod judicium de dignitate, & reverentia requisita ad quotidie communicandum, respectu hujus, vel illius pœnitentis, sit opus magnę discretionis, prudentiæ, ac sapientiæ, nec nisi pede, ut ajunt, laqueo in hac re procedendum, præsertim respectu mulierum, ac respectu conjugatorum.

12. Dixi, respectu mulierum; quia, ut ait B. Albertus Magnus *lib. de Mis. in fin. de his, qui mulieres omni die communicant, videtur, quod acriter sine reprehendendi, quia nimio usu vilescere faciunt Sacramentum, & potius ex levitate mulierum putatur esse desiderium, quam ex devotione causatum.* Id ipsum monet Joannes Pontius in *Cursu Theol. disp. 44. q. 11. concl. 4.* Propter vanam gloriam, inquit, qua multum prevalere solet apud mulieres. Imo-
oppor-

opportune in hanc rem, ac festive notat Galinus in *cap. 7. lib. 1. Reg.* quod mulieres sunt natura sua propensæ ad illa devotionis opera, quæ fiunt extra domum, fiunt sine labore, & fiunt in aliorum conspectu; ac propterea facile est, ut non sit in eis verum desiderium communicandi, sed quædam naturalis propensio ad hujusmodi opera: & sane, pace earum dictum sit, quæ vera pietate ducuntur, nonnullæ fortasse minus frequenter communicarent, si id remotis arbitris faciendum esset.

13. Dixi, respectu conjugatorum; quia Apostolus Paulus non vult, eos invicem fraudari, nisi forte ex consensu ad tempus: sanum autem consilium est, ut conjugati se mutuo consensu abstineant ante sumptionem Eucharistiæ, nisi aliqua ratio urgens oppositum suadeat, ex Sanchez *lib. 9. de Matr. disp. 13.* Universim tamen notandum ex decreto, nec conjugatos, nec negotiatores &c. eo titulo, quod conjugati, quod negotiatores sint, a quotidiana Communionem esse repellendos; sed iudicio, prudentiæque Confessoriorum, secreta cordium explorantium, id relinquendum: siquidem ex conjugatis, & ex negotiatoribus ipsi possunt esse, qui digne se præparent ad quotidianam Divinæ Eucharistiæ frequentationem.

14. Animadvertendum 3. quod post tale decretum Sacræ Congregationis, quamvis non solum constet, quotidianam Communionem esse laicis existentibus in gratia licitam, sicuti & olim inter sapientes constabat, sed etiam ex se, & ex genere suo esse iisdem melius & utilius quotidie communicare, quam abstinere, nam propterea, opinor, Sacra Congregatio vult, ut nemo a sacro convivio, seu frequenter, seu quotidie accesserit, repellatur, & hoc omnino providendum a sacris Pastoribus mandat: tamen, quia eadem Sacra Congregatio in pluribus clausulis sui decreti vult, ut unusquisque digne ad sacram mensam accedat, & Pastorum, ac Confessoriorum vigilantia committit decernere, quid singulis, attenta eorum dispositione, permittendum sit in ordine ad crebrius, vel rarius communicandum, restat indecisum a tali decreto, an Communionem quotidianam, non quidem secundum se, sed prout in hoc, vel illo individuo, sit hic & nunc magis expediens: ac proinde, cum decidendum id sit a prudentia Confessarii, duo huic observanda sunt, ut sit fidelis dispensator, & prudens: 1. nempe, an facilitas in concedenda Communionem quotidiana possit esse hallucinationi obnoxia? 2. quænam regula moralis servanda sit, ne erretur in concedenda, aut neganda crebrius, aut rarius respective, quotidiana Communionem? Alterum ex his ego expediam in resolutione casus; alterum in tradendo, circa hanc rem, practicam doctrinam.



P A R S S E C U N D A.

PROPONITUR, AC RESOLVITUR CASUS.

§. I.

15. **C**asus est. Confessarius quidam pius facile permittebat, imo suadebat indifferenter personis laicis, existentibus in gratia, Communionem quotidianam, iis ductus rationibus: 1. quia usus frequentis Communionis perfectior est, quam usus rarior: 2. quia Concilium Tridentinum optaret, ut in singulis Missis Fideles adstantes communicarent: 3. quia talis erat usus primitivæ Ecclesiæ: 4. quia Sancti Patres frequenter inculcant quotidianam Communionem: 5. quia Sacra Cardinalium Congregatio anno 1587. statuit, licitam esse quotidianam Communionem; cui novissime aliud decretum accessit, permittens rem hanc integram judicio Confessarii. Quæritur, an praxis talis pii Confessarii recte innitatur talibus fundamentis, & an sit obnoxia hallucinationi, ac periculo tum irreverentiæ in tantum Sacramentum, tum damni spiritualis earum animarum?

16. **R.** Præmitto 1. non esse hic quæstionem, an facilitas in concedenda Communione quotidiana sit connexa cum actuali hallucinatione, & damno animarum, necne? certum enim videtur, non dari talem connexionem; siquidem potest Confessarius ita esse a Deo illuminatus, ita prudens, ac solers, ut licet facilis in hac re, tamen non hallucinetur: sed quæstio est, an talis facilitas sit moraliter obnoxia hallucinationi, & exposita periculo damnificandi animas.

17. Præmitto 2. hallucinationem quo ad hanc materiam stare in eo, quod Confessarius judicet dignas quotidiana Communione eas personas, quæ revera non sunt; quod putet se conformare decreto Sacræ Congregationis, cum revera ab ejusdem functione discedat; demum quod putet, se hic & nunc animarum bono consulere, cum revera illis potius noceat.

18. Præmitto 3. damnum spirituale animarum stare posse in eo, quod accedentes aliqui iusti quotidie sine sufficienti, & requisita dispositione, vix eximuntur, inquit de Lugo *disp. 17. de Eucharistia*, a multiplici culpa veniali tum antecedenti, tum concomitanti; imo quamplures Communiones non raro habent finem defectuosum, & malum venialiter, nempe inanem gloriam, vanam æmulationem, vel aliquid simile: unde iusto Dei judicio fit, quod propter hanc oscitantiam in frequentanda sacra Eucharistia, & in faciendi hoc tale opus Dei negligenter, disponantur hujusmodi personæ ad culpas graves, & eas tandem in se admittant; ut bene notat Viva in *expositione prop. 23. Alexandri VIII.*

19. His præmissis, quandoquidem responsio ad primum quæsitum pendet quammaxime ex responsione ad 2. huic secundo primum satisfaciam. Dico igitur. Facilitas in Confessario concedendi personis laicis, præsertim mulieribus, existentibus tamen sine conscientia peccati gravis, Communionem quotidianam,

est moraliter obnoxia hallucinationi, ac periculo minuendi reverentiam Sacramento, & damnificandi eas animas. Probo hoc. Omne id, quod recedit ab eo, quod regulariter per hæc tempora docent Theologi tum Scholastici, tum Morales, tum Mystici, & quod observant per hæc tempora sancti ac religiosissimi animarum directores, est obnoxium hallucinationi, ac periculo &c. Hæc major videtur certa; nam, ut recte docet Canus *de Loc. Theol. in quacunque arte peritis credendum esse ratio monstrat, & sane hallucinaretur, qui nautis in navigandi ratione non crederet*: quod in re nostra magis valet ex eo, quia illa, quæ communiter docent sapientiores Theologi, & observant regulariter Sancti, fundantur vel in sacris litteris, vel in Apostolorum traditione, vel in Conciliorum, ac Pontificum sanctionibus, vel in solida aliqua ratione. Atqui facilitas in Confessario concedendi personis laicis Communionem quotidianam, recedit ab eo, quod sapientissimi Theologi tum Scholastici, tum Morales, tum Mystici, communiter per hæc tempora post Tridentinum docent, & quod sancti ac prudentes animarum directores regulariter observant. Ergo &c. Minor hæc fusc per suas partes probanda est.

20. Et primo quidem recedit ab eo, quod docent Theologi; nam hi fere uno omnes consensu docent, raros esse per hæc tempora, quibus recte, ac sapienter possit concedi quotidiana Communio: summo in hac re cum delectu, & cautela procedendum: prudentia, judicioque opus esse non mediocri ad ferendum iudicium de uniuscujusque dispositione: ac, stando in linea directoris, regulariter non esse laicis crebrius, quam octavo quoque die, vel ad summum ter in hebdomada Communionem permittendam. Unde, cum non sit regulariter actus prudentiæ facilem se in hoc negotio exhibere, siquidem facilitas regulariter deficit a cautela requisita ad prudentiam, & inclinat ad præcipitationem, quæ est vitium oppositum prudentiæ, sequitur, quod qui facilem se in hoc exhibet, recedat ab eo, quod docent Theologi; præsertim cum hi rari esse dicant dignos quotidianam Communionem, ille indifferenter personis iustis hoc permittat, vel etiam suadeat; hi octavo quoque die moneant concedendam, ille quotidianam passim concedat Communionem.

21. Do ipsamet verba Theologorum, ac primo quidem proponam Scholasticos, deinde Morales, postremo Mysticos, ut veritas plane elucescat, & sub unum aspectum veniat tota ac solida eorum doctrina; ex qua etiam, quomodo se Confessarius gerere debeat in ordine ad Communionem concedendam, constabit.

§. II.

22. Scholastici Theologi agmen ducant. Dominicus Soto, spectatissimus Ordinis Prædicatorum Theologus, *art. 10. de Euch.* sic ait: *Simpliciter loquendo, non est utile omnibus hominibus quotidie ad Sacramentum accedere, sed quotiescumque homo ad illud se invenerit preparatum: ac deinde concludit: Secularibus conjugatis, qui rei familiari inserviunt, non consule-*
reus

rem frequentius, quam a quindena in quindenam ad Sacramentum accedere, licet a peccatis mortalibus sint liberi: nam, quamvis curam habeant expurgandæ conscientie, nihilominus, ut ait Paulus, non possunt non curare, quomodo placeant uxoribus, & quomodo rei familiari prospiciant; quod frequentiori sumptioni Sacramenti non est adeo congruens. Idem inferius ait: Quocirca, si inter sæculares esset aliqua persona & probitate, & modestia insignis, nulla esset irreverentia, imo deceret forte semel in hebdomada communicare: crebrius autem, nullatenus approbare possem.

23. Joannes Pontius, egregius Theologus ex Seraphico Ordine, in *Curs. Theol. disp. 44. de Euch. concl. 4.* postquam quæsit, an consulenda sit quotidiana Communio? respondet, talem usum fuisse in primitiva Ecclesia, quando primorum Christianorum ardebat charitas, & devotio, & esse etiam jam laudabilissimum singulis, qui pariter essent dispositi. Sed, refrigescente jam a pluribus sæculis illa charitate, non est omnino conveniens singulis diebus communicare aliis, quam Sacerdotibus; aut iis, qui singulis etiam diebus cum speciali reverentia, & preparatione accedunt, & experiuntur profectum spirituales ex tali accessu, quales certe paucissimos reperire est inter sæculares: & infra addit: Sed ipsi Confessarii, ac directoribus spiritualibus cavendum valde est, ne suadeant Communionem quotidianam, nisi paucissimis, de quorum singulari pietate, ac devotione sincera, ex conversatione, & effectibus satis constet communiter iis qui cum ipsis conversantur; nec crederem sufficere, quod ex Confessione pateat Confessariis. Notetur hoc diligenter a Confessariis; non enim, juxta hunc Doctorem, facile debent Communionem quotidianam permittere iis, quorum specialis devotio, licet sit nota ipsi Confessario ex Confessione, non est tamen nota aliis, cum quibus tales personæ versantur, ex earum conversatione.

24. Franciscus Suarez e Societate Jesu, acerrimus propugnator frequentie hujus Divini Sacramenti, *disp. 69. de Euch. sect. 4.* sic habet: Ut tamen in re morali rationem aliquam insinuemus ad ferendum prudens judicium, videtur sane, raro esse alicui consulendum, ut ordinaria consuetudine frequentius, quam octavo quoque die, communicet. Ita significant Doctores, & ita sentiunt prudentes & experti viri in hac materia, & communis usus Ecclesie non parum favet: nam, regulariter loquendo, tot sunt humane vite negotia, & impedimenta, quæ & animum distrahunt, & tempus occupant, ut non possint homines frequentius accedere cum debita dispositione, nec tantum temporis huic actioni dare, quantum par est: hoc tamen semel in hebdomada præstare, regulariter non est difficile.

25. Gabriel Valquez tom. 3. in 3. par. *disp. 214. cap. 3.* ait: In Ecclesia maxime usitatum video, ut frequentius, quam octavo die, raro, & nonnisi hominibus probate virtutis, singulis autem diebus rarissime, ac paucissimis hoc Sacramentum tribuatur.

26. Agidius Coninch qu. 80. de Euch. art. 10. Si consideremus, inquit; prudentissimum per Orbem Christianorum hæc in re judicium, & praxim; laicis, qui timore vivunt, & a graviore abstinent peccatis, videtur consul-

fulendum, ut semel per hebdomadam communicent, nec sapius, nisi particularis ratio occurrat, præsertim si conjugati sint. Per se nis autem continentem vitam agentibus, & omnino a mundo abstractis, iudicio prudentis Confessarii posset facile concedi, ut etiam diebus festis per hebdomadam occurrentibus communicarent. Cavenda tamen est etiam iis nimia frequentia, ne vel appareant omnino singulares, aut suo exemplo alios pertrahant, ut frequentius communicent, quam ipsi expediat.

27. Idem ferme docent alii Scholastici ex diversis Scholis, Cajetanus, Orlandus, Medina, Cardinalis de Lugo, Lessius, Valentia, Vega, Durandus, Ledesma, alique quamplures citati a Francisco de Lugo lib. 4. de Euch. cap. 9. q. 6. & apud Serlogo in Cant. antil. 4. sect. 10. adeo ut multo etiam ante hæc ultima tempora S. Bonaventura in 4. dist. 12. p. 2. qu. 2. asseruerit: Omnes ergo rationes pro frequentia intelliguntur, salva debita præparatione, quæ in paucissimis est, ut semper.

§. III.

28. **M**orales Theologi subscribunt Scholasticis: nam Salmanticensis Collegii Patres Discalceati ex Carmelitis in *Curso morali tract. 4. cap. 7. p. 3.* ajunt: Quapropter, spectata hominum conditione, paucissimi sunt, exceptis Sacerdotibus, quibus consulendus sit usus quotidiana Communionis: rari, & pauci, qui ad plusquam hebdomadariam Communionem sint hortandi.

29. Ochagavia tract. 2. de Euch. q. 16. Generaliter non est Fidelibus consulendum, ut frequentius, quam octavo quoque die, sanctissimum Eucharistiæ Sacramentum suscipiant: paucissimis, ac nonnisi maximos in virtute profectus consecutis concedenda est Eucharistia quotidiana.

30. Martinus Bonacina, insignis e Clero seculari Canonista, ac Theologus, disp. 4. qu. 7. p. 2. de Euch. apertissime assernat: Raro personis non Religiosis consulendum est, ut frequentius communicent, quam octavo quoque die, ut majori cum reverentia, & iudicii maturitate discernant cibum a cibo.

31. Ioannes Clericatus, Præpositus Patavinus, decis. 10. de Euch. asserit: Nullus est, cui mensura Communio consuli non possit: pauci, quibus Communio hebdomadaria sit prohibenda: paucissimi, quibus quotidiana sit concedenda: & infra censet, non esse interdendum quotidianum accessum ad Angelicam mensam laicis, & aliis charactere Sacerdotali non insignitis, si Angelicam vitam ducant. Notetur hæc conditio, & planum fiet, quam parvus in hac re debeat esse Confessarius.

32. Castropalaus disp. 21. de Euch. punct. 16. postquam dixit, laudabilem esse quotidianam Communionem, sicuti etiam laudabile est votum virginittis, seu castitatis &c. subdit: Verum hoc intelligendum, si magno devotionis, & charitatis fervore ad tantum suscipiendum Sacramentum disponamur. Neque enim expedit reverentia tanto Sacramento debita, ut quotidie communicetur tepido, & remisso in charitate, curisque secularibus implicato. Quapropter spectata ho-

minum

minum conditione, paucissimi sunt, quibus expediat singulis diebus communicare: rari, & pauci, quibus plusquam octavo quoque die.

33. Layman in Theol. Mor. cap. 5. de Euch. Per accidens, consideratis vita hujus impedimentis, & distractionibus, raro hodie inter laicos reperiuntur, qui idonei sint ad S. Eucharistiam saepius, quam octavo quoque die, cum ea, qua par est, reverentia, atque anima sua fructu, aliorumque adificatione sumendam.

34. Idem ferme docent Sylvester Ordinis Prædicatorum 3. de Euch. q. 15. Jo. Baptista Corradus Ordinis Prædicatorum p. 1. q. 57. Filliucius Soc. Jesu c. 7. de Euch. Gobattus Soc. Jesu cas. 4. n. 57. Diana Clericus Regularis p. 11. tract. 7. ref. 15. Cardinalis Toletus, alique quamplures in ead. resol. citati a Diana. Rogo: si rari sunt in toto Orbe Christiano, qui frequentius, quam octavo quoque die, communicari mereantur; qua prudentia censerebatur Confessarius, plures in una urbe; imo in uno oppidulo reperiri, qui quotidiana sint digni Communionem? Possunt reperiri, non inficior; sed caute procedendum.

§. I V.

35. **A** Gesis porro Theologos Mysticos consulamus: hi etiam in eadem prorsus sententia sunt, ac Scholastici, & Morales. Horum aliquos insigniores in medium proferam. Thomas a Kempis, quamvis ante Tridentinum floruerit, tamen, quia ejus aureus de Imitatione Christi libellus plurimum fuit, & est usus omnibus animarum directoribus, qui post Tridentinum extitere, idcirco primo loco producendus videtur. Ipse itaque in cit. libello l. 4. cap. 4. ait: *Et licet omni die non sim aptus, nec ad celebrandum bene dispositus, dabo tamen operam congruis temporibus Divina percipere mysteria, ac tanta gratia participem me præbere.* Notes, quod devotissimus hic vir, instruens alios, induendo personam discipuli, supponit, non facile in aliquo dari aptitudinem, & dispositionem ad quotidie frequentandam Divina mysteria.

36. Joannes de Avila, Presbyter, ac Doctor eximie sanctitatis ac doctrinæ in Hispania, scribens ad quemdam concionatorem, qui hac super re illum per litteras consuluerat, ita loquitur, uti legere est ep. 3. part. 1. suarum Epistolarum: *Dico, che l'esser tanti, come ella dice, a comunicarsi ogni giorno, mi dà qualche sospetto all'animo, che forse tal cosa non piaccia a Dio, perchè, richiedendo questo negozio di comunicarsi ogni giorno, grandissima preparazione, tanto, che i Teologi, e specialmente S. Tommaso, e S. Bonaventura, parlano di ciò più tosto, come di cosa possibile, che reale, & essendo assai più difficile tal preparazione nello stato matrimoniale ec. io per me non so intendere, come in tanta gente possa essere tanta santità.* Infra vero subdit: *Pare frequenza assai ragionevole per quelli, che non passano la mediocrità dello spirito, il comunicarsi ogni otto giorni una volta, salvo se non occorresse qualche caso particolare infra settimana ec. e che chi vorrebbe far più, parli con V. R. ec. e quando vedrà in alcuno il profitto del comunicarsi assai chiaro, glie lo conceda, ma siano pochi: comunemente cogli altri sia pur sopra*

sopra di se, raccomandandosi prima a Dio, e domandandogli lume per non errare. Notetur, quanta cautela in hac re procedendum sit.

37. Ludovicus Granatenſis, Ordinis Prædicatorum, spectatæ sanctitatis ac doctrinæ vir, quem summis laudibus extulit Gregorius XIII. propter ejus excellentiam in doctrina spirituali, & quem S. Carolus Borromæus absentem consulebat, & vehementer amabat, ait, uti extat apud Corradum, quod ad hoc Sacramentum accedere regulariter cuicumque persona sufficere debet Dominicis tantum diebus. Intelligas, nisi aliqua sit specialis causa, vel devotio: sed videas, quam esset alienus a concedenda passim quotidiana.

38. Ludovicus de Ponte Soc. Jesu, insignis vitæ spiritualis magister, 1. tom. perf. Christianæ tract. 4. cap. 6. inquit: Satis apparet, si ordinariam hominum dispositionem attendamus, duo posse esse extrema circa frequentiam Communions vitiosa: alterum eorum, qui rarius, quam par esset, accedunt; alterum eorum, qui nimis frequenter: in qua re difficile est medium attingere. Infra deinde dat pro hac re varias regulas, quarum una est, posse aliquas personas excellentis adeo virtutis ac sanctitatis esse, adeoque Divinum hoc Sacramentum appetere & esurire, ut merito debeat eis sacra Communio ter, aut quater singulis hebdomadis concedi: imo aliquibus, etsi raris, etiam quotidie, si persone sint Divino obsequio omnino mancipata. Expendantur a Confessariis hæc verba; & intelligetur, quam minime deceat facilitas in indulgenda quotidiana Communionem.

39. Eusebius Nieremberg Soc. Jesu, cujus pii summi libri, quantus ipse vir sit, satis ostendunt, in suis pandectis vitæ asceticæ l. 2. doct. 4. cap. 22. postquam laudavit ulum communicandi octavo quoque die, subdit: Et licet olim major frequentia fuerit in usu Fidelium non solum Apostolorum temporibus, sed etiam postea per plures annos, nihilominus his frigidis temporibus hæc frequentia satis magna indicatur. Unde, si hæc frequentia est satis magna, caute Confessarii incendant, & majorem facile non concedant, nisi majores, & graviore hic & nunc causæ occurrant.

40. Demum in Vita S. Margaritæ de Cortona, descripta a Francisco Marchesio, lib. 1. cap. 20. habetur, quod ipse Episcopus animarum nostrarum Christus Dominus dixerit, ac mandaverit suæ fideli servæ hæc: Farai avvertito in mio nome il tuo P. Confessore a non ammettere in avvenire con tanta facilità qualunque persona, che addimanda il Sacramento, ma che lo comparta solo alle anime ben disposte e pure, le quali con grande ardore di spirito lo desiderano, perchè io sono pur troppo offeso dalle frequenti Comunioni degli uomini, i quali senza ritrarne alcun frutto malamente vivono. Utinam hæc monitio Confessariorum omnium menti inhaereat!

41. Stat igitur, quod sapientissimi omnium Ordinum Theologi tum Scholastici, tum Morales, tum Myſtici docent, raros, imo rarissimos esse, quibus prudenter, & congrue possit a Confessariis quotidiana Communio indulgeri. At, rogo, qua veritate id assererent, si recte procederent ii animarum directores, qui facile plures, & pluribus in locis ad quotidianam Communionem admittunt? Profecto, si bene procedunt hi Confessarii, non vi-

deo, quomodo vera sit horum Theologorum doctrina; siquidem non rari, sed plures, & plures sunt non solum in Christiana republica, sed in uno oppido, quibus consulenda sit quotidiana Communio.

§. V.

42. **S**uperest, ut videamus, an talis facilitas etiam recedat a praxi, quam tenuerunt sancti ac prudentes animarum moderatores, qui floruerunt per hæc duo ultima sæcula: & quidem pronum est ostendere, quod sic, ut constet ab exemplis: nam

43. S. Cajetanus Thienæus, qui, ut testantur lectiones Breviarii, sanctissimæ Eucharistiæ frequentiore usum maxime promovit, ita se gessit, juxta ejus Vitam descriptam a Joanne Baptista Castaldi: *Prima dispose i popoli a frequentare la Comunione una volta il mese, poi che si frequentasse ogni Domenica: v'aggiunse le feste fra settimana, & anco i Venerdì*. Ubi notes, quod qui maxime fuit promotor frequentis usus, & ut talis ab Ecclesia laudatur, non legitur, quod ordinaria consuetudine quotidianam Communionem invexerit.

44. S. Ignatius de Loyola, a quo Sacramentorum frequentia incrementum accepit, tam parvus erat, & cautus in concedenda laicis quotidiana Communionæ, ut, teste Sacchino *lib. 3. hist. Soc. n. 8.* etiam eos, quibus quotidiana Divina mensa consuetudo jam erat, quamquam non cogendos, tamen adhortandos aiebat, ut id rarius facerent. Quare obiter notetur, non esse, cur quis miretur, si aliqui e Societate aliquando laicis consilium dent, ut rarius, quam singulis diebus, communicent; nam hoc documentum habent a S. Fundatore, optimo animarum moderatore, ac zelantissimo sanctissimæ Eucharistiæ quo ad usum propagatore.

45. S. Philippus Neri, ut constat ex ejus Vita descripta a P. Bacci *l. 2. c. 1.* volebat, *che non solo i Sacerdoti, ma ancora i laici frequentassero questo Sacramento: per la qual cosa alcuni de' suoi penitenti si comunicavano ogni otto giorni, molti ogni festa, altri tre volte la settimana, ed alcuni, se ben pochi, ogni giorno*. Ubi notetur, quod S. Philippus erat ita a Deo illuminatus, ut probe intelligeret, quid cuique expediret: notetur, quod ejus penitentes erant plurimi, ita ut tota fere Roma ad ipsum conflueret: notetur, quod non pauci ejusdem penitentes fuerunt insigni pietate ac sanctitate excellentes: unde magna in eo relucet circumspectio, & cautela, quod paucos Communione quotidiana dignaretur: imo Sanctus Vir sapientissime dictabat: *Non tutto quello, che è in se stesso buono, è buono in particolare*. Bonum est v. g. quotidie communicare secundum se; sed non semper est bonum, seu expediens, prout in individuo. Et ad mulieres quod attinet, sæpe ille laudabat, atque in exemplum proponebat Martham quamdam Spoletinam. Cur? Numquid quia semper adibat sicut novella olivarum in circuitu mensæ Domini? Minime gentium: sed quia, ut ipse aiebat, *attendeva a filare in casa sua*,

46. S. Fran-

46. S. Franciscus Salesius agens de frequenti Communione *cap. 20. introd. ad vit. devot. 10.*, inquit, *né vitupero, né lodo assolutamente, che uno si commichi ogni giorno; ma lascio questo alla discrezione del Padre spirituale, perchè la disposizione, che si ricerca ad una sì frequente Communionem, dovendo essere tanto esquisita, non è bene darne consiglio in generale.* Notentur illa verba: la disposizione che si ricerca, dovendo essere tanto esquisita: quæ sane indicant, quam parce & caute in hac re Sanctus Vir procederet.

47. S. Carolus Borromeus, ut videre est in pluribus ab eo habitis Conciliis provincialibus, commendat quidem sæpissime frequentem Communionem, non autem unquam, neque ab ipsis Clericis, exigit, aut petit quotidianam: imo ab ipsis Clericis cum non petat frequentiore, quam hebdomadariam, & in seculis occurrentibus, colligitur, quod S. Antiles non ita facilis esset ad laicos quotidianam indulgentiam.

48. Jacobus Laynez, qui Concilio Tridentino interfuit Pontificii Theologi munus exequens, teste Sacchino *lib. 3. hist. Soc. n. 6.* collectis in unum pluribus aliis Theologis, hanc rem de concedenda crebrius, aut rarius laicis Communionem diligenter ad examen vocavit, ac discussit, ut ad certam quandam ac prudentem normam Societatis Confessarii se componerent, nec in tanta re errarent: ac demum statuit, *permitti nequaquam debere, ut singulis diebus mysteria Divinissima laici sumerent, nisi si quis forte ita viveret, ut vita ejus perpetua ad sanctam Communionem preparatio videretur.*

49. Religiosissimi illi animarum directores ex Dominicana Familia, qui hoc ultimo precedenti sæculo direxerunt in spiritu S. Rosam Peruanam, nunquam illi stabiliter, & ordinaria consuetudine permiserunt Communionem quotidianam: unde historicus vitæ hujus P. Laurentius Lucchesini ait: *Ter ut minimum in hebdomada Divina Eucharistia reficiebatur, quinque dies non raro, & aliquando in singulos dies.* Notetur ly aliquando, & notetur, quod erat S. Rosa, quæ accedens ad sacram mentiam, facie ipsa præferebat cordis incendium, adeo ut cælesti splendore sæpissime perfulsa Sacerdotibus ipsis terrorem incuteret.

50. Religiosissimi illi viri, qui direxerunt in spiritu his nostris temporibus Augustissimam Eleonoram Neuburgicam, matrem regnantis Imperatoris, Fæminam plane omnibus ornatam virtutibus, ut constat ex ejus Vita nuper impressa, nunquam illi concesserunt, neque in ipso statu viduitatis, quotidianam Communionem, sed ter in hebdomada: adeo in hac re cauti & temperati erant.

51. Demum vix in ullo, quod sciam, Religionum Novitiatu, licet quotquot in iis vivunt, religiosissimam ad exacte regularis observantiæ normam vitam traducant, conceditur plus quam ter in hebdomada sacra Eucharistia: quod sane non leve argumentum est ad probandum, quanta discretione, & moderatione procedere debeant Confessarii in hoc negotio respectu laicorum sæcularium.

52. Neque illos ad facilitatem incitare debet, quod S. Catharina Senensis quotidie communicaret, quod idem faceret per hæc nostra tempora S. Ma-

ria Magdalena de Pazzis cum toto integro suo monasterio. Nam in peimis, quod duæ adeo sanctæ Fœminæ id usurpaverint, non probat, non esse raras eas, quibus id concedendum sit. Adde, quod de S. Catharina Senensi ita loquitur S. Antoninus *tit. 23. cap. 14. §. 8. Erat satis inter laicos vulgatum, quod Catharina ista quotidie communicabat, & ex Sacramento absque alio cibo vitam transigebat: sed quod pie dicebant, & suspicabantur, utique verum non erat; non enim quotidie, sed frequenter Sacramentum sumebat.* Monasterium vero S. Mariæ Magdalenzæ de Pazzis, & Sancta ipsa hoc habent peculiare, ex quo litum cum cæteris discrimen oritur; nam, cum ex instituto Religioso id faciant, & ipsa fecerit, habent, & ipsa habuit gratiam vocationis, seu auxilia quædam actualia specialia ad id rite exequendum: unde ex eo, quod ita fecerit Sancta, & quod ita faciant illæ religiosissimæ Matres, non est, cur facilis esse debeat Confessarius in indulgenda aliis quotidiana Communione.

53. Postremo sic concludo. Integrum est iudicium, quod plurimorum prudentum sententia comprobatur, *Can. Extra dist. 64.* Ergo a contrario hallucinationi est obnoxium illud iudicium, quod a plurimorum sententia recedit. Atqui iudicium eorum Confessariorum, qui facile hanc Communionem quotidianam concedunt iustis, simpliciter recedit a plurimorum sententia; siquidem plurimi ajunt, raros, ac paucissimos esse in toto Orbe, quibus concedenda sit. Ergo iudicium talium Confessariorum hallucinationi obnoxium est &c.

54. At, inquit, nos innititur gravibus fundamentis in hoc faciendo. Bene est: expendamus illa: & sit nostra secunda assertio.

§. VI.

55. **D**ico 2. Praxis talium Confessariorum non bene innititur fundamentis in casu expositis. Probo hoc, explicando sensum, quem habent fundamenta adducta; ex quo sensu liquido contabit, talia fundamenta nihil patrocinari praxi talium Confessariorum. Ac primum erat. Usus frequentis Communionis perfectior est, quam usus rarior. Admitto hoc libentissime: imo tam certum hoc esse affirmo, ut nullus de hoc Catholicus possit dubitare, sicuti bene observat de Lugo *loc. cit.* Sed quid inde? Etiam status Religionis perfectior est, quam status conjugalis; etiam votum castitatis perpetuæ perfectius est, quam votum castitatis ad tempus: numquid proinde facilis quis esse debet in faciendo potestatem prænitentibus emittendi votum castitatis perpetuæ? nnnquid facile quis suadebit huic, vel alteri in particulari statum Religionis præ alio statu? ReCOLatur illud dictum S. Philippi Nerii: *Non tutto quello che è buono in se stesso, è buono in particolare.* Sensus itaque talis propositionis, nempe quod usus frequentior sit in se perfectior, non negatur; imo asseritur, imo proponitur ad populum. Sed, an huic, vel illi expediat hic & nunc usus frequentior, quam rarior, hoc opus, hic labor est; & idcirco considerate, & cum cautela procedere debet Confessarius. Videatur *art. 10. q. 80. S. Thomæ in 3. p.* ubi recte explicatur, quæ ratione frequens
usus

usus Sacramenti semper expedit, & qua ratione possit per accidens non expedire.

56. Replicabit fortasse aliquis. Usus sacræ Eucharistiæ, seu sacra Communio augeat gratiam sanctificantem ex opere operato homini in gratia existenti: ergo quilibet in gratia existens, utiliter ac sancte facit, accedendo ad hunc Divinum cibum: adeoque facilitas Confessarii in concedendo laicis quotidiana Communionem non est obnoxia hallucinationi.

57. Sed contra. Nam in primis non desunt Auctores satis graves, qui negant, sufficere solam existentiam in gratia ad hoc, ut sacra Communio pariatur in subiecto augmentum gratiæ sanctificantis ex opere operato, sed ulterius requirunt actuale devotionem, & fervorem; ut videre est apud Castropalaum *tratt. 21. disp. unic. p. 11*. Deinde, esto sit verum, sufficere carentiam lethalis in subiecto, ad hoc ut habeatur per sacram Communionem augmentum gratiæ sanctificantis, ut docet Suarez *in 3. p. disp. 63. sect. 3.* numquid proinde sequitur, ut respectu cujuslibet hominis iusti utilior sit quotidiana Communio, quam Communio non ita frequens? Nequaquam: etenim 1. gratia, quæ ex opere operato datur in Sacramento, proportionem habet cum dispositionibus recipientis, uti Suarez *ibi sect. 4.* cum autem possit quis esse magis dispositus in Communionem non adeo frequenti, potest etiam contingere, ut majus augmentum gratiæ recipiat hic in Communionem minus frequenti, quam in quotidiana, & consequenter utilior illi sit Communio non adeo frequens, quam quotidiana, & frequentissima: 2. Communio quotidiana ut respectu hujus, vel illius subiecti dicatur utilior, pensanda est, ut recte notat Moya, non solum utilitas proveniens recipienti ex opere operato, sed hæc, & reverentia debita Sacramento: cum autem longe major possit reverentia reperiri in hoc, vel illo subiecto, si frequenter quidem, sed non quotidie accedat, quam si accedat quotidie; hinc est, quod respectu hujus, vel illius subiecti non semper sit utilior Communio quotidiana, etiamsi per talem quotidianam Communionem habeatur augmentum gratiæ: & consequenter Confessarius non debet esse facilis &c.

58. II. Concilium Tridentinum optat, ut in singulis Missis Fideles adstantes communicent. *R. 1.* quod, ut bene notat Cardenas, Tridentinum non id optat absolute, sed *optaret*, id est inclinat quodammodo ad optandum: non optat absolute; quia non omnes, imo paucissimi habent eam dispositionem, quæ requiritur ad talem frequentiam: inclinat ad id optandum; quia id, ut dictum est, perfectius in se est. *R. 2.* quod sancta Synodus optat quidem, ut omnes Fideles adstantes communicent; sed simul optat in Fidelibus veram, & congruam dispositionem: unde objectum desiderii habiti a Tridentino, non est sola Communio quotidiana, sed complexum ex eadem, & ex congrua in Fidelibus dispositione: cum autem hæc in paucissimis reperitur, sicuti sancta Synodus idcirco nihil præcepit, sed tantum, quid euperet, indicavit; ita Confessarius non facilis debet esse in concedendo tali frequenti usu, sed temperamentum juxta unicujusque dispositionem adhibere.

59. III. Talis erat usus primitivæ Ecclesiæ, ut quotidie communicarent.

R. ve-

Et verissimum id esse, ut constat ex Actis Apostolicis, & ex Angelico in *resp.* ad 5. sed fervorem illorum temporum proportionem habuisse cum ea frequentia, uti optime notat S. Bonaventura in 4. *dist.* 12. p. 2. q. 2. apud de Lugo d. 17. Quare, si aliquis inveniatur habere fervorem illorum primorum Christianorum, poterit illi laudabiliter & faciliter concedi quotidiana Communio. At quoniam erat fervor illorum primorum Christianorum? Audiatur ex Cornelio a Lapide in cap. 5. *Act. Apostolorum*: ubi ex Josepho refert, eos fuisse opum contemptores, paupertatis, & vitæ communis amantes, religiosos erga Deum, silentio deditos, psalmodos, mites, fideles, pacificos, continent, iustos, abstinentes, longævus, in tormentis constantes, imo ridentes, immortalitati, & æternitati viventes quasi heroes, & semideos. Rursus ibidem ex Philone refert, quod illi pie, sancte, iubeque vivebant triplici regula utentes, amore Dei ardentissimo, virtutis cultu diligentissimo, charitate proximi ferventissima. Rogo, quoniam sunt huiusmodi nostris temporibus? Utinam multi! Sed juxta Theologos, ac Patres, pauci sunt: ac propterea Confessarius non debet usum illorum temporum ad tuendam suam facilitatem obtendere, sed potius cum S. Bonaventura concludere: *Si aliquis videat, se esse in statu Ecclesiæ primitivæ, laudandum est, quotidie communicare: si autem in statu Ecclesiæ finali, utpote frigidum & tardum, laudandum est, quod raro: si autem medio modo, medio modo se debet habere, & aliquando debet cessare, ut addiscat revereri, aliquando accedere, ut inflammetur amore.*

60. IV. Sancti Patres frequenter inculcant quotidianam Communionem, & usum frequentissimum illius. Et cum S. Bonaventura, omnes tales textus Sanctorum Patrum intelligendos esse, salva semper debita præparatione, quæ in paucissimis est: unde optime notat Cardenas, quod omnia Concilia, & Patres, qui adducuntur, & possunt adduci ad tuendam facilitatem, non faciunt ad rem; quia illi, dum hortantur ad Communionem quotidianam, simul hortantur ad debitam & congruam dispositionem, quæ raro reperitur. Adde, quod Sancti Patres multoties loquuntur, non præse, & scholasticè, sed concionatorio modo in hominibus habitis ad populum: expedit autem, ut Concionatores frequenter inculcent frequentiam Communionis, ejusque utilitatem amplificent; quia populus magis per se inclinat ad raritatem, quam ad frequentiam: & si frequentia reprehendatur (quod sane & S. Carolus in suis Conciliis vetuit, & Franciscus de Lugo non carere gravi peccato judicat), si, inquam, frequentia reprehendatur, facile erit, ut plures suam desidiam reverentiæ velamine tegant: unde bene notat Cardinalis de Lugo: *Decet Theologum scire, quid doceat theologia veritas in hoc negotio, sermonem tamen temperare, & apud plebem in favorem frequentia loqui, prout Sancti Patres fecerunt.* Monet tamen decretum Sacræ Congregationis, ut Concionatores postquam frequentiam commendaverint, statim de magna ad illud sumendum Sacramentum præparatione orationem habeant. Demum accedit, quod Sancti Patres multa dixerunt, quæ videntur præferre aliquam exaggerationem, quia toti erant in reprehendendo, & confutando adversarios

rius illos, qui infrequentiam volebant, ut contigit in Oriente tempore S. Chrysostomi. Quando autem quis e pulpito, & apud populum vitium aliquod contra ejusdem defensores reprehendit, facile, & etiam prudenter oppositam virtutem exaggerat. Hinc etiam factum fuit, quod nostra Societas cum sub ejus initium in invidiam apud aliquos vocaretur, imo hæresis accusaretur, ex eo quod frequentiam hujus Divini cibi promoveret, S. Thomas de Villanova e pulpito tum talem frequentiam, tum Societatem defenderit, & Chrytophorus Madritius librum de frequentis Communionis laude conscripserit: quæ laus semper intelligenda est vel de frequentia secundum se, vel de frequentia suppositis terminis habilibus in subiecto.

61. Neque facilitati Confessariorum patrociniatur, quod Sancti Patres aliquando dicant, semper accedendum esse ad Communionem, quando quis non habet lethale: nam *ly semper*, debet accipi cum proportionem, inquit de Lugo, idest suis temporibus congruis: sicut *ly semper* orandum, debet accipi cum eadem proportionem. Item nec patrociniatur, quod aliqui Sancti dicant, raritatem non reddere hominem dispositum, & quod qui non est dignus accipere quotidie, non est dignus accipere post annum: nam verum est, quod raritas accessus ad sacram mensam per se non parit dispositionem, eam tamen parit occasionaliter, & qui non est dignus accipere quotidie, non est dignus accipere post annum condignitate adæquationis; tamen est dignus accipere post annum sine indecentia, quæ utique esset, si in statu tepido quis accederet quotidie; non est autem, si accedat post annum, quia post annum datur major necessitas, qua excusatur illa irreverentia.

62. V. Sacra Cardinalium Congregatio anno 1587. statuit, non esse illicitum quotidie communicare. Et utique non est illicitum; nullum enim extat præceptum prohibens quotidianam Communionem. Sed quid inde? Peregrinatio Compostellana non est illicita, imo sancta: numquid tu facile omnibus fœmellis consuleres Compostellanam peregrinationem? Quamvis igitur res aliqua non sit illicita, tamen multa consideranda sunt, ut eadem hic & nunc in particulari alicui suadeatur. Certe S. Thomas considerans Communionem ex parte sumentis, pronunciat: *Non est utile omnibus hominibus quotidie ad hoc Sacramentum accedere*. Adde, quod, quamvis quotidiana Communio non sit illicita ex decreto citatæ Congregationis, id tamen intelligendum de quotidiana Communionem secundum se; nam per accidens, & ex circumstantiis potest esse alicui illicita, saltem leviter, in hoc sensu, juxta de Lugo, non quatenus actus communicandi sit illicitus, sed quatenus actus habendi v.g. voluntariam distractionem, aut inanem gloriam, aut quid simile, habet: in circumstantia accedendi ad Eucharistiam, non solum malitiam propriam objecti, sed etiam malitiam contra religionem, propter irreverentiam contra Sacramentum. Et notetur, quod talis irreverentia, & consequenter venialis aliqua culpa facilius potest incurri a personis devotis, quam ab aliis; quia a personis devotis major reverentia, & præparatio, juxta de Lugo, requiritur ex præcepto levi, quam ab aliis personis justis: unde facilius est, quod peccent leviter in accedendo ad Communionem istæ personæ devo-

devotæ, quam aliæ: ac propterea non ita facilis debet esse Confessarius in concedendo etiam illis quotidianam Communionem. Certe S. Romualdus nolebat, ut illi Monachi communicarent, qui inter orandum dormitassent; videlicet quia in talibus viris spirituales vitam profitentibus talis dormitatio videbatur Sancto Abbati indispositio quædam ad Communionem, quæ fortasse in aliis non esset.

63. VI. Sacra Congregatio in ultimo decreto de quotidiana Communionem relinquit hanc rem integram iudicio Confessarii. R. Relinquit iudicio Confessarii, at iudicio recto, non erroneo. Etiam in Jubilæis committitur arbitrio Confessarii commutatio votorum: non tamen idcirco temere Confessarius in hac re procedere debet, sed ea expendere, quæ expendenda movent quo ad communionem Sanchez, alique Theologi. Similiter dicendum in præsenti materia. Debet proinde Confessarius, ne erret; expendere quæ docent Theologi, quæ usurparunt Sancti: cum autem doceant Theologi, rarissimos esse, quibus quotidiana Communio concedenda sit, ex eo quod in rarissimis reperitur debita & congrua dispositio, non debet præcipitanter omnibus indifferenter iussis quotidianam Communionem concedere, sed bene expendere, an in penitentibus sint dispositiones requisitæ ad Communionem quotidianam.

64. Duo fortasse replicabit hic Confessarius facilis ad Communionem indulgendam. I. Sacra Congregatio non vult assignari certos dies, quibus liceat, aut non liceat ad sacram mensam accedere: ergo Theologi supra citati, assignantes octiduum regulariter pro frequentanda Communionem, non bene docent; adeoque illis non standum. II. Sacerdotes quotidie celebrant, & quotidiana celebratio in illis laudatur, nec tanta cautela præscribitur: cur igitur tanta adhibenda est in laicis, cum ex his multi devotiores sint, quam Sacerdotes? R. ad 1. Aliud est assignare certos dies, quibus generaliter unica præcepti formula possint, vel non possint laici accedere ad sacram mensam: aliud assignare certam regulam, quæ possit plerumque fere in omnibus observari, quando specialis causa aliter faciendi non occurrat. Illud primum prohibetur a Sacra Congregatione, & quidem recte; quia possunt reperiri laici adeo sancti, quibus expediat frequentior Communio. Hoc vero secundum non prohibetur; & hoc faciunt citati supra Theologi indicando octavum quemque diem pro frequentanda Communionem: sicuti hoc etiam facit regula 26. Sacerdotum Societatis Jesu, quæ proinde optime videtur coherere cum hoc decreto, & cum doctrina Theologorum; non enim præscribit generaliter dies, quibus huic, vel illi generi personarum danda, aut non danda sit Communio, sed assignat quandam mensuram, quæ facilius, & congruentius potest fere in omnibus observari, ne detur locus errori: ac proinde Laynii cum cæteris Patribus, ut refert Sacchini *lib. 3. hist. Soc. n. 6.* dixerunt, *moderationem iustam videri, si laici octavo quoque die Communionem usurpent.* Notes ly *moderationem*: non enim dixerunt taxationem, aut præscriptionem.

65. R. ad 2. primo, quod Sacerdotes cum pari dispositione, quam habent laici, possunt frequentius celebrando communicare, quam laici; quia defectus dispositionis, quem forte habent, compensatur per obligationem, quam

quam habent ex officio : secundo, Sacerdotes frequentius possunt communicare celebrando, quia ex se, ratione status, sunt regulariter magis dispositi, quam laici, utpote ratione status separati a curis secularibus; præterea ratione Ordinis habent auxilia quædam gratiæ ad rite sancteque peragendam illam actionem sacrosanctam, quæ auxilia non habent laici: tertio non inficior, quod etiam Sacerdoti, qui culpabiliter, vel inculpabiliter ob frequentem & quotidianam Communionem est in periculo irreverentiæ, & indevotionis, consilium dandum esset de abstinendo aliquando, ut postea reverentius accederet, sicuti docet S. Bonaventura apud de Lugo *disp.* 17. quamquam raro crederem inculpabiliter eventurum tale periculum Sacerdoti; ac propterea cum tale periculum irreverentiæ regulariter eveniat ex culpa Sacerdotis, auctor illi eisem, ut potius ipse tolleret talem culpam, quam omitteret Sacram, ea ductus ratione, quia innumera bona, & immensi fructus proveniunt Fidelibus tum vivis, tum defunctis, ex sacrosancto Missæ Sacrificio.

66. Constat proinde ex hæcenus dictis id, quod alluimus 2. loco, nempe quod praxis talis pii Sacerdotis facilis in concedenda quotidiana Communionem, non bene inritur fundamentis in casu expositis.

PARS TERTIA.

PROPONUNTUR ALIQUOT MORALES REGULÆ SERVANDÆ
A CONFESSARIO IN CONCEDEENDO CREBRIUS, AUT
RARIUS LAICIS SACRAM COMMUNIONEM, UT SIT
FIDELIS DISPENSATOR ET PRUDENS.

§. I.

67. **T**riplicem assigno regulam desumptam ex doctrina Sanctorum, ex Theologis, & ex ipso decreto. Prima igitur regula est ex S. Francisco Salesio. Hic Sanctus *cap.* 20. *lib.* 2. *Introd. ad vit. devot.* sic docet: *Per comunicarsi ogni otto giorni bisogna non avere nè peccato mortale, nè affetto al peccato veniale, ed avere un grau desiderio di comunicarsi; ma per continuare tutti i giorni, bisogna di più aver superata la maggior parte delle sue male inclinazioni, e che questo sia col consiglio del Padre spirituale.* Quamobrem ecce satis congruam regulam pro concedenda Communionem quotidiana, vel non concedenda. Videat scilicet Confessarius, an persona petens Communionem quotidianam, 1. sit expers peccati mortalis, 2. an sit expers omnis affectus ad peccata venialia, 3. an habeat ardens desiderium communicandi, 4. an superaverit plerasque suas pravas inclinationes tum partis concupiscibilis, tum partis irascibilis: & si quidem ita invenerit, tunc poterit quidem eam adhortari, ut rarius, vel certis diebus communicet; non poterit tamen, nisi alia occurrat causa, v. g. ad eam mortificandam, denegare illi Communionem quotidianam, aut ab eadem eam repellere, vel deterere, juxta supra relatum decretum. Dixi, poterit adhortari: addo nunc, meo quidem iudicio, exequens munus directoris, adhortarer; tum quia raro mihi crederem adeo dispositiones has ex Salesio requisitas; tum quia, ut bene notat

Calinus *loc. supracit. n. 12.* ita homines a natura comparati sunt, ut eorum fervor sensim tepescat in rebus quotidianis; nam ex assuetis non fit passio: unde, si quotidie Divinus cibus accipiatur, facile est, ut tepide, & sine congrua dispositione accipiatur. Videatur idem Auctor *loc. cit.*

§. II.

68. **S**ecunda regula est ex Paulo Segneri in *suo Parocho instructo cap. 21.* Nempe observet diligenter Confessarius finem, quem habent, & quo moventur personæ ad frequentem Communionem usurpandam; & si animadvertat, talem frequentiam non provenire ex fame talis Divini cibi, sed ex quadam interna æmulatione, ex quadam ambitione, ex quadam consuetudine, non consultum videtur, iis frequentiorem Communionem, & præsertim quotidianam concedere. Quod olim etiam solide doctæque monerat Ludovicus de Ponte *p. 1. perf. Christiana tract. 4. cap. 6.* omnino videndus:

69. At unde cognoscet Confessarius finem sincerum, & non vitiosum talium personarum? R. Cognoscet, si, quando eis denegatur Communio, illæ vel gravate, & ægro animo obediant, vel absolute non obediant, eundo ad alium Confessarium, aut superbe asserendo, non posse se recedere a consuetudine, quam habent. Cognoscet etiam, ut bene notat Stadiæra *tract. 14. c. 19. degl' inganni &c. investigando*, che effetti provino in se dopo la Communion; e se scoprirai, inquit, che non v'è altro, o poco altro, fuor di quel gusto, o soddisfazione d'aver avuta la Commione, questo non è il desiderio sodo e massiccio, che richiede l'Eucaristia, ma s' addimandano vogliuiccie, ed appetiti, non mali, ma imperfettissimi, e di pochissima sostanza. Ideoque Confessarius non debet, ut prudens dispensator sit, iis concedere quotidianam Communionem regulariter. Certe illæ animæ, quæ sincerum valde habuerunt desiderium Divinæ Eucharistiæ, alios experiebantur post Communionem effectus. Audiantur, quos experiretur S. Catharina Senensis: *Tantus ejus in Eucharistiam erat ardor, tanta fames, ut, si quotidie non communicasset, videretur animam exalatura: mox vero, ut communicaret, & spiritu, & corpore (en effectus) evadebat ita valida, ut ingentes subiret labores & penitentias, ac cibos omnes humanos fastidiret: apud Cornelium a Lapide in Apoc. cap. 2.* Alii hujus Divini cibi post ejusdem sumpcionem effectus videantur apud Rodriguez *tom. 2. tract. de Euch.*

70. Demum notetur cum Ludovico a Ponte *loc. cit.* quod vera fames, & sincerum desiderium frequentæ extraordinariæ hujus Divini cibi, non statim incipit, postquam aliqua persona devotioni, ac superficiali cuidam pietati se addixit; sed regulariter postquam magnos ac multos habuit in solita virtute progressus. En ejusdem Auctoris piissimi verba: *Specialis, suaviorque vocatio, qua Christus Dominus electos suos ad majorem hujus Sacramenti frequentiam invitare solet, ut plurimum incipit, postquam illi dies permultos in sanctis operationibus se exercuerint, vultque ipse singulare suum erga eos studium, & favorem ostendere, bonaque illa opera remunerare, & spiritum addere, ut prosequantur, & in perfectione virtutum omnium proficiant.* Unde mirum sane est, quod aliquæ personæ spiritualem vitam & incipiant, & absolvant in quotidiana hujus Divini cibi usurpatione.

§. III.

§. III.

71. **T**ertia regula ex decreto ipso, & ex communi Theologorum est explorare frequentia fructum, & ad pietatem processum. Quando itaque aliquis ex frequenti Communione vere proficit, & proprium hujus Sacramenti fructum recipit, quando in solidis virtutibus per frequentem Communionem processus habet; tunc sane illi Confessarius poterit liberius mensuram hujus Eucharistici panis libenter dare: at vero, si secus contingat, expedit potius, uti in tuenda corporis valetudine, cibum minuire, & exercitium augere, idest minuire Communionem, & augere alia pietatis opera. Vide Cajetanum 3. p. q. 80. art. 10.

72. Verum, hoc opus, hic labor est. Unde intelliget Confessarius, an aliquis ex frequentia Eucharistiae fructum capiat, & an in solidis virtutibus proficiat? *Be. 1. cum S. Francisco Salesio in 18. Traët. ubi sic ait: Desiderate forse sapere, come conoscerete, se v'aprofittate con ricevere i Sacramenti? Lo conoscerete, se v'avanzate nelle virtù, che sono proprie di tali Sacramenti: v. g. voi conoscerete cavar frutto dalla Comunione, se voi, frequentandola, diventerete dolce, soave, e umile; poichè tale è la virtù propria di questo Sacramento, che è tutto dolce, tutto soave, e tutto meile: ma, se al contrario voi non diventate più umile, nè più dolce, meritate, che vi si levi il pane, giacchè non volete faticare.*

73. *Be. 2. cum Sancto Apostolo Paulo 2. ad Cor. cap. 10. Ipsi in nobis nosmetipsos metientes, & comparantes nosmetipsos nobis.* Idest Confessarius prudens metiatur penitentes in ipsismetipsis, & comparet illos in ipsismetipsis: obliervet, quales fuerint ante frequentem Communionem, & quales sint nunc, an sint faciles in committendis venialibus, sicut prius? an sint iracundi, sicut prius? an sint propriarum amatores commoditatum, sicut prius? & si ita eos reperiat, probabilem conjecturam habebit, quod non proficiant; sin vero secus, constabit profectus in virtutibus. Notet tamen diligenter Confessarius in hac instituenda comparatione illud, quod recte notat Joannes Petrus L'innamonti in suo *Diret. cap. 29. Non credere, che tutto ciò, che prova internamente una persona per la sua complessione affettuosa, sia un eccesso di perfezione, o di accrescimento nella pietà*: atque idcirco ibidem docet idem Autor: *Non far conto in materia di amor di Dio, se non del forte: non si deve no disprezzare le tenerezze, & altre impressioni sensibili, ma non se ne deve far conto in maniera, che il direttore se ne serva per misura.* Quod idem olim monuerat, & usurpaverat in animarum directione S. Ignatius, uti refert Maffejus in ejus *Vita l. 3. cap. 10.*

74. Demum, et si Confessarius non debeat in hoc gerendo negotio multum commoveri ex admiratione, & opinione vulgi, tamen non eam negligat, ut supra n. 23. indicavit Pontius: unde, quando viri prudentes admirantur in aliquibus frequentiam Communionis, cautus sit, suspicetur aliquid; nam fortasse penitentes veniunt ad ipsum sub vellimentis ovium, apud alios vero tales non sunt, apud alios præferunt iracundiam, oblationem in proprio judicio, amorem suarum commoditatum, fugam laborum, aliaque imper-

fectiones, quas apud Confessarium quadam externa sensibili devotione, aliquibus suspiriis, & lacrymulis contegunt: quare, quando canes latrant, pastor advigilet, & meminerit I. illud S. Thomæ 2. 2. q. 49. art. 3. *In his, quæ ad prudentiam pertinent, maxime indiget homo ab alio erudiri.* Quocirca concedere, prout oportet, rarius, aut crebrius Communionem pœnitentibus, cum sit opus prudentiæ, maxime indiget Confessarius, ut in multitudine Presbyterorum, idest seniorum prudentum, stet, & sapientiæ illorum ex corde conjungatur. II. meminerit illud S. Philippi Neri, *che nel passare da uno stato cattivo al buono, non ci va consiglio; ma nel passare dal buono al migliore, vi vuol tempo, consiglio, e orazione:* ex Bacci in ejus Vita l. 3. c. 9. Non est opus consilio ad suadendum alicui, ut a non frequentia transeat ad frequentiam Sacramenti: sed ad suadendum alicui, ut a frequentia Sacramenti transeat ad frequentiam majorem, præsertim quotidianam, opus est tempore, consilio, & oratione.

75. Hæc dicta sint ad laudem Divinissimi hujus Sacramenti, ad uberiorem animarum fructum, & ad Sacerdotum, quibus laboro, institutionem: quæ omnia Sanctæ Romanæ Ecclesiæ, & sapientiorum censura, & correctioni subijcio.

APPENDIX

De Communione in Viaticum.

76. **P**lacet hic mantissæ loco quæstionem satis practicam enodare: an videlicet qui semel Viatico refectus fuit, possit intra eandem ægritudinem iterum non jejunos communicare?


77. R. asserendo sententiam Eminentissimi Cardinalis de Lugo *disp. 15. de Sacram. sect. 3.* nec quidquam de meo addendo. Tantis igitur Auctor loc. cit. putat, id posse fieri, subscribendo sententiæ plurium Auctorum, quos ibi allegat. At, quia ejusmodi Auctores non conveniunt in determinanda distantia, quæ debet intercedere, ut possit iterum dari Communio absque jejuno intra eandem infirmitatem; alii enim exigunt octo, vel decem dies, ut Suarez; alii septem, vel sex, ut Filliuccius, quem sequitur Diana 1. tom. *tract. de celebrat. Miss. resol. 77.* alii tertia die dari posse existimant, ut Ludovicus de S. Joanne &c. hinc Cardinalis citatus in hac Doctorum varietate dat pro regula firma & secuta, directiva praxis, consuetudinem Fidelium: & cum jam, ipso teste, vigeat inter Fideles consuetudo, ut iterum detur Eucharistia infirmo non jejuno intra eandem infirmitatem post aliquot dies, v.g. septem, vel octo; idcirco judicat, id in tali distantia posse fieri: cum vero, ipsomet iudice, non sit sufficienter a Fidelibus approbatus usus dandi iterum Eucharistiam infirmo non jejuno proxima, vel tertia die; idcirco hoc ipse non approbat. Videatur de Lugo loc. cit. & la Croix lib. 6. par. 1. *de Euchar. n. 613.* At præ cæteris videndus, atque omnino audiendus est Bened. XIV. qui in suo Opere de Synodo Diocesana lib. 7. cap. 12. num. 4. & 5. docet, posse, & debere Sanctissimum Viaticum in eadem infirmitate iterum, & tertio administrari, præsertim si ipsimet egrotantes iterum caelestem illum panem esuriant: quod & exemplo suo in postrema, qua decessit, infirmitate confirmavit.

DE

DE QUOTIDIANA CELEBRATIONE MISSÆ OPUSCULUM III.

§. I.

Proponitur questio .

1.  Ostquam de venerabili Eucharistia, ut Sacramentum est, ac de ejus debita adoratione, ejusdemque usu crebrius, aut rarius laicis concedendo disseruimus; superest, ut de Eucharistia, quatenus est Sacrificium, aliquid dicamus. Profecto uberrima hic se se offerret disserendi materies, siue instituitur sermo de essentia incurrenti Sacrificii, siue de multiplici fructu, qui ab eo dimanat, siue de obligatione Sacerdotum ad illud offerendum, siue de aliis quamplurimis, quæ ejusmodi Sacrificii oblationem vel comitantur, vel subsequuntur. Nihilominus in tanta rerum copia placuit illud dumtaxat in medium proferre, ac diligentius intueri; videlicet, an, & quatenus licitum & conveniens sit Sacerdoti Missam quotidie celebrare?

2. Rem hanc cur cæteris præhaberem, in causa fuit propositio quædam insignis Doctoris Martini Bonacinæ, qui de *Ench. disp. 4. q. ultim. p. 7. n. 17.* agens de Cappellano electo ad celebrandum quotidie, ait: *Obligatio Missæ quotidiana imposita Sacerdoti intelligitur, salva decencia & honestate; aliquin videretur injungi obligatio ad rem illicitam.* Superius autem explicans, in quo sita sit hæc honestas & decencia, addiderat: *Honestas ac decencia postulat, ut aliquando Missæ Sacrum prætermittatur.* Ne igitur tanti Auctoris commotus sententia, Sacerdotum aliquis religioni sibi ducat Missam aliquando non prætermittere, idcirco rem hanc præ cæteris disserendam explicandamque suscepi.

3. Verum, antequam rem aggrediar, monitos vellem Sacerdotes, exploratum jam esse, eos ratione Ordinis, & officii sui Sacerdotalis, graviter obligari ad Missam aliquoties celebrandam, nisi rationabilis causa excuset. Ita S. Thomas in 3. p. q. 82. art. 10. Suarez disp. 80. sess. 1. Vasquez disp. 252. cap. 1. Wiesner de celebr. Miss. aliique, & patet ex Tridentino sess. 22. cap. 1. de Sacrif. Missæ. Quamvis vero non ita exploratum sit, quando, & quoties in anno ad id obligentur, videtur tamen rationi consentaneum, eam obligationem procedere in præcipuis festis, & maxime in illis diebus, in quibus consueverunt Fideles communicare, ex S. Thoma. Proinde dissertatio verteretur, non circa quamcumque celebrandi frequentiam; aliquam enim vel obligatoriam, vel maxime sibi conducentem Sacerdotes pro certo habere debent: unde aiebat Suarez loc. cit. *Monendi sunt, ut frequenter celebrent; & sua-*

suadendum, contrarium non esse in conscientia securum: sed tota lis erit de frequentia quotidiana.

4. Quo ad differendi modum, eadem incedam via, qua in præcedentibus dissertationibus. Proponam enim casum, ac deinde questionem resolvam, enodatis, quæ contra positionem ipsam adductæ fuerint, difficultatibus. Omnia propemodum ex probatissimis Theologis, ex Ecclesiæ Patribus, ex Sanctorum exemplis depromam. Quidquid vero de meo, ut ajunt, penu protulerim, enitar, ne a communi ac magis recepta Patrum, ac Theologorum sententia discedat.

§. II.

Proponitur, & resolvitur casus.

5. **C**asus est. Titius Sacerdos ab eo die, quo primum ad Aras operatus est, nunquam omisit incruenti hujus Sacrificii celebrationem, ductus ea qua erat in Deum religione ac pietate: verum intelligens, id a nonnullis minime probari, imo a timoratis quibusdam viris Sacrum aliquando prætermitti, conscientia motus, a Theologo sciscitatus est, an, & quatenus licite & convenienter Sacerdos quotidie celebret?

6. *Et supponendo, sermonem esse de Sacerdote, qui nulla sit censura impeditus, qui sit in statu gratiæ, vel, si conscius sit peccati mortalis nondum confessi, sacramentalem de eo Confessionem præmittat, quique denique ea habeat extrinseca a sacris canonibus potissimum instituta ad Sacrificium rite ac reverenter peragendum, v. g. jejunium naturale, vestes sacras &c.*

7. Item supponendo, sermonem esse de quotidiana celebratione excludente aliquot dies juxta Ecclesiæ ritum impeditos, non autem de includente eos dies; nam certum est, nos prohiberi sub mortali celebrare feria sexta in Parasceve, ut habent Hurtado de Sacr. Suarez, Vasquez, Tanner, alique apud Bussembaum: & quamvis Diana, Palaus, alique probabiliter docuerint, posse privatim celebrari Sabbato Sancto, & feria quinta in Cœna Domini, ex variis tamen nuperis declarationibus, ac particularibus legibus alicubi saltem id non licet.

8. Item supponendo, non adesse præceptum ullum Superioris hic & nunc ex justis causis prohibentis alicui sibi subdito sacrificare; nam certe tunc subditus obedire teneretur, ac locum haberet illud: *Melior est obedientia, quam victimæ*. 1. Reg. 15.

9. His suppositis, videtur, non esse licitum & conveniens, per se loquendo, celebrare quotidie. I. Quia Concilia urgendo, & commendando Sacerdotibus frequentiam sacrificandi, nunquam expresse commendarunt, ut id fieret quotidie, sed vel omnibus diebus Dominicis, & festivis solemnibus, ut voluit Concilium Rhotomagense, celebratum anno 1581. vel omnibus diebus solemnibus, & Dominicis, & sæpius, si fieri possit, ut voluit Rhemense can. 8. vel *ter in hebdomada, ac sæpius*, si Sacerdos sit Curatus, ut voluit Aque-

Aquense : ac proinde conjectura primum est assequi , Concilia non existimasse expedientem usum quotidiani Sacrificii .

10. II. Quia in Templo S. Sophiæ apud Constantinopolim , uti narrat Card. Baronius *ad annum Christi 1054.* quamvis plurimi adessent Sacerdotes , non cœptum est sacrificare quotidie usque ad eum annum : unde inferre possumus , apud Græcos per plura secula non viguisse praxim celebrandi quotidie nec respective ad Sacerdotes singulares , nec respective ad integras Ecclesiasticas communitates : imo , teste Raynaudo *tom. 16.* apud Latinos plerique olim religioni sibi ducebant celebrare quotidie .

11. III. Quia apud Religiosas quasdam Familias , puta apud Carthusianos , teste Petro Blesensi , ulius olim viguit non celebrandi quotidie : imo citatus Auctor *in epist. 86.* agens cum Alexandro Carthusiano , qui nutabat in sua vocatione , ex eo quod non poterat quotidie celebrare , negat , eam quotidianam sacificationem esse religionem ; vocat vero superstitionem ; multisque argumentis ductis ex periculo non disjudicandi Corpus Domini , & ex summa munditie ad Sacrificii celebrationem requisita , confirmat , non esse quotidie celebrandum , ac jure eam praxim viguisse apud Carthusianos .

12. IV. Quia S. Franciscus de Assisio videtur fuisse in hac sententia , quod minime conveniret Sacerdotibus quotidiana celebratio ; siquidem *in epist. 12. ad Sacerdotes totius Ordinis* sic habet : *Moneo præterea , & exhortor in Domino , ut in locis , in quibus morantur Fratres , una tantum celebretur Missa in die secundum formam S. Rom. Ecclesiæ . Si vero in loco plures fuerint Sacerdotes , sic sit per amorem charitatis alter contentus audita celebratione Sacerdotis alterius &c.*

13. V. Quia Theologi Morales admittunt , Cappellanum , obligatum celebrare quotidie , posse semel in hebdomada vacare ob reverentiam debitam tanto Sacramento , seu , ut ipsi ajunt , ob honestatem , & decentiam . Ita Gavantus *de Rub. Mis. part. 3. tit. 12. num. 17.* Bonacina , Tamburinus , Toletus , alique apud ipsos videndi . Ergo juxta hos Doctores minus conveniens est quotidiani Sacrificii usus .

14. VI. Demum quia nos in Opusculo præcedenti diximus , regulariter non esse concedendam laicis Eucharistiam plus , quam bis , aut semel in hebdomada : cum autem non solum eadem , sed major etiam requiratur in Sacerdote dispositio ad Sacrificium , sequitur , si coherenter loqui velimus &c.

15. Nihilominus ajo , per se loquendo , licitum ac maxime conveniens esse Sacerdoti quotidie celebrare ; per accidens vero in aliquo raro casu posse esse aliquando religiosum , aliquando etiam obligatorium eidem Sacerdoti , unum , vel alterum diem , aut etiam ulterius , juxta prudentis Confessarii consilium , a sacrificando abstinere .

16. Probo hoc per partes . Et primo quidem , quod , per se loquendo , licitum , ac maxime conveniens sit Sacerdoti quotidie celebrare , suadetur tum praxi SS. Virorum , tum sententia Patrum , ac Doctorum , tum ratione ipsa ex utilitate tanti Sacrificii . Suadetur praxi SS. Virorum ; nam a primis nascentis Ecclesiæ sæculis usus invaluit apud pios Sacerdotes celebrandi quoti-

die .

die. S. Andreas Apostolus testatus est de se ipso: *Ego omnipotenti Deo, qui unus & verus est, immolo quotidie*. De S. Petro hoc affirmat Simon, antiquus Auctor Græcus, apud Turrianum lib. 8. *de dogm. Car.* Idem factum a S. Cassio Narniensi Episcopo, narrat cum laude S. Gregorius 3. *dialog. c. 6.* S. Basilium quotidie Sacrum fecisse, commemorat Amphiloehius in *eius Vita cap. 6.* Hoc idem affirmat S. Dionysius de S. Carpo in *epist. 1. ad Demophylum*; & S. ipse Dionysius ne in carcere quidem a Sacrificio abstinerebat, ut testatur in *eius Vita* Halduinus. Tribuit item S. Ambrosio quotidianam Missæ celebrationem Baronius. Item Scriptor Vitæ S. Laurentii Justiniani ait, Sanctum Virum, etiam valde provecum ætate, quotidie sacrificasse: imo arguere solitum refert eos Sacerdotes, qui, secluso gravi impedimento, quotidianum Sacrificium omitterent. De S. Francisco Borgia Soc. Jesu legitur in lectionibus Breviarii: *Numquam a sacrificando abstinuit*. De S. Cajetano Thienæo memoriæ proditum est, se Neapoli olim Romam contulisse ad hunc dumtaxat finem, ut Prælatum quemdam de non omitendo quotidiano Sacro commonefaceret. Unde, talem fuisse praxim plurium SS. Virorum variis ac diversis temporibus, certum est. Accedit etiam, plures Religiosas domos ex instituto & ex approbatis Regulis habere id in usu. Accedit, id olim in usu fuisse apud Monachos; siquidem Cassianus l. 6. *de spir. forn. cap. 8.* approbat Monachorum suæ ætatis quotidie sacrificantium consuetudinem. Quamobrem ex praxi conitat, quotidianum Sacrificium licitum per se, & expediens esse.

17. Suadetur id ipsum ex sententia Patrum, & Doctorum. Nam tritum est illud Venerabilis Bedæ: *Sacerdos non legitime impeditus, celebrare omittens, quantum in eo est, privat SS. Trinitatem laude & gloria, Angelos lætitia, peccatores venia, iustos subsidio & gratia, in Purgatorio existentes refrigerio, Ecclesiam spiritali Christi beneficio, se ipsum medicina & remedio*. Insuper S. Hieronymus lib. 3. *adversus Pelag.* vocat Missam quotidianam Corporis Christi Sacrificium: quod idcirco dictum exidimat Gonzalez, quia congruum censebat Sanctus Doctor, tantum Sacrificium quotidie peragi a Sacerdotibus. Imo Doctores quidam Canonistæ, ut refert Arch. apud Sylvestrum v. *Missæ q. 7.* docent, peccare mortaliter eum Sacerdotem, qui ex negligentia omitteret quotidie celebrare, innixi dicto B. Ambrosii, scilicet: *Ego, quia quotidie pecco, quotidie debeo accipere medicinam: de Conf. dist. 2. Can. Si quoties*. Tandem eximius Suarez disp. 80. sect. 2. tom. 3. in 3. part. aperte alicrit: *Per se loquendo, & seclusa speciali prohibitione Ecclesiæ, non solum est licitum Sacerdoti quotidie sacrificare, verum etiam ex se melius est, magisque consulendum*. Unde ex doctrina Patrum, & Doctorum, per se licitum & conveniens est quotidie sacrificare.

18. Suadetur id ipsum ratione. Nam quotidie sacrificare, non esse per se illicitum, constat ex eo, quod id non sit ex natura sui malum, sed bonum, neque sit aliquo jure positivo prohibitum. Idem vero esse expediens ac conveniens, conitat ex eo, quod honor maximus per Sacrificium incruentum exhibetur Deo, ac fructus uberrimus non in solum dumtaxat sacrificantem, sed in univertum etiam Orem terrarum inde redundat, ut infra videbimus.

19. Probo jam alteram assertionis partem, nempe per accidens in aliquo raro casu posse esse religiosum abstinere a quotidiano Sacro peragendo. Nam timor aliquis reverentialis, ut recte notat Suarez *tom. 1. de Relig. lib. 3. cap. 2. n. 5.* potest esse actus elicited a religione, v. g. timor de eo, ne quis deficiat in debito cultu Dei. Hinc est, quod, si quis timeat ob urgentem & gravem aliquam occupationem, ne irreverenter & indevote Missam celebret, sique deficiat a debito cultu Dei, & idcirco Missæ celebrationem omittat, eliciet actum religionis. Unde idem Suarez *loc. cit.* expresse docet, quod aliquando *abstinere a frequentia Communionis possit esse actus religionis, & ab ea elicited, sicut odisse irreverentiam Dei.* Verum sedulo cavendum est, ne sub specie ac prætextu nolendi deficere a debito cultu Dei per irreverentiam, studeamus commoditati propriæ, qua nobis a curis temporalibus recedere, ac paulisper in nosmetipsos nos colligere, ut Deo vacemus, & Sacrum debite peragamus. Propterea consilium prudentis Confessarii ad id postulandum & exquirendum erit in casu aliquo occurrente, ne vanus sit ac palliatus noster timor. Accepimus ex Historiis, S. Petrum Celestinum per quinquennium a sacrificando abstinuisse, eo quod reformidaret (uti refert Petrus de Amiari *l. 1. Vita cap. 7.*) tractare tanti mysterii Sacramentum; sed prodigiose fuisse errorem deductum: nam de nocte venit ad eum in visione quidam Abbas nuper defunctus, quique illi habitum Religiosum contulerat; isque illi Missam cum timore & tremore dicere persuasit, ac statim disparuit. Ex quo deprehendes, rarum esse casum, in quo religiose a sacrificando abstineas.

20. Demum probo tertiam assertionis partem, scilicet aliquando esse obligatorium a quotidiano Sacrificio abstinere. Nam, si quis Sacerdos (quod Deus avertat) paulo ante, v. g. nocte, aut die præcedenti peccaverit, præsertim peccato carnali externo, tunc ille, etiamsi pœniteat, & confessus sit, regulariter non evitabit veniale peccatum accedendo ad sacrificandum die subsequenti. Ita Card. de Lugo de *Euch. disp. 15. sect. 1.* ubi sic habet, loquens de talibus peccantibus, ac deinde pœnitentibus: *His quidem regulariter expedit injungere, ut ea die, qua culpabiliter polluti sunt (quod idem de copula illicita intelligitur), abstineant; vix enim accedere possunt absque irreverentia; que sit culpa venialis, nisi forte ratio specialis dicat, esse accedendum &c.* & infra addit: *Raro permittendus videtur aliquis celebrare eadem die post copulam illicitam, licet Confessionem præmiserit.* Unde quamvis ad celebrandum non prærequiratur, quod quis condignam de delictis suis pœnitentiam egerit, sicuti constat ex propositione 22. damnata ab Alexandro VIII. nec prærequiratur amor purissimus, sicuti pariter constat ex propositione 23. ab eodem Pontifice damnata; tamen ex lege naturali, saltem leviter obligante, prærequiritur regulariter, ne quis eadem die, aut die immediate antecedenti peccaverit, peccato præsertim carnali externo. Qua in re non facile audiendi sunt allegantes, & obtinentes necessitatem celebrandi vel propter Cappellaniam, vel propter indigentiam eleemosynæ; siquidem oneri Cappellaniæ ipsi possunt vel per alium satisfacere, vel possunt, juxta multo-

rum sententiam, semel in hebdomada vacare, ac tunc vacent: indigentia vero eleemosynarum unius, vel alterius diei, raro erit tanta, ut præhabenda sit ejusmodi reverentia debita tanto Sacramento. Profecto olim sacri canones, uti habetur in *Can. Presbyter dist. 82.* non nisi post annum & dimidium gravis poenitentia permittebant, ut Sacerdos in fornicationem lapsus, princeps fieret Corporis & Sanguinis Domini: nunc autem nonne esset detestabilis inconvenientia, si quis, ut Sancti Bernardi verbis utar, *auderet intingere in Sanguine Salvatoris carnes nefarias, quibus paulo ante (proh dolor!) carnes meretricias attrectavit?*

21. Stat igitur, per se loquendo, licitum & conveniens esse quotidie celebrare; per accidens vero aliquando religiosum, aliquando etiam obligatorium esse a quotidiana celebratione abstinere.

22. Neque obstant rationes in contrarium supra adductæ. Non prima; nam ex eo quod Concilia, urgendo & commendando frequentiam sacrificandi, non expresserint, ut id fieret quotidie a singulis Sacerdotibus, nequaquam deducitur, quotidianum Sacrificium non esse magis conveniens, sed non esse obligatorium, stando in jure Divino, ac jure positivo communi, & insuper esse onus satis grave respectu omnium. Deducitur igitur, non esse obligatorium; quia certe id expressissent. Et propterea conveniunt Theologi apud Suarez *de Sacr. disp. 80. sect. 2.* non esse obligatos singulos Sacerdotes ad quotidianum Sacrificium: quare, si id ipsi non præstent, relinquunt quidem quod per se est perfectius, sed non delinquant. Item deducitur, quotidianum Sacrificium esse onus satis grave respectu omnium; & idcirco Concilia, legem dum ferrent pro tota communitate, ejusmodi frequentiam non præscripserunt: siquidem lex humana debet esse de re moraliter possibili, nisi commune bonum aliud exigat. Hinc Doctores quamplures ajunt, quod sicubi adesset obligatio celebrandi quotidie, ea intelligenda sit moraliter, & regulariter; quia alias esset onus intolerabile: ex Bonacina *de Euch. disp. 4. q. ult. p. 7.* Tamburino *de Sacr. lib. 3. cap. 3.* aliisque. Dixi, nequaquam deduci, quotidianum Sacrificium non esse magis conveniens; nam ex eo quod legislator aliquid non præscribat, nequaquam inferitur, illud non esse per se magis conveniens. De facto S. Paulus, *De virginibus*, inquit *1. Cor. 7. præceptum Domini non habeo*; & tamen ipse matrimonio virginitatem præfert.

23. Ad 2. esto ita invaluerit usus in eo augustissimo Templo Constantinopolitano propter aliquas circumstantias fortasse talem usum exigentes, certe apud Græcos quotidianum Sacrificium in more positum legimus; nam S. Joannes Chrysostomus *hom. 5. in epist. ad Ephes.* scribit, quotidianam oblationem suo tempore fieri solitam: unde ex ea historia solum confirmatur Theologorum sententia asserentiam, stando in jure Divino, non esse singulis Ecclesiis præceptum quotidianum Sacrificium: quamquam hodie ex jure positivo communi doceant, in singulis Ecclesiis Cathedralibus, Parochialibus, & Conventualibus debere quotidie Sacrificium Missæ offerri, si conveniens sit, seu mediocri Sacerdotum numerus. Ita Doctores *ex Cap. Cum creatura, de celebrat. Missæ.* Quod vero addebatur de Latinis quibusdam religioni sibi ducentibus

tibus quotidianum Sacrificium, non facit contra nos; nam, cum nesciamus, quinam isti fuerint, qua doctrina, & quibus occupationibus, dictamen conscientiae, quod sibi ipsi efformaverant, non potest nobis pro regula ad operandum inservire.

24. Ad 3. Carthusianorum, quos adducit Blesensis, vetus ille usus postea correctus est 2. p. *Statutorum cap. 7.* & idem insinuat in antiqua collatione *Statutorum cap. 1.* ut advertit Buxius *ad epist. 86. Blesensis.* Quæ vero Petrus Blesensis contra quotidianum Sacrificium protulerit, nequaquam sunt attendenda per se, & universaliter; nam intendebat ipse in suscepto vitæ consilio confirmare eum Carthusianum: unde ab uno extremo, in quo tentabatur ille Novitius, visus est ipse in alterum, dicendo, & exaggerando, vergere, more Patrum, qui unam hæresim impugnantes, ad oppositam videntur aliquando accedere.

25. Ad 4. quo ad S. Francisci de Assisio epistolam, respondet Joannes Eckius, epistolam illam non agnosci a Fratribus Ordinis Minorum pro vera S. Francisci epistola. Waddingus autem *ad eum locum* ait, S. Patriarcham agere tantum de Missa conventuali. Placet responsio Raynaudi ingenue facientis, S. Franciscum pro ea qua erat Christiana humilitate, sicuti ea ductus virtute, noluit sibi Sacerdotium, ita eadem timuisse, ne plerique suorum minime essent comparati ad quotidie sacrificandum: ac propterea &c.

26. Ad 5. fateor, Theologos quamplures docere, Cappellanum obligatum toto anno Missas quotidie celebrare, eum posse intermittere, seu vacare semel in hebdomada; at nego, rationem eam esse, quam ex iis nonnulli adducunt, scilicet ne faciant rem illicitam: sed ratio est, quia celebrare toto anno sine ulla intermissione, onus nimis grave est; quod imponere fundator minime præsumitur, cum tale onus redundet semper in Sacerdotem, directe quidem, si ipse sit electus, indirecte, si electus sit locus, ut in eo a Sacerdote celebretur: semper enim celebratio quotidiana Sacerdoti incumbet. Cæterum puto, Bonacinam, aliosque fuisse usos ea ratione de illicito, non quod putaverint, quotidianum Sacrum rem esse per se illicitam, sed quod putarint, attenta fragilitate humana, per accidens in plerisque propter indispositionem fieri illicitam.

27. Ad 6. optime respondet P. Suarez, cujus verba exscribam: *Licet laicis regulariter non sit consulendum, ut quotidie communicent, Sacerdotibus autem consulendum est, ut quotidie sacrificent; est enim id, per se loquendo, melius. Nam minus sacrificandi, non est privatum, sed publicum, nec prodest soli sacrificanti, sed toti Ecclesie; & ideo, dummodo indignus non sit, & moralem ac humanam diligentiam adhibeat, quamvis sit imperfectus, non debet ab hoc munere cessare. Accedit etiam, quod, cum sit specialiter ad hoc munus consecratus, & habet propriam ac peculiare jus ad offerendum, & habet paratum speciale Divinum auxilium, ut sancte conficiat. Per hoc tamen non intendimus negare, quo minus ex reverentia, & timore, aliquo die interdum hoc munus intermittere, possit esse & bonum, & utile, & alicui forsasse consulendum, juxta diversas personarum conditiones, & varias Spiritus*

51 DE QUOTIDIANA CELEBRATIONE MISSÆ

Sancti divisiones gratiarum. Hactenus Suarez *disp. 80. sect. 2. de Sacr.* Ex quibus habes disparitatem laicos inter & Sacerdotes. Hæc autem Suarezii disparitas magis apparebit ex sequentibus.

§. III.

Ad quid nobis datum sit hoc Sacrificium?

28. **U**T plane sibi persuasum habeant Sacerdotes, esse, per se loquendo, melius, ut ipsi quotidie sacrificent, quamvis non sit regulariter laicis consulendum, ut ipsi quotidie communicent, ut aiebat Suarez; imo, ut docet Vasquez *disp. 232.* non eam ex necessitate in Sacerdote ad celebrandum quotidie requiri sanctitatem, quam ad communicandum quotidie, aut bis in hebdomada, in laicis requirimus: ut, inquam, id sibi Sacerdotes persuasum habeant, ac propterea frequenter celebrent, illud intelligant oportet, quod citati Doctores recte expendebant, scilicet Sacerdoti convenire munus sacrificandi non tantum in suam, sed etiam in populi utilitatem: quæ quanta sit, prout erit dignoscere, investigando, ad quid nobis datum sit hoc Sacrificium? de quo itatim.

29. Pius æque ac doctus vir P. Leonardus Lessius in *lib. 12. de Perfectiōibus Divinis* censet, datum esse hoc Sacrificium potissimum ad quatuor. Et primo quidem ad dignitatem religionis Christianæ: cum enim hæc religio sit eminentissima, inquit ipse, decuit etiam, illam ornari, vel potius perfici eminentissimo Sacrificio. Et quidem eminentissimo Sacrificio de facto ornatur; siquidem Missa & est Sacrificium, & maximam quamdam habet excellentiam & dignitatem. Est Sacrificium; nam in consecratione Eucharistiæ verum & proprium Sacrificium offerri docuit Tridentinum *sess. 22. cap. 1. & 2. & can. 1. de Sacrif. Miss.* Alias Ecclesia Catholica nullum haberet Sacrificium; siquidem nec oves, nec boves in Sacrificium offert, neque sub hac ratione incensum adolet, sed ut Deum adoret, & excellentiam illius recognoscat. Accedit, quod sancta illa Hostia, quæ in Missa offertur, ea ratione offertur, ut protestemur supremum Dei dominium in mortem & vitam nostram, & summum ac supremum cultum illi tanquam primo principio & supremo fini nostro exhibeamus. Maximam quamdam habet excellentiam; nam res in eo oblata, est infinitæ dignitatis; siquidem Deo offertur ipse Christus Dominus sub speciebus panis & vini. Modus offerendi, in se, & quo ad substantiam suam, ut sic dicam, est maxime supernaturalis & Divinus; nam offertur illa sacrosancta Hostia, quando vi verborum Consecrationis Corpus & Sanguis Christi ponuntur seorsim, tanquam rei occise & immolate, Corpus sub specie panis, & Sanguis sub specie vini: quo ad sensibilem vero actionem est simplicissimus, mundissimus, & facillimus: offerentes autem licet sint Sacerdotes tanquam Christi ministri, tamen præcipuus ac principalis offerens est ipsemet Christus; tum quia ipse Sacrificium hoc instituit, illique virtutem & efficaciam suis meritis concessit; tum quia credibile est, eum singula Sacrificia, dum actu sunt, Patri suo offerre actu elcito, ut notat Suarez *disp.*

disp. 77. sect. 1. alique. Hinc prima ratio Sacrificii cum sit adtribuendum Deo honorem illi proportionatum, quantum homo potest, sequitur, hanc rationem in hoc Sacrificio cumulatissime reperiri; nam, ut recte expendit Suarez, *ad hunc finem aptissima sunt omnia, quæ in hoc Sacrificio interveniunt, præsertim principalis offerens, res oblata, & modus offerendi.* Unde non est mirum, quod omnia vetera sacrificia abolita sint post institutionem hujus in lege nova; nam, ut recte ait S. Leo *serm. 8. de p.iss. Domini, nunc carnalium sacrificiorum varietate cessante, omnes differentias hostiarum una Corporis, & Sanguinis tui implet oblatio.* Viderint proinde Sacerdotes, ne tantum Sacrificium offerre negligant, obtendentes indispositionem, sed revera laborem se se disponendi reformidantes.

30. II. Datum est hoc Sacrificium ad gratiarum actionem, ut habeamus, quo dignas Deo gratias perpetuo agamus pro ingentibus ipsius in nos beneficiis, maxime redemptionis, ex *Lessio ibidi.* & traditum est a Tridentino *sess. 22. cap. 2. de Sacrif. Missæ.* Hinc Irenæus *lib. 4. contra hæreses cap. 32.* expresse dicit, instituisse Christum hujus Sacrificii oblationem, *ne nos ingrati esse Deo videremur.* Et sane innumera ac maxima sunt beneficia, quibus nos Deus obstrinxit. At nulla potest esse major ac præstantior gratiarum actio, quam quæ hujus Sacrificii oblatione perficitur. Nam ad gratiarum actionem hæc potissimum pertinent: 1. quod homo acceptum beneficium commemoret, & recognoscat: 2. quod retribuat loco & tempore secundum suam facultatem. At, quæso vos, qua re alia magnitudinem beneficiorum Dei magis commemorare, ac cognoscere possumus, quam hoc Missæ Sacrificio, quo testamur, ipsum esse auctorem redemptionis, & salutis nostræ, ipsum misisse Filium in carnem ad nos salvandos, & bonis omnibus cumulandos, ipsius voluntate pro nobis mortem suscepisse, ipsam denique mortem Filii commemoramus, & veluti ob oculos ponimus? Rursum quid præstantius, aut gratius offerre Deo possumus pro acceptis beneficiis, quam Hostiam hanc immaculatam, ipsum Dei Filium Unigenitum? Enimvero opportunus in hanc rem detorquerem verba David in *Psal. 115.* Cum nihil habeam præstantius, quod offeram Deo meo, inquebat ipse, pro tam multis bonis quæ retribuit mihi, *Calicem salutaris accipiam.* Scio, hunc locum magno Patrum consensu intelligi de Calice patientiæ, & tribulationis; sed recte iis verbis utar, & recte verborum sententiam exponam de hoc admirabili Sacrificio. Cum nihil habeam præstantius, quod Deo retribuam, *Calicem salutaris accipiam, & nomen Domini invocabo.*

31. III. Datum est ad peccatorum propitiationem: nam Tridentinum *cit. sess. 22. can. 2.* aperte docuit, hoc Sacrificium non solum propitiatorium esse pro peccatis, sed etiam pro culpis, nec solum pro culpis levibus, sed etiam pro gravibus. Hinc S. Cyprianus in *Serm. de Cæna Dom.* dicit, Eucharistiam esse holocaustum ad purgandas iniquitates. S. Ambrosius *lib. 1. de officiis cap. 48.* de Eucharistia loquens, *Offert, inquit, Christus se ipsum quasi Sacerdos, ut peccata nostra dimittat.* At sciscitaberis, quomodo, & qua ratione hoc Sacrificium peccata dimittat? R. communem sententiam esse, hoc Sacrificium

non habere vim remittendi peccatum mortale instar Sacramenti, ita ut in eo, qui sola attritione dispositus est, mortale peccatum deleat, sicut Sacramentum Pœnitentiæ: deinde neque vim habere hoc modo remittendi venialia, aut conferendi gratiæ, & justificationis augmentum: sed tantum vim habere impetrandi auxilium gratiæ, quo & justificari a peccatis mortalibus, & venialibus, & in justificatione sua homo crescere possit. Unde Tridentinum *cit. sess. 22. cap. 2.* docuit: *Hujus oblatione placatus Dominus, gratiam (excitantem), & donum penitentiæ concedens, crimina, & peccata etiam ingentia dimittit.* Non igitur intelligendum est hoc Sacrificium immediate per se delere peccata, sed mediate, quatenus scilicet impetrat veram illorum contritionem, & inspirationem ad recte pœnitendum specialiter de peccatis cognitis, generaliter de oblitis, vel ignotis. Quandoque vero hic spiritus pœnitentiæ datur tempore Sacrificii, quod pro aliquo peccatore offertur; quandoque alio tempore opportuno, prout Deus providet, intuitu tamen Sacrificii. Sic multi post multa crimina convertuntur speciali auxilio Dei, & nesciunt, virtute Sacrificii Missæ, impetrantis tale auxilium, id fieri. Quandoque aliqui non convertuntur; quia auxiliis a Deo datis non cooperantur, sed abutuntur.

32. Præterea hoc Sacrificium dicitur peccata dimittere; quia, remissa culpa, & pœna æterna per Sacramenta, & etiam culpis venialibus deletis, sæpe ingens debitum pœnæ temporalis restat luendum. Ad hoc autem debitum extolvendum confert quammaxime hoc Sacrificium; applicat enim satisfactionem Christi, uti habet Tridentinum *cit. sess. 22. cap. 1. & 2.* Hinc de Petro quodam pio juvene, qui Missis interesse, ac ministrare consueverat, narrat Cæsarius *lib. 8. mir. c. 13.* *Quadam etiam vice cum ministraturus Missæ Domini Caroli Abbatis quondam Vilarientis confessionem dixisset, & absolutionem devotius acciperet, audiit vocem de Cælo dicentem sibi: Dimissa sunt omnia peccata tua.* Caveant proinde Sacerdotes, ne per negligentiam ac socordiam celebrare omittentes, se ipsos, aliosque privent beneficio tam grandi remissionis peccatorum.

33. Demum datum est hoc Sacrificium ad impetrationem omnis generis beneficiorum, etiam temporalium, quatenus saluti conducunt. Si enim, inquit Lessius, precibus Sanctorum ea sæpe obtineri possunt, quanto magis hoc Sacrificio, in quo id, quod præ omnibus Sanctis Deo est acceptius, & ipse fons sanctitatis cum omnibus suis meritis offertur? Hinc Liturgiæ omnes Jacobo, Clementis, Basilii, Chrysostomi, non semel, inter sacrificandum, orandum præcipiunt pro pace, pro copia fructuum, & pro aliis id genus temporalibus beneficiis. Ac de factis plura a Deo per hoc Sacrificium impetrata esse sacræ testantur historiæ. S. Prosper *lib. de prædicationibus Dei* scribit, suo tempore oblatum fuisse Sacrificium Missæ pro dæmoniaca, atque eam a dæmonis vexatione fuisse liberatam. S. Gregorius *hom. 37. in Evang.* & Beda *4. lib. Hist. Angliæ* scribunt, diversis temporibus idem miraculum contigisse, ut, cum Sacrificium Missæ offerretur pro homine captivo in alia regione posito, & ignorante quid pro se fieret, ejus vincula Divinitus solyerentur ipsa hora Sacrificii. Cum itaque innumera nos circumstent in hoc exilio mala, cum

cum plurimis indigeamus bonis, incuria esset acriter reprehendenda, hoc Sacrificium omittere, quo illa possumus avertere, hæc vero nobis aliisque comparare.

34. Stet igitur illud, simplices Sacerdotes etsi nulla lege ad quotidianam celebrationem astringantur, nihilominus illam maxime eos decere, tum ob Deum cultum & honorem, tum ob Ecclesiæ fructum, tum ob cuiusque utilitatem privatam ac publicam, temporalem ac spiritualem. Quamobrem sibi incumbere Sacerdotes intelligant ita vitam moresque componere, ut quotidie merito celebrare possint: ad idque conducet tum sæpius in hebdomada confiteri, tum singulis diebus aliquid spatii rerum cælestium contemplationi tribuere. Profecto indispositionem ad tantum Sacrificium frustra excusaverint, si dispositionem ultro ipsi neglexerint. Audiant ex Baronio tom. 12. qua ratione ad quotidianum Sacrificium se compararet spectatissimus vir Matthæus Cardinalis Episcopus Albanensis: *Servabat in palatio instituta claustrum, & mundo expositus, firmo & longo usu, velut innato religionis proposito, a secularibus vanitatibus se quasi septo firmissimo secernebat; cohibebat se intra se, nunquam (sicut de quodam dictum est) magis solus, quam cum aliis, nunquam magis negotiosus, quam cum solus erat. Præferebat cunctis operibus suis, omnibusque sanctis studiis, sacrificandi Deo illam suum quotidianum usum, a quo nec rei familiaris cura, nec multiplex occupatio, nec ipsa continua post Summum Pontificem omnium Ecclesiarum sibi imposita sollicitudo eum retrahere poterat.*

35. Utinam pium hoc exemplar imitantes nos Sacerdotes, & Sacrificium frequentemus, & debitam ad Sacrificium dispositionem afferamus.

ADDITIO.

36. **U**T satisfaciam Typographo requirenti uberiores materiam ad absolvendum hoc Opusculum juxta regulas suæ artis, nonnulla exscripsi ex Gobato *tract. 3. de Missæ Sacrificio num. 448.* Quærit igitur hic Auctor, an, & quæ censuræ arceant Sacerdotem a jure sacrificandi? Cui quæsitio ipse sic respondet: Illum arcere excommunicationem majorem, juxta *Cap. Cum illorum de sent. excomm.* omnesque Doctores post S. Thomam *q. 52. art. 9.* observantem, esse etiam nefas, audire Missam excommunicati, sicut & concubinari: item excommunicationem minorem; privat enim hæc perceptione Sacramentorum, ex textu in *Cap. penult. de sent. excomm. II.* respondet sic: *Suspensio a Beneficio non utique privat jure sacrificandi; privat autem suspensio ab Ordine, Cap. Litteras, de temp. ordinat. & Doctores ibid. III.* sicuti interdictum personale, seu latum in personam directe, privat jure sacrificandi quocumque loco, ita locale jure sacrificandi in loco, qui interdictus est, Doctores in *Cap. Non est vobis, de sponsal. Cap. Quod in te, de penit. & remiss. IV.* degradatio, ac depositio, licet non sit proprie censura, quandoquidem est quidem poena, sed non est medicinalis, aufert tamen jus ad Altare, *Cap. 2. de penis in 6.* Doctores cum Palao *de Cens. disp. 8. punct. ult.*

37. Irregularitas quoque licet non sit proprie censura, attamen irregularis ad.

ad Ordines suscipiendos, vel exercendos, peccat utique mortaliter sacrificando: Doctores omnes tractantes de hoc argumento. Licet autem quis irregularis suscipiat vel bona, aut mala fide Ordinem Sacerdotalem, in eoque bona, aut mala fide semel, aut sæpius exequatur Divina, non tamen idcirco incurrit ullam censuram, sed prior quasi suspensio identidem permanet. Ita ego abhinc decennium respondi interrogatus in casu, qui tunc contigerat; traditque aperte Filliucci *tract. 19. cap. 3. num. 69.* Ratio est; quia in toto jure non reperitur ulla nova pœna decreta huic delicto: sicuti etiam in recentissimo eventu resolvi cum communi Doctorum apud Avilam *de Cens. p. 3. disp. 5. dub. 7. not. 10.* Religiosum, qui ex errore prorsus inculpabili fuerat ordinatus Sacerdos paulo ante legitimam ætatem, non potuisse primam Hostiam Deo offerre, nisi in legitima ætate, aut per dispensationem Pontificis &c.

38. Querit idem Doctor, an qui per contritionem perfectam resipiscit a peccato, ob quod erat percussus anathemate, licite peragat Sacrum, priusquam sit absolutus a Confessario, vel a Judice fori externi? Respondet 1. non licite peragere publice, si excommunicatio fuit publice nota; dat enim non levem causam gravis scandali. Respondet 2. imo nec privatim: Suarez *in 3. part. tom. 5. disp. 9. sect. 3.* expresse dicens, fore absurdum, si quis hoc diceret. Consentit in hoc Tannerus *cit. disp. 6. quest. 19. num. 112.* quamvis videatur contradicere Navarrus *in Ench. cap. 27. num. 18.* Ratio est; quia, manente causa, manet effectus. Atqui certum est, quod ille sit nihilominus in foro Ecclesie excommunicatus, cujus excommunicationis effectus est privatio Sacrificii &c. Hactenus Gobatus, quem vide, si lubet.



DE UBERIORI FRUCTU SACRIFICII

IN LOCO SACRO, QUAM IN CAPPELLA PRIVATA.

OPUSCULUM IV.



UM pro ea qua est benignitate Sedes Apostolica recte aliquibus indulgere consueverit, ut in loco non sacro Missas celebrent, vel respective celebrare faciant, illud cavendum est, ne qui ejusmodi privilegio potiuntur, in ipsius usu modum excedant, & ne præcepti loco habere videantur, quod in unius vel necessitatis levamen, vel alterius justæ causæ favorem gratiose permittitur.

2. Facturum propterea me operæ pretium existimavi, si pro viribus eniterer, ut ejusmodi privilegiarii parce ac discrete permitta sibi facultate utantur, & sacrosancto Missæ Sacrificio in Ecclesia, quoad fieri potest, devote ac frequenter intersint. Quod sane ut assequar, opportunum arbitror, iis omnibus ostendere, uberiorem esse fructum, qui ex Sacrificio in Ecclesia & loco sacro peracto descendit, quam qui ex eodem in privatis ac domesticis Oratoriis celebrato sive ad celebrantem ipsum, sive ad præsentem dimanat.

3. Et quidem triplici unijs Opusculi Parte rem totam conficiam. In prima præliminares quasdam hac super re notiones proponam. In altera id ipsum, quod intendo, curabo, ut evincam. Postremo difficultatibus, quæ se se offerre poterunt, copiose satisfaciam.

PARS PRIMA.

NOTIONES DE LOCO SACRIFICII PROPONUNTUR.

4. S Emper in Ecclesia Dei custoditum fuit jam inde ab Apostolorum tempore, ut sacrosanctum Missæ Sacrificium in Ecclesia, vel loco sacro, ad eum finem peculiariter deputato, perageretur; nam sicuti in lege veteri nefas erat extra Templum Hierosolymitanum victimas immolare, uti expendit Cardinalis Bona *lib. 1. cap. 19. Liturg.* ita in lege gratiæ sacra quædam loca Apolloli primum, ac deinde eorum successores deputarunt, extra quæ tremendum hoc Sacrificium offerre, jure communi & ordinario minime liceret. Locuples rei hujusce testimonium dat S. Paulus 1. Cor. 11. *Convenientibus vobis in unum, jam non est Dominicam cenam manducare: & infra: Numquid domos non habetis ad manducandum, & bibendum, aut Ecclesiam*
Tom. III. H Dei

Dei contemnitis? Ubi nomine Ecclesiæ, non Fidelium congregationem, sed locum illum, seu Templum intelligit, in quo Fideles ad Christi Corpus offerendum & manducandum conveniebant, teste Chrysostomo, Ambrosio, & reliquis Auctoribus Græcis & Latinis apud Suarez de *Euch. disp.* 8. l. 1. *sect.* 1. Præterea ostendit Baronius ad annum Christi 57. Romæ & alibi fuisse ab Apostolis erectas ac deputatas Ecclesias, in quibus Fideles ad Divina mysteria se recipere: quod & ejusdem temporis Scriptoris S. Ignatii Martyris *ep.* 6. 11. & 13. expressis testimoniis confirmatur. Quinimo, antequam ejusmodi Ecclesiæ essent erectæ, adhibebantur quidem ad talem effectum privata domus, sed in iis ampliora earum membra, quæ cœnacula dicebantur, specialiter erant constituta ex legitima auctoritate, quæ ejusmodi ministeriis intervirent; unde non privata quædam Oratoria, sed interiores quodammodo Ecclesiæ, uti nunc sunt in aliquibus urbibus heterodoxis, ea esse videbantur. Post erectas autem Ecclesias, in domibus Sacrificium celebrare jure ordinario non licuit, nisi urgente necessitate; etenim S. Felix IV. qui fuit avatus S. Gregorii, & floruit anno Christi 526. testatur in sua epistola decretali de *Ecclesiæ*, & *Altarium consecratione*, antiquis canonibus prohibitum fuisse, ne sacra Missarum solemnia alibi, quam in locis Deo sacratis, magna necessitate excepta, ullus celebrare præsumeret.

5. Et quidem merito, tum ad debitam reverentiam hujus tremendi Sacrificii, ut cum debito honore tractaretur, tum etiam ob majorem Fidelium devotionem. Ex quo inferunt Theologi, transgressionem hujus præcepti ex suo genere esse peccatum mortale; quoniam jura simpliciter dicunt, hoc non licere, & loquuntur tanquam de re gravi & maxime necessaria, quæ prætermittenda non sit, nisi in summa necessitate: ut constat ex *Can. Sicut, de Consecrat. dist.* 1. & *ibid. Can. Hic ergo, & Can. Nullus*. Do ipsum textum in *Can. Sicut*, ex quo dilucide apparet, quam severe veteres canones celebrationem Missæ in locis non sacris interdiciant: *Sicut non alii, quam sacri Domino Sacerdotes debent Missas cantare, nec Sacrificia super Altare offerre, sic nec in aliis, quam Domino sacratis locis, idest in tabernaculis Divinis, precibus a Pontificibus delibatis, Missas cantare, aut Sacrificia offerre licet, nisi summa coegerit necessitas. Satius ergo est Missam non cantare, aut non audire, quam in illis locis, ubi fieri non oportet, nisi pro summa contingat necessitate: quoniam necessitas legem non habet. Unde scriptum est: Vide, ne offeras holocausta tua in omni loco, quem videris, sed in omni loco, quem elegerit Dominus Deus tuus. In domibus tamen ab Episcopis, sive Presbyteris oblationes celebrari nullatenus licet.*

6. Dixi, in locis non sacris non licuisse celebrare, nisi urgente necessitate; tum quia hanc exceptionem expresse faciunt sacri canones, ut apparet ex textu jam citato; tum quia accepimus ex historiis, sæviente persecutione, Christianos, quocumque in loco decenti poterant, incruentum Sacrificium obtulisse. Sic in carceribus sacrificari consuevisse, ex Actis Sanctorum Processi, & Martiniani, Clementis Ancyran, aliorumque Martyrum passim didicimus. Legimus etiam, S. Apollinarem Episcopum & Martyrem turgurum habuisse

habuisse extra muros civitatis, ad quod Christiani furtive conveniebant, in quo & Missas celebrabat, & ex vicino mari sumpta aqua baptizabat. Imo refert Simeon Metaphrastes, S. Paphnutium Abbatem, eo quod eremum inco-
leret, nec facilem haberet ad urbes accessum, in sua cella Sacrum peregrisse; necessitas enim, ut optime agebat citatus canon, legem non habet: quamquam recte notant Theologi, in casu necessitatis non esse pratermittendam legitimi Superioris facultatem, si peti possit; si autem non possit, tunc sufficere necessitatem solam: ex Suarez *disp. 81. sect. 3.*

7. Dixi etiam, de iure communi & ordinario; nam ex licentia legitimi Superioris licet, & etiam olim licuit extra Ecclesiam sacrificare in privata domo, seu Oratorio non consecrato, nec benedicto. Quod liceat, patet ex usu, & ex Indultis Apostolicis concedentibus facultatem celebrandi in privatis Oratoriis. Quod olim etiam licuerit, ostenditur primo ex iure; nam in *Can. Missarum, dist. 1. de Consecrat.* habetur sic expresse; *Missarum solemnia, non ubique, sed in locis ab Episcopo consecratis, vel ubi ipse permiserit, celebranda esse censemus.* Deinde ostenditur ex facto; nam de S. Ambrosio, qui floruit circa annum 354. meminit Paulinus in *eius Vita*, eum aliquando invitatum fuisse trans Tyberim ad quemdam virum, ut Sacrificium in domo sua offerret. Præterea extat S. Gregorii Magni epistola ad *Joannem Episcopum Syracusanum*, in qua *l. 5. ep. 43.* ad evitandas contentiones cum provinciarum Præfatis, & ad eos officii promerendos, ipsum adhortans monet, ut Missas in domo Venantii præfecturam illic gerentis celebrari permittat, imo, si ille voluerit, ipsemet accedat, & Missam apud eum celebret. Ex quibus satis intelligitur, jam tunc in domibus etiam privatis consuevisse dici Missas, ut expendit Spondanus ad annum Christi 596.

8. Quamquam vero hæc ita se habeant, illud tamen exploratum est, intentionem Ecclesie semper fuisse, ut, quoad fieri possit, Missa in Ecclesia, aut locis sacris celebretur; nam, præter citatos supra canones, aliosque *Can. 14. Can. 15. & Can. 25. de Consecrat.* novissime sacrosancta Tridentina Synodus *sess. 22. in decret. de observandis in celebratione Missæ*, Episcoporum facultatem coarctavit in concedendo licentiam celebrandi extra locum sacrum, illisque injunxit sic: *Neve patiantur, privatis in domibus, atque omnino extra Ecclesiam, & ad Divinum tantum cultum dicata Oratoria, ab eisdem Ordinariis designanda, & visitanda, sanctum hoc Sacrificium a secularibus, aut Regularibus quibuscunque peragi &c.* Huic Concilio generali consonat Provinciale Concilium Rhemense habitum anno 1583. inquit: *Extra Ecclesiam, & Oratoria Divino cultui dicata, nemini rem sacram facere liceat.* Item Concilium Bituricense anno 1584. *Missæ neque in profanis locis, neque in privatis domibus celebratur.* Item Concilium Tolosanum anno 1590. *In Ecclesiis tantum publice, non privatim in aditu Oratoriis ab Episcopo non temere unicuique concedendis, nisi pernecessarium sit, accedatque Episcopi venia, celebrentur.* Item Concilium Mediolanense I. habitum anno 1585. *p. 2. tit. Quæ pertinent ad celebrationem Missæ &c. Missæ non dicendæ in Cappellis domorum secularium, nisi cum licentia Episcopi, & hac ad solum semestre dyres &c.* Ex quibus san-

tionibus, & limitationibus proum est colligere, mentem Ecclesie esse, ut Missa nonnisi in locis sacris, quoad fieri possit, celebretur.

9. Quod uberius etiam elucescet ex decretis Romanorum Pontificum; siquidem, ut vetera prætermittam, postremis temporibus clar. mem. Paulus V. *sub die 10. Martii 1615.* ademit Episcopis potestatem concedendi licentiam celebrandi in domibus, aut locis non sacris, uti narrant Fagnanus *tom. 5. pag. 286.* & Pignatellus *tom. 6. consul. 98.* alique: quod idem deinde confirmavit Urbanus VIII. uti testantur Diana, Portel, Reiffenstuel, & alii. Clemens vero XI. *anno 1703.* sancivit quamplura restrictiva antiquarum præsentiarum facultatum circa uſum Altaris portatilis, & Missarum celebrationem in Oratoriis domesticis, reddens optimam rei hujusce statim ab initio rationem his verbis: *Quoniam sancta sancte tractanda, ac præsertim tremendum inuenienti Sacrificii mysterium, quod omni religionis cultu ac reuerentia est peragendum.* Hoc porro decretum Benedictus XIII. in Concilio Romano *rit. de celeb. Missarum cap. 2.* per Episcopos publicandum, & observandum præcepit. Quare satis aperte colligitur, Romanorum Pontificum animum inclinare, ut Fideles a celebrando in privatis Oratoriis, & locis non sacris, quoad fieri potest, abſtineant; siquidem ejusmodi celebrationis facultatem difficilem reddere pro temporum ac circumſtantiarum exigentia magis ac magis intenderunt.

10. Romanis Pontificibus, & Conciliis aſtipulantur, ut par est, Ecclesie Doctores; nam ex Ecclesia Græca S. Basilii *in reg. brevior. reg. 310. Quemadmodum, inquit, ratio non permittit, quod eas ullum commune in sancta introferatur, eodem modo etiam vetat Sancta in domo communi celebrari.* Ex Ecclesia vero Latina Angelicus S. Doctor *3. p. q. 83. art. 3.* expressè docet, quod regulariter non liceat celebrare hoc Sacramentum, nisi in locis consecratis. Et quidem in hac sententia semper fuisse Patres tum Græcos, tum Latinos, fuisse ostendit contra Waldenses, aliosque Novatores eruditissimus Jodocus Coccii *lib. 6. de Euch. art. 17.*

11. Quamobrem, etsi nonnullis liceat ex Sedis Apostolicæ privilegio Missam in Oratorio privato suæ domus celebrare, vel celebrare facere, iis tamen incumbit privilegii hujusce uſum ita temperare, ut non longe a piæ matris Ecclesie intentione ac desiderio discedant, quæ uſum Oratorii indulget quidem, at, sicuti expressit in suo Concilio Mediolanensi I. *p. 2.* S. Cardinalis Carolus Borromæus, optaret, ut Oratoriis privatis raro uteremur pro Missa.

12. Profecto aiebat Apostolus *1. ad Cor. cap. 6.* *Omnia mihi licent, sed non omnia expediunt:* in quem locum appositè admodum S. Bernardus *lib. 3. de consider. ad Eug. Spiritualis, inquit, homo omne opus suum trina consideratione præveniet: primo, an liceat; deinde, an deceat; postremo, an expediat: nam etsi constat in Christiana: utique philosophia non decere, nisi quæ licent, non continuo tamen omne, quod licet, decere, aut expedire, consequens est.*

13. Licit itaque privilegiariis uſus Oratorii privati pro Missa. Libenter id do: at non continuo ejusdem uſum præsertim frequentem decere, aut expedi-

pedire consequens erit. Quod ut planum fiat, jam nunc illud ostendere aggrediar, quod ab initio mihi proposueram, videlicet uberiorem esse fructum Sacrificii in loco sacro.

PARS SECONDA.

PROPONITUR, ET PROBATUR UBERIOR FRUCTUS SACRIFICII IN LOCO SACRO.

§. I.

14. **D**uplex est fructus Sacrificii: alter ex opere operato: alter ex opere operantis. Uterque uberior est ex Sacrificio in loco sacro. Et quidem, quod attinet ad fructum ex opere operato, præmittendum est primo, vim inesse Sacrificio Missæ, ex institutione, & promissione Christi, impetrandi nobis aliquid; nam tale Sacrificium proprie solum est impetratorium, ex Bellarmino de Miss. lib. 2. cap. 4. Cum autem dicitur propitiatorium, vel satisfactorium, id est intelligendum ratione rei, quæ impetratur: dicitur enim propitiatorium, quia impetrat remissionem culpæ; satisfactorium, quia impetrat remissionem pænæ; meritorium, quia impetrat gratiam beneficiendi, ac merita acquirendi. Unde ex opere operato, seu independentè a bonitate & dispositione ministri, habet impetrare illi, pro quo offertur, non ponenti obicem, & capaci, bona spiritualia, ac temporalia; cum hac tamen differentia, quod habet impetrare aliqua infallibiliter, ut remissionem pænæ temporalis post deletam culpam in homine iusto, ex Vasquez disp. 229. aliqua vero conformiter placito Divinæ providentiæ, ut remissionem culpæ, auxilia gratiæ, donum perseverantiæ &c. Ubi notant cum Bellarmino Doctores, Sacrificium Missæ non esse instrumentum immediate producens ejusmodi effectus ad instar Sacramentorum, sed mediate, quatenus impetrat auxilia & dona ad ejusmodi effectus: quamquam non negent, quod in ordine ad tollendas pœnas temporales, remanentes post remissam culpam, non solum habeat vim ad impetranda auxilia opportuna pro earum congrua satisfactione, sed insuper ex Christi institutione habeat hoc, ut applicetur Christi passio ad eas tollendas tum in vivis, tum in mortuis.

15. Præmittendum secundo, effectum hunc remissionis pænæ temporalis, quem infallibiliter diximus evenire ex hoc Sacrificio in homine iusto, probabilius crescere in eo, pro quo offertur, ex meliori ipsius dispositione sive habituali, sive etiam actuali: quod proportionaliter intelligendum est de aliis effectibus, qui eveniunt ex Sacrificio, conformiter placito Divinæ providentiæ. Ratio est 1. quia hæc videtur esse sententia S. Thomæ q. 79. art. 5. ubi de hac oblatione dicit: *Quod sit satisfactoria illis, pro quibus offertur, vel etiam offerentibus, secundum quantitatem devotionis: & art. 7. ad 2. dicit: Illud tamen prodest plus, vel minus, secundum modum devotionis eorum: & idem censent Card. de Lugo de Euch. disp. 19. sect. 10. num. 200. Caltropalaus tract. 22. de Euch. disp. unic. p. 6. aliiq. cum Vasquez: 2. quia Sacramenta conferunt effectum suum majorem, vel minorem, secundum mensuram dispositio-*

stionis, & devotionis illius, cui conferuntur: cum autem non appareat verisimilis quo ad hoc disparitas inter effectum Sacramenti, & Sacrificii, cum uterque sit ex opere operato, videtur omnino tenendum, quod etiam effectus Sacrificii eo major & uberior sit, quo fuerit maior devotio illius, pro quo offertur.

16. His præmissis, ut evincam, quod mihi propositum est, uberiorem esse fructum ex opere operato Sacrificii celebrati in loco sacro, quam celebrati in privato ac domestico Oratorio; nihil aliud faciendum superest, quam evincere, maiorem, per se loquendo, ac regulariter esse devotionem eorum, pro quibus offertur Sacrificium, & intersunt eidem in loco sacro, quam eorum, pro quibus offertur & intersunt in privato Oratorio.

17. At id evincere expeditissimum, ut arbitror, est. Etenim Templum, seu Ecclesia specialem efficaciam habet, ratione consecrationis, ad excitandam in nobis devotionem, uti expresse docet S. Thomas 3. p. qu. 83. art. 3. Ecclesia; inquit, & Altare ex consecratione adipiscuntur quamdam spirituales virtutes, per quam apta redduntur Divino cultui, ut scilicet homines devotionem quamdam exinde percipiant, ut sint paratiores ad Divina. Accedit præsentia Angelorum, qui nostram devotionem promovent; nam credibile est, aut semper, aut frequentissime, in Templis Angelos adesse. Quare Iosephus lib. 7. de bell. Judaic. cap. 12. scribit, in Templo Salomonis, paulo ante quam everteretur, auditas voces: *Migremus hinc*: quas Angelorum fuisse deferentium eum locum, communis opinio est. Præterea adest nobis in Ecclesia Deus ipse per singularem quamdam protectionem, & virtutem: siquidem in lib. 2. Machab. cap. 3. legimus, dixisse Heliodorum: *In loco illo est vere Dei virtus quædam; nam ipse, qui habitat in Calis, visitator, & adiutor est loci illius*. Quare negari non potest, maiorem, per se loquendo, in Ecclesia, quam alibi, devotionem nos habere, & consequenter uberiorem in loco sacro ex Sacrificio fructum emanare.

18. Id ipsum ulterius suadet ex eo, quia in Ecclesia sunt omnia accomodata ad excitandam devotionem, uti expendit Card. Bellarminus de Cult. Sanct. lib. 3. cap. 4. nam sacræ functiones, Reliquiæ, parietes Deo dicati, præsentia mediatoris Christi corporaliter in Eucharistia, movent nos ad pietatem, nec possunt non incutere menti religiose horrorem & reverentiam.

19. Adde his absentiam dæmonis, quæ removendo nostræ devotionis hostem, devotos nos ac dispositos facit esse recipiendo uberiori fructui Sacrificii; nam sicut templa Gentilium polluta sunt & immunda, quia sunt domicilia dæmonum, ut patet ex S. Gregorio lib. 3. Dial. cap. 3. ita contrario, inquit Bellarminus loc. cit. Templa Dei sancta sunt, quia dæmonibus carent: etenim idem S. Gregorius lib. 3. cap. 30. Dial. scribit, post consecrationem Templi, quod antea Arianorum fuerat, diabolum inde egressum sensibilibiter in specie suis maximo strepitu. Quare, cum in Ecclesia & removeatur prohibens nostram devotionem, & adsint incitamenta nostræ devotionis; illud plane consequitur, nos ibi regulariter esse magis dispositos, atque idcirco recipere uberiorem fructum proveniente a Sacrificio ex opere operato, uberiorem scilicet remissio-

tionem pœnæ : nam , ut optime aiebat Valquez *disp. 231. cap. 7. Sicut certum est inter Auctores , ad effectum hujus Sacrificii nullam actionem præster statum gratia requiri , ita etiam citra controversiam est , eo esse majorem fructum Sacrificii , quo fuerit melior dispositio .*

20. At duo sunt , quæ argumenti vim apud aliquem infirmare possint : alterum est , quod majorem devotionem nonnulli experiantur in Oratorio privato , quam in Ecclesia : alterum , quod in publica Ecclesia non raro plura sensibus obijciuntur , quæ a devotione nos avocant , v.g. apparatus , ornamenta Ecclesiæ , cantus musici , ac præterea strepitus , & occurus multorum , qui illuc se conferunt &c. Verum facilis est responsio . Nam ad 1. h. devotione n esse in duplici differentia . Alia consistit in actu humano deliberato ac speciali religionis , quo se se aliquis Divino cultui & honori addicit ex affectu colendi Deum ; & hæc est præcipua & maxime propria devotio . Alia se habet per modum passionis , & cujusdam delectationis ac suavitatis ; & hæc est veluti accidentalis devotio . Jam vero , si loquamur de prima ac substantiali devotione , ea semper , cæteris paribus , major est ratione materiæ in justo audiente Missam in loco sacro , quam audientem in sua privata domo ; siquidem ille addicit se Divino cultui , exhibens actum exteriorem magis proportionatum , & magis accommodatum ad significationem honoris & præminentiam : majorem enim de Deo æstimationem manifestat se habere , qui ad Ecclesiam se confert , ut Deo sacrosanctam victimam offerat , quam qui domi suæ absque necessitate , & sola ductus commoditate , Sacrificium celebrat , vel celebrare facit .

21. Si autem loquamur de accidentalī devotione , nempe de ea delectatione , suavitate , ac fervore &c. non inficior , eam aliquando majorem posse reperiri in audiente domi suæ Sacrificium ; siquidem , cum Spiritus Sanctus sit propria causa talis devotionis vel per gratiam prævenientem , vel per gratiam operantem & cooperantem respective , notum est , quod *Spiritus ubi vult spirat* ; unde potest quis domi suæ audiens Sacrum , experiri majorem devotionem accidentalem , quam audiens in Ecclesia : at nihil hinc infertur contra nostram assertionem : nam id esset per accidens , & nos locuti sumus per se , & regulariter : deinde hæc accidentalis devotio consistens in ea delectatione ac suavitate , licet sit bona , & sublevet nos ad bona opera , tamen , si non deveniat ad deliberatam ac substantialem devotionem , nihil proderit ad recipiendum uberiorem fructum Sacrificii : substantialis autem devotio major est ratione materiæ , ut diximus , in audiente Sacrum in Ecclesia , quam in audiente Sacrum domi suæ . Tandem quædam suavitas , delectatio , ac fervor , non semper est devotio , non semper est quid supernaturale a Spiritu Sancto proveniens : multoties est mera passio , proveniens ex variis naturalibus circumstantiis , ex corporis complexione &c. inde ea non est tanti , ut propter illam expediat domi suæ Missam audire , & non in Ecclesia .

22. Hæc ad 2. Ea quæ sunt in Ecclesia , vel sunt Ecclesiæ propria , ut cantus sacri , ornamenta &c. vel sunt extranea & fortuita , ut occurus hujus , vel alterius personæ &c. Prima non sunt apta nata , ut distrahant , sed

§ 4 DE UBERIORI FRUCTU SACRIFICII &c.

ut excitent devotionem : quod si aliqui distrahantur, est vitium illorum qui abutuntur rebus bonis. Posteriora autem, nempe extranea, nostræ devotioni nequaquam officient, si ea modestia, & ea intentione fuerimus in Ecclesia; qua in illa esse, illamque adire nos oportet; præsertim cum in Ecclesia alia sint pietatis incitamenta, ut diximus, nec in ea sinantur a Deo grassari dæmones eo modo, quo in aliis locis: quod certe est valde notandum; nam, si in Ecclesia est aliquando homo qui nos a bono removeat, domi est non raro diabolus, qui ad malum nos pertrahit.

§. I L.

23. Hactenus de uberiori fructu ex opere operato: inspicendum jam est, uberiozem esse etiam fructum ex opere operantis, per se loquendo. Pro quo præmittendum est, unum idemque opus bonum uno eodemque tempore esse ex opere operantis, & meritorium, & impetratorium, & simul etiam satisfactorium; quia, cum sit opus bonum, mercedem aliquam in Cælo bonis omnibus operibus a Deo promissam meretur: & quia idem ipsum opus bonum est, aptum est etiam movere Deum, ut intuitu illius ea in bene operantem beneficia conferat, quæ ipse a Deo impetrare cupit: denique, quia hoc ipsum opus est bonum, compensat aqualiter mala illa opera quæ fecimus, præsertim si opus hoc bonum sit arduum, & laboriosum; quo enim plus in aliquo bono opere molestiæ & laboris subeundum est, eo nobilior a nobis præstatur satisfactio: & quoniam in omni fere opere bono aliqua ob corruptæ naturæ perversitatem superanda occurrit difficultas, vix invenitur actio bona, quæ non sit etiam ex hoc capite satisfactoria.

24. Hoc præmissis, perspicuum fiet, Sacrificium Missæ in loco sacro uberiozem fructum parere ex opere operantis, si ostendero, in tali loco illud, per se loquendo, esse magis meritorium, magis impetratorium, & magis satisfactorium, quam sit, cæteris paribus, in Oratorio privato. Agemus porro initium faciamus a merito.

25. Meritum, ajo, uberius derivari ex Sacrificio in loco sacro; etenim certum est per Theologos, multitudinem bonorum operum, & eorum excellentiam per se conferre ad augmentum meriti, si cætera sint paria, ex Suarez *lib. 12. de mer. cap. 20.* aliisque. At quam multa, quam excellentia exercentur bona opera ab offerente Sacrificium, eidemque interessente in loco sacro, quæ non exercentur, per se loquendo, ab offerente, & interessente in privato Oratorio? In primis exercetur actus Fidei vividior ac perfectior de tam tremendo Sacrificio, ac de veneratione illi debita; quam excellentes Templum, ac nolentes uti privato Oratorio, re ipsa fatentur, Sacrificium Missæ esse quid præstantissimum, ac proinde illi deberi locum præstantissimum, qualis est locus sacer. Sane laudata est Centurionis fides a Christo Domino, quod se indignum pronunciavit, sub cuius tectum Christus intraret. Sic pariter ab Angelis eorum Christianorum fides laudabitur, qui ob reverentiam noluerint in propria domo victimam illam sacrosanctam Deo offerri, &c.

Uni-

Unigenitum Patris æterni e Cœlo per Consecrationem inter profanos parietes advocari nequaquam permiserint. Deinde exercetur actus Charitatis valde commendandus erga nostrum proximum, qui aliorum, ac præsertim virorum nobilium exemplo ducitur ad cultum Deo dandum, & ad Sacrificii causâ Templum adeundum. *Luceat lux vestra*, (inquit Christus Dominus *Matth. 5.*) *coram hominibus*, ut videant opera vestra bona: non quidem, sicuti exponit hic S. Augustinus *serm. 2. de verbis Domini*, ut vos glorificemini, sed ut glorificetur Pater vester, qui in Cœlis est. Id exigit scilicet Charitas, ut ad Dei cultum aliis exemplo & incitamento sumus. Id præstant illi, qui publice in Templis Missæ interfunt, non vero, quantum est ex hoc capite, illi, qui privatim in domestico Oratorio Sacrificium celebrant, vel coram se celebrare faciunt. Hinc de multis Sanctis Regibus accepimus, consuevisse publice in Ecclesia aliquoties in singulos menses Divinis mysteriis vacare, ut suis subditis bonorum operum præberent exemplum, eosque ad sanctæ ac religiose vivendum adducerent. Imo cum olim Victorinus, insignis Philosophus, ac Senator Romanus, affirmaret S. Simpliciano, se esse Christianum, optime illi reposuit Sanctus Antistes: *Non credam, nec te inter Christianos reputabo, nisi in Ecclesia te videro*. Nimirum Christiani hominis est non erubescere Evangelium, & aliis bonorum operum exercitio præluere. Tertio auditio, vel celebratio Missæ in loco sacro præfert actum religionis perfectiorem; nam, supposita fide de tam venerabili Sacrificio, & de infinita majestate Dei, actus religionis est professio non solum interior, sed etiam exterior de eo quod nos Deum, & Sacrificium magni facimus: at quis non videat, perfectius nos id profiteri, cum laborem & incommodum viæ sponte suscipimus, ut Templum adeamus, ibique Sacrificio præsentem? Adde etiam, obedientiam Ecclesiæ piæ Matri nos singularem exhibere in tali auditione; nam obedientiam plurimum observat, qui alicui obedit non solum in re obligatoria, sed etiam in ea, in qua nihil aliud, quam desiderium superioris sine ullo expresso præcepto cognoscitur: quare, cum desiderium Ecclesiæ sit, ut Sacrificium, quoad fieri potest, in Templo offeratur, singulariter nos illi obedi-mus non utentes ad talem effectum Oratorio privato, sed Templum adeuntes. Præterea exercemus etiam actum Christianæ humilitatis; nam, teste Lessio *lib. 4. cap. 4. dub. 6.* actus hujus virtutis est, in externis rebus & functionibus amplecti semper id, quod habet minus honorificentie ac singularitatis: cum autem celebrare, vel celebrare facere in Oratorio domestico, habeatur tanquam signum specialis alicujus prærogativæ, & ideo perhonorificum apud nonnullos æstimetur, erit hujus etiam virtutis actus nolle identidem hoc suo privilegio Oratorii privati uti, sed cum aliis ad publicas Ecclesiasticas Sacrificii causâ se se conferre. Tot igitur ac tam præclaris Christianarum virtutum actibus concomitantibus, per se loquendo, Missæ oblationem in loco sacro, illud plane consequitur, uberius ex ea meritum derivari, quam ex eadem in loco privato tot, vel tam excellentibus actibus, per se loquendo, destituta; siquidem ex majore numero bonorum operum, vel majore eorum excellentia, cæteris paribus, meritum augetur, ut diximus cum Suarez.

26. Nec solum meritum; sed etiam impetratio uberior est ex Sacrificio in loco sacro: nam Deus in Templo citius exaudit, ut patet ex promissione Dei 3. Reg. 9. & advertit Bellarminus *lib. 3. cap. 4. de cultu Sanctorum*: etenim, quod Deus promissit Templo Salomonis, sine dubio promissit etiam Templis Christianorum; siquidem, quod petiit Salomon, cum Templum dedicavit, idem petit Ecclesia, cum nova Tempia dedicat, nimirum ut aures Dei in eo loco sint apertæ: non est autem credibile, Deum exaudire preces Salomonis, & non exaudire etiam preces Ecclesiæ suæ. Hinc est, quod tam in veteri, quam in novo Testamento. legimus, Sanctos Viros, etiam si possent domi orare, & frequenter ibi etiam orarent, tamen, quia sciebant orationem in Templo. facilius exaudiri, illuc se orationis & impetrationis gratia conferre consuevisse. Anna filia Phanuel non discedebat de Templo, jejuniis & obsecrationibus serviens die ac nocte, *Lucæ 2. SS.* Apostoli Petrus, & Joannes ascendeant in Templum ad horam orationis nonam, *Act. 3.* & passim in Historia Ecclesiastica ejusmodi exempla occurrunt. Cum itaque Sacrificium, teste Card. Bellarmino *lib. 2. cap. 4. de Missa*, sit quædam oratio, non verbalis, ut sic dicam, sed realis, citius in Templo exauditur, & citius nobis impetrat quod a Deo postulamus: ac propterea stat, uberio rem impetrationem ex Sacrificio in loco sacro derivari.

27. Restat, ut uberio rem etiam satisfactionem ex eodem in tali loco peractæ provenire ostendamus. At id in promptu est; etenim neminem latet, satisfactionem eo. esse majorem, quo majus in opere aliquo bono molestiæ & laboris subeundum est, cæteris paribus: cum autem majus incommodum, & major labor sit Templum adire Sacrificii offerendi causa, quam illud in propria domo, & ad nutum suum paratum a Sacerdote expectante procurare, sequitur &c. Enimvero longas olim Imperatores ipsi ac Reges peregrinationes obibant, ut suorum delictorum veniam a Deo impetrarent: sicuti memoriæ proditum est de Othone III. qui a S. Romualdo, ut nudis pedibus Ravenna ad Garganum montem Apuliæ ad memoriam S. Michaelis. Archangeli peregrinaretur, pœnitentiam suscepit. Nunc vero vix aliquis e plebe emergit, statim domo exire pro Missa audienda, & minimum itineris conficere dignatur. Uique adeo ex hominum memoria excidit illud S. Gregorii in 1. Reg. cap. 15. *Non solum confitenda sunt peccata, sed etiam pœnitentiæ austeritate diluenda*. Verum, ne a proposito discedam, rem ipsam alia. ratione confirmo, ac dico, Sacrificium in loco sacro, cum ostensum sit, esse magis meritorium, illud consequitur, ut eo ipso sit magis satisfactorium. Probo hoc ex doctrina illa, quam optime tradit celeberrimus Theologus Gabriel Vasquez *tom. 4. in 3. p. quæst. 94. art. 1. dub. 5. n. 7.* ubi pari passu docet in bono opere procedere meritum, & satisfactionem. En ejus verba: *Qui bene operatur, non tantum est dignus laude aeterna vitæ, sed etiam dignus, ut liberetur ab impedimento consequendi illam, & quo magis (& melius) operatur, magis ab illo liberetur: nam, si dignus est vitæ aeternæ, potiore ratione dignus erit auferendi impedimentum consequendi illam, quale impedimentum est pena interim solvenda, Hæc Vasquez. Quisquis ergo per bonum*

aliquod opus magis meretur, & sit Deo gravior, necesse est, juxta hanc solidam doctrinam, ut magis pro suis malis operibus (per quæ minus illi gratus aliquando fuit) satisfaciatur: ac propterea audientes, vel celebrantes Missam in loco sacro, cum magis mereantur, sicuti supra dictum est, magis etiam satisfaciunt pro suis peccatis. Ad extremum non omitam, in loco sacro sæpe esse Indulgentias concessas a Summis Pontificibus, quas illuc accedentes Sacrificii causa, & per eam occasionem exequentes opera præscripta, consequuntur: at manentes domi, ibique Sacrificio intereuntes, cum ea opportunitate careant, carent etiam ejusmodi remissione pœnæ temporalis per applicationem satisfactionis Christi, & Sanctorum; carent etiam fructu verbi Dei, quod per eam occasionem audirent &c.

28. Sive igitur spectemus fructum Sacrificii ex opere operato, sive eundem spectemus ex opere operantis, uberior ille est, per se loquendo, & cæteris paribus, in loco sacro, quam in profano, uberior in Templo, quam domi in privato Oratorio. Propterea non adeo suæ commoditati indulgeant Christianifideles, ut fere semper in privato Oratorio Missam audiant, & uberioris hujuscemodi lucri jacturam faciant. Si necessitas id exposcat, necessitatis nostræ miserebitur scrutator Dominus; & pie credi potest, quod alia via ipse supplebit: at, si nulla legitima subsit necessitas, non sumus rerum spiritualium tam prodigi, ut iis tenuem quamdam ac temporalem commoditatem anteponamus, memores illius ad Gal. 6. *Quæ seminaverit homo, hæc & metet.*

§. III.

29. Hactenus dicta dum ostendunt, uberiorem esse fructum Sacrificii in loco sacro, illud etiam tacite insinuant, licere quidem ex privilegio Missam in privato Oratorio celebrare, vel celebrare facere; at, per se loquendo, & comparative ad eandem Missam in loco sacro, non expedire. Superest jam, ut ab ea, quam tero, via aliquantulum deflectens, indigitem, id ipsum non decere, nisi id rationabilis necessitas honestet. Hoc duplici historia perspicuum faciam.

30. Refert B. Petrus Damiani *Opusc.* 34. *cap.* 6. de quodam Monacho Cluniacensi, qui cum fessus de via projecerit se super lectum, ibique Completorium recitarit, mane ab incognito sive Angelo, sive homine Divinitus edocto, nec deinceps amplius ab eo viso, audit: *Completorium in lecto nec salus est, nec profectus.* Item de alio Monacho Priore monasterii Fontis Avellani idem memoriæ prodidit, quod cum esset infirma satis valetudine, ac propterea sæpe jacens in lecto partem Divini Officii exsolveret, a dæmone inter exorcizandum energumenum hoc responsum tulit: *Tu ne illes, qui sub cotto quotidie Completorium insusurras, & modo me quasi Sanctus ejicere, & juris mei vasculum de meo vis dominio liberare?*

31. Jam rogo: quid est majus, orare, an sacrosanctum Missæ Sacrificium offerre? Utique Sacrificium offerre. Si ergo orare in loco minus opportuno, & ad talem effectum non deputato, oburgationem promeruit, quanto

deteriorem, putamus, merebitur increpationem, qui absque necessitate Sacrificium in profana domo, & loco non sacro celebrare, vel celebrari voluerit? Si indecentiam præferret Horas Canonicas in loco non proprio percurrere, quanto magis indecentiam quamdam sapiet, rem Divinam sine necessitate in loco non sacro peragere?

32. Vidit hoc laudatissimus Imperator Justinianus, atque idcirco legem tulit, qua sic præcepit: *Omnibus interdiximus magna hujus civitatis habitatoribus, magis autem etiam totius nostre ditionis, in domibus suis habere quasdam quasi Oratorium domos, & in his sacra celebrare mysteria &c.* ut in *Authen. coll. 5. t. 12.* Sanctus vero Antistes Carolus Borromæus inter præcipuas suas pastorales curas eam habuit, ut frequens usus celebrandi in Oratoriis domesticis minueretur: quod & per provinciales leges, & per indefessam ipsius sollicitudinem enixe curavit, intelligens, id quidem de licentia legitimi Superioris licere, sed non semper expedire, nec semper decere; ac propterea neque ipsi Regio. Gubernatori Mediolanensi Oratorii domestici usum permisit, quamvis ipse privilegio ad id Apostolico munitus esset: ut in *lib. 8. cap. 4. ejus Vite*. Extat Romæ etiam nunc Princeps Fœmina, gratia & opibus florentissima, quæ domi privatum Oratorium habere recusat, & quotidie Templum adit, ut Sacro religiose intersit. Reservat nempe sibi Deus per omnem ætatem quamplures, qui res sacras eo quo par est in honore habeant.

PARS TERTIA.

SATISFIT OBJECTIONIBUS.

33. **C**ontra hæc, quæ diximus, possent aliqua opponi, quæ, ut veritas eluceat, a nobis diluenda sunt. Ac primo opponi potest ex Sacra Scriptura illud Malachiæ *cap. 1. v. 11. In omni loco sacrificatur, & offertur nomini meo oblatio munda*: quod de Sacrificio novæ legis plures ex Patribus intelligunt: unde videtur ita a Christo Domino institutum esse hoc Sacrificium, ut in omni decenti loco peragi possit ac debeat. Præterea Sacrificium Crucis fuit peractum, non in Templo, sed in monte extra portam civitatis. Ergo similiter poterit extra Templum peragi Sacrificium incurantum Altaris sine ulla indecentia. Adde, in celebratione hujus mysterii nos debere imitari morem Christi, & Apostolorum: sed Christus primo hoc Sacrificium confecit, non in Templo consecrato, sed in quodam communi cœnaculo, a quodam patrefamilias præparato; Apostoli vero, ut habetur *Act. 2.* erant perdurantes unanimiter in Templo, & frangentes circa domos panem, & sumebant cibum cum exultatione: ergo & nos &c.

34. **R.** textum citatum Malachiæ non habere hunc sensum, quod Sacrificium Eucharisticum offerendum sit in quovis decenti loco, sed quod offerendum sit in quavis Mundi parte, & a quibusvis gentibus. Ita explicat Cornelius a Lapide *Malach. c. 1. v. 11.* & quia Ecclesia Christi non erat concludenda sub
fini-

finibus gentis Judaicæ, sed erat in universo Mundo fundanda, ideo Passio Christi, seu Sacrificium Crucis non fuit celebratum sive intra Templum, sive intra civitatem Judæorum, sed sub dio, inquit S. Thomas, ut sic totus Mundus se haberet ad Passionem Christi, seu Sacrificium Crucis, ut domus, seu Templum. Ad id, quod addebatur de Christo Domino, & de Apostolis, quos nos oportet imitari, *Re.* Oportet, nos imitari Christum, & Apostolos in celebratione hujus Sacrificii, sed pro loco, tempore, & personis; nam sacræ illæ cæremoniæ, quæ deinde ab Ecclesia ad ornatum & reverentiam tanti Sacrificii institutæ sunt, tunc temporis non fuerunt usurpatæ, & tamen a nobis sunt usurpandæ, nisi (quod absit) velimus convenire cum Luthero ajente in *lib. de Capt. Bab.* Missam eo esse magis Christianam, quo est simplicior, & similior Missæ Christi, in qua nulla fuit cæremoniarum pompa. Esto itaque Christus Dominus primo obtulerit hoc Sacrificium in cœnaculo, & non in Templo; nihilominus, cum Ecclesiæ visum sit post institutionem talis Sacrificii præcipere, ut in Templo regulariter illud celebretur, & cum Templum consecratur ad Sacrificium offerendum, sequitur, quod nos pie matri Ecclesiæ teneamur obedire, & quod, obedienda per celebrationem in loco sacro, uberiolem ex Sacrificio fructum reportemus. Accedit, quod Apostoli, ut supra dicebamus, in necessitate extra Templum celebrant: cæterum ipsi statim ab initio Tempia ædificanda curarunt, sicuti constat ex Paulo 1. ad Cor. c. 11. & refert Nicephorus *lib. 2. hist. cap. 39.* Sanctos Apostolos Philippum, & Bartholomæum in Syriæ & Asiæ civitatibus Tempia construxisse, atque idem fecisse Thomam, Andream, & Matthæum in suis regionibus.

35. Altera objectio est ex S. Joanne Chrysostomo, qui *homil. 18. in Acta* Ecclesiolas domesticas dotatas, in quibus Sacerdos quotidie, saltemque Dominicis diebus Hostiam vivam immolet, late & fortiter commendat; unde primum est colligere, expediens esse, habere domi Oratoria privata, ibique Missam audire.

36. *Re.* S. Chrysostomum non loqui ibi de Ecclesiis in domibus privatis urbanis, sed de Ecclesiis in domibus ruralibus: cum enim Sanctus Doctor probe cognosceret fructum proveniente ex Sacrificio, illoque eos privandos intelligeret, qui commorarentur in agris, ubi non essent Ecclesiæ; idcirco hortatur, ut Ecclesiæ ibidem ædificentur & dotentur, ad hoc ut illi possint Missæ interesse. Quod sane nihil contra nos evincit; siquidem nos etiam propter necessitatem commendamus usum Oratorii, & multo magis commendamus ejusmodi dotatas Ecclesiolas auctoritate legitimi superioris erectas, ubi opus fuerit.

37. Tertia objectio est ex variis historiis Sanctorum Virorum, qui non solum ob persecutiones, sed etiam aliis de causis aliquando in privatis locis Sacrificium offerebant. Legimus enim, S. Gregorium Nazianzenum, in exigua cellula extructo Oratorio, Sacra fecisse ibidem, ex Sozomeno *lib. 7. hist. cap. 5.* Item Theodoretus in *hist. relig. cap. 20.* scribit, se in cellula Maris Anachoretæ sacra mysteria celebrasse. Denique, ut alia exempla prætermittam,

tam, S. Joannes Damascenus in *Historia de Barlaam & Josaphat* scribit B. Barlaam Presbyterum fuisse, & in sua cellula, solo præsentè Josaphat, Sacrificium offerre solitum. Cum autem non sit credibile, hos Sanctos Viros voluisse uberioris fructus jacturam facere, videtur dicendum, non esse uberiozem fructum Sacrificiû in loco sacro, uti nos contendimus.

38. Bz. Admitto, plures Sanctos Viros, extra etiam persecutiones, in privato Oratorio, & loco non sacro celebrasse; sed omnes cum rationabili causa solam commoditatem superante; quando autem adest rationabilis causa, præter solam commoditatem, non est novum, quod Viri etiam Sancti omittant aliquando opus non præceptum, quamvis de se melius & fructuosius. Sic fructuosior ac melior de se est celebratio Missæ, quam ejus simplex auditio: & tamen, ut se magis præpararent ac disponerent, legimus, nonnullos Sanctos Viros ad tempus a celebrando abstinuisse, & aliis spiritualibus exercitationibus vacasse, ut de S. Ignatio Loyola memoriæ proditum est. Accedit, quod diximus, fructum Sacrificii in loco sacro uberiozem esse de se, & cæteris paribus; nam, si in aliis circumstantiis sit inæqualitas, non est dubium, quin possit inde compensari, vel etiam superari fructus Sacrificii in loco sacro: & quia in Sanctis Viris major est status gratiæ, & melior est dispositio, ideo potest iis per accidens uberior fructus respondere ex Sacrificio in loco non sacro, quam aliis in loco sacro. At quid inde? Numquid, per se loquendo, non erit uberior fructus Sacrificii in loco sacro? Numquid Sanctis Viris nosmetipsos cœquabimus, putantes nos ita dispositos, ut loci sacri circumstantia non indigeamus ad uberiozem ex Sacrificio fructum percipiendum?

39. Quarta objectio desumitur ex praxi Episcoporum, qui cum sint forma facti gregis, ab iis nos exempla petere possumus: ii autem frequenter in suo domestico Oratorio Missam celebrant, vel audiunt: & quidem jam inde a prisca temporibus id usu receptum est; nam S. Joannes Eleemosynarius, ut in *ejus Vita* scribit Leontius, cum populum de Ecclesia egredi videret, quo tempore Sacra celebrabat, ad illos conversus dixit: *Ego, filii, propter vos ad Ecclesiam descendo, nam mihi ipse in Episcopio Missas facere poteram.* Ex quo apparet, nullam esse inconvenientiam, nullum dispendium, si Missa in privato Oratorio celebretur.

40. Bz. respectu Episcoporum, ac Prælatorum superiorum non esse indecentiam illam in frequenti usu Oratorii domestici ad Missas celebrandas, vel audiendas; tum quia Oratoria in palatio Episcoporum propter dignitatem Episcopalem non censentur Oratoria privata, sed comprehenduntur nomine loci sacri & religiosi, uti cum aliis docent Quart. in *Rub. p. 3. tit. 10. n. 1.* & Tamburinus de *Sacrif. l. 1. c. 4. §. 4.* præsertim cum deputatio facta auctoritate Episcopi, uti contendit Sanchez *l. 9. de matr. disp. 15. n. 39.* vicem benedictionis ad hunc effectum suppleat, sitque veluti consecratio quædam; tum quia optime expendit Bonifacius VIII. in *Cap. Quoniam, de privileg. in 6.* Episcopos, eorumque superiores, ex una parte non semper posse commode ad Ecclesias accedere pro Missa celebranda, vel audienda in ipsâ, ex alia vero

sine

sine Missa celebrata, vel audita, non decere eos transire ullam diem, nisi ad id compellat necessitas: unde convenienter ipsi utuntur Oratorio domestico. Cum autem ejusmodi rationes non militent pro secularibus, non est respectu ipsorum talis convenientia. Et hæc sane quo ad decentiam. Quod attinet vero ad dispendium, non inficior, aliquale ferre etiam Episcopos, per se loquendo, ex celebratione in loco non consecrato; nam specialis illa efficacia, quam Templum acquirit ratione consecrationis, vel ad coercendos demones, ne adeo infensi sint nobis inter celebrandum, vel ad remittenda venialia, & consequenter ad majorem aliquam nostram dispositionem, vel ad conferenda aliqua gratiæ auxilia; specialis, inquam, hæc efficacia non reperitur in loco non consecrato, quamvis inter sacra & religiosa annumerato. Compensabitur nihilominus facilius in Episcopis tale dispendium, præsertim ob finem vacandi rebus gravioribus conducentibus ad salutem animarum, quibus non possent se dedere, si pro celebratione Missæ stabiliter Templum adirent. Non sic in secularibus recusantibus Divina mysteria in Ecclesiis obire vel ob meram commoditatem, vel ob finem alium non adeo honestum ac meritorium. Unde est disparitas. Et notent universi, quod S. Joannes Eleemosynarius, ut populi utilitati consulere, quamvis in Episcopali palatio celebrare posset, tamen ad Ecclesiam se conferebat. Utinam hunc imitentur viri principes! & licet Oratorii domestici privilegio potiantur, tamen, ut cæterorum ædificationi serviant, nec molestum, nec indecorum sibi putent ad Ecclesias convenire, ibique publica Sacrorum frequentatione Christianos se pios ac devotos probare. Profecto aliter sustentis absque rationabili causa, non parum a charitatis lege institutoque discedunt. *Ubi autem diminutio est charitatis (inquit S. Bernardus ep. 82.) miror, quod, vel quale possit spiritualis exercitii sperari lucrum.*

41. Quinta objectio deducitur ex eo, quod, stante hac nostra positione deberet unusquisque adire Tempia illa, quæ solemnî ritu sunt consecrata, nec satis esset adire Tempia solum benedicta; siquidem de Templis consecratis potissimum procedunt ea, quæ conducunt ad uberiores fructus Sacrificii: cum autem hoc nimium sit, & contra praxim Fidelium, sequitur &c.

42. R. distinguendum esse inter id, quod licet ac decet, & id, quod simpliciter magis expedit. Si sermo sit de eo, quod licet ac decet, ajo, quod, quamvis antiquitus præciperetur, ut celebratio fieret in Ecclesia consecrata, tamen jam consuetudine obtentum est, ut sufficiat ad celebrandum Ecclesia benedicta, imo & erecta auctoritate Pontificis, aut Episcopi, ex Vasquez disp. 283. cap. 1. aliisque. Unde ad effectum Missam celebrandi, vel audiendi, jam licet ac decet Ecclesiam solum benedictam adire. Si vero sermo sit de eo, quod per se magis expedit, non potest negari, magis, ut infra exponam, expediens esse, per se loquendo, adire Ecclesiam consecratam. Nostra tamen positio, si bene consideretur in suis probationibus, non contendit, adeundum regulariter esse solas Ecclesias consecratas, sed præferendas esse Ecclesias tum consecratas, tum benedictas, privatis domesticis Oratoriis pro celebratione Divinorum mysteriorum; siquidem multiplices ex capite fructuosus per se est Sacri-

Sacrificium tam in Ecclesia consecrata, quam in Ecclesia benedicta, quam vis comparative ad Ecclesiam solum benedictam excessus aliquis sit in Ecclesia consecrata. Cæterum non tantum consecratio, sed etiam benedictio Templi est quoddam sacramentale, & consequenter propter orationes Ecclesie Deus etiam in Templo solum benedicto speciale aliquod auxilium præberet. Rursus tam Templum consecratum, quam Templum benedictum, deputatur firmiter Divino cultui, & utrobique asservari solet Divina Eucharistia &c. unde tam Templum consecratum, quam benedictum, ea, quæ diximus, sibi vendicant; at potiori jure sibi ea vendicat Templum consecratum, tum propter plures orationes, quæ in consecratione fiunt a sacerdotibus, tum propter solemniores ritus adhibitos ad significandam sanctitatem in his requisitam, qui rem Divinam faciunt, quique propterea plurimum valent ad excitandam devotionem.

43. Sexta objectio. Pontifices dant sæpissime hanc facultatem celebrandi in Oratoriis privatis; quod non facerent, si Fideles hac ratione minus reverentes se gererent erga Sacrificium, ut innuimus, & majori fructu, per se oquendo, se privarent. Ergo &c.

44. R. Omnes humanas leges debere cedere legi charitatis, & prudentiæ. Quare quælibet lex vel retinenda, vel dispensanda, vel abroganda, vel mutanda est a legitimo superiore, prout charitas & prudentia hic & nunc persuaserit. Cum autem sæpenumero charitas & prudentia persuadeat concessionem Oratorii privati sive ad consulendum petentium necessitati, sive ad conciliandos & promerendos nobilium animos, sive ad benignitatem subditis ostendendam; oportet namque (ut aiebat in simili S. Gregorius l. 5. ep. 43.) filiis Sacerdotalem amorem Episcopos impendere: cum, inquam, hæc sint, non est mirum, si Romani Pontifices sæpe numero ejusmodi concessionem faciant. Cæterum, sicuti ipsi prudenter hoc privilegium concedunt, ita vellent, ut privilegiarii prudenter eo uterentur, ideoque non sine rationabili causa, nec passim, nec sine ulla Templorum frequentatione: unde, si secus hi fecerint, & idcirco majus spirituale lucrum amiserint, non Pontifici, licentiam concedenti, sed iis, qui concessa moderate non utuntur, adscribendum est.

45. Septima objectio. Multoties contingit, ut viri nobiles non audirent Missam, si non uterentur Oratorio privato: quia multoties eos piget domo exire, vel dormiunt ad multam diem, quando nulla jam in Templis Missa celebratur, eo quod vel sit proximus, vel elapsus meridies: unde carerent fructu Sacrificii, si suo non uterentur privilegio.

46. R. Doleo sane, propter temporum nostrorum vitium viros nobiles ad eas angustias redigi, ut iis oporteat aut Missam omittere, aut eam in loco minus proprio audire. Certe non sic olim apud nobilissimos & occupatissimos viros mos erat. De Alphonso Siciliæ & Aragoniæ Rege narrat historia, quod quotidie diluculo surgens orationes in interiore Sacello ad Deum ipsum effundebat; inde in Templum prodiens, die lucente, Missas admiranda devotione audiebat. De eximio Angliæ heroe Thoma Moro accepimus, quod singulis diebus ante alia negotia quæcumque (studiis interdum valde matutinis exceptis)

Sacro religiose in Templo intererat . Verum , quando nova temporum ratio pios ejusmodi usus apud plerosque viros nobiles delevit , & necessitatem differendi ad multam diem auditionem Sacri ipsi causantur, inspicendum est, an sit necessitas, quæ hominem præoccupat, an vero sit necessitas, quam homo sibi faciat, ingerendo se libere actionibus quibusdam habentibus annexam talem necessitatem : v.g. ducendo noctes infomnes alea &c. Si primum , utique melius erit Missam in Oratorio domestico audire , quam illam omittere , per se loquendo ; & in tali casu ab hoc qualicumque majoris reverentiae defectu excusabuntur . Si secundum , & ratio ingerendi se talibus actionibus fuerit vel mala, vel non necessaria, tunc videant, ne accommodantes, ut ita dicam, suis voluptatibus & commoditatibus ipsum tremendum Divinum Sacrificium , mereantur exprobrari a supremo Judice per illa verba (*Isai. 43.*) *Servire me fecisti in peccatis tuis* . Siquidem in tali casu haud verificatur, eos non posse in Ecclesia sacrificare, quia impediuntur ; sed impediri, quia nolunt ad Ecclesiam accedere. Enimvero quid excusabimus, inquit S. Chrysostomus in *Orat. de S. Philogonio*, aut quam veniam obtinebimus, si, cum ipse nostra causa descenderit e Cælis, nos ad illum vel ex adibus ire gravemur? Cum alienigena barbarique ex Perside accurrant, ut illum videant in Prasæpi; tu vero ne breve quidem spatium emeriri sustines, ut hoc felici spectaculo perfruaris? Non igitur sibi blandiantur ex necessitate ; qui necessitatem sibi voluntarie faciunt, dum suis voluptatibus indulgent ; sed meminint ex Tridentino, maximam adhibendam esse curam, ut sacrosanctum Missæ Sacrificium omni religionis cultu ac veneratione tum quo ad tempus, tum quo ad locum &c. peragatur: in quo si ipsi ob suam meram commoditatem deficiant, nec excusatione sunt digni, nec venia . Et quamvis laudandi sint in eo, quod Missam velint audire (non enim pium hoc eorum desiderium improbare ausim), non tamen sunt laudandi in eo, quod habitualiter id velint in Oratorio domestico ; tum quia regulariter id eis adimit fructuum ubertatem ; tum quia præfert speciem minoris reverentiae erga Divinam Eucharistiam . Privilegium vero, quod habent a Sede Apostolica, efficit quidem, ne ipsi peccent contra legem celebrandi in loco sacro ; at non efficit etiam, ut parspiritali lucro, & pari reverentia celebrent in loco non sacro . Sic dispensatus legitime a jejuniis, non peccat quidem contra legem jejunii comedendo ; at non simul vi dispensationis habet meritum temperantiae, quod habent jejunantes .

47. Ad extremum notam cum Raynaudo t. 16. quod David Arcam Dei inducere in domum suam diu cunctatus est præ reverentia & metu alicujus mali, si quid minus digne admitti in domo sua contingeret, tametsi, Templo nondum constructo, deesset eo tempore locus honoratior, in quem Arca Dei posset inferri . Jam vero Arca erat rudis quædam delineatio veritatis expressæ in Eucharistia; ac propterea multo justius est extimescere incommodum ali-quod ex ejus non necessaria vel confectione, vel administratione in domo profana, in qua certum est multa plerumque fieri corporalem Dei vivi præsentiam dedecentia: dicitur enim domus contegere turpitudinem ; quia multa intra eam admittuntur, quæ oculis mortalium sunt obducenda . Unde non solum ob lucrum cessans, sed etiam ob damnum emergens debent parce, discrete,

& cum rationabili causa suo uti viri nobiles privilegio celebrandi in loco non sacro, & in domestico Oratorio;

48. At sciscitaberis: hæc discretio, hæc parsimonia in usu talis privilegii intra quos fines consistet? R. Intra eos fines, quos ultra committeretur defectus in ipsomet usu privilegii. Hoc autem tripliciter potest contingere: I. si quis fini privilegii resistat: II. si inde occasionem capiat delinquendi saltem per omissionem: III. si privilegium extendat ultra id, quod superior concedit sive relate ad tempus, sive ad locum, sive ad materiam, sive ad personas &c.

49. Jam vero finis privilegii in generali videtur esse augmentum Divini cultus respectu personarum nobilium, vel aliarum, quæ sive ab infirma valetudine, sive a convenientia exteriorum rerum, v.g. officiorum, necessarij comitatus &c. impedirentur, ne Sacro frequenter assisterent, si Oratori privilegio non potirentur. Probo hoc textu in *Cap. Ex parte, de consuet.* ubi Pontifex Honorius III. declarat, per ejusmodi gratiosas Pontificum concessiones intendi augmentum Divini cultus, nullatenus autem ejusdem diminutionem: unde factum est apud Canonistas adagium illud: *Privilegium in præjudicium Divini cultus non debet concedi*: ex Gonzalez *Cap. 6. de Cleric. non resid.* Quando igitur privilegiarii tam frequenter, & in talibus circumstantiis uterentur suo privilegio, ut potius inde resultaret diminutio, quam augmentatio Divini cultus respectu ipsorum, tunc ipsi resisterent fini privilegii. Eatenus proinde eo uti debent, & eatenus eo abstinere, quatenus cognoverint, per ipsius usum augmentari, vel diminui Divinum cultum respective, Scio, non esse ita facile in praxi id deprehendere; at optime in simili reposuit Doctor Angelicus 2. 2. q. 185. art. 7. aiens: *Non potest homo in talibus punctualiter accipere illud, quod fieri oportet: si vero sit multus excessus, non potest latere*. Profecto, si fuerint multus excessus in usu talis privilegii, utendo illo frequenter sine ulla necessitate, & sine ullo honesto motivo superante meram commoditatem, non poterit latere.

50. Deinde haberetur etiam defectus in usu talis privilegii, si privilegiarii inde caperent occasionem delinquendi saltem per omissionem: v.g. si propterea ipsi non audirent verbum Dei, non frequentarent Sacramenta, negligerent lucrari Indulgentias, opportunas ac necessarias suis famulis instructiones Fidei, quæ traduntur in Ecclesia, impedirent &c.

51. Demum haberetur defectus in ejusmodi usu, si privilegium ipsi extendere ultra id, quod superior concedit: v.g. si plures Missas uno die celebrare facerent sine speciali indulto, si Missam celebrare facerent hora indebita, puta post meridiem, ac præsertim expectante ad Altare Sacerdote sacris vestibus induto, si diebus exceptis, si per Sacerdotes non approbatos &c. Caveant igitur privilegiarii, ne ad hos scopulos impingant, & ita intra eos fines se contineant, quos ultra nequit consistere rectum.

52. Hæc dixerim, ut proximorum utilitati, ac tremendi Sacrificii reverentiz prospectum sit. Decet nimirum Religiosum ac Sacerdotem in id incumbere, ut opus maxime sanctum ac Divinum quantamaxima fieri potest exteriori devotionis ac pietatis specie tractetur, & spiritualibus bonis proximis copiose angeatur.

75
M E M O R I A L E
C O N F E S S A R I O R U M .

O P U S C U L U M V .

P A R S P R I M A
D E S A C R A M E N T O P Æ N I T E N T I Æ .

C A P U T I .

De præcedentibus sive tempore , sive natura , sacramentalem
Confessionem .

§. I .

Quidditas , partes , & effectus hujus Sacramenti .



Sacramentum Pœnitentiæ , a Christo Domino institutum , bene explicatur sic : *Sacramentum reconciliationis hominis cum Deo , per remissionem peccati commissi post Baptismum , consistens in actibus pœnitentis , & Absolutione Sacerdotali .* De Fide est , quod sit verum ac speciale Sacramentum novæ legis , ex Tridentino *sess. 7. can. 1. de Sacram.* & fuit a Christo institutum , quando ipse apparuit post suam resurrectionem Apostolis , absente S. Thoma , *cap. 20. Joan.* dicens : *Accipite Spiritum Sanctum : quorum remisistis peccata , remittuntur eis , & quorum retinueritis , retenta sunt .*

2. Partes hujus Sacramenti sunt quatuor ; nempe Contritio , Confessio , & Satisfactio ex parte pœnitentis , Absolutio ex parte Sacerdotis ; cum hoc tamen discrimine , quod Contritio , Confessio , & Absolutio sint partes essentielles , Satisfactio vero in re exhibitâ sit pars integralis : & quia in omni Sacramento datur materia tum remota , tum proxima , & forma ; etiam in hoc Sacramento habetur materia proxima , quæ consistit in tribus dictis partibus hujus Sacramenti se tenentibus ex parte pœnitentis ; habetur forma , quæ consistit in Absolutione se tenente ex parte Sacerdotis potentis , & volentis absolvere .

3. Materia remota dicitur in hoc Sacramento illa , circa quam abolendam versatur Contritio , Confessio , & Absolutio ; eaque est peccatum quodcumque actuale commissum , non antecedenter , sed subsequenter tempore , vel natura , ad Baptismum . Hinc non esset capax Absolutionis , qui confiteretur peccatum originale , aut solum peccatum aliquod actuale commissum ante Baptismum , Et quamvis Card. de Lugo optime censeat , non esse impediendos

pœnitentes, ne se accusent de non correspondentia Divinis inspirationibus circa opera consilii, tamen qui de iis solis se accusaret, non videretur capax Absolutionis; quia non est, per se loquendo, peccatum non correspondere Divinis inspirationibus circa opera consilii, secluso earum contemptu.

4. Hec vero materia remota est in duplici differentia: altera enim est materia remota necessaria; altera est materia remota sufficiens, sed non necessaria. Materia necessaria sunt peccata mortalia commissa subsequenter tempore, vel natura. ad Baptismum, nec alias directe clavibus subiecta, & absoluta. Nomine autem clavium hic intelligimus potestatem interrogandi, & potestatem absolvendi, quæ resident in Sacerdote, quarum altera vocatur clavis scientiæ, altera vocatur clavis potentiæ. Materia sufficiens, sed non necessaria, sunt peccata venialia, & peccata etiam mortalia, alias directe clavibus subiecta, & absoluta, sicuti declaravit Benedictus XI. in *Extrav. 1. de privi.* Peccata autem negative dubia, ut infra dicemus, probabiliter obligamur fateri simul cum alia materia certa; quæ si haberi non possit, poterit prudens Confessarius, juxta periculum, & dubii probabilitatem, Sacramentum conficere, absolvendo sub conditione: Suarez *disp. 18. de Pœn. sect. 1. 2. 12.* Catropalaus *tract. 23. disp. un. p. 6.*

5. Quando peccata prius remissa per antecedentem Confessionem, iterum subiiciuntur clavibus, forma habet suum sensum, & sit vera remissio; quia, ut bene docet Catropalaus *cit. tract. pœnit. 6. nunquam peccatum ita remittitur, quin amplius remitti possit, saltem quatenus est impedimentum gratiæ abundantioris recipiendæ.*

6. Sacramentum Pœnitentiæ vel in re, vel in voto, lapsis post Baptismum est necessarium necessitate mediæ, ut colligitur ex Christi verbis *Joan. 20.* quibus dat potestatem non tantum peccata remittendi, sed etiam retinendi. Dixi, vel in re, vel in voto; quia constat, posse peccatorem justificari per Contritionem perfectam, sic tamen, ut justificatio non sit adscribenda Contritioni, nisi prout continet votum Sacramenti, quod votum, juxta communiorum ex Suarez *disp. 17. sect. 3. n. 8.* sufficit implicitum.

7. Effectus hujus Sacramenti alii sunt primarii, alii sunt secundarii. Primarii sunt quatuor, nempe remissio peccati mortalis, commutatio pœnæ æternæ in temporalem, sacramentalis gratia, & ablatio reliquiarum peccatorum semper ex parte, aliquando etiam omnino, ex S. Thoma 3. *par. q. 86. art. 5. ad 1.* Secundarii sunt tres, nempe remissio venialium, vivificatio operis Sacramenti fide suscepti, dempta tamen Eucharistia, & restitutio in pristinam dignitatem, & merita: unde opera mortificata, non autem mortua, per tale Sacramentum reviviscunt. Quamvis vero remissio venialium fiat per hoc Sacramentum, potest tamen eadem fieri in homine justo extra Sacramentum, per sacramentalia, quæ sunt sex, videlicet Oratio Dominicalis, Aqua benedicta, comestio Agni Paschalis, & aliorum ciborum, ad præscriptam Ritualis Romani benedictionem, recitatio confessionis generalis, quæ fit in Missa, & Officio per *Confiteor*, elargitio elemosynæ, & benedictio Episcopalis: quæ omnia comprehenduntur uno versiculo: *Orans, Tinctus, Edens, Confessus, Dans,*

Dans, Benedicens. Censemur autem, quod remissio venialium fiat per hæc sacramentalia, non quidem immediate ex opere operato, ad modum Sacramentorum, supposita dispositione; sed mediate ex opere operato, excitando actum sufficientem, ut Attritionem, vel alium bonum motum.

§. II.

De Contritionis essentia, & qualitate.

8. **C**ontritio in præsentī accipitur genericè, prout est in communi dolor de peccatis, abstrahendo, an sit dolor perfectus, vel imperfectus, & a Concilio Tridentino sess. 14. cap. 4. de Pœnit. sic describitur: *Contritio est animi dolor, ac detestatio de peccato commisso, cum proposito non peccandi de cætero*: eaque duplex est: altera perfecta; altera imperfecta, seu minus perfecta. Contritio perfecta, quæ antonomastice dicitur Contritio, est animi dolor, conceptus ex motivo charitatis propter Deum summe dilectum, de peccato commisso, cum proposito &c. Contritio imperfecta, seu minus perfecta, quæ vulgo dicitur Attritio, est animi dolor, conceptus ex motivo aliquo inferiori, sed supernaturali, de peccato commisso, cum proposito &c. Alterutra ex his est necessaria non solum ad effectum, sed etiam ad valorem hujus Sacramenti Pœnitentiæ: unde voluntas confitendi peccata, & recipiendi Absolutionem, requiritur quidem, sed non sufficit ad Sacramenti validitatem, quæ necessario exigit aliquem ex prædictis doloribus, & sane non mere existimatum, sed vere existentem; dolor enim existimatus, non est dolor, sed erronea persuasio doloris: sicuti dolor reflexus de eo, quod non doleas de peccato, non est dolor de peccato, ac propterea speculative, & per se loquendo, non sufficit ad valorem Sacramenti quia tamen talis dolor, practice loquendo, trahit secum dolorem ipsum directum de peccato commisso, practice loquendo, sufficit. Non est tamen opus, talem dolorem, seu Contritionem requisitam, esse de omnibus peccatis singillatim; satis enim dolere potes de omnibus sub generali ratione offensæ Dei, ut fuse probat Vasquez *quest. 86. art. 2. dub. 7.* sicuti neque opus est ad prædictum dolorem aliqua graduum intensio, cum in quolibet gradu etiam remisso reperitur quidditas doloris a Concilio requisiti: item nec mora temporis determinata, necessaria est ad prædictum dolorem, cum possit ille concipi unico prorsus momento.

9. Præterea Contritio, seu dolor, abstrahendo a perfecto, vel imperfecto, debet habere has qualitates: 1. quod sit supernaturalis; quia, quod naturale est, non potest ad salutem conducere: unde merito ab Innocentio XI. scripta est hæc propositio: *Probabile est, sufficere Attritionem naturalem, modo honestam*: 2. debet esse formalis: unde non sufficit dolor virtualis inclusus in actu charitatis, aut altero pio motu excludente affectum ad peccatum: 3. debet esse efficax, saltem quo ad affectum; quia debet excludere voluntatem peccandi: non tamen debet esse necessario efficax quo ad effectum hoc sensu, quod pœnitens vi illius nunquam amplius debeat peccatum, de quo do-
luit,

luit, iterare: 4. debet esse dolor terminative absolutus, & non pure conditionatus: 5. debet esse universalis, ad remissionem mortalium; hoc saltem sensu, quod debeat se extendere ad omnia mortalia admissa: non tamen hoc sensu debet esse necessario universalis, quasi necessario debeat inniti motivo extendente se ad omnia mortalia tam admissa, quam non commissa. Dixi, ad remissionem mortalium; nam ad remissionem venialium in Sacramento Pœnitentiæ quavis requisitus sit dolor supernaturalis tum ob valorem, tum ob effectum Sacramenti, tamen, quia potest unum peccatum veniale remitti sine altero, non videtur ad peccati confessi remissionem necessarius dolor se extendens ad omnia venialia, sed sufficit dolor de illo. Censemus vero cum Cardenas *diff. 2. q. 4.* esse in praxi illicitum sequi opinionem asserentem, quod ad Confessionem venialium non requiritur dolor formalis, & expressus, sed sufficit implicitus, qui includitur in voluntate confitendi ea peccata.

10. Contritio, seu dolor hactenus explicatus, debet præcedere Absolutionem, non tamen videtur absolute necessarium, ut præcedat Confessionem. Neque huic opinioni aliquo modo officit propositio prima damnata ab Innocentio XI. quia moraliter certum videtur, valere Sacramentum, etiamsi dolor non præcedat Confessionem, dummodo præcedat Absolutionem. Et quia gravis inter Auctores est controversia, an, quando dolor præcedit Confessionem, officiat valori Sacramenti, si per multum tempus illam præcedat, nos eam litem dirimimus asserendo, quod speculative tuto procedit, qui uno, vel duobus diebus ante Confessionem recogitat peccata sua, & de iis dolet in ordine ad confitendum, & postea non elicit novum actum doloris, uti docuit Cardenas *diff. 2. cap. 6. q. 6.* prædicit tamen prudens Confessarius debet semper excitare pœnitentem, antequam eum absolvat, ut reiteret actum doloris de suis peccatis, ne se exponat periculo nullitatis Sacramenti, uti recte docuit Clericus *decis. 13. de Pœn. num. 8.* Eadem etiam distinctione componimus tum asserentes, tum negantes, requiri novum dolorem, si perseveret habitualiter, vel virtualiter prior, ad novam ejusdem, vel alterius peccati Confessionem: nam asserentes cum Vasquez *q. 92. art. 3. dub. 5. n. 10.* optime procedunt, & sunt omnino audiendi, si loquantur prædicit; negantes vero cum Cardinali de Lugo *disp. 14. de Pœn. sect. 3.* bene procedunt, nec sunt improbandi, si loquantur dumtaxat speculative: quorum sententia, etsi nequeat deservire ad praxim, extra casum necessitatis; poterit tamen prodesse ad conscientię quietem, ne quis angatur de Confessionibus factis, uti docet Cardenas *loc. cit. num. 3.*

§. III.

De proposito, quod esse debet cum dolore.

11. **A**D veram Contritionem, seu dolorem, de quo hactenus locuti sumus, spectat propositum non peccandi de cætero, ut constat ex *loc. cit.* Trident. & ex Florentino in *Decreto Eugenii*. Hoc autem propositum non est actus intellectus, sed voluntatis, neque est præcise amor, vel odium, sed

sed volitio seria & resoluta obediendi omni legi quo ad gravia, & nolitio seria violandi unquam præceptum ullum grave in circumstantia ulla, ex Ulloa *trakt. de Pen.* Hinc potest dari casus, quod in penitente habeatur verum propositum, & tamen in eodem habeatur probabile iudicium reflexum formidolosum de relapsu in culpam gravem, ut bene advertit cum Sylvestro Layman *trakt. 6. num. 8.*

12. Certum est, propositum reviri tum ad valorem, tum ad effectum Sacramenti, ex Card. Toletio *lib. 3. Sum. c. 4.* Et quamvis nonnulli velint, requiri formale & expressum, asserentibus aliis cum Suarez *disp. 20. sect. 4.* requiri vel formale, vel virtuale, dicendum tamen est cum Card. de Lugo, *loc. cit. sect. 5.* quod requiritur formale, & expressum, si dolor fuerit, non ex motivo universalis, sed speciali illius peccati, quod penitens confitetur; sufficit autem virtuale inclusum in ipso dolore ac detestatione, si dolor fuerit ex motivo aliquo universalis comprehendente omnia mortalia, quamvis in praxi a penitentibus, præsertim rudioribus, semper exigendum sit propositum expressum. Neque hæc opinio de validitate talis propositi ullatenus videtur affici a proscriptione primæ propositionis damnatæ ab Innocentio XI. uti ostendit Cardenas *differt. 2. cap. 5. q. 4. num. 80.* Qualitates vero, quas habere debet dolor, nempe quod sit efficax, sit supernaturalis, sit omnino absolutus respectu peccati ut talis, & non terminative conditionatus, sit universalis &c. easdem etiam habere debet propositum; cum hoc tamen discrimine, quod universalitas doloris non necessario debet extendi ad omnia prorsus peccata etiam non commissæ; at universalitas propositi debet extendi ad omnia prorsus peccata gravia; ita ut propositum debeat esse penitus universale quo ad tempora, circumstantias, & objecta, non necessario in specie, vel in individuo, sed in genere, uti fuscè probat Ulloa *in cit. trakt.*

13. Præterea ex tali propositi universalitate servandi omnia mandata, nec violandi præceptum ullum grave, sit consequenter, ad valorem Sacramenti requiri in penitente volitionem seriam & resolutam relinquendi occasionem proximam peccati gravis. Hæc autem occasio proxima dicitur illa, quæ homines similis conditionis frequenter inducit ad peccatum, vel de qua per experientiam constat, quod in peccatum frequenter inducat, ex Suarez *disp. 32. sect. 2.* ex Card. de Lugo *disp. 14. de pen. sect. 10. n. 149.* ad differentiam alterius occasionis, quæ dicitur remota, & est ex citatis Doctoribus illa, quæ quamvis aliquo modo inducat ad peccatum, tamen non habet frequentem conjunctionem cum peccato. Ubi notamus 1. quod talis frequentia inductionis ad peccatum, non pensanda sit absolute, sed respective, ex Segneri *in Confess. inst. cap. 5.* Notamus 2. quod occasio proxima peccati constituitur per duo prædicata, nempe per circumstantiam extrinsecam, & per periculum formale proximam peccandi, ex Cardenas *diff. 4. cap. 2.* Hinc inferimus 1. quod aliquando teneatur quis relinquere eam occasionem, in qua solum sexies, vel etiam quater in anno peccavit. Inferimus 2. quod in penitente semper requiritur seria volitio relinquendi occasionem proximam quo ad periculum formale proximam peccandi, non autem semper requiritur volitio relinquendi eamdem

dem quo ad circumstantiam externam; quia aliquando datur ad id impossibilitas vel physica, vel moralis: unde locus factus est celebri divisioni in occasionem proximam voluntariam, quam tenemur relinquere tum quo ad periculum, tum quo ad circumstantiam externam; & in occasionem proximam involuntariam, quam tenemur relinquere quo ad periculum proximum peccandi, per orationes, Sacramentorum frequentationem, & alia huiusmodi. Quod si quis, adhibitis talibus, aliisque mediis, non possit, remanente circumstantia extrinseca, removere ab eadem periculum proximum peccandi, & impossibilitas relinquendi circumstantiam eam externam, non esset physica, sed moralis, licet summa, & gravissima, tunc censemus cum Cajetano, Cardenas, aliisque, quos refert, sequiturque la Croix lib. 5. de pecc. n. 261. contra de Lugo de *Pen. disp. 14. num. 452.* obligandum illum omnino esse ad occasionem proximam relinquendam tum quo ad periculum proximum, tum quo ad circumstantiam extrinsecam. Impossibilitas autem moralis, excusans a removenda circumstantia extrinseca occasionis proximæ, non resultat ex eo, quod illa sit nimis utilis ad oblectamentum, & quod, illa deficiente, nimis agre ageretur vita &c. ut constat ex *prop. 41. damnata ab Alexandro VII.* imo nec resultat ex illo magno incommodo, quod excusat ab observantia legis positivæ, ut videtur deduci ex eadem damnatione *prop. 41.* sed resultat ex alio longe graviore incommodo, quale esset v. g. si vita discrimini evidenti esset exponenda, vel familia honesta ad mendicitatem esset redigenda, ex *Viva in prop. 41. ab Alexandro VII. damnata.*

14. Hactenus dicta de proposito, intelligenda sunt relate ad peccata mortalia: limitanda tamen aliquatenus sunt quo ad peccata venialia; nam quamvis ad valorem ejus Sacramenti, cujus materia sunt sola venialia, requiratur propositum supernaturale, formale, vel virtuale, efficax etiam modo supradicto, etsi, ut docet Castropalaus *trist. 23. p. 2.* non ita firmum & efficax, sicuti propositum vitandi mortale; tamen non necessario requiritur, quod sit omnino absolutum vitandi omnia venialia, sed sufficit absolutum vitandi eadem, prout humana fragilitas patitur, ex eodem Castropalaus *loc. cit.* nec necessario requiritur, quod sit universale, extendens se ad omnia venialia in genere, & collective, ex S. Thoma 3. p. q. 87. art. 1. ad 1. Unde concludimus, quod ad valorem Sacramenti, & ad remissionem eorum venialium, quæ sunt materia Sacramenti, requiritur, & sufficit propositum vitandi venialia plene deliberata, & adhibendi diligentiam, quantum humano modo fieri poterit, vitandi omnia semideliberata, vel saltem minuendi eorum numerum, quando dolor venialium fuerit elicited ex motivo universali, extendente se ad omnia venialia. Requiritur vero, & sufficit propositum vitandi unum ex venialibus, quæ quis confitetur, vel eorum aliqua, vel eorumdem frequentiam, quando dolor fuerit elicited ex motivo specialiali vel unius, vel aliquorum, vel eorumdem frequentiarum. In hoc autem casu non remitterentur omnia venialia, quæ quis confitetur, sed vel unum, vel aliqua, vel illa, ob quæ cœpit denominari frequentia, seu frequens lapsus. Ita videtur crui ex de Lugo *disp. 14. sect. 9.* aliisque apud la Croix l. 6. p. 2.

p.2. n.905. Quo ad occasiones proximas venialium, quamvis multi graves Auctores, quales sunt *Con. de Pœn. disp.2. num.130. Layman lib.5. tract.6. cap.4. num.20. Semery in MSS. de Pœn. quest.7. p.3.* alique fortasse probabiliter doceant, non requiri ad valorem Sacramenti, quod proponamus eas vitare, tamen cum Arriaga *de Pœn. disp.38.* probabilius, & fortasse coherentius censemus, requiri, quod proponamus vitare occasiones proximas ejus, vel eorum venialium, de quibus, vel de quorum aliquo dolemus, aut saltem proponamus vitare eas occasiones proximas, quæ venialium frequentiam per se inducunt, vel diligentiam eadem præcavendi imminuunt; quia aliter non videtur subsistere sincerus & efficax dolor, aut propositum, etsi hoc non ita efficaciter debeat movere animum ad fugiendas hujusmodi venialium occasiones, uti sic movet propositum vitandi mortale ad vitandas occasiones mortalium, ex Castropalao *loc. cit.* Demum ex Gobat *tract.6. num.216.* non putamus necessarium, quod qui confitetur sola venialia, habeat, cum proposito vitandi venialia, etiam propositum expressum vitandi mortalia; esto hoc virtualiter semper habeatur in proposito venialium, ut docet la Croix *lib.6. num.906.*

CAPUT II.

De concomitantibus sacramentalem Confessionem.

§. I.

Quidditas, & necessitas sacramentalis Confessionis.

15. **I**N sacramentali Confessione, quæ est altera materiæ proximæ, atque adeo ipsius Sacramenti pars, quinque nobis occurrunt exponenda. 1. Quidditas. 2. Necessitas. 3. Qualitas. 4. Quantitas. 5. Ordo, seu habitudo, quam ipsa habet ad aliquem, ut constabit ex ejus definitione. Itaque Confessio sacramentalis est accusatio legitima de propriis peccatis, facta coram Sacerdote habente locum Dei, in judicio sacramentali, ad veniam peccatorum virtute clavium obtinendam, ex communi Doctorum, & præcipue ex S. Thoma *in 4. d. 22. q. 3. a. 2.* De Fide est, quod fuerit a Christo Domino instituta, & præcepta, ut constat ex Tridentino *sess. 14. cap. 5. de Pœnit.* ex Concilio Constantiensi *sess. 8.* ubi damnatur hic error Wicleffi: *Si homo fuerit debite contritus, omnis Confessio exterior est sibi superflua, & inutilis: præterea ex unanimi consensu Patrum apud Bellarminum, atque ex perpetuo usu non solum Ecclesiæ Latinæ, sed etiam Græcæ; qui usus nunquam fuisse inductus, nisi Confessio fuisset jure Divino præcepta, uti recte notat Platelmus n. 732.*

16. Propterea jure Divino necessaria est omnibus post Baptismum lapsis in mortale, ex Tridentino *loc. cit.* etiam illis, qui per Contritionem charitate formatam justificati sunt. Ii tamen non tenentur statim primo quoque tempore confiteri, sed quando instat obligatio. Hæc autem ex jure Divino obligatio instat per se 1. in periculo mortis, sive hoc sit ex morbo, sive ex imminente

Tom. III.

L

navi-

navigazione; periculo partu periculoso, extremo supplicio &c. ex S. Thoma, Castropalao, Card. de Lugo *disp.* 15. *sess.* 3. *num.* 37. qui sub eodem casu comprehendit illum, qui habet de presenti Sacerdotem, a quo possit absolvi a reservatis, postea vero non habiturus est, a quo possit absolvi; imo recte idem Auctor insert, ratione hujus obligationis teneri Medicum monere infirmos de imminente periculo mortis. 2. Instat talis obligatio per se, ut probabilius vult Illung. *num.* 13. contra Castropalaum, sæpius in vita. 3. Instat radi caliter pro tempore ab Ecclesia determinato, quatenus Christus voluit obligare pro tempore ab Ecclesia determinando, ex Card. de Lugo *num.* 39. Per accidens vero in aliis multis casibus instat: primo nempe, si gravatus peccato mortali, etiam si contritus, velit quis suscipere Eucharistiam, ex Tridentino *sess.* 13. *cap.* 7. secundo, si quis credat, certam speciem peccati, v.g. luxuriæ, se non posse vitare, nisi ad Pœnitentiæ Sacramentum accedat &c. ex Castropalao, aliisque communiter. Propter dicta, merito Ecclesia suo præcepto determinavit, ut omnes Fideles, cum ad annos discretionis pervenerint, semel saltem in anno omnia sua peccata mortalia confiteantur, ex Concilio Lateranensi in *Cap. Omnis utriusque sexus, de pen. & rem.* Huic autem præcepto, quod non est mere Ecclesiasticum, sed veluti modificatio præcepti Divini, non satisficit per Confessionem voluntarie nullam, ut constat *ex prop.* 14. *damnata ab Alexandro VII.* imo nec per Confessionem quamvis involuntarie nullam, ex Platelio *num.* 744. Satisficit tamen quocumque anni tempore; quia, per se loquendo, non habet ullum anni tempus, adeoque nec Paschale determinatum, quanvis qui tempore Paschali haberet peccatum mortale, teneretur tunc confiteri ratione Communionis faciendæ, ex Castropalao *num.* 8. Mandat præterea Tridentinum *sess.* 13. *cap.* 3. ut Sacerdos quilibet quamprimum confiteatur, si, necessitate urgente, absque prævia Confessione celebraverit, ex cuius mandato datur ad id obligatio gravis, ut constat *ex prop.* 38. *damnata ab Alexandro VII.* Illa autem particula *quamprimum* non intelligitur, cum Sacerdos suo tempore confitebitur, ut constat *ex 39. damnata ab eodem Pontifice*, sed probabiliter ex de Lugo, aliisque apud Vivam *num.* 5. intelligitur, si Sacerdos intra triduum confiteatur. Hactenus exposita de præcepto tum Divino, tum Ecclesiastico Confessionis, afficiunt Fideles lapsos in mortale; nam peccatis venialibus tantum adstricti, nec Divino, nec Ecclesiastico præcepto confiteri tenentur, ex Suarez *disp.* 36. *sess.* 2. aliisque communiter apud Castropalaum *traff.* 23. *p. 5. disp. unic.* Consuetudo tamen habet, teste Bufembaum, & cogi etiam quilibet posset, ut in Paschate habens sola venialia, se sistat Parocho, si nolit confiteri, eique hunc conscientiæ suæ statum declaret, ut eum cum reliquis ad Communionem admittat.

§. II.

Qualitates Confessionis sacramentalis.

17. **Q**ualitates Confessionis sacramentalis aliz sunt substantiales, aliz sunt accidentales. Substantiales sunt 1. quod ipsa sit dolorosa, uti supra explicavimus; 2. quod sit sensibilis, quia ipse dolor, ut sit pars Sacramenti, debet per Confessionem fieri aliquo modo sensibilis. Accidentales sunt 1. quod ipsa sit secreta, seu auricularis; 2. quod sit vocalis; 3. quod sit vera, seu fidelis. Jam vero certum est, quod, si in Confessione deficient primæ duæ qualitates substantiales, ea irrita sit, nec sit pars Sacramenti: non autem semper est irrita, si deficient postremæ tres qualitates accidentales; nam hic modus faciendi Confessionem secreto, etsi licitus & honestus sit, uti definivit Tridentinum *sess. 14. cap. 5.* non est tamen de necessitate Sacramenti, ex S. Thoma *quodlib. 1. art. 10.* & hæc doctrina videtur Suarezio nunc omnino certa ex Tridentino: imo neque est de necessitate præcepti ex parte poenitentis, ex Suarez *disp. 29. sect. 1.* unde posset aliquando poenitens in majorem suorum scelerum vindictam, & Ecclesiæ ædificationem, sua peccata proprio Sacerdoti coram aliis fateri, ex eodem, & ex Castropalao *loc. cit. p. 8.* Est tamen de necessitate præcepti ex parte Sacerdotis, tum quantum ad secreti observationem juxta voluntatem poenitentis, tum quo ad hoc, ut non possit cogere poenitentem, ut aliter confiteatur, ex eodem *loc. cit.* Hinc recte Navarrus in *Cap. Sacerdos, de poen.* insert, graviter peccare eum Sacerdotem, qui plures simul poenitentes audit in Confessione, eo quod sint pueri. Item neque est de necessitate Sacramenti, quod Confessio fiat vocaliter, seu voce humana, ex S. Thoma *quodlib. 1. art. 10.* quem communiter sequuntur Doctores, teste Suarez. Hinc in praxi absolvi solent muti, & morituri, qui aliter, quam nutibus, peccata sua declarare nequeunt. Est tamen talis modus confitendi vocaliter, de necessitate præcepti Ecclesiastici, desumpti ex usu & praxi Ecclesiæ, ex Castropalao *loc. cit.* Hinc graviter peccaret, qui nutibus, vel scriptura tantum, absque ulla vocis prolatione, peccata fateretur, cum tamen facile posset ea voce proferre, ex S. Thoma *quodlib. 1. artic. 10.* Demum fidelitas, seu veritas in Confessione ita requiritur, ut mentiri in Confessione non solum sit contra veracitatem, sed etiam contra religionem, propter irreverentiam contra Sacramentum, quæ potest esse vel levis, vel gravis, adeoque peccatum vel leve, vel grave, ex Suarez *disp. 22. sect. 10.* Et quidem mentiri in materia necessaria, sive negando peccatum mortale, quod factum est, sive asserendo peccatum grave, quod factum non est, est peccatum grave, & consequenter contra substantiam Sacramenti. Mentiri vero in materia non necessaria, cum hoc fiat aut negando v. g. veniale, quod factum est, aut fiat asserendo veniale, quod factum non est; dicimus, quod, si fiat primo modo, erit peccatum veniale, & stabit substantia Sacramenti, dummodo cætera adsint; si autem fiat secundo modo, peccabitur graviter, nec stabit substantia Sacramenti, quando tamen tale falsum

veniale fuerit materia totalis ejus Sacramenti; peccabitur venialiter, quando illud veniale falsum fuerit materia partialis ejus Sacramenti, ex Suarez *cit. disp. num. 7.* secluso tamen scandalo, & contemptu.

§. III.

Quantitas, seu integritas Confessionis.

18. **Q**uantitas Confessionis dici potest ex Suarez integritas ejusdem, & extensio, quam ipsa habere debet ex parte materiae. Hæc autem integritas, seu extensio protenditur ad peccata omnia mortalia quo ad speciem, & numerum, post diligens examen memoriæ occurrentia, quæ commissa sunt subsequenter tempore, aut natura ad Baptismum, quæque rite aperta non fuerint in Confessione: item ad circumstantias omnes speciem mutantes, non autem, per se loquendo, ad circumstantias pure aggravantes. Et quidem talis integritas per se, & ordinarie requiritur in Confessione, vi præcepti Divini in ipsa Sacramenti institutione fundati: per accidentem tamen, & extraordinarie potest abesse; cum ejus præcepti obligatio cesset, quando ea integritas vel physice, vel moraliter servari non possit. Hinc 1. integritas Confessionis duplex assignatur: alia materialis; alia formalis. Integritas materialis est, quando Confessio fit de omnibus peccatis memoriæ occurrentibus modo supradicto: formalis est, quando Confessio fit, non de omnibus peccatis memoriæ occurrentibus, sed de illis omnibus, quæ, & qualiter nulla impossibilitas, vel physica, vel moralis, impedit manifestare. Primum integritatem dicimus esse necessariam necessitate præcepti; alteram vero esse necessariam necessitate Sacramenti, ex Castropalao *tract. 23. disp. unic. p. 1.* aliisque communiter. Hinc 2. pœnitens tenetur sub gravi, quando habet conscientiam peccatorum mortalium, in quibus requiritur integritas, præmittere Confessioni diligens examen, & facere moralem diligentiam, ut eorundem recordetur quo ad numerum, & speciem, ex Suarez *disp. 23. scđ. 10.* Hæc tamen diligentia non requiritur eadem in omnibus: unde recte ait Clericus *dec. 11.* quod in aliquibus requiritur examen exactissimum, in aliquibus mediocre, in aliquibus modicum, considerata capacitate personæ, consuetudine peccandi, diuturnitate temporis ab ultima Confessione respective. Potest ac multoties debet talis diligentia juvari ab industria Confessoris: non ideo tamen existimandum est, posse pœnitentes imparatos accedere, ex Suarez *loc. cit.* imo, si pœnitens imparatus, & sine prævio examine accederet, Confessio esset invalida, non solum casu quo ex defectu examinis illa non fuisset integra, & omisum esset unum, vel plura peccata, sed etiam, ut probabiliter docet Card. de Lauræ *disp. 12. art. 9.* casu quo Confessio fuerit integra, & nullum omisum peccatum, quamvis id fortasse non immerito limitet Clericus *dec. 21. de Pœn.* dicendo, sententiam Eminentissimi de Lauræ procedere, dummodo tales non fuerint circumstantiæ, ut pœnitens per omissionem examinis nullo prudenti periculo se exposuerit lændendi integritatem. Certum vero est ex Suarez *loc. cit.* aliisque, non teneri pœnitentem ad facien-

faciendam diligentiam extraordinariam : unde ille non tenetur peccata scribere , etiam si timeat probabilissime , se non esse eorum in Confessione recordatum : Castropalaus *disp. unic. p. 10.* Hinc 3. merito damnata est ab Alexandro VII. hæc propositio num. 11. *Peccata in Confessione omissa , seu oblita ob instans periculum vite , aut ob aliam causam , non tenemur in sequenti Confessione exprimere :* item num. 24. hæc alia : *Mollities , sodomia , & bestialitas , sunt peccata ejusdem speciei infima ; ideoque sufficit dicere in Confessione se procurasse pollutionem :* item num. 25. hæc alia : *Qui habuit copulam cum soluta , satisfacit Confessionis præcepto , dicens , commisi cum soluta grave peccatum contra castitatem , non explicando copulam :* sicuti qui peccato interno superaddidit externum , debet hoc etiam explicare , etiam si admittatur , quod actus externus nullam novam malitiam superaddat interno , ex communi cum Platelio Peccata etiam negative dubia sunt probabilius , saltem ob ingentem auctoritatem Doctorum , explicanda : quamvis opposita opinio , spectatis præcise rationibus intrinsicis , videatur probabilis , ut videre est apud de Lugo *disp. 16. sect. 2.* qui bene monet , in re morali non esse facile recedendum a communi sensu . Admittimus tamen cum Gormaz de Pæn. 170. quod qui multis ab hinc annis fecit Confessionem generalem , & modo negative dubitat , an tum dixerit certum peccatum , non teneatur illud confiteri ; quia Confessio facta , est in possessione pro integritate , nisi positiva ratio prudenter dubitandi occurrat . Hinc 4. potest per accidens dimidiari valide , ac licite Confessio in variis casibus a Doctoribus enumeratis : v. g. si imminet periculum mortis vel pœnitenti , vel Confessario ; si infirmus non potest , nisi summo cruciatu , & summa difficultate , ac detrimento valetudinis , peccata omnia aperire &c. Non tamen potest sic dimidiari ratione magni concursus pœnitentium , qualis v. g. potest contingere in die magnæ alicujus festivitatis , aut Indulgentiæ , ex decreto Innocentii XI. *prop. 59.* non enim in tali casu datur impossibilitas vel physica , vel moralis , servandi integritatem , propter quas solas impossibilitates excusamur ab integritate materiali . Hinc 5. ex de Lugo *disp. 17. sect. 1.* potest aliquando in casu gravissimæ necessitatis non solum dimidiari Confessio , sed eadem fieri in genere , manifestando , se peccasse : unde Confessio generalis , seu in genere , potest aliquando esse sacramentalis ; quia aliqua Confessio est de essentia hujus Sacramenti , Confessio vero talis , vel talis , solum est de præcepto , uti supra innuimus . Qui autem , sic est confessus , tenetur postea , si recordetur , vel possit , confiteri speciem infimam ; & , universaliter loquendo , repeti debet Confessio peccati mortalis nunquam directe absoluti in sua specie infima .

etiamque .

§. IV.

Ordo, quem habet sacramentalis Confessio.

19. **O**Rdo, seu respectus ad aliquem, quem habet sacramentalis Confessio, stat in hoc, quod fiat coram legitimo Judice, idest fiat Sacerdoti vero, presenti, approbato, & jurisdictionem habenti, ex communi. Hinc 1. certum est, nullum extare præceptum, quo quis non habens copiam Confessarii, teneatur aperire laico sua peccata, imo nec quo teneatur per interpretem aperire Sacerdoti extra articulum mortis, in quo articulo, non quidem ex præcepto Divino Confessionis, sed ex præcepto charitatis erga se ipsum, teneretur habens conscientiam peccati mortalis, per interpretem confiteri Sacerdoti, ut docet Suarez *disp. 36. sect. 6.* Hinc 2. illicitum & invalidum est confiteri Sacerdoti absenti per litteras, aut internuncium, & sic confessum absolvere: item absentem absolvere post Confessionem in præsentia factam, & etiam, secluso casu extremæ necessitatis, præsentem absolvere post Confessionem in absentia factam. Ita Platelius, & Viva, ex decreto Clementis VIII. Potest nihilominus moribundus a Sacerdote præsentem absolvere, si per testes constet, eum ante Sacerdotis adventum dedisse signa penitentiae: imo, quamvis omnino illicitum sit etiam sub conditione dare Absolutionem moribundo, si nulla simpliciter sensibilis Confessio, ne in absentia quidem Sacerdotis, præcessit, potest tamen idem moribundus sub conditione absolvere, si ille det aliqua signa, aut dederit, aut sit in talibus circumstantiis, ut Sacerdos præsens possit prudenter judicare, quod sit, aut præcesserit aliqua sensibilis Confessio. Addo, quod in casibus, in quibus Sacerdos potest eum moribundum absolvere, etiam sub gravi tenetur: Viva *in App.* allegans quamplures Doctores. Hinc 3. ut satisfiat præcepto Confessionis, Confessio fieri debet Sacerdoti approbato, sive is sit sæcularis, sive sit Regularis; si tamen fiat Regulari, qui est præsentatus Episcopo, & ab eo est injuste repulsus, non satisfacit, ex decreto Alexandri VII. *prop. damnat.* 13. Advertas, quod hæcenus exposuimus Confessionem sacramentalem, quæ est a Christo Domino instituta, & est pars Sacramenti Penitentiae: quando tamen Auctores docent, obligationem sigilli sacramentalis emanare ex sola Confessione sacramentali, tunc nomine Confessionis sacramentalis non intelligunt dumtaxat hanc specificam, & legitimam, sed hanc & aliam etiam illegitimam, quæ non est pars Sacramenti: unde a Gobato assignatur definitio universalis Confessionis sacramentalis, complectens tum legitimam, tum illegitimam, & est: *Accusatio peccatorum facta Sacerdoti vero, vel probabiliter existimato in ordine ad Absolutionem.* Posita autem hac divisione Confessionis sacramentalis legitimæ, & Confessionis sacramentalis illegitimæ, salvatur veritas ejus axiomatis, nempe quod obligationem sigilli parit omnis & sola Confessio sacramentalis, ex Gobat. *tract. 7. num. 11.*

§. V.

§. V.

Utrum liceat revelare complicem in Confessione.

20. **R**ES hæc satis practica sic breviter resolvitur. Non licet sub gravi, per se loquendo, revelare complicem in Confessione, sine ulla necessitate, vel causa. Ita Suarez *disp. 34. de Pen. sect. 1.* Cardinalis de Lugo *disp. 16. sect. 7.* Dixi, per se loquendo; nam per accidens, v. g. ex inadvertentia, vel ignorantia, potest id esse vel nullum, vel leve peccatum, etiam si propter delicti gravitatem complex notabile famæ detrimentum patiatur apud Confessarium. Dixi, sine ulla necessitate, vel causa; nam, stante aliqua gravi causa, id per se licitum erit: siquidem, ut colligitur ex S. Thoma, revelare peccatum occultum alterius propter bonum ejus, vel reipublicæ, vel tertiæ personæ, aut propter aliquod aliud bonum necessarium, debitis circumstantiis observatis, non est peccatum, aut detractio. An vero sit gravis causa, & sufficiens ad id licite faciendum necessitas servandi integritatem materialem Confessionis, quæ aliquando potest occurrere, cum quis non potest rite aperire suum peccatum, quin revelet complicem? etsi nonnulli id negent cum Diana *1. tom. tractat. de circumst. agg. resol. 49.* aliisque videntis apud de Lugo *disp. 16. sect. 7.* tamen probabilior ac verior videtur sententia opposita id affirmans, quam tenent S. Thomas *opusc. 12. q. 6.* Scotus *in 4. dist. 21. q. 2.* S. Bonaventura, ac S. Bernardus, qui *in formula honesta vitæ* sic ait: *De nullo prorsus sinistre loquaris, quantumcumque sit verum, vel manifestum, nisi in Confessione, & hoc, ubi non potes aliter manifestare peccatum tuum.* Limites, dummodo aliud malum complici non immineat, nisi præcisè hoc, quod Confessarius ejus peccatum sciat, ex de Lugo *ibid.* item dummodo pœnitens non possit absque gravi difficultate alterum Confessarium adire, cui complex ignotus sit, neque possit aliquantum Confessionem differre, ex cuius dilatione speret manifestare posse peccatum absque complicitis revelatione; quia, quando hæc duo possent commode fieri, non adesset justa causa revelandi complicem, & deberent ea duo præstari ad servandam integritatem, ex de Lugo *ibid.* Hæc vero doctrina, quod liceat id propter integritatem Confessionis, non habet locum in Confessione venialium, neque mortalium alias clavibus directe subsectorum: unde, quando pœnitens non potest ista fateri sine revelatione complicitis in materia gravi, debet eorum Confessionem omittere, ex eodem: habet tamen locum hæc doctrina in peccatis dubiis mortalibus, nunquam alias rite clavibus subiectis, ex eodem. Rursus, cum nonnulli Auctores velint, esse causam sufficientem revelandi complicem, correctionem faciendam ipsi a Confessario, ac propterea censeant, posse interrogari a Confessario pœnitentem de complice, ex sine correctionis, & obtemperantis licentia illum corrigere, dico, quod hæc doctrina licet, per se loquendo, & secluso scandalo, possit tuta conscientia ad praxim deduci, ea tamen non videtur consulenda, nisi in casu, in quo non sit alius, qui præter Confessarium possit complicitis correctionem efficere. Quamobrem optime

mo-

monet Fagundez *de Eccl. prac. l. 5. cap. 2.* cavendum esse, *ne petatur, ut detur hac licentia, sine causa urgentissima, & in negotio etiam gravissimo.* Imo sapienter de more animadvertit Suarez *disp. 34. de Pœn.* hæc servanda in tali casu esse: 1. ut Confessor propter hunc finem correctionis non interroget in particulari personam complicitis, nisi pœnitens sua sponte illam declaret; quia exponeret se periculo infamandi proximum sine necessitate: potest tamen in generali interrogare, an complex indigeat correctione, & juxta responsionem pœnitentis, generaliter illum monere, ut suæ obligationi satisfaciatur: 2. ne statim se invitet ad correctionem faciendam; quia hoc ipso, quod Confessor se offert ad illud munus, pœnitens non tam libere & sponte procedit in hoc negotio, sicut par est: 3. ne aliquid exigat a pœnitente tanquam debitum ex obligatione præcepti, quod revera non sit, sed vere, & fideliter illi proponat, quid ex præcepto agere teneatur, quid vero tantum liceat; alioqui graviter deciperet pœnitentem, si sub titulo ficto, & non vero necessitatis, aut præcepti, eum cogeret vel ad revelandum complicem, vel ad dandam facultatem corripiendi illum, aut aliquid simile, & consequenter in hoc graviter peccaret vel contra iustitiam, vel contra sigillum &c. ex Suarez *loc. cit.* Addo ex Card. de Lugo *de Pœn. disp. 26. n. 392. & seq. & ex Bannez 2.2. q. 32. art. 8. post tract. de corr.* posse contingere, ut gravia damna timeantur a complice, & pœnitens non possit ea impedire, sed solus Confessarius; in quo casu, ut innuimus, tenetur quidem pœnitens Confessario manifestare complicem, sed expedit, ut id fiat extra Confessionem, ex la Croix *l. 6. p. 2. num. 1752.* Quod si pœnitens spondeat impedire per se ipsum, & Confessarius habeat prudentem causam dubitandi, an id faciurus sit, non potest cogere, ut manifestet complicem; attamen potest, & juxta Bannez debet differre Absolutionem, donec renunciet, se id fecisse. Cavendum tamen, ne quid fiat contra Constitutionem 134. *Suprema omnium Bened. XIV. tom. 1. ejus Bull. pag. 535.* ab eodem Pontifice denuo confirmatam per duas alias Constitutiones, nempe 8. *Ubi primum,* & 20. *Ad eradicandum,* quæ habentur *tom. 2. ejusd. Bull. pag. 54. & pag. 143.*

CAPUT III.

De subsequenti sacramentalem Confessionem.

§. I.

De Absolutione.

21. **A**bsolutio, quæ est pars essentialis hujus Sacramenti, & dicitur forma, in qua præcipua hujus Sacramenti vis sita est, ex Tridentino *sess. 14. de Pœnit. cap. 3.* & quæ determinat actus pœnitentis, ut hic & nunc constituentur hoc Sacramentum, cum ex illis actibus, & hac Absolutione resultet integrum Sacramentum Pœnitentiæ, describi potest sic: *est prolatio sententia facta a sacerdote potente, & volente absolvere a peccatis.* Unde, si Sacerdos aut non haberet jurisdictionem vel ordinariam, vel delegatam; aut

aut non haberet intentionem vel actualem, vel virtualem, nulla esset, & invalida Absolutio: in qua expendemus 1. an, & quibus verbis necessario constare debeat: 2. qualiter absolute, & conditionate proferenda sit: 3. cui danda sit: 4. cui neganda, vel differenda: 5. quando demum danda sit.

22. Hæc itaque Absolutio non potest confici nutibus, aut exprimi aliis signis, quam verbis a Sacerdote prolati. Ita communiter, ex Tridentino sess. 14. cit. cap. 3. Verba autem debent esse hæc: *Ego te absolvo a peccatis tuis, in nomine Patris, & Filii, & Spiritus Sancti. Amen*: cum hac tamen differentia, quod omnia hæc verba necessario proferri debeant necessitate præcepti, ex communi; & quamvis aliqui dubitent de qualitate præcepti, an graviter, vel leviter obligantis, ut Bonacina dubitat de præcepto invocationis Trinitatis, tamen omnes conveniunt, quod graviter obligat præceptum exprimendi ly *a peccatis*. Non vero omnia verba necessario proferri debent necessitate Sacramenti; nam etsi ad hujus valorem sufficiant hæc verba: *Absolvo te*: tamen hæc opinio, speculative valde probabilis, non est ad praxim deducenda, ob primam propositionem ab Innocentio XI. damnatam, nisi in casu necessitatis &c. Prædictis verbis mutatio substantialis contingeret, si proferrentur deprecativo modo, v.g. *Absolvat te Christus*: Castropalaus ex communi; non autem mutatio substantialis interveniret, si diceretur reverentiæ causa erga pœnitentem: *Absolvo Dominationem vestram*. Orationes ac preces tum antecedentes, tum subsequentes, etsi laudabiliter ac rite proferantur, non sunt tamen de necessitate, & rationabili causa omitti possunt, v.g. in Confessionibus brevibus, & quando multi sunt confitentes, Bussembaum ex communi. Sensus horum verborum: *Absolvo te a peccatis*: significat veram a peccatis Absolutionem: cum autem peccata ligent peccantem multis vinculis, Absolutio a peccatis non determinat vinculum, a quo pœnitentem absolvit; sed ad omnia vincula, quibus pœnitens tenetur, se extendit. Hinc, quia pœnitens nunquam est antecedenter ita a peccatorum vinculis absolutus, ut sit etiam solutus ab improportione, & indignitate abundantioris gratiæ recipiendæ, quam contraxit ratione peccati commissi, idcirco sensus Absolutionis a peccatis semper est verus, ex Castropalao hic num. 6.

23. Prædicta verba Absolutionis proferri debent absolute, non conditionate, nisi quando dubium esset, an pœnitens esset rite dispositus, & rationalis atque urgens causa exigeret, ut absolveretur; tunc enim posset Absolutio concedi sub conditione de præsentī, mente saltem retenta, v.g. *si es capax, ego te absolvo &c.* nunquam vero proferri potest Absolutio sacramentalis sub conditione de futuro, v.g. *Absolvo te, si resistes*, ex Castropalao hic cum communi.

§. II.

Cui danda, vel neganda, vel differenda sit Absolutio.

24. **P**œnitenti rite disposito, & de quo Confessarius tum ut iudex, tum ut medicus prudenter iudicat, esse rite dispositum, danda omnino est Absolutio; ita ut graviter peccaret Confessarius eum sine Absolutione dimittens, non solum quando Confessio fuit facta de materia necessaria, sed etiam quando fuit facta de materia dumtaxat sufficienti, v.g. de venialibus, ut probabilius docet Castropalaus *tract. 1. de conf. p. 4.* contra Sanchez doctentem, quod non dare Absolutionem pœnitenti rite disposito confitenti venialia, sit dumtaxat veniale. Limites sententiam Castropalai, dummodo ipse pœnitens non consentiat, & dummodo non habeat reservata; in hoc enim casu est remittendus pœnitens ad superiorem, ut alibi dicemus, nec debet, nisi urgente aliqua gravi causa, & expositis aliis peccatis non reservatis, absolvi, & tunc cum onere comparendi, seu se præsentandi superiori, etiam si Confessarius fuerit ex Mendicantibus, quo ad casus reservatos Episcopo; nam proscripta est ab Alexandro VII. hæc propositio *num. 12. Mendicantes possunt absolvere a casibus Episcopis reservatis, non obtenta ad id Episcoporum facultate.*

25. Dilatio Absolutionis, & negatio Absolutionis, sunt duo valde diversa non solum quo ad verba, quibus a Confessario exprimitur negatio, & exprimitur dilatio, sed etiam quo ad rem; nam negatio Absolutionis supponit, non esse in pœnitente jus ad illam simpliciter, & de facto tale jus illi inesse negatur a Confessario, quando negatur Absolutio: dilatio vero non supponit, deesse simpliciter pœnitenti jus ad Absolutionem, sed supponit, vel tale jus illi inesse sub aliquo dubio, vel esse quidem, at non ad habendam statim Absolutionem, vel esse tum sine dubio, tum etiam ad habendam statim Absolutionem, spectato munere substantiali Confessoris, & pœnitentis, non tamen spectato munere accidentali, seu secundo, quod est consulere majori utilitati, & majori fructui animæ. Jam vero neganda est Absolutio pœnitenti, qui non est rite dispositus, Suarez *disp. 32. ex communi.* Hujusmodi autem est inter ceteros pœnitens, qui ignorat mysteria Fidei ad salutem necessaria, ut constat *ex prop. 64. damnata ab Innocentio XI.* item nolens rem alienam restituere, aut famam: item nolens injuriam condonare: item nolens deferre proximam, & voluntariam occasionem peccandi, *ex prop. 61. damnata ab Innocentio XI.* volens directe & ex professo eam querere, aut ei se ingerere, *ex eadem propositione:* volens directe eam querere pro bono spirituali, vel temporali suo, vel proximi; *ex prop. 63. damnata ab Innocentio XI.* volens eam non fugere, quando causa aliqua utilis, aut honesta non fugiendi occurrit, *ex prop. 62.* item habens consuetudinem peccandi, quam nolit aperire Confessario interroganti, vel in quo eam faten-

fatente nulla appareat spes emendationis, etiamsi dicat, se dolere, & proponere emendationem, ut constat *ex prop. 58. & 60. damnatis ab eodem Innocentio XI.* Unde proloquium illud: *In foro conscientie credendum est homini pro se, & contra se loquenti*: intelligendum est, dummodo homo fidem mereatur, nec sit praesumptio in contrarium.

26. Porro differenda est Absolutio 1. quando Confessarius prudenter iudicat, Absolutionem statim, & facilius impetratam, futuram esse per accidens occasionem poenitenti, ut iterum relabatur: 2. quando idem prudenter iudicat expedire dilationem Absolutionis, ut poenitens reddatur magis cautus, & magis confirmetur in bono proposito, & quidem tali modo expedire, ut sit medium hic & nunc fere unicum in ordine ad talem finem: 3. quando idem prudenter iudicat, dilationem expedire ad talem finem, sed non esse hic & nunc medium ad illum necessarium, sed dumtaxat opportunum; cum hac tamen differentia, quod in 1. & 2. casu videatur Confessarius non solum posse, sed teneri differre Absolutionem, cum sit non solum iudex, sed etiam medicus; in tertio vero videatur posse quidem, extra articulum mortis, & extra casum quo poenitens non sit facile amplius habiturus occasionem consentiendi, vel in desperationem casurus, posse (inquam) differre, sed non teneri: imo, quia hoc remedium differendi Absolutionem, siue Sacerdos eo utatur ut iudex ad cognoscendam dispositionem poenitentis, siue ut medicus ad emendationem ejus, quem scit esse dispositum, regulariter est periculosum, ut ait Francol. in *Cler. Rom. l. 1. disp. 5.* idcirco parce, & cum grano salis adhibendum est: unde sapius expedit; ut monet Castropalaus *tract. 23. p. 13.* quod Confessarius siue ut iudex, siue ut medicus, cognoscens poenitentem indispositum, aut de ejus sufficiente dispositione dubitans, non illum dimittat statim inabsolutum, sed salutaribus monitis adjuvet, disponat, & dispositum absolvat: quin etiam cum eodem Castropalao *loc. cit.* censemus, quod Confessarius advertens poenitentem indispositum inculpabiliter, teneatur exhortationibus, interrogationibus, ac salutaribus monitis illum disponere, nec possit illum statim, eo renuente, inabsolutum dimittere, tametsi possit aliquantulum Absolutionem differre, donec disponatur.

§. III.

Quando danda sit Absolutio?

27. **F**alsum omnino est, quod Absolutio sacramentalis debeat dari post peractam poenitentiam, ut constat *ex prop. 16. damnata ab Alexandro VIII.* Nec consuetudo, quae est in Ecclesia, eam dandi ante peractam poenitentiam, potest ullo modo dici abusus, *ex prop. 18. ab eodem Pontifice damnata*; sicuti etiam cum Platelio erroneum censemus generatim asserere, differendam esse Absolutionem poenitenti, donec per tempus aliquod notabile a peccatis commissis abstinerit. Illud vero omnino tenendum, ut verba Absolutionis aliquo modo sint simul, & ut aliquo modo conjungantur cum ipsa Confessione sacramentali; quia, nisi aliquo modo conjungerentur,

non facerent aliquo modo unum, ex Suarez de *Sacr. disp. 2. sect. 2.* Quanta vero debeat esse hæc simultaneitas, seu conjunctio, non potest certa regula definiri, ac propterea est moraliter pensanda, dicendumque, quod ea simultaneitas sufficiat, quæ moraliter satis sit, ut idem iudicium peragi, & per sententiam consummari intelligatur, ex eodem *ibidem*. Cum autem idem iudicium peragi recte intelligi possit, etiam si aliquo tempore post factam Confessionem detur pœnitenti præfenti Absolutio, hinc non immerito Gobat *trakt. 1. de Sacr. in gener. sect. 2.* secutus Tamburinum, putat, quantum est ex hoc capite, rite se gessisse Sacerdotem quemdam, qui pœnitentem absolvit non statim post auditam Confessionem, & iunctam satisfactionem, sed post integram fere horam, in qua ipse Confessor debuit in loco eodem Confessionis, ex urgenti necessitate, prolixum sermonem habere cum quodam magnæ auctoritatis Principe. Quamquam pro praxi, si similis casus occurreret, nec res improvisa faceret Confessarium immemorem officii sui, ut fortasse contigit in relato eventu prædicti Sacerdotis, deberet Confessarius, antequam loqui cum Principe incipiat, proferre verba Absolutionis; non enim videtur, quod Confessarius, monitus adesse Principem volentem eum alloqui, debeat secundum regulas Christianæ vel urbanitatis, vel observantiæ, prorsus subito abrumperæ ceptum, & eo usque perductum ministerium; quinimo, si id faceret, vix censet Gobatus occurrere rationem eum excusandi saltem a veniali: nam reverentia debita Sacramento exposcit, ut in tali casu Confessarius petat a Principe licentiam tantillæ moræ, ut tam sanctum ministerium conficiat.

§. IV.

De Satisfactione sacramentali.

28. **S**atisfactio, quam diximus esse partem integram Sacramenti Pœnitentiæ, tria nobis exponenda exhibet, quæ tenent se quo ad illam 1. ex parte ipsius Satisfactionis: 2. ex parte Confessoris: 3. ex parte pœnitentis. Dicimus igitur, quod Satisfactio sacramentalis est. *Executio operis a Confessario in pœnitentiam peccati confessi virtute clavium pœnitenti injuncta*. Hæc autem executio quamvis per se solam spectata habeat vim remittendi pœnas peccatis debitas, quia, ut supponimus, est actus virtutis factus ab homine iusto; tamen, ut est pars integrans Sacramentum præteritum, habet majorem vim ex institutione Christi ad eas pœnas delendas. Unde non solum ex opere operantis, sicut satisfactio mere voluntaria, sed etiam ex opere operato causat hunc effectum remissionis pœnæ; ac propterea per hanc sacramentalem Satisfactionem major pars pœnæ remittitur in non ponente obicem, quam, ceteris paribus, remitteretur per satisfactionem voluntariam. Quemadmodum vero incertum est, quanta sit ea major portio pœnæ, quæ ex opere operato remittitur, cum id soli Deo cognitum sit; ita certum est, hanc pœnæ remissionem non conferri exequenti hanc Satisfactionem in statu peccati mortalis, seu obicem ponenti; siquidem non vivens in Christo, nequit Christi

Christo satisfacere. Rursus huic Satisfactioni concedimus vim impetrandi gratias prævenientes, & auxilia Divina, quibus pœnitens juvatur, ut in posterum cautius vivat, & a peccatis absteat. Utrum vero ex opere operato causet augmentum gratiæ sanctificantis, controversa est gravis inter Auctores, ut cernere est apud Salmanticenses, qui argumenta pro utraque opinione, ac DD. referunt; & quamvis pro parte affirmativa stent eximii Theologi Cajetanus & Suarez, tamen quia hoc non obstante Card. de Lugo *disp. 25. sect. 11* expresse ait, probabiliorem esse partem negativam, asserimus cum Castropalao, quod Satisfactio sacramentalis non causat ex opere operato augmentum gratiæ sanctificantis, cum ipsa neque sit Sacramentum, neque pars essentialis ipsius, neque sit instituta ad reconciliandum pœnitentem cum Deo.

29. Confessarius regulariter, & per se loquendo, tenetur hanc Satisfactionem pœnitenti injungere: unde, per se loquendo, peccaret graviter, si id omitteret, ut docent Castropalaus *tract. 23. disp. unic. p. 21.* & Salmanticenses *tract. 6. cap. 10.* qui volunt, hoc procedere, quando Confessio facta fuerit de mortalibus, non autem quando facta fuerit de venialibus, vel de mortalibus antea confessis; tunc enim probabiliter asserunt cum de Lugo, quod Confessarius omittens injungere Satisfactionem, peccaret solum venialiter. Nos tamen cum Castropalao censemus, quod Confessarius in utroque casu graviter peccaret; siquidem in utroque casu, ut bene notat Moya, inferret grave damnum, & injuriam pœnitenti. Diximus, per se loquendo; nam aliquando potest Confessarius licite ministrare hoc Sacramentum nulla adjuncta Satisfactione, nempe quando absque pœnitentis præjudicio eam injungere omitteret, aut qualibet Satisfactio esset impossibilis, ut congerit 1. si pœnitens esset mortis proximus, adeoque nullam posset adimplere: 2. si ex Confessione, & aliis circumstantiis intelligeret, pœnitentem jam integre satisfecisse pro pœna debita; quod tamen raro eveniet: 3. juxta nonnullos Doctores, si prudenter judicaret pœnitentem non adimpleretur ullam Satisfactionem, cum non teneatur Confessarius vitare damnum quo ad non remissionem pœnæ, quod passurus est pœnitens, cum majori ipsius pœnitentis damno; in quo casu, sicuti & in superioribus, non esset fortasse immunis Confessarius ab aliqua culpa saltem levi, si non curaret levissimam aliquam Satisfactionem injungere, nisi forte etiam hæc, ut in 1. casu videtur supponi, esset impossibilis. Præterea, etsi de facto non detur determinata regula, cui debeat se conformare Sacerdos impositurus Satisfactionem, ut notat Card. de Lauræa *disp. 22. num. 108.* ideoque regula in hoc sequenda, sit dictamen pii & prudentis Confessarii, tamen ex Tridentino *sess. 14. cap. 8. de Pœnit.* universi docent Auctores, teneri Confessarium Satisfactionem imponere peccatis pœnitentium, spectatis omnibus circumstantiis, proportionatam, ita ut peccaret graviter, si pro quibuscumque peccatis gravissimis leves tantum pœnitentias promiscue imponeret. Ob varias autem circumstantias posset Confessarius minorem Satisfactionem injungere, quam mereantur peccata, v. g. ob vehementiam doloris in pœnitente, ob ejusdem debilitatem, ob tempus Jubilæi,

ob dubium prudens, ne gravior Satisfactio obfutura potius sit, demum ob alliciendum sic pœnitentem ad frequentiorē, utilēque Confessionem. Cœterum circa qualitatem operis injungendi pro Satisfactione censemus cum communi, debere esse opus bonum moraliter, & de se Deo gratum, item debere esse pœnosum, & naturæ humanæ afflictivum; quam conditionem habent omnia opera bona post naturæ lapsum: non necessario tamen requiritur, quod sit opus supererogationis; cum aliquando imponi possit, imo aliquando expedit, imponi opus alias præceptum; et si, quoties Confessarius opus aliquod injungit, intelligatur injungere opus alias non præceptum, nisi contrarium vel ex verbis ipsius Confessarii, vel ex communi consuetudine intelligatur. Quod autem Joannes Sanciū velit, necessario debere esse opus externum, hoc non admittimus: unde cum Suarez, aliique putamus, esse posse, imo aliquando expedire opus internum, v.g. piam aliquam meditationem: sicuti etiam probabilius videtur, & tutum, quod pro tali Satisfactione imponi possint preces, & alia pietatis opera præstanda pro defunctis. De tempore, quo hæc Satisfactio injungi debet, dicimus, injungi posse tum ante, tum statim post Absolutionem: consultius autem est ex praxi Ecclesiæ, quod injungatur ante Absolutionem; post quam raro sunt omittenda illa verba: *quidquid boni feceris &c.* cum probabiliter aliquid operentur, & prosint ad Satisfactionem.

§. V.

An pœnitens teneatur acceptare Satisfactionem injunctam?

30. **P**œnitens, per se loquendo, tenetur sub gravi Satisfactionem a Confessario injunctam, & rationabilem acceptare, & acceptatam exequi: unde qui docent Satisfactionem in voto esse partem essentialem Sacramenti, non immerito loquuntur: cum votum, seu propositum exequendi Satisfactionem, includatur in proposito universali servandi omnia mandata graviter obligantia, quod, ut supra vidimus, est pars essentialis Sacramenti, siquidem est illa Contritio requisita ad Confessionem. Advertenter diximus, rationabilem; nam, si injusta esset, & irrationabilis sive ob gravitatem, sive ob temporis diuturnitatem, posset pœnitens illam recusare, & ad alium Confessarium recurrere: sicuti etiam advertenter diximus, per se loquendo; nam ob levitatem materiæ posset, ex communi cum Castropalao, & Suarez, excusari pœnitens a mortali, si post acceptam Satisfactionem, eam non exequatur; nunquam tamen potest excusari a mortali, si nolit Satisfactionem rationabilem, esse levis sit, acceptare, & velit absolvi. Addimus, quod talis obligatio eam exequendi urget pro tempore præscripto a Confessario, & si nullum præscriptum fuerit, urget, cum primum commode quis possit, siquidem ea videtur intentio Confessarii. Quod si contingat, ut Satisfactionis injunctæ pœnitens obliviscatur, cessat ejus obligatio: tunc tamen expedit, uti etiam, si fiat impossibilis, aliam, vel commutationem ejus petere. Non potest autem pœnitens propria auctoritate Satisfactionem sibi injunctam in aliam mutare,

tare, etiamſi evidenter meliorem, &, ut conſtat *ex prop. 15. damnata ab Alexandro VII.* non poteſt propria auctoritate alium ſubſtituere, qui loco ipſius pœnitentiam adimpleat: imo cum de Lugo *diſp. 25. ſeſſ. 5. d. 4.* neque id poteſt de licentia Confefſarii; quia Satisfactio ex Tridentino *cit. ſeſſ. 14.* eſt actus ipſius pœnitentis. Admittimus, quod non ſolum ab eodem Confefſario, ſed ab alio etiam prior Satisfactio injuncta, ex juſta cauſa, poteſt in aliam commutari: in hoc autem ultimo caſu commutationis faciendæ ab altero Confefſario, probabilius videtur, quod repetenda ſit ſaltem in conſuſo prior Confefſio. Quamvis verò nonnulli Auctores, quales ſunt Vaſquez, Bonacina, Navarrus, alique, putent, poſſe a Confefſario inferiori commutari ſuo pœnitenti Satisfactionem illi impoſitam a ſuperiore pro reſervatis, dicendum tamen, quod talis ab eo commutatio fieri non poſſit per ſe, & jure ordinario loquendo. Ita Suarez *tom. 4. in 3. p. d. 38. ſeſſ. 10.* Maſtrius, Tabiena, Sylveſter, alique tum veteres, tum recentiores, & videtur hæc ſententia communior. Ratio eſt; quia pœnitentia illa a ſuperiore injuncta includit quoddam præceptum a ſuperiore impoſitum, quatenus ſuperior eſt: ſed inferior non poteſt mutare præceptum ſuperioris, per ſe loquendo, ac jure ordinario: ergo &c. Addidi ly per ſe, & jure ordinario: quod diligenter notes; nam per accidens, v. g. urgente aliqua gravi neceſſitate, vel pia utilitate, nec facili exiſtente recurſu ad ſuperiorem, poterit fieri talis commutatio: ſiquidem tunc pie præſumitur, hanc eſſe intentionem ſuperioris. Placet hic adjungere, quod ſicuti optime imponitur pro Satisfactione frequentia Confefſionis, uti contra Navarrum docent Vaſquez, Layman, Toletus &c. ita raro, vel nunquam expedit, ut pœnitens obligetur ad conſtitendum cum eodem Confefſario, ex Caſtropolao *traſt. 23. p. 20.* quamquam ſalubre conſilium ſit, ut pœnitens ipſe id ſponte faciat, quando tamen Confefſarius habeat eas qualitates, quas modo recenſebimus.



P A R S S E C U N D A

DE MINISTRO SACRAMENTI PŒNITENTIÆ.

C A P U T I.

Quisnam sit Minister hujus Sacramenti, & quænam ejusdem obligationes præcedentes tempore, vel natura, ipsum actum excipiendi Confessionem sacramentalem.

§. I.

31. **M**inister Sacramenti Pœnitentiæ, cujus obligationes, ac proprietates tum antecedentes sive tempore, sive natura, ipsum actum excipiendi Confessionem, tum eundem concomitantes, tum subsequentes, in breve coactas, & suis capitibus distributas exponam, est solus Sacerdos, ac necessario debet esse distinctus a suscipiente, ex communi. Et quidem prima assertio est de Fide, definita in Concilio Florentino *in litteris unionis*, & Tridentino *cit. sess. 14. cap. 6.* Altera vero satis colligitur ex verbis Christi *Joan. 20. Quorum remisistis peccata &c.* quibus indicatur distinctio remittentis, ab eo cui fit remissio. Ac proinde nunquam laicus, neque in extrema necessitate, deficiente Sacerdote, potest sacramentalem Confessionem excipere, etiamsi ista fiat de solis venialibus; quorum Confessionem, etiamsi aliqui putaverint, posse fieri laico per modum cujusdam sacramentalis, id tamen, ut bene docet Suarez *disp. 24. de Pœnit.* nullum habet fundamentum. Rursus non posset unquam Sacerdos se ipsum absolvere, ac sibi peccata judicialiter remittere, ex communi; nec Pontifex, aut Ecclesia potest in hoc dispensare, aut in eo, ut aliquis non Sacerdos, sit minister hujus Sacramenti; siquidem Pontifex, aut Ecclesia institutionem Christi mutare non potest, ex communi apud Suarez *disp. 24. & Gastropalaum tract. 23. punct. 13.*

32. Sacerdos, quamvis malus sit, aut peccator, est tamen sufficiens minister hujus Sacramenti, atque id de Fide credendum est, ex Tridentino *sess. 14. can. 10.* Verum, non hoc ipso, quod quis est Sacerdos, potest hoc Sacramentum valide ac licite ministrare; sed, supposito Sacerdotio, aliquæ res sunt ulterius necessariæ ad hoc, ut quis valide, aliquæ ad hoc, ut quis licite hoc Sacramentum ministret, ex communi: unde licet omnis Confessarius sit Sacerdos, non tamen omnis Sacerdos est Confessarius, qui bene ex Gobato *tract. 7. cap. 1.* describi, aut definiri potest sic: *Confessarius est Sacerdos præditus potestate completa ligandi, atque solvendi in foro sacramentali.* Cum autem hæc in Sacerdote potestas per se, & quo ad materiam necessariam, sine controversia compleatur per concessionem alicujus rei factam ab Ecclesia, sequitur, quod valor hujus Sacramenti ex parte ministri pendeat ab aliqua concessione, vel prohibitione Ecclesiæ, quod est singulare huic Sacramento, inter cætera, ut advertit Suarez. Dixi, quo ad materiam necessariam;

riam; nam Auctores olim fere omnes convenientes in asserendo, quod facultas absolvendi a materia mere sufficienti, idest a venialibus, & mortalibus alias rite confessis, esset complete concessa omni Sacerdoti in Ordinatione, discrepabant in iudicando, an talis concessio haberetur ex jure Divino, vel potius ex Ecclesiæ benignitate: asserentibus aliis cum Vaquez de *Pan. q. 93. art. 5. dub. 8.* haberi ex jure Divino; aliis contententibus cum Suarez *disp. 26. sect. 5. & seqq.* haberi ex jure Ecclesiastico. Nos in præfenti, præcipientes ab hac controversia, asserimus, esse omnino illicitum simplici Sacerdoti audire Confessionem venialium, aut alterius materiæ pure sufficientis, ex prohibitione facta a Sacra Concilii Congregatione anno 1679. annuente Innocentio XI. Quod si, ea non obstante, simplex aliquis Sacerdos id attentaret, quamvis probabiliter Platellius, & Clericatus *decis. 15. de Pan.* putent invalidam futuram Absolutionem, censemus tamen, probabilius esse, quod ea futura sit valida, uti docent Cardenas *disp. 2. cap. 6. art. 9. & 10. la Croix l. 6. part. 2. num. 1489.* quia, etiamsi stet, talem concessionem haberi ab Ecclesia, non ex hoc, quod Pontifex velit tantum prohiberi, & non permitti, sequitur, tolli jurisdictionem, vel irritari Absolutionem. Dixi, per se; nam per accidens, v.g. in articulo mortis, quando vera interveniat necessitas ministrî, quilibet Sacerdos habet potestatem completam ligandi, atque solvendi, ut certum est ex Tridentino *cit. sess. 14. cap. 7.* At dubitatur inter Auctores, unde tunc habeat Sacerdos suæ potestatis complementum? Qua in re relictis iis, qui docent haberi ex jure Divino, uti specialiter docet Armilla *verb. Absolutio*, asserimus cum Suarez *disp. 26. sect. 4.* haberi ab ipsa Ecclesia.

33. Porro in prædicto casu ita quilibet Sacerdos habet completam potestatem, ut I. nullus Sacerdos excipiat, quamvis esset excommunicatus, hæreticus, degradatus, suspensus, irregularis, uti ex Tridentino inferunt Suarez *disp. 26. sect. 4.* Sanchez *in decal. lib. 2. cap. 13.* aliique communiter: quamvis contradicant aliqui cum Fagnano, allegantes quamdam declarationem Sacre Congregationis, de qua cum non meminerint neque recentiores, neque veteres gravissimi Auctores, credendum est, eam aut non esse authenticam, aut ex alia ratione non ob stare communi assertioni, præsertim cum Urbanus VIII. anno 1631. mandaverit, hujusmodi declarationibus, quæ circumferuntur, fidem non esse adhibendam, nisi authentica forma, & solito sigillo &c. munitæ fuerint. Non per hoc tamen excluditur, quin talis Sacerdos teneatur in eo casu facere, quod in se est, ut digne ministret: faciet autem, si contritionem eliciat, etiamsi a censura solvi non possit, ex Suarez *ibidem*. II. non excipiat ullus casus: unde quilibet Sacerdos posset in eo articulo absolvere a quolibet casu, & censura reservata; imo, proprie loquendo, nulla tunc est reservatio, ut docet Tridentinum *sess. 14. cap. 7.* unde Platellius, ac Bussembaum cum Suarez, & Bonacina *disp. 5. quest. 7. punct. 1.* censent non immerito, probabile esse, quod absolutus in articulo mortis, non teneatur postea se sistere superiori, vel alteri pro reservatis, quia directe absolutus fuit ab illis. Excipe tamen, si peccato reservato annexa esset excommunicatio, aut censura alia reservata; quia facultas absolvendi a censuris reservatis,

tis, non datur in articulo mortis cuilibet Sacerdoti, nisi sub onere postea comparandi coram superiore; ut constat *ex Cap. De cetero, de sent. excomm. & ex Cap. Eos qui, eodem tit. in 6.* apud Suarez *disp. 30. sect. 3.* sed de hoc distinctius infra agendum erit.

34. Notanter superius posui ea verba, *quando vera interveniat necessitas ministri*; nam, ut quilibet Sacerdos possit in eo articulo valide & licite ministrare hoc Sacramentum, debet non adesse alius Sacerdos, ad quem ex officio, vel delegatione, tale munus pertineat: & quamvis Salmanticenses *tract. 6. cap. 11.* adherentes huic nostræ sententiæ, multos Doctores contrarium non improbabilius sentientes asserant, his tamen Doctoribus non acquiescendum iudico, saltem propter illud principium, quod in summo salutis æternæ periculo tutior, & communi usui conformior opinio est consulenda, & practicanda, ut monet Gobatus *tract. 7. num. 133.* præsertim ubi aliud extrinsecum incommodum non occurrit, ex Suarez *disp. 30. sect. 3.* Quare ex Suarez servandus est hic ordo, ut Sacerdos habens jurisdictionem præferatur illam non habenti, approbatus non approbato, expeditus impedito a censura aliqua &c. quia talis videtur semper fuisse Ecclesiæ consuetudo, quam Patres Concilii Tridentini, nolentes in hoc puncto jus novum coadere, solum approbarunt, & commendarunt, ex de Lugo *disp. 18. sect. 2. §. 2.* Hæc doctrina suas habet limitationes: nam poterit quilibet Sacerdos ministrare, etiam præsentem proprio, vel delegato Confessario, I. si hic præfens nolit audire Confessionem moribundi, ex Sanchez *lib. 2. in dec. cap. 13. II.* si Confessio incepta fuerit coram non proprio, nec delegato, ac deinde superveniat proprius, vel delegatus, poterit enim tunc ab illo continuari auditio Confessionis, & dari Absolutio, ex eodem *ibidem*: III. si Confessio coram simplici Sacerdote facta, esset repetenda ob nullitatem Absolutionis ex aliquo defectu pœnitentis, v.g. mendacii; posset enim ea repeti coram eodem simplici Sacerdote, etiam superveniente legitimo Confessario, eoque præsentem, ex Sanchez *ibid.* & Clericato *dec. 37. de pœnit.* Rursus cum Gobato *tract. 7. num. 135.* sicuti censemus, adesse veram necessitatem ministri, ac proinde posse valide hoc Sacramentum ministrari a quolibet Sacerdote, quando homo constitutus in eo articulo nequit ipse Confessarium adire commode, nec eundem commode accersere, quia vel non venit, vel non sine nota; ita non obligamus talem pœnitentem, ut mittat Sacerdotem præsentem ad superiorem, aut per litteras petat ab illo facultatem confitendi huic, vel alteri, quia id non præcipit Ecclesia.

35. Nomine articuli mortis intelligitur ex Gobato tum stricte dictus articulus mortis, seu status, & tempus, quo mors proxime instat, & est moraliter certa, ac fere inevitabilis, tum late dictus, seu periculum probabile mortis, idest status, & occasio, in qua, spectata rerum natura, & spectato eo, quod solet in simili occasione evenire, mors etiam non proxime sequetur, probabiliter tamen, ac prudenter potest, ac debet timeri. Unde, quando dicitur, quod simplex Sacerdos habet facultatem completam absolvendi in articulo mortis juxta superius exposita, quamvis Soto in 4. *dist. 18. quest. 4.*

quæst. 4. art. 4. & Valentia tom. 4. disp. 7. quæst. 10. part. 2. velint intelligi solum articulum mortis stricte dictum, verius tamen censemus cum Sylvestro verb. Confessio 1. quæst. 6. Suarez disp. 26. sect. 4. Sanchez l. 2. in dec. cap. 13. & Card. de Lugo disp. 18. de Pœn. intelligi articulum mortis tum stricte, tum late dictum; quia aliter plures sine remedio decederent, neque Ecclesia illis opportune de remedio providisset; ut notat Castropalao tract. 23. disp. unic. punct. 13. ac proinde cuilibet Sacerdoti in Ordinatione subijciuntur, ut ab eo absolvi possint subsequentes: I. damnati ad mortem sive iusta, sive iniusta sententia: II. banniti illi, quos unusquisque habet potestatem impune occidendi: III. inturi periculosa navigationem, aut periculosum prælium, ut notant omnes cum Rituali Romano, tractantes de hac materia, quorum alii contra alios limitant hanc doctrinam ad casum, quo quis coactus, non autem quo sponte adit hoc periculum, item ad casum, quo jam incipit periclitari navis, non quo illam quis conscendere vult: IV. varii alii, quos enumerant Tamburinus de Sac. l. 5. cap. 11. & Diana part. 5. tract. 3. ref. 93. videndi.

36. Extra itaque hunc casum articuli mortis, qui est per accidens, Sacerdos, si valide ministret hoc Sacramentum, debet habere ulterius I. jurisdictionem specialiter vel a jure, vel ab homine attributam; II. approbationem; III. carentiam aliquarum censurarum, quæ jurisdictionem auferunt; cum autem hæc duo ultima requisita referantur ad primum, & sint in ordine ad illud, nempe ad jurisdictionem sive recipiendam, sive conservandam, sive exercendam, idcirco hæc duo ultima requisita priori loco exponemus.

§. II.

De carentia censurarum.

37. **R**equiritur itaque primo loco, ut Sacerdos careat aliquibus censuris, quæ jurisdictionem vel impediunt, vel auferunt, ad hoc ut ipse valide administret hoc Sacramentum, quod, ut infra dicemus, & supra innuimus, jurisdictionem expostulat in ministro ad sui valorem. Censuræ autem, quæ a Sacerdote auferunt jurisdictionem absolvendi, sunt I. si ipse sit excommunicatus vitandus; II. si sit suspensus absolute ab officio, vel determinate a Confessionibus audiendis; III. si sit personaliter interdictus: Layman l. 1. sum. tract. 5. part. 2. cap. 2. Unde excommunicatus vitandus, qualis est publice denunciatus, vel notorius percussor Clerici, invalide exciperet Confessionem; siquidem Ecclesia jurisdictionem denegat excommunicato vitando, ex communi cum Castropalao disp. 2. de Cens. punct. 8. Limites, ne hoc procedat, si Confessionem excipiat in loco, in quo non sit nota ejus excommunicationis denunciatio; quia tunc ille retinet suam jurisdictionem ob præsumptam Ecclesiæ voluntatem, quæ, stante communi errore, censetur concedere quidquid ad valorem actus ex parte sua necessarium est, ne Fideles decipiantur, ex Castropalao ibidem, & ex Bonacina disp. 2. quæst. 2. punct. 2. §. 4. Imo advertas, quod, juxta Suarez de censur. disp. 13. sect. 1. valide ministraret hoc Sacramentum ille Parochus, qui esset quidem publicus excom-

municatus ob delictum publice commissum, cui annexa sit de jure excommunicatio (non intelligas Clerici percussorem), sed adhuc non est per sententiam iudicis denunciatus; quia, supposita Extravaganti *Ad evitanda*, non esset talis excommunicatus vitandus, cui ab Ecclesia aufertur jurisdictio. Rursum suspensus absolute ab officio, vel suspensus determinate ab hoc officio audiendi Confessiones, invalide eas exciperet. Limites, dummodo sit suspensus vitandus, qui ex Suarez *disp. 29. sect. 5. de cens. usque* ad denunciationem in particulari, & proprio nomine factam, talis non erit; in hoc enim solo casu denunciationis factæ per Extravagan. *Ad evitanda* obligantur Fideles evitare suspensum in his, a quibus suspensus est; & dummodo non adsit error communis, & titulus coloratus, qui tribuat jurisditionem. Idem prorsus censendum de personaliter interdicto, ut videre est apud Bonacinam *disp. 5. de Pœn. quasi. 4. punct. 4.* Porro, an per meram prohibitionem factam a superiore audiendi Confessiones tollatur, vel suspendatur jurisdictio ad illas, & consequenter Sacerdos debeat carere etiam tali prohibitionem ad valide ministrandum hoc Sacramentum, gravis est controversia inter Auctores, de qua aliquid innuimus *num. 32.* sed nunc ab ea præcidentes, solum asserimus, quod, si Prælati Regularis tantum prohibeat suo Religioso uti facultate audiendi Confessiones, non ideo redditur usus, seu Absolutio invalida, ex la Croix *lib. 6. part. 2. num. 1546.*

§. III.

De approbatione.

38. **R** Equiritur secundo loco in Sacerdote ad valide ministrandum hoc Sacramentum approbatio. Hæc autem est: *Authentica, seu auctoritativa declaratio ac testificatio, qua declaratur, personam, quæ approbatur, esse instructam qualitatibus necessariis ad fungendum officio Confessarii, dummodo accedat jurisdictio.* Ita ex Gobato *tract. 7. cap. 1.* Ex qua definitione patet, approbationem esse quid distinctum a jurisditione, ejusque collatione: siquidem approbare aliquem est declarare, illum esse dignum, cui a legitimo superiore possint re ipsa, & in actu secundo committi subditi, in quos exerceat potestatem clavium; at dare, seu conferre jurisditionem, est assignare ipsi re ipsa subditos, in quos prædictam exerceat potestatem: unde approbatio est actus intellectus, collatio jurisditionis est actus voluntatis. Verum, esto approbatio sit quid distinctum a jurisditione, ejusque collatione, regulariter tamen collatio jurisditionis conjungitur cum approbatione; superior enim legitimus, Sacerdotem approbens, simul jurisditionem concedit, ut docet Caltropalaus *tract. 23. punct. 16. §. 1.* nisi forte iste aliunde habeat jurisditionem, ut contingit in Regularibus, qui approbantur quidem ab Episcopis, sed jurisditionem habent a Papa sive immediate, ut sentiunt plerique, sive mediate, idest mediante ministerio Episcoporum, ac de eorum manu, ut magis placet Clericato *decis. 38. num. 15.*

39. Approbatio autem duplex est, expressa videlicet, & tacita. Approba-

probatio tacita est, quando Episcopo constat, hos, vel illos Sacerdotes libere audire Confessiones in sua diœcesi sine sua expressa approbatione, & tamen dissimulat, cum facile posset se opponere: item quando habens potestatem approbandi, dicit Sacerdoti non approbato: *Audi Confessionem huius penitentis, vel audi, si velis, omnes volentes confiteri tibi*: nam in primo casu approbatur Sacerdos respectu unius, in secundo approbatur respectu omnium, adeoque absolute, ex Gobato *tract. 7. cas. 2. num. 44*. Expressa est, quæ sit vel per collationem Parochialis Beneficii, in quo casu Sacerdos approbatur ab Ecclesia, ut placet Cardinali de Lugo *de Pæn. disp. 21. sect. 3.* aut a Prælato conferente illud Beneficium, ut sentit Fagundez *de præc. Eccles. præc. 2. l. 7. cap. 2.* vel sit per authenticam sententiam, seu contestationem legitimi Superioris de sufficientia Sacerdotis in ordine ad audiendas Confessiones. Et quidem, si expresse quis approbetur per collationem Parochialis Beneficii, requiruntur ad hanc approbationem scripturæ, reliquæque conditiones necessariae pro valida ejusdem collatione: si vero quis approbetur per authenticam testificationem, non est necessaria scriptura, cum ea neque ex natura rei, neque ex Concilio, neque ex ulla lege canonica, ut notat Suarez *disp. 28. sect. 5.* appareat necessaria; unde verbo tenus fieri potest, ac sæpe fit. Expedit tamen, ut bene advertit Castropalaus, quod ea habeatur in scriptis, ut certius de eadem constet, quando necesse fuerit.

40. Circa hunc secundum modum expresse approbandi per authenticam sententiam, notandum est 1. quod, licet collatio Beneficii simoniace facta, sit irrita, & consequenter irrita approbatio per talem modum obtenta, tamen verius censemus, approbationem per authenticum testimonium habitam, non esse irritam, si simoniace obtineatur, quia pœnæ non sunt extendendæ ultra casus expressos, ex Suarez *de Pæn. disp. 28.* & Castropalao *tract. 23. p. 16.* unde gratis quidem debet dari, ut mandat Tridentinum *sess. 23. c. 25. de reform.* ex defectu tamen hujus conditionis solum sequeretur, quod approbatio esset graviter illicita; graviter, inquam, etiamsi pretium datum esset leve, ut bene contra Fagundez docet Castropalaus *loc. cit.* Notandum 2. quod, si detur Religiosis talis approbatio, debent ii Religiosi esse præsentati a suis Superioribus; aliter censemus cum Henriquez, Fagundez, & Castropalao, fore nullam, & irritam talem approbationem, quamvis non improbabilius contrarium censeat Card. de Lugo *disp. 21. sect. 3.* Notandum 3. quod talis approbatio, si videbitur Episcopis necessarium, facienda est per examen præmissum, ex Tridentino *loc. cit.* quod unice spectat ad Episcopum, vel ad eum qui debet approbare: posset tamen is remittere illud, ut constat ex ipso Tridentino agente: *si videbitur Episcopis necessarium*: quæ necessitas sane non est, quando approbatori sit aliunde satis cognita idoneitas approbandi. Approbatus autem præmissis rigoroso examine, si sit Regularis, & approbatio fuerit simpliciter, & indefinita, non potest iterum ab eodem Episcopo ad examen vocari sine nova superveniente causa concernente Confessiones, ex decreto Sacræ Concilii Congregationis die 17. Januarii 1654. & ex Constitutione Clementis X. *Superna*. Causa iterum examinandi potest esse scienti-

scientia deperdita, seu prudens suspicio de ejusdem amissione, ex Clericato *dec. 38.* Dixi, ab eodem Episcopo; nam hujus successor potest indiscriminatim vocare iterum ad examen omnes Confessarios etiam Regulares, licet illimitatas licentias habentes, ex Suarez *disp. 28. sect. 8.* quia est novus Pastor, & propriam obligationem induit, neque est, cur teneatur omnes facultates a prædecessore concessas, ratas habere. Dixi, si sit Regularis: nam, secluso privilegio, quale est respectu Regularium ex citato decreto, & ex Motu proprio S. Pii V. apud Suarez, habet jus Episcopus vocandi ad novum examen Sacerdotes illos, quos præmisso examine ipsemet illimitate approbavit, quamquam non ita facile eo jure uti debeat, sicuti advertit *loc. cit.* idem Auctor. Imo etiam Parochi poterunt ab eodem Episcopo, a quo examinati, & approbati fuerint in concursu, revocari ad examen, si prudens suspicio de eorum imperitia suboriatur ex noviter deductis supervenientibus etiam extrajudicialiter indicis, ut probant Card. de Lugo, Card. de Luca, Barbosa, alique apud Monacellum *part. 1.* & apud la Croix *l. 4. num. 605.* quia spectat ad officium Episcopi providere, ut semper idonei curam administrent; adeoque, si in novo examine eos inidoneos reperiatur, poterit ipsos a cura suspendere, ex declaratione Sacre Concilii Congregationis in una *Placentina sub die 26. Augusti 1628.* apud Ursaya. Quod si talia imperitiæ indicia non supervenerint, tunc quidem non poterunt Parochi ab eodem Episcopo, a quo examinati, & approbati fuerint in concursu, iterum vocari ad examen; at poterunt ab Episcopo successore vocari absque alio indicio & diffamatione ad novum examen, cui si renuant subijci, poterit Episcopus eos suspendere, & coadjutorem deputare, ut probant Gonzalez, Garcia de Ben. Barbosa, Cardin. de Luca cum aliis ad saturitatem adductis a Rota in *decis. 257. & 258. part. 19. Recent.* Idque procedit tam intra sacram visitationem, quam extra, ex pluribus declarationibus Sacre Concilii Congregationis apud Barbosam *Apostolic. dec. collect. 339.* & apud Ursaya. Dixi demum, præmisso rigorofo examine, & si approbatio fuerit illimitata; nam Regularis ad tempus limitatum approbatus, v.g. ad sex menses, ad annum &c. potest ad examen revocari ab Episcopo, sicuti si approbatus esset præmisso examine non rigorofo, quale est, si non fiat per omnes materias moralis scientiæ, ex Clericato *dec. 38.* ubi obiter advertes, quod Vicarius Capitularis non posset, mortuo Episcopo, vocare ad examen Regulares illimitate approbatos ab Episcopo, ex Marchetto in *praxi Vic. Capit. part. 2. tit. 17.* posset tamen examini subijcere limitate approbatos, si tempus limitatum expiret Sede Episcopali vacante, ex Nicol. in *flosc. v. Vicar. Capit. n. 74.*

41. Circa primum modum expresse approbandi, nempe per collationem Parochialis Beneficii, notandum est 1. quod habens Parochiale Beneficium dicitur ille, qui ratione hujus primario habet curam animarum respectu secularium, ex Lessio *cas. 3. num. 3.* unde Episcopi etiam, & eorum Vicarii Generales in spiritualibus, imo & in Pontificalibus, censentur approbati per collationem Beneficii Parochialis, ex Gobato; non vero Abbates, Guardiani, Rectores &c. ii enim, etiam si jurisdictionem habeant in suos Religiosos sub-

ditos,

ditos, tamen non eam habent respectu secularium, seu non habent curam animarum respectu secularium, ex Suarez *disp.* 28. *sect.* 28. ac de Lugo *disp.* 21. *sect.* 1. unde non sunt audiendi Henriquez *lib.* 6. *cap.* 6. Bannez, Valerus, Salas, alique apud Dianam, & Vivam de *sub. quest.* 9. censentes, Prælatos Religionum venire nomine habentis Beneficium Parochiale, & esse consequenter vi talis Prælaturæ approbatos. Notandum 2. quod in collatione Beneficii confertur talis approbatio, non autem in electione, seu præsentatione; quia electus, seu præsentatus, non dicitur Beneficium habere, quod Concilium requirit, sed habiturus, ex Castropalao *tract.* 13. *disp. unic. punct.* 17. ac propter eandem rationem, quod Concilium requirat Beneficium Parochiale haberi, non sufficit, ut quis censeatur approbatus, illud habuisse, si jam illud dimisit, ex Suarez *loc. cit.* aliisque; siquidem in his, quæ pendent ex jure positivo, standum est verbis legis: quicumque vero de facto habet tale Beneficium, non solum censendus est approbatus respectu eorum secularium qui habitant in ejus Parochia, seu Beneficio Curato, sed etiam, saltem ex consuetudine universali, ubique scientibus, & approbantibus eam Episcopis, respectu totius diocesis, in qua obtinet Beneficium Parochiale, ex Clericato, & ex communi: imo satis probabilem censemus sententiam Suarez *loc. cit.* opinantis, habentem Beneficium Parochiale esse idoneum reputandum simpliciter, & pro quocumque loco, ita ut ubique sit proxime capax jurisdictionis, si aliunde conferatur vel ab eo, qui potest delegare, vel mediante privilegio eligendi Confessorem. Limites, dummodo non sit privilegium Bullæ Cruciatæ, vel privilegium concedi solitum in Jubilæis, aut hujusmodi: nam Bulla Innocentii XII. edita die 19. Aprilis 1700. quo ad privilegia Cruciatæ, & Bulla emanare solita in Jubilæis, exigunt omnino approbationem Ordinarii loci, in quo sit Confessio, dum in citata Bulla Innocentiana referuntur, & innovantur declarationes de eo quod nihil novi juris quo ad approbationem Confessariorum contra formam Concilii per talia privilegia inducatur, ut bene expendit Constantinus in *tract. de Ann. Sancti.* & licet tam Bulla Innocentiana, quam Bulla Jubilæi videantur non loqui de Parochis, circa quos Tridentinum nihil innovavit quo ad hoc, teste Suarez, sed videantur loqui de alijs, respectu quorum ex novo jure Tridentini requiritur approbatio per authenticum judicium Episcopi, tamen quia in hac re tutior opinio admittenda est, & quia nonnulli Auctores asserunt aliquas Congregationum declarationes in contrarium, de quibus juxta alios non satis constat, atque ipse Card. de Lugo *disp.* 21. *sect.* 1. & 2. Parochum indigere approbatione Ordinarii innuit, idcirco limitationem hanc apponendam sustinemus, censentes cum Illung. *tract.* 5. *disp.* 6. *num.* 117. & alijs multis, quos allegant Salmanticenses *tract.* 6. *cap.* 11. non esse improbabile, quod Parochus hujus v. g. diocesis non indigeat alia approbatione ad Confessionem sui subditi in aliena diocesi; quia cum ratione muneris sit Pastor ejus, & Confessarius ordinarius, satis censetur pro illo ubique audiendo approbatus. Sicuti etiam Confessarii Principum, & Magnatum, qui respectu illorum sunt veluti Parochi, quando per varias dioceses illos comitantur, audiunt illos ubique

ubique sine approbatione singulorum Ordinariorum, ex la Croix l.6. part.2. num. 1516.

42. Quilibet ex his duobus enumeratis modis habendi approbationem, nempe per Parochiale Beneficium, & per authenticum iudicium sive tacitum, sive expressum Ordinarii, est sufficiens ad valorem Sacramenti: alteruter est omnino necessarius ex novo jure Tridentini *sess.23. cap.15.* ac de Fide certum est, potuisse a Concilio hoc decerni, ex Suarez *disp.28. sect.4.* ita vero necessarius est, ut extra casus suprapositos quilibet non habens Parochiale Beneficium, indigeat vera & reali approbatione Ordinarii loci, in quo est, ad valide audiendas Confessiones sæcularium etiam Sacerdotum, non autem Religiosorum, nisi sint Moniales, de quibus est speciale jus, ex communi. Dixi, quilibet non habens Parochiale Beneficium. Hinc Magistri, Doctores, Licentiati in Theologia, vel Jure Canonico, sive Regulares, sive sæculares, examini, & approbationi Ordinarii obtinendæ subjiçuntur ex Bulla S. Pii V. incipiente *Romani Pontificis*: decet tamen (ut notat Castropalaus), ne prædicti Magistri, & Doctores, alique viri sapientes examini quo ad scientiam (si ea manifeste constet ita, ut aliis querelæ locus non sit), de facto subjiçiantur, quamvis id fieri possit, sed ex communi hominum æstimatione judicentur: arg. text. Trident. *sess.7. cap.13. de reform.* quod etiam notant Miranda, Layman, & Fagundez apud ipsum. Dixi, vera, & reali approbatione. Hinc nulla est approbatio falsò putata, nisi addit titulus coloratus; v. g. quia fuit vere quis approbatus, at revocata fuit approbatio, ignorantibus plerisque hanc revocationem, ex Sanchez l.3. de *Matrim. disp.11.* item nulla est approbatio, quæ fuerit petita, atque injuste negata, etiamsi qui petierat, esset Regularis, qui proinde invalide exciperet Confessiones, nec per Confessionem illi factam satisfaceret præcepto annuæ Confessionis, ex Decreto Alexandri VII. damnante propositionem 13. Dixi, Ordinarii loci in quo est; nam respectu Sacerdotis Regularis certum est ex Decreto Clementis X. eum non posse absque Episcopi diocæsani approbatione audire Confessionem, quamvis pœnitens subditus sit ejus Episcopi, a quo in alia diocæsi fuerat talis Regularis generaliter approbatus: respectu vero Sacerdotis sæcularis, quamvis controvertant Auctores, cujusnam Prælati approbatio exigatur, an videlicet Prælati loci, in quo excipiuntur Confessiones, an pœnitentis, an Confessarii? tamen probabilior, & verior sententia est, requiri approbationem Prælati, seu Ordinarii loci, in quo audiuntur Confessiones, uti determinate olim docuerunt Barbosa de *pot. Ep. alleg.25.* Card. de Lugo *disp.21.* Card. de Lauræa *disp.20. de Pen. art.3.* alique, confirmantes id ex præxi totius Orbis, de qua expresse testatur Clericatus *dec.36. de Pen.* imo tanquam omnino certum id esse contendit Cardenas ex Constitutione citata Clementis X. quia decisum hoc cum fuerit respectu Regularium, infert ex paritate rationis, decisum etiam esse respectu sæcularium. Verum in positivis non valet illatio a pari, ut bene expendit la Croix hic: unde adhuc videtur probabilis sententia Platelli, aliorumque docentium, quod Sacerdos sæcularis approbatus, retinens domicilium in hac diocæsi;

cessi, si cum subdito hujus diœcesis peregrinetur, possit hunc in Confessione audire absque approbatione ejus Episcopi, per cujus diœcesim iter facit. Videatamen novissima Constitutio Benedicti XIV. *Apostolica indulta*, quæ est 100. ejus *Bull. t. 1. p. 358.* Dixi, ad valide audiendas Confessiones: unde approbatio non solum est necessaria de præcepto, sed etiam ex necessitate Sacramenti; quia licet ad valorem Sacramenti solum requiratur in Ministro potestas Ordinis, & jurisdictionis, tamen Ecclesia per verba Concilii Tridentini reddit incapacem jurisdictionis suscipiendæ, vel exercendæ illum, qui non præhabuit approbationem: atque idcirco, qui sine approbatione audit Confessiones, invalide illas audit, propter defectum jurisdictionis. Dixi, sæcularium, non autem Religiosorum; nam jus hoc novum Tridentini requirentis approbationem, habet locum respectu omnium sæcularium sine ulla exceptione; adeoque comprehendit omnes Clericos, etiam Sacerdotes, omnes laicos, etiam Principes & Reges, ex Suarez *disp. 28.* Hinc non possunt Episcopi, alique Prælati, habentes a jure facultatem eligendi Confessarium, eligere simplicem Sacerdotem non subditum extra propriam diœcesim, non approbatum ab Ordinario, ex oraculo Gregorii XIII. pronunciantis, quod in re dubia tutius est adhærere decreto Concilii Tridentini, Notanter dixi, non subditum extra propriam diœcesim; siquidem Episcopi, Vicarius Generalis, & Abbates exempti, habentes jurisdictionem quasi Episcopalem, possunt eligere simplicem Sacerdotem subditum extra diœcesim, aut non subditum in propria diœcesi, quia per hanc electionem illum approbant, ex Viva, aliisque communiter. Hinc etiam ab Alexandro VII. proscripta est opinio asserens *prop. 16.* quod qui Beneficium curatum habet, possit sibi eligere in Confessarium simplicem Sacerdotem non approbatum ab Ordinario: imo tanquam omnino improbabilis rejicienda est sententia illa, quod possit Parochus simplicem Sacerdotem exponere ad audiendas Confessiones suarum ovium, ex Suarez *disp. 28. sect. 4.* quamquam cum eodem Suarez, Navarro, Viva, aliisque communius admittimus contra Clericatum, posse Parochum delegare vices suas, & exponere ad audiendas Confessiones suarum ovium vel alterum Parochum, vel Sacerdotem approbatum ab Episcopo loci, qui ab eo non acceperit jurisdictionem, dummodo Episcopus non repugnet; quia, ut dicemus, probabiliter potest Parochus delegare jurisdictionem Sacerdoti approbato.

43. At vero hoc jus novum Tridentini non habet locum respectu Confessionum Regularium; idest, noluit Concilium in hoc subicere Regulares Episcopis quo ad Confessiones, quas ipsi faciunt inter se, seu de peccatis suis: unde Superior Regularis potest exponere suis subditis Confessorem non approbatum ab ullo Episcopo, ex Suarez: subditi autem talis Superioris sunt, in ordine ad hoc, non solum Religiosi immediate, vel mediate ei subiecti, sed etiam illi sæculares, qui in ejus monasteriis sunt vere de familia, & continui commensales, non autem illi qui tantum ipsis deserviunt, ex Constitutione Clementis X. *Superna*: quod adeo verum est, ut Confessarius Regularis approbatus ab Episcopo, non autem a Prælato Regulari, non possit audire Confessiones Religiosorum, atque eos valide absolvere, ex Suarez *tom. 4. de Relig. tract. 9.* Idem dicendum de Confessario sæculari, qui sine facultate Præ-

lati Regularis nequit Regulares audire, etiamsi fuerint Novitii, ut probant Suarez, & Bordonus de *Profes. Regular. cap. 15. quest. 18.* acriter, nec improbabiliiter contradicente Diana, qui putat, Novitios æque valide confiteri Sacerdoti etiam sæculari, ac si non essent Novitii. Posset tamen Sacerdos per Episcopum approbatus sine ulteriori Prælati Regularis facultate audire famulos illos, qui sunt in monasterio continui commensales, ex Clericato, aliisque. Porro ex eadem exceptione Regularium a jure novo Tridentini sequitur, quod si Religiosus habeat facultatem eligendi Confessorem a suo Prælato, possit eligere quemcumque voluerit, sive Regularem, sive sæcularem, etiamsi hic ab Episcopo approbatus non sit, ex Suarez *disp. 18. de Pæn.* Castropalao, & Bonacina: quod licet aliqui limitent, dicentes, hoc habere locum solum, quando Prælatus id expresse significaverit, aliqui vero cum Vasquez, & Clericato mordicus id negent, tamen prædicta Suarez opinio & communior ac tuta est, atque ab ipso sine limitatione ulla tradita; qui proinde monet illud dumtaxat in usu talis facultatis advertendum, ut eligatur Sacerdos ab Ecclesia toleratus, scilicet non suspensus, non excommunicatus &c. Dixi, si habeat facultatem eligendi a suo Prælato; nam, si habeat ex Bulla Jubilæi, aut alia hujusmodi, expendenda sunt privilegia, atque indulta quo ad hoc concessa aliquibus Religionibus: quibus privilegiis, nisi per Bullam Jubilæi, aut aliam similem derogetur in concessione talis facultatis, utique standum erit. Cæterum, ab his præscindendo, & loquendo jure communi, duplex est controversia: 1. an Religiosus vi Jubilæi possit eligere Sacerdotem non approbatum ab Ordinario loci: 2. an possit eligere approbatum quidem ab Ordinario loci, sed extraneum, & non approbatum a Prælato Regulari. In quarum prima licet Castropalaus cum Bonacina putet probabilem opinionem affirmativam, tamen cum Suarez, ac de Lugo, cæterisque communiter recentioribus sustinemus negativam. Vide supra memoratam Constitutionem Benedicti XIV. *loc. cit.* In secunda vero placet opinio affirmativa, per se loquendo, & nisi obstant privilegia Religionum, quibus probabiliter per Bullam Jubilæi extra Annum Sanctum derogatur, juxta Suarez, de Lugo, Filiucium, Tamburinum, aliosque: non adeo tamen probabiliter derogatur per Bullam promulgari solitam in Anno Sancto, per quam Jubilæum Romanum extenditur ad Anachoretas, Moniales &c. ut bene expendit Constantinus p. 3. c. 5. Demum, ut presse rem totam ad Regularium Confessionem pertinentem complectar, sic assero. Nullus Sacerdos, etiamsi approbatus ab Ordinario loci, etiamsi ex Mendicantibus habentibus privilegium audiendi quoscumque Christianos fideles, nisi fuerit Pœnitentiarius D. Papæ, aut ab eodem speciali aliquo privilegio munitus, potest Regularium Confessionem audire sine facultate directa, vel indirecta, tacita, vel expressa Prælati Regularis. Quilibet autem Sacerdos non excommunicatus &c. etiamsi non approbatus ab Ordinario loci, potest Regularium Confessionem audire cum tali prædicta facultate: quæ quidem facultas relate ad Religiosos cum debita licentia itinerantes, aut commorantes ubi non est monasterium, sive domus proprii Ordinis, dummodo non in fraudem, aut occasionaliter existentes extra claustra, celebraturos in aliena Ecclesia, vel Ordines sacros recepturos in Episcopio, vel sacra Exercitia

citia in solitaria & aliena domo peragentes, adest sive e x privilegio, sive ex consuetudine in quolibet idoneo Sacerdote, quando non sit socius Sacerdos ejusdem Ordinis, nec posita fuerit limitatio a Prælato; adest vero in Sacerdote socio ejusdem Ordinis, quando itinerantes illum habent, & quidem aQualiter itinerans (non autem hospitans in domo proprii Ordinis), privative quo ad alios, eo uti debet Religiosus Societatis Jesu. Porro ita adest hæc facultas sive in quolibet Sacerdote, sive in Sacerdote ejusdem Ordinis socio itineris respective, ut non simul in eo adsit facultas absolvendi a reservatis directe, nisi Religiosus pœnitens fuerit e Societate Jesu; hic siquidem etiam a reservatis absolvi potest, cum onere tamen se præsentandi superiori pro accipienda iterata Absolutione, idemque externum sive Regularem, sive secularem Confessarium eligere non potest, non solum quando habet, ut dixi, socium itineris Sacerdotem Societatis, sed etiam quando occurrat alteri e Societate a Prælatis ejusdem Societatis approbato; quamvis cæteri Regulares communiter possint uti libertate confitendi cuilibet Sacerdoti, etiam casu, quo Religiosus itinerans incidat forte in Confessarium sui Ordinis. Spectanda vero sunt in his omnibus peculiaria statuta, & consuetudo cujuslibet Ordinis Religiosi; in pluribus enim Religiosis Ordinibus prohibetur confiteri alteri, quam Sacerdoti ejusdem Ordinis a superiore destinato, prout constat de PP. Carthusianis, ac de Cappuccinis, quos proinde Habsensis in *Summula v. Confessarius*, negat, etiam iter agentes posse absolvi per Confessarium non Cappuccinum a mortalibus sive reservatis, sive non reservatis; quod an habeat locum, etiam quando necessitas urgeat celebrandi &c. ipsi viderint. Unde communiter interrogandi sunt Regulares de facultate data, & asserentibus (quæ quidem assertio, attenta qualitate personæ, non raro implicite habetur in ipsa petitione Confessionis) fides utique habenda est; ignorantibus an habeant saltem tacitam, præsertim pro reservatis, aut non impertienda Absolutio, aut impertienda cum onere se sistendi in monasterio habenti potestatem in reservata, si necessitas urgeat; & aliquod non reservatum, vel saltem veniale clavis subjecerint.

44. Verum, ad PP. Capuccinos quod attinet, attendenda est Constitutio 49. Benedicti XIV. *Quod communi*, pluribus annis post primam hujus Memorialis impressionem edita, in qua statuitur §. 2. ut quilibet dicti Ordinis sive Sacerdos, sive Laicus, seu Conversus, qui de Superiorum suorum licentia, quacunque de legitima causa, titulo, & occasione, sive prædicandi verbum Dei quocumque tempore, sive sacras Missiones peragendi, sive iter agendi, & alicubi commorandi, ubi nullus Conventus, seu Hospitium, nullusque Frater dicti Ordinis Confessarius reperitur, libere & licite possit ac valeat quemlibet Presbyterum secularem ab Ordinario loci, vel Regularem a suo superiore Regulari ad sacramentales Confessiones excipiendas approbatum adire, eique peccata sua confiteri, atque ab ipso obtinere sacramentalem Absolutionem, etiam quo ad casus per constitutiones & statuta Regularia dicti Ordinis reservados, incursasque proinde censuras, recepta saluari pœnitentia, præstitaque obligatione se statim, quoad ipsi permissum fuerit, coram suo Regulari superiore præsentandi,

standi, ac de novo super calibus & censuris huiusmodi Absolutionem impetrandū uti videre est tom. 1. eius Bullarii pag. 145.

45. Dixi tandem supra, nisi sint Moniales, de quibus est speciale jus; siquidem ad audiendas Confessiones Monialium, etiam earum, quæ sunt exemptæ, requiritur approbatio Episcopi, ex Constitutione Gregorii XV. *Inscrutabili*, sive Confessarius sit ordinarius, sive extraordinarius, ex eadem: cum hoc tamen discrimine, quod, ut audiantur Moniales non exemptæ, seu quæ subsunt gubernio Episcopi, requiritur & sufficit approbatio Episcopi; at vero, ut audiantur Moniales exemptæ, requiritur quidem approbatio Episcopi, ea tamen non sufficit, sed ulterius requiritur licentia superiorum Ordinis, in quo sunt illæ exemptæ; quia Pontifices non videntur per hæc nova decreta circa approbationem Confessarii Monialium derogasse Constitutionibus, aut privilegiis Religionum, vi quorum non possunt ejusmodi Regulares confiteri, nisi Confessariis a superiore designatis, ex la Croix l. 6. p. 2. num. 1532. Adde, quod ad superiorem Ordinis pertinet regulariter deputatio, & presentatio Confessarii respectu Monialium, quæ sunt exemptæ, ex eadem Constitutione Gregorii XV. & quidem deputatus ab eo superiore ad triennium, non potest per Episcopum ad annum limitari, sed est ad triennium admittendus, vel absolute rejiciendus, ex rescripto Sac. Epif. & Reg. Congr. die 4. Maji 1696. apud Matthæuccium: Sacerdos vero approbandus in Confessarium Monialium tam ordinarium, quam extraordinarium, esse debet ætatis 40. annorum, ex Decreto Sacre Congregationis apud Pitonium, & ex Felice Potestate, nisi forte necessitas aliud suadeat, aut præscripta consuetudo aliud permittat; quæ duo sunt maxime attendenda ad interpretationem legis præexistentis. Ordinarius autem Confessarius non potest esse neque Vicarius Generalis, neque generaliter Sacerdos Regularis pro Monialibus Episcopo subiectis, ex Decreto Sacre Congregationis in Sorana 23. Julii 1587. & in Pistoriensi 16. Maji 1653. nec potest in eodem monasterio deputari, nisi ad triennium, ex Decreto Sacre Congregationis apud Gavantum: quo elapso potest pro alio monasterio ordinarius deputari, & pro eodem extraordinarius, ex Felice Potestate. Confessarius extraordinarius, ex Tridentino sess. 25. cap. 10. de Regularib. bis, aut ter in anno Monialibus debet offerri, & hoc, etiam si occasione alicujus Jubilæi fuerit alia vice concessus. Quamvis autem Moniales non teneantur singulæ extraordinario confiteri, ex præcepto tamen Sacre Congregationis Episcoporum tenentur omnes coram extraordinario se præsentare; imo Clemens XI. 12. Decembris 1708. Decretum Cardinalis Vicarii id ipsum Urbis præscribens confirmavit: at non inde sequitur, quod recusantes extraordinario confiteri, possint per id tempus ordinario uti; quinimo, si per id tempus, quod extraordinario destinatur, rarius accedat vel ad Ecclesiam, vel ad monasterium illud, suspensionis poenam incurrit, ex Decreto Sacre Congregationis apud Matthæuccium verb. *Confess. Monial.* ubi advertimus, quod Confessarius extraordinarius tempore suæ deputationis indiget speciali licentia pro ingressu intra clausuram sive ad communicandum, sive ad infirmæ Confessionem excipiendam, sive ad assistendum mori-

monibundæ. Vide Constitutionem Benedicti XIV. *Pastoralis cura*, super designatione Confessariorum extraordinariorum pro Monialibus, quæ est 56. *ejus Bullarii tom. 2.* Porro, ut quis dicatur, & sit approbatus pro Monialibus, non sufficit, quod sit approbatus generaliter ad omnes Christifideles, etiam si Episcopus Moniales non exceperit, nec quod sit approbatus ad viros, & mulieres; sed necesse est, ut, quando petitur, vel datur approbatio, expressa fiat mentio de Monialibus, aut ex circumstantiis aperte intelligatur, quod mens Episcopi approbantis illum, etiam ad Moniales extendatur, ex la Croix: approbatus vero pro uno monasterio, aut pro una Moniali, aut pro una vice, non potest audire Confessiones, neque est approbatus respectu alterius monasterii, alterius Monialis, ex ratione, & ex Constitutione Clementis X. *Superna*, juxta quam toties Confessarius Monialium est approbandus, quoties casus deputationis contigerit. Hinc Moniales unius monasterii non possunt virtute Jubilei eligere Confessarium non approbatum tunc specialiter pro illis, sed pro secularibus, aut pro Monialibus alterius monasterii, aut pro eodem monasterio alia vice olim approbatum, ex la Croix, Viva, Felice Potestate, Constantino p. 3. cap. 5. aliisque communiter recentioribus, contra Bonacinam, Peyrinum, Bossum, Vasquez, & Summam Dianæ v. *Jubileum num. 20.* affirmantes ex ratione, & ex Constitutione 17. Urbani VIII. *Pontificia sollicitudo*, id a Monialibus fieri posse. Quocirca, stante nostra assertionem, Episcopi, & alii Monialium Ordinarii, tempore Jubilei, debent pro eis approbare plures sive seculares, sive Regulares, quos aptos judicaverint, quosque Moniales ipsæ exoptaverint, ex Decreto Sacræ Congregationis Episcoporum 24. Martii 1643. apud Lantuscum, ut eos Moniales eligere valeant.

46. His circa approbationem recensitis, superest, ut tria hæc expendamus: 1. an possit approbatio petenti ab Episcopo denegari: 2. an possit limitate concedi: 3. an semel concessa possit revocari. Et primo quidem certum est, non posse Episcopum approbationem denegare Sacerdoti seculari, vel Regulari, in casu quo illum ad examen admiserit, eumque in eodem idoneum repererit quo ad doctrinam, nec aliunde quidquam cognoverit in eo desistere sive quo ad mores, sive quo ad aliud pertinens ad rite obeundum Confessarii munus, ex Castropalao: quippe, examine posito, ex officio obligatur Episcopus juxta merita causæ judicare. Quamobrem solum est difficultas, an possit Episcopus approbationem negare, nulla facta ad examen admissionem, ex eo v. g. quod in ea diœcesi plures, ac forte doctiores sint Confessarii? In qua quidem controversia procedimus cum distinctione, ac tanquam indubitatum asserimus, non posse Episcopum Sacerdoti Regulari a suo Prælati præsentato admissionem ad examen negare, eidemque idoneo approbationem non concedere, ita ut graviter ipse peccaret aliter faciendo: Sacerdoti vero seculari quamvis nonnulli affirmant id posse ab Episcopo negari, tamen ii videntur loqui de approbatione complectente simul jurisdictionem: ceterum loquendo de sola & formali approbatione, atque admissione ad examen, probabile censemus, non posse ab Episcopo id negari serio expollanti,

lanti, sed illum necessario examinandum esse, si ei placuerit, & idoneo re-
perto approbationem concedendam; quia Sacerdos secularis, ut bene ex-
pendit Castropalaus, habet jus se taliter disponendi, ut ei merito jurisdictio
ad excipiendas Confessiones committi possit. Verum tamen est, quod Sacer-
dote seculari pro suo libito potest Episcopus vel negare, vel concedere ju-
risdictionem; siquidem elargitio jurisdictionis est mera gratia, ut infra dicam.
Sacerdos autem Regularis jurisdictionem habet vel immediate, vel mediate a
Papa, ut supra diximus. Uterque tamen invalide absolveret approbatione
petita, & injuste negata, ut pariter supra innuimus.

47. Deinde approbatio concedi potest Sacerdoti tum seculari, tum Re-
gulari, cum limitatione personarum, locorum, ac temporis, ex justa cau-
sa. Ita ex communi apud Card. de Lugo *disp. 21. de Pœn. sect. 3. §. 1.* Dixi, ex justa
causa; nam sine ea, ut advertit citatus Cardinalis, non videntur licite apponi
posse ejusmodi limitationes. Justa autem causa multiplex est; nam potest esse
quis idoneus ad audiendos viros, & non fœminas, propter minorem gravi-
tatem, aut propter juvenilem aspectum, aut propter aliquam suspicionem
de ipso conceptam: item potest esse quis aptus ad Confessiones in uno oppi-
do, non autem in una urbe, ubi v. g. viget mercatura, & difficiliore casus
occurrunt; siquidem pro diversitate locorum, ac personarum, major,
vel minor scientia in Confessario requiritur: imo casus potest contingere,
ut, stante necessitate populi, & carentia aliorum Sacerdotum, sit in aliquo
oppido censendus doctus & idoneus, qui alibi ut indoctus & ineptus esset
repellendus, ex Castropalao *disp. unic. p. 16.* & quia potest esse persona de
qua prudenter timeatur, ne, semel obtenta simpliciter approbatione, am-
plius studio vacet necessario ad hoc sanctum ministerium, ac consequenter
redeat ad pristinam ignorantiam, idcirco juste aliquibus etiam idoneis ad cer-
tum tempus limitatur approbatio. Quando autem sit de facto justa causa ap-
ponendi has, vel illas limitationes, arbitrio & conscientie Episcopi relin-
quitur, qui sive juste, sive injuste eas apponat, semper facit, ut Sacerdos
revera non sit approbatus pro tali tempore, pro tali loco, pro talibus per-
sonis respectu; adeoque ex limitationes omnino servandæ sunt ad validita-
tem Sacramenti, ex de Lugo *loc. cit.* Advertendum tamen, hæcenus tra-
ditam doctrinam de facto habere locum respectu Sacerdotis tum secularis,
tum Regularis; spectato tamen juris rigore, temperandam ex parte esse re-
spectu Regularis, siquidem ex Constitutione Clementis X. *Superna* ille Sacerdos
Regularis, qui ad Confessiones audiendas idoneus generaliter repertus fuerit ab
Episcopo, generaliter quoque & indistincte, absque aliqua limitatione temporis,
certorumque locorum, aut generis personarum, in diocesi propria est admit-
tendus: unde de rigore juris possunt hujusmodi Regulares Sacerdotes præten-
dere licentiam absolutam, & indefinitam audiendi Confessiones secularium:
in praxi tamen, ut inquit Clericatus *dec. 33. vel cedunt juri suo*, vel in facto
contenti sunt eam recipere ad annum, ne rigoroso examini subjiciantur, ut
idem Clericatus docet.

48. Postremo approbatio vel fuit concessa absolute & indistincte, vel li-
mitate

mitate ad certum tempus. Si limitate ad certum tempus, ea cessat finito eo tempore; quia nequit extendi ultra voluntatem concedentis, ex Castropalao & communi. Si vero fuit concessa absolute, ea taliter perseverat, ut non cesset per mortem concedentis; siquidem declaratio juridica suam vim retinet, quamdiu non revocatur, ex Suarez, Filliuccio, aliisque. At cessat, seu cessare potest, tum ex parte ipsius Sacerdotis approbati, tum ex parte Episcopi approbantis. Ex parte Sacerdotis approbati cessat, quando ipse diocesim mutat, ex Suarez: cum hoc tamen fiat, quod si ille postmodum redeat ad diocesim, in qua prius approbatus fuerat, non indigeat nova approbatione; nam quamvis prior approbatio, absolute concessa, extincta fuerit pro tempore, quo ille a diocesi abfuerit, eadem tamen redit ad ipsum, cum ipse ad diocesim redit, ex Castropalao, & Card. de Lugo *disp.* 21. *num.* 44. apud la Croix id ipsum sentientem *num.* 1541. atque hinc etiam patet falsitas ejus assertionis, qua olim nonnulli contendebant, semel in una diocesi simpliciter approbatum, semper, & ubique esse approbatum. Cessat ex parte Episcopi, quando ipse datam approbationem revocat; potest enim tum ipse Episcopus concedens, tum ejus successor, ex iusta causa, licite & valide approbationem revocare; atque in dubio iusta causa præsumentum est pro Prelato, qui multa novit, quæ latent subditos, ex de Lugo *disp.* 21. *sect.* 3. An vero sine causa Episcopus id possit, operosum est distincte exponere. Unde breviter sic dicimus. 1. Quod sine causa Episcopus illicite quidem, attamen valide revocat approbationem datam ad beneplacitum. 2. Quod pariter illicite revocat sine causa approbationem datam absolute: sicuti etiam illicite revocat sine causa ante tempus præfixum approbationem datam limitate ad certum tempus. 3. Quod si de facto illicite hoc fiat ab Episcopo, esset res dubia, & timenda, in tali casu Sacramentum ministrare; quia rationes pro nullitate talis revocationis, quamvis munitæ auctoritate Card. de Lugo *loc. cit.* *num.* 64. non sunt evidentes. Certum autem est, quod sicuti non intelligitur valide revocata approbatio, nisi revocatio constet authenticæ vel per nuncium ad id destinatum, vel per edictum &c. ita Sacerdos debet esse moraliter certus de sua approbatione, ita ut illi constet de licentia audiendi Confessiones vel immediate per Episcopi, seu Vicarii loquelam, vel per nuncium ex Episcopi mandato id testificante &c. ut fuscè docent Sanchez *lib.* 3. *de Matr. disp.* 36. in simili, & in præsentī Tamburinus *cap.* 5. *num.* 41.

49. Hactenus de revocatione dicta temperanda sunt, seu intelligenda respectu Regularium, juxta tenorem Constitutionis Clementis X. *Superna*, ubi decernitur I. Regulares ad hujusmodi Confessiones audiendas, prævio examine simpliciter, & absque ulla temporis præfinitione ab ipsomet Episcopo (secus autem, si ab ejus Vicario, aut ab antecessoribus Episcopis) approbatos, non posse ab eodem, qui sic approbavit, iterum examinari, aut ab eisdem Confessionibus audiendis suspendi, seu licentias illis concessas revocari, nisi nova superveniente causa, quæ ipsas Confessiones concernat, de qua tamen haud necessarium esse ut in actis constet &c. II. vitæ integritatem, ac morum honestatem esse causam Confessionis ministerium concernentem, ac

proinde

proinde nihil ob stare , quominus ob eam possit Episcopus Regulares a semet ipso approbatos suspendere, aut repellere a Confessionibus audiendis: III. Confessiones audiendi facultatem omnibus simul unius conventus Regularibus Confessoribus adimi ab Episcopo, inconsulta Sede Apostolica, nullatenus posse. Hactenus citata Constitutio. Expediens tamen, & honestissimum censemus, ut Regulares quicumque, si revocentur ad examen, se promptos & faciles exhibeant Prælatorum intentioni; non solum quia, uti expendit la Croix num. 1545. frustra se opponent, siquidem Episcopus facile prætendet causam, quæ præsumi debebit esse iusta; sed etiam quia, ut bene monet Card. de Lugo loc. cit. num. 67. cuius ipsissima verba exhibeo, *alioquin suspicionem dabimus æmulis nostris, quod non tam ob zelum tuendi nostra privilegia, quam ob alias causas obedientiam Prælati adhibere nolumus.*

§. IV.

De jurisdictione.

50. **P**ræter carentiam censurarum, & approbationem, requiritur in Sacerdote ad valide ministrandum hoc Sacramentum Pœnitentiæ jurisdictionis, ex Trident. sess. 14. cap. 7. agente: *Quoniam natura, & ratio iudicii illud exposcit, ut sententia in subditos dumtaxat feratur, persuasum semper in Ecclesia Dei fuit, & verissimum esse, Synodus hæc confirmat, nullius momenti Absolutionem eam esse debere, quam Sacerdos in eum profert, in quem ordinariam, aut subdelegatam non habet jurisdictionem.* Hæc autem cum sit dicta a jure dicendo, describitur a Molina, & Layman generaliter sic: *Facultas alicujus habentis publicam auctoritatem, & eminentiam super alios ad eorum regimen, & gubernationem:* in re autem nostra a Tamburino, aliisque exponitur sic: *Potestas data alicui Sacerdoti, per quam tanquam in suos subditos possit ipse educere in actum eam potestatem absolvendi a culpis, & pœnitentias injungendi, quam habet in Ordine Sacerdotii.* Unde constat, quod, quando Episcopus dicit Sacerdoti, *approbo te*, perinde est, ac si dicat, *declaro te esse idoneum excipiendis Confessionibus illorum, qui aliquando tibi legitime subjiiciuntur in foro sacramentali:* at quando dicit, *do tibi jurisdictionem in hos, aut illos*, perinde est, ac si dicat, *impertior tibi jus audiendi, & judicandi in foro sacramentali hos, aut illos, seu subicio tibi tanquam arcano iudicii hos, aut illos, in ordine ad hoc, vel illud.*

51. Dividitur jurisdictio in ordinariam, & delegatam. Ordinaria est, quæ alicui competit ex vi proprii officii, dignitatis, seu præeminentiæ, quam habet super alios; & sic ordinariam jurisdictionem obtinet a Christo Summus Pontifex respectu omnium Fidelium, eo ipso quod in Pontificem legitime eligitur, ideoque Ecclesiæ nec limitare, nec restringere ejus jurisdictionem potest. Ordinariam pariter jurisdictionem accipiunt Episcopi, Parochi, Abbates, & Prælati Regulares respective a Pontifice, ratione Episcopatus, Beneficii Parochialis, Prælaturæ Religiosæ &c. Delegata est, quæ habetur, non ex munere pro-

proprio, aut dignitate, sed præcise ex alterius sive juris, sive hominis commissione; & sic delegatam habent plures Cappellani, ac Religiosi, ex privilegio Apostolico excipientes sæcularium Confessiones. Potest autem utraque jurisdictione esse in personam, sed non in omnia ejus peccata, propter reservationem. Hinc ab ordinaria jurisdictione Episcopi casus aliquos Pontifex excludit, ac sibi reservat, & ab ordinaria Parochi Episcopus sibi reservat peccata quædam absolvenda, sicuti a delegata aliorum, etiam Regularium, quibus non est a Pontifice concessa jurisdictione in ea, quæ sibi Episcopi reservant, nisi Episcopus det facultatem, ex Suarez *disp. 30. sect. 2. num. 16.* imo ab Alexandro VII. proscripta est hæc thesis *num. 12. Mendicantes possunt absolvere a casibus Episcopis reservatis, non obtenta ad id Episcoporum facultate.* Quo ad hanc vero casuum reservationem, quidquid sit de jure, de facto non reservari solent, nisi certo mortalia ratione sui, & non per solam relationem ad actum internum: imo, cum reservatio sit odiosa, stricte est interpretanda, nec extendenda ad casum dubium, ex Suarez, de Lugo *disp. 20. & la Croix.* Et quamvis olim Clemens VIII. vetuerit, ne simplex Confessarius absolveret a delictis in Bulla Cœnz contentis etiam in casu dubio, tamen, cum in decreto moderatorio ejusdem Pontificis id non exprimitur, sequitur, ut notat Viva *in prop. 3. Alexandri VII.* reservationem in tali casu dubio non incurri: unde in omni proprietate verba delicti reservati accipi debent, nec peccata reservata censenda sunt, quoadusque, juxta Constitutionis tenorem, completa & perfecta non fuerint, ex Sylvestro *v. Casus quest. 5. & ex Castropalao tract. 33. punct. 15.* Superior autem reservans, regulariter tenetur sub gravi, subdito vel se, vel per Confessarium facultatem petenti, ut alteri confiteri possit; eam concedere, ex Soto, Suarez, Layman, aliisque apud Castropalaum *loc. cit. mem. 4.* Dixi, regulariter; nam aliquando in aliquibus circumstantiis a Castropalao *loc. cit.* enumeratis, posse hanc facultatem negari, affirmant Suarez, Layman, alique ab ipsis citati. Hæc vero facultas non censetur concessa, quando Episcopus dicit, *do tibi facultatem absolvendi ab omnibus peccatis, vel committo tibi totam meam potestatem,* nisi mens ejus aliunde constet; sed debet fieri de reservatis specialis mentio, sicuti & de censuris reservatis, ex Navarro, & Dicastillo apud la Croix *num. 1630.* quamvis oppositum, fortasse non improbabilius, doceat Mendo *in Epitom. v. Casus reserv.* Illud quidem ex Suarez *disp. 30. sect. 1.* & communi admittimus, quod si ab Episcopo petatur facultas ad absolvendum ab uno reservato, & ille concedat, atque addat, *& concedo tibi omnes vices meas,* facultas præbetur absolvendi ab aliis reservatis. Porro Confessarius simplex licet non obligetur regulariter, imo plerumque sanum consilium sit, ne sumat onus poenitentis adeundi superiorem, ut impetret facultatem absolvendi dictum poenitentem a peccato reservato, sicuti recte expendit Tamburinus *in method. Confess. l. 3. cap. 9. §. 4.* tamen, si quando id faciat ex charitate, quæ in gravissimo, & in raro casu potest illum obligare sub gravi, tunc reticere debet & casum, & personam, ex Busembaum *lib. 6. tit. 4. c. 2. dub. 4.* Nec opinioni consentium, posse manifestari casum, suffragatur finis reservationis, quem ajunt esse, ut Pastores habentes noti-

tiam peccatorum, possint melius prodesse omnibus subditis, & providere de opportuno remedio. Nam non ideo fit reservatio, ut ex notitia habita sive directe, sive indirecte ex Confessionibus, Pastores possint diœcesis bono consulere, ut notant Theologi apud Castropalaum, sed ut pœnitens ex difficultate remedii magis arceatur a peccatis, eorumque gravitatem agnoscat; deinde ut graviora quædam, & atrociora crimina, non a quibuscvis, sed a summis dumtaxat Sacerdotibus, utpote doctioribus, & prudentioribus, judicentur, & absolvantur. II. Non leviter apud nonnullos redderetur odiosa Confessio, si hi scirent, Pastores notitia ex ea habita velle uti ad diœcesis gubernationem, & politiam, quæ fortasse in aliquod ipsorum gravamen cedet. Quantum autem id cavendum sit, nemo non videt; atque idcirco S. Leo I. in sua epistola ad Episcopos per Campaniam, Samnium, & Picenum, damnat consuetudinem, quæ per eas regiones irrepserat, publicandi pœnitentium (quorum nomini, ut opinor, parcebatur) occulta delicta ad aliorum terrorem: damnat, inquam, *ne multi a pœnitentiæ remediis arceantur, dum aut erubescunt, aut metuant inimicis suis facta referare, quibus possunt legum constitutione percelli*: ubi notentur ea verba: *metuunt iis referare, quibus possunt legum constitutione percelli*. III. Demum quia S. Thomas in 4. dist. 17. q. 3. *questiunc. 4. ad 6.* expresse asserit, Superiores, qui sunt nimis solliciti, ut conscientias subditorum per Confessionem sciant, multis laqueum damnationis injicere, & per consequens sibi ipsis. Hoc autem, apertum est, habere locum, tum si velint scire immediate, tum mediate per varias interrogationes factas postulantibus facultatem absolvendi a reservato.

52. Acquiritur jurisdictio La jure tum scripto, qualiter obtinent in primis omnes ordinarii Pastores, tum consuetudinario, accedente nimirum simul tacito consensu Superioris: in tantum enim dicitur consuetudo dare jurisditionem, in quantum est signum evidens, quod ea commissa sit a superiore vidente ac potente impedire, nec contradicente: hinc Parochi, alique Confessarii, præsertim Regulares, absolvunt peregrinos, & vagabundos existentes, vel peregrinantes per ea loca, & territorium, ubi ipsi sunt approbati, & expositi Confessarii. II. ab homine per delegationem alicujus ordinarii Pastoris, idque sive explicitè & directe, sive implicitè & indirectè: & quidem indirectè datur jurisdictio ab homine, quando quis aliquin approbatus, sed non habens jurisditionem in hunc pœnitentem, eligitur in Confessarium ab hoc pœnitente, utpote habente facultatem confitendi cuivis approbato, ex Gobato, aliisque. III. ex errore communi, non autem privato unius, vel alterius, præsertim accedente titulo colorato; in tali enim casu Ecclesia tribuit actualem jurisditionem pro singulis Confessionibus respectu veri Sacerdotis, ut prospiciatur saluti animarum inculpabili errore laborantium, ex communi: tunc autem adest talis error communis, quando in loco, in quo quis excipit Confessiones, omnes, aut plerique existimant, eum esse vere habitualiter præditum jurisditione, cum tamen careat tali habituali potestate.

53. Jurisdictio delegata potest duplici modo delegari: 1. absolute sine
ulla

ulla limitatione : 2. cum aliqua limitatione . Hæc vero limitatio solet esse in hac triplici differentia : 1. ut concedatur duratura usque ad beneplacitum Episcopi , vel Sedis Apostolicæ &c. 2. ut concedatur ad absolvendum aliquas determinatas personas in favorem illarum : 3. ut concedatur duratura usque ad aliquod determinatum tempus . His positis , jurisdictio concessa absolute , & sine limitatione , non expirat per mortem concedentis , vel ejus amotionem ab officio ; quia gratia facta non expirat per mortem concedentis , ex Sanchez l. 8. de Matr. disp. 28. aliisque communiter : concessa ad beneplacitum Episcopi , vel Sedis Apostolicæ , non expirat per mortem concedentis , quia dignitas Episcopalis , & Sedes Apostolica semper manet , unde semper permanet ejus beneplacitum , donec aliud significetur : item concessa cum hac limitatione , *donec revocavero* , non expirat ; quia est concessa , donec ponatur conditio revocationis , quæ utique non ponitur per mortem concedentis : at vero concessa cum hac clausula , *ad meum beneplacitum* , expirat per mortem concedentis , vel ejus amotionem ab officio , juxta probabiliorē sententiam Sanchezii , Suarezii , & Castropalai ; quia talis jurisdictio , ad hoc ut duret , requirit beneplacitum concedentis , quod non adest post ejus mortem , & quamvis adsit post ejus amotionem , tunc tamen non est legitimum : concessa cum limitatione ad aliquas determinatas personas , & in favorem illarum , expirat per mortem concedentis , re integras quia in tali casu non est gratia facta , sed facienda , gratia autem facienda expirat per mortem concedentis , re integra , ut firmat Sanchez l. 8. de Matr. disp. 28. denum concessa cum limitatione ad certum tempus , v. g. ad annum , non expirat morte concedentis , si annus non fuerit elapsus , & , nisi a successore revocetur , durat toto eo anno , quia toto eo anno habitualiter perseverat voluntas concedentis , ex Castropalao , & communi . Ubi notamus cum communi Doctorum apud Felicem Potestatem , quod valet Absolutio data ab approbato , & habente jurisditionem ad annum , etiam eo anno elapso , si tamen id communiter ignoretur , quamvis , per se loquendo , Confessarius graviter peccaret absolvendo : an vero a tali peccato excusaretur , ex eo quod ipse tunc temporis licentiam confirmandam apud Curiam Episcopalem transmiserit , & moraliter certus sit de confirmatione ? res mihi est valde dubia ; tum quia praxis Curie Romanæ , a nonnullis prætensa pro parte affirmativa , cum fuerit a me sædulo per viros doctos investigata , nunquam liquido constitit ; tum quia assertio videtur tota fundari in præsumptione jurisditionis , seu licentiæ : de hac autem præsumptione sic asserimus .

54. Non sufficit jurisdictio præsumpta hoc sensu , quod daretur , si peteretur , quia per hoc non est data jurisdictio , sed danda . Sufficit autem , si hoc sensu sit præsumpta , quod adsint sufficientia signa , quod sit concessa : hæc autem signa , non solum debent esse externa , quia voluntas interna , non manifestata exterius , est impotens ad dandam jurisditionem , ut tradunt passim Doctores in materia tum Confessionis , tum Indulgentiarum , sed etiam debent esse talia , ut non relinquunt rem dubiam , ex Suarez disp. 26. sect. 1. num. 16. quia sic non satis manifestant voluntatem superioris : atque hinc etiam

fit, quod omnes fere Theologi negent, valere Absolutionem sub ratihabitione jurisdictionis, siue ratihabitio sit de futuro, ut v.g. contingeret, si quis audiret Confessiones sciens, quod superior, ubi hoc intellexerit, dicet, se esse contentum; siue ratihabitio sit de presenti (quæ dictio, ex Suarez, involvit repugnantiam in terminis proprie sumptis), ut v.g. contingeret, si quis audiret Confessiones, putans per conjecturas meras, aut merum probabile ratiocinium, quod superior de presenti consentiat, & ratio hujus est; quia ex communissimo sensu Theologorum, tacita licentia pro administratione valida Sacramentorum pendendum a jurisdictione, vel quasi jurisdictione, nihil valet, nisi signo externo demonstretur: non negamus tamen, signum externum esse aliquando ipsam taciturnitatem, quando nempe res est notoria, & superior, cum possit, non se opponit, ex Suarez *loc. cit.* Gobato *trakt. 7. cas. 3.* aliisque.

55. Cum autem fieri possit, ut hujusmodi signa præcesserint quidem, sed propter aliquas supervenientes circumstantias, aut eorumdem conditiones, dubius quis sit de sua jurisdictione, nos dicimus cum Suarez, Card. de Lugo, aliisque communiter, quod vel tale dubium est merum negativum, vel est positivum, seu tale, ut probabile sit, non autem certum, dari jurisdictionem. Et quidem, si sit merum negativum, non poterit Sacerdos sub tali dubia jurisdictione ministrare hoc Sacramentum, nisi in casu necessitatis, quando aliud remedium magis securum ex 'beri non poterit: quo casu Absolutio danda erit sub conditione, & ex Suarez, ac Castropalao *hic*, monendus erit pœnitens de obligatione quam habet confitendi iterum ea peccata Sacerdoti, qui habeat jurisdictionem certam. Si vero tale dubium sit positivum, ita ut adsit judicium probabile de jurisdictione, tunc etiam non poterit Sacerdos ministrare extra casum necessitatis hoc Sacramentum sub tali jurisdictione probabili, quousque illa persistat intra fines meræ probabililitatis, ex la Croix, & Cardenas *disp. 2. num. 137.* poterit autem, quando tali jurisdictioni accedat certitudo ex principio aliquo extrinseco: hæc vero certitudo semper accedit ex consuetudine universali, qua stante, Ecclesia supplet jurisdictionem, si ea forte desit, quando opinio de jurisdictione est vere ac solide probabilis, non autem quando est tenuiter probabilis, ex Sanchez in *Dec. l. 1. cap. 9.* Bonacina de *Pœnit. quest. 7. punct. 5. §. 4.* Cardenas *loc. cit. num. 160.* aliisque tum veteribus, tum recentioribus, qui bene notant, Sacerdotem non prohiberi ab administratione Sacramenti sub tali jurisdictione, ex decreto Innocentii XI. damnante primam propositionem: *Non est illicitum &c.* quia talis Sacerdos non ministraret sub opinione probabili, sed sub certa, certo nimirum supplente jurisdictionem Ecclesia, si ea forte desit.

56. Ad extremum notamus, quod omnes illi, qui possunt approbare, possunt etiam delegare jurisdictionem. Approbare autem possunt Papa pro toto Orbe; Nuncius Apostolicus pro sua provincia, quamvis contradicat Pignatellus *tom. 2. consult. 1.* adducens varias declarationes, quæ an authenticæ sint, scient Domini Nuncii; Episcopus pro sua diocesi, etiamsi non confetratus, sed dumtaxat electus, & confirmatus, ac subditos habens; Vicarius

Ge-

Generalis Episcopi, quia personam Episcopi repræsentat; item Capitulum Sede Episcopali vacante; præterea Abbates, alique Prælati jurisdictionem quasi Episcopalem habentes, quia nomine Episcopi, in iis, quæ ad jurisdictionem pertinent, subintelliguntur. Excipias tamen Prælatos Regularium quo ad approbationem pro secularibus; ex omnium enim sententia, declarata a S. Pio V. in Constitutione *Romani Pontificis*, apud Barbosa, non sunt quo ad hunc actum Ordinarii, nec sub nomine Episcopi intelliguntur: sicuti etiam excipiendi sunt Parochi; certum siquidem est, non posse Parochum approbationem dare ulli Sacerdoti. Utrum vero possit ille Sacerdoti ab Episcopo approbato, sed non habenti jurisdictionem, delegare suam pro suis parochianis, res est valde controversa, in qua probabile censemus, quod possit, ex Suarez *disp. 26. de Sacr. sec. 1.* Navarro in *Can. Placuit, de Pen. disp. 6.* aliisque contra Clericatum *dec. 37. de Pan.* pluribus contendentem, Parochum non habere ordinariam jurisdictionem.

§. V.

De requisitis ad licite ministrandum hoc Sacramentum.

57. **S**acerdos prædictis requisitis instructus, ad valide ministrandum Sacramentum Pœnitentiæ, alia quædam habere debet ad licitam ejusdem administrationem: quorum 1. est probitas: 2. scientia: 3. carentia aliquarum censurarum: 4. carentia prohibitionis factæ a legitimo superiore. Et quidem in primis in eo requiritur probitas; nam, ut bene ait Clemens X. in sua Constitutione *Superna*, præcipua ministri Sacramenti Pœnitentiæ qualitas est vitæ integritas, ac morum honestas: unde, ut Sacramentum debite ministretur, existimare debet prudenter, se non esse in peccato mortali; alioquin mortaliter peccaret ministrando, nisi forte excusaretur ob subitam necessitatem, sicuti advertit Castropalaus *tract. 18. de Sacr. in gen. punct. 5.* Quando autem debeat ita existimare, seu quando debeat esse in gratia, an videlicet toto tempore, quo audit Confessionem, an solum quando profert formam Absolutionis, variant Doctores, asserentibus aliis cum Suarez *disp. 28. sect. 1. num. 3.* debere Sacerdotem ad totum illud ministerium accedere in statu gratiæ; aliis cum de Lugo *disp. 22. sect. 4.* putantibus sufficere, quod ille sit in gratia, antequam absolvat, & perficiat Sacramentum. Suarezii opinio ut securior, ita rationi conformior nobis videtur. Status autem gratiæ non est necessario ab illo procurandus per Confessionem sui peccati in ordine ad tale ministerium, sed vel per Confessionem peccati, vel per dolorem perfectum, seu Contritionem, ex communi apud de Lugo *loc. cit.* Quod si existens in statu peccati mortalis plures Confessiones audiat continuatim, una quasi vice mortali, non improbabiler unum numero peccatum committeret, ex Card. de Lugo *disp. 16. sect. 14. §. 2.* quamvis securius doceat Bonacina, alique, tot ab eo peccata numero distincta committi, quot Confessiones audiuntur.

58. Requiritur secundo ad licitam administrationem scientia aliqua; quia nullus potest licite iudicium exercere in aliqua causa gravi, nisi habeat scientiam proportionatam ad ferendum æquum iudicium, siquidem alias exponit se

se evidenti periculo errandi, ex communi apud Suarez: non eadem tamen scientia requiritur in omnibus; multo enim major scientia requiritur in uno loco, quam in alio, & respectu unius personæ, quam alterius: unde minor scientia requiritur in eo, qui expositus est ad audiendos solos rusticos, quam qui expositus est ad audiendos omnes, ex Navarro, Suarez, ac de Lugo; sicuti ex eodem de Lugo, contra Navarrum de hoc dubitantem, multo minor requiritur pro audiendis viris doctis, a quibus Confessarius possit instrui, quam pro audiendis indoctis. Communiter in quolibet Confessario talis ac tanta requiritur scientia, ut 1. sciat discernere peccatum, & an veniale sit, vel mortale, non quidem speculative differentiam eorum cognoscendo, sed practice, & quantum ad an est, ex Cajetano, aliisque: 2. ut sciat, quæ sunt de substantia hujus Sacramenti (quod exposuimus in alia parte), & simul quæ sint necessaria, ad hoc ut pœnitens sit dignus Absolutione: 3. quænam peccata habeant annexam censuram, ac reservationem: 4. quænam habeant annexum onus restitutionis, vel denunciationis: 5. quæ circumstantiæ vel aggravent peccatum, vel novam malitiæ speciem superaddant: 6. quæ circumstantiæ ex mortali veniale, & vicissim ex veniali mortale efficiant: 7. quomodo possit cognosci distinctio numerica peccatorum &c. Non ita tamen exacta horum omnium scientia requiritur, ut Confessarius de omnibus, quæ pœnitens dicit, possit discernere, an sint mortale, aut veniale; sæpe enim id nec doctissimi possunt, ex Suarez, ac de Lugo, aliisque: sed sufficit mediocris, ac talis, ut intelligat ea, quæ frequentius accidunt, & de aliis dubitare sciat, ac proprio studio, vel labore, aliorumque consilio dubium vincere, ex Castropalao, aliisque; ubi advertimus cum la Croix n. 1790. quod Confessarius, quantumvis doctus, minus prudenter ageret resolvendo statim implicatos casus, præsertim quæ Matrimonii impedimenta, simoniam, vel restitutionem concernunt, sed expediret, ut tempus considerandi a pœnitente exposceret. Hoc autem multo magis præ oculis habendum a Confessariis non adeo doctis, qui eo confidentius aliquando absolvent, ac dispensant, quo minus ob imperitiam dubitare norunt: non inde tamen fit, quod Confessario pœnitens esset in tali casu inabsolutus dimittendus; posset enim is absolvi, si ipse se facturum promittat, quod deinde Confessarius ex proprio studio, vel aliorum consilio judicaverit ab eo præstandum esse, ex Suarez *disp. 28. sect. 2.* & Bonacina *disp. 5. de Pen. quest. 7. pun. 5. §. 2.*

59. Cæterum, qui, extra casum necessitatis, sine prædicta scientia huic muneri se ingereret, graviter peccaret; quia intrinsece malum est suscipere aliquod iustitiæ munus sine sufficienti scientia ad illud iuste ministrandum, ex communi apud Suarez: neque ab hoc peccato excusat approbatio habita a superiore; quia approbatio præsupponit quidem scientiam, at eam non confert; ac proinde, qui manifeste cognoscit, se ea carere, non est securus in conscientia administrando hoc Sacramentum. Dixi, qui manifeste cognoscit; nam qui dubitat, vel scrupulis angitur circa scientiam requisitam, consulat superiorem, vel virum doctum, & ejus dictis acquiescat, ex Suarez, Vasquez, Bonacina, Layman apud Castropalaum *hic*, & apud la Croix

num. 1788. Illud vero pro indubitato esse censemus, quamvis superior, seu Prælatus excusetur aliquando a peccato ob penuriam virorum doctorum, & necessitatem diœcesis in approbando, seu deputando ad Confessiones virum non satis doctum, debet tamen iste talis sic deputatus moneri de sua ineptitudine, teneturque ipse dare operam, ut proprio studio, vel aliorum consilio, se muneri exercendo aptum reddat, ex de Lugo, aliisque.

60. Hactenus diximus, scientiam requiri ad licitam administrationem; quia scientia, per se loquendo, non requiritur ad valorem, seu substantiam Sacramenti; siquidem absque illa potest stare materia, forma, & minister habens jurisdictionem cum debita intentione, ex communi apud Suarez, & Castropalaum, quamvis in aliquo sensu, & per accidens, scientia requiratur ad valorem. Hinc pœnitens confitens bona fide Sacerdoti existimanti venialia esse, quæ sunt mortalia, non tenetur, ubi id animadverterit, Confessionem repetere, ex Suarez *disp.* 28. *sect.* 2. tenetur tamen pœnitens, si doctus sit, & aperte cognoscat, Confessarium peccati gravitatem non percipere, illum instruire, quia tenetur facere, quantum in se est, ut Confessarius iuste ferat iudicium in causa gravi, ex Castropalao *hic*. Per accidens autem scientia pertinere potest ad valorem; nam si ejus carentia tanta sit, ut Confessarius nesciat formam Absolutionis, neque eam proferre possit, vel nesciat cognoscere peccata, neque sub ratione confusa peccati, utique invalidum erit Sacramentum: quia talis homo sic imperitus non potest humano modo exercere hoc ministerium: unde talis ignorantia, ut bene advertit Suarez, potius dicenda esset impotentia quædam ministrandi hoc Sacramentum, quam ignorantia officiens ejus valori.

61. Requiritur 3. ad licitam administrationem carentia aliquarum censurarum; nam interdictus personaliter, suspensus, vel excommunicatus, etiam si toleratus, illicite administrat hoc Sacramentum, ex communi apud Castropalaum, utpote qui exclusus est ab omnium Fidelium communione, & præcipue ab hac, quæ est omnium maxima. Limites, nisi fuerit licite ad id requisitus a Fidelibus, ex *Extrav. Ad evitanda*; siquidem ex causa rationabili, & quando desit alius, licitum est Fidelibus hoc Sacramentum petere a ministro tolerato, atque hic eorum petitioni annuens non peccabit, dummodo, ut diximus supra, eliciat actum Contritionis, & dummodo Absolutionem a censura ante administrationem obtinere minime valeat. Dixi, quando desit alius; nam probabilius est, non licere ab excommunicato tolerato Sacramentum petere, si in promptu sit alius qui illud ministrat, ex Coninch. & la Croix *l. 6. p. 1. num.* 212. contra Valentiam, Dianam, & alios.

62. Demum requiritur carentia prohibitionis factæ a legitimo superiore, vel ab Ecclesia. Hinc, licet Suarez *disp.* 33. *de cens. sect.* 1. probabilius credat, per se concedi, ut Sacramentum Pœnitentiæ dari possit in Ecclesia specialiter interdicta, persona tamen specialiter interdicta vel directe, vel indirecte, scilicet quæ causam dedit interdicto generali, etiam si nominatim non sit interdicta, ac denunciata, peccat, per se loquendo, ministrando hoc Sacramentum; sicut etiam qui illud ministrat tempore cessationis a Divinis extra articulum,

vel

vel periculum mortis, ex eodem *ibid. disp. 39. sect. 2.* Dixi, per se loquendo; nam consuetudo præcipue fundata in doctorum virorum auctoritate, & a Pastoribus tolerata, poterit excusare &c. ex eodem *ibidem*. Item Sacerdos Regularis prohibitus a suo Regulari superiore ministrare hoc Sacramentum, peccabit mortaliter illud ministrando, ut habet Diana *tr. 15. res. 16.* vel venialiter, juxta minorem præcepti dati rigorem; quamvis enim superior Regularis jurisdictionem suo subdito datam a Pontifice vel per speciale privilegium personale, vel per Bullam Jubilæi (non autem per privilegia directæ, & primario concessa Ordini, & personis ejus, ex his enim emanans jurisdictio, cum non descendat ad singulos Religiosos, nisi media concessione superiorum, præsertim in Societate Jesu, potest a Prælato limitari, coarctari, & communicari, prout libuerit, ex Suarez *tom. 4. de Rel. lib. 2. cap. 10.* nec eidem datam ab Episcopo independentem a superiorum licentia, quod sane Episcopi, etsi possint, tamen facere non præsumuntur, nisi id expriment, ex Diana apud Tamburinum *lib. 5. cap. 5. §. 4.*) quamvis, inquam, talem jurisdictionem vel coarctare, vel abolere nequeat, potest tamen Religiosum regere in usu talis jurisdictionis; adeoque, prohibendo, illicitum reddere usum talis facultatis. Cum vero in licentis expediri solitis a Curia Episcopali habeatur hæc clausula, *ut in Ecclesiis tui Ordinis, & in aliis de licentia Rectorum Confessiones audire valeas*, si forte contingeret, ut quis in aliena Ecclesia sine licentia ejus Rectoris Confessionem exciperet, valide quidem exciperet, quia ea verba non faciunt conditionem, sed modum, ex Sanchez *lib. 3. de Matrim. disp. 33.* non careret tamen per se aliqua culpa, etiamsi privatim id faceret. Quod si publice, quasi alienam jurisdictionem invadendo, posset etiam graviter peccare, præsertim superveniente scandalo, & confusione, ex Layman *de leg. tr. 4. cap. 6. num. 4.* Item ea verba, *in Ecclesiis tui Ordinis*, posita sunt demonstrative, non taxative, ex Clericato *decis. 39.* aliisque.

§. VI.

De obligatione excipiendi Confessiones.

63. **S**acerdos talibus commemoratis requisitis instructus ita, ut & valide, & licite administrare possit hoc Sacramentum, non hoc ipso tenetur illud ministrare; sed obligatio talis administrationis aliunde oritur, nempe vel ex obedientia, & voto, vel ex officio, & justitia, qualis est in Episcopis, & Parochis &c. Et quidem Episcopus, etsi aliquando, id postulante gravi necessitate subditi, teneatur immediate per se ipsam Confessiones audire, regulariter tamen non tenetur ad id, quia habet regimen universalius, & plures actiones ex officio, quibus incumbere debet. Prælatus vero Regularis exemptus, quamvis sit ordinarius Pastor animarum suorum subditorum, & in eum translata sit cura, quam Episcopi, vel Parochi habent circa suos subditos sæculares, tamen debet quidem esse paratus ad Confessiones subditorum audiendas, si ipsi velint ei confiteri; at hoc munus Confessarii personaliter, & per se exercere ordinarie non potest, ex decreto Clementis VIII.

ajen-

ajente: Non liceat superioribus Regularium Confessiones subditarum audire, nisi quando peccatum aliquod reservatum admiserint, aut ipsimet subditi sponte, aut proprio motu id ab iis petierint. Adeoque non solum ex proprio instituto, & regula, quilibet superior Regularis sive immediatus, sive medius, ut observat Suarez tom. 4. de Relig. l. 2. cap. 16. tenetur propriam jurisdictionem alteri delegare, cui Religiosi libere consteantur, verum etiam ad id tenetur sub gravi, ex rigore juris, & decreto ejusdem Clementis VIII. in quo notanda sunt ea verba sponte, aut proprio motu; ea siquidem, cum disjunctiva sint, non vetant Prælati subditos ad sibi confitendum suaviter inducere, hoc illis consilium dare, aut ab iis id petere; nam adhuc ipsi id facerent sponte, licet non facerent proprio motu: verum securius est, ut id non fiat nisi proprio motu ipsius pœnitentis, ac præsertim cavendum, ne timor aliquis reverentialis, aut nimia persuasio, quæ est virtualis quædam præceptio, intercedat, ex Suarez ibidem. Rursum ea verba, nisi quando peccatum aliquod reservatum admiserint, docent, non esse, per se loquendo, Prælatos Regulares obligatos delegare jurisdictionem in reservata, quamvis de facto ob pœnitentis utilitatem, aliasque occurrentes circumstantias, & ex eodem decreto Clementis VIII. in sequent. §. ea jurisdictio committenda sit, non semper quidem permanenter & habitualiter, sed quando casus occurrerit, & quando Confessarius designatus, suo principaliter, & etiam superioris iudicio committendam censuerit. Tunc autem sic prudenter censebit, quando nec damnum proximo, nec bono publico Religionis, nec ipsi pœnitenti ex ea Absolutione timeri rationabiliter potest. Quod si in tali casu, quo Confessarius designatus censet sibi committendam eam jurisdictionem, superior nihilominus committere nolit, tunc per declarationem Urbani VIII. confirmantis decretum Clementis, poterit Confessarius designatus illa vice, pœnitentem Regularem, etiam non obtenta a superiore facultate, absolvere. Notanter dixi ly designatus; nam hoc jus an habeat locum etiam respectu alterius Confessarii, cæteroquin docti, & pii, res est valde dubia; & cum agimus de jurisdictione necessaria ad actum, non est satis qualicumque interpretatio concessionis datæ.

64. Parochus tenetur hoc Sacramentum ministrare, non solum quando subditi tenentur confiteri, sed etiam aliis temporibus, si ipsi subditi petant, ex Bonacina de Pan. quest. 7. p. 4. §. 2. aliisque contra nonnullos minime audiendos, saltem quando est tempus alicujus Jubilæi, vel quando subditus aggressurus est longum iter, aut quando solemnitas aliqua occurrit, & nulla est notabilis causa negandi. Certum autem nobis est ex de Lugo de Pan. disp. 22. sect. 1. illum teneri id præstare etiam cum periculo suæ mortis, quando pœnitens est in extrema, vel in gravi necessitate salutis: tunc vero censetur in extrema necessitate, quando morti vicinus existit in peccato mortali, & ignorat, aut quid sit perfecta Contritio, aut an, & quomodo elicienda: tunc censetur in gravi necessitate salutis, quando non sine magna difficultate potest elicere Contritionem perfectam, ex de Lugo ibidem. Sciatur porro, hunc, vel illum esse in hac, vel in illa necessitate, observando has

Tom. III.

Q

sub.

subsequentes tres regulas traditas a Doctoribus apud Gobatum : I. quod , si poveris , hominem esse flagitiosum , præsumas exilire in gravi necessitate ; etenim tales rarissime , nisi a probis Confessariis edocti , & inducti , eliciunt actum perfectæ Contritionis : II. quod si compertum tibi sit , hominem esse vitæ perquam bonæ , & honestæ , confesumque paulo ante ægritudinem , prudenter confides , operam Sacerdotis haud esse ipsi necessariam , ex Suarez *de Pœn. disp. 44. sect. 3. num. 15.* III. quod si homo sit tepidus , ac remissus in procuranda æterna salute , atque ab uno circiter mense non expiatus Confessione sacramentali , recte præsumes , indigere Absolutione sacramentali ; rari enim sunt inter hujusmodi homines , ut notat *ibidem* Suarez cum aliis , de quibus imprudenter formides , ne intra tale temporis spatium Deum graviter offenderint . Imo non nimis rigidam censemus opinionem Caramuelis docentis in *sua Theologia præintentionali num. 2595.* Parochum obligari ministrare cum mortis suæ periculo Sacramentum Pœnitentiæ , nisi certus moraliter sit , infirmum non exilire in statu peccati mortalis , aut certe non esse tunc occubiturum . Admittimus tamen cum Suarez , Vasquez , Layman , Castropalao , & aliis , quod raro Parochus tenetur immediate per se ipsum Sacramentum hoc ministrare , sed satisfaciet suæ obligationi , si per alium idoneum ministret , & subditi id ægre non ferant : adeoque potest Parochus tempore pestis cum licentia Episcopi se subducere , dummodo substituat æque profuturum , & subsistat in loco , in quo possit suo gregi providere ; autem nequeat substituere idoneum , non potest uti privilegio Tridentini recedendi ad bimestre , nec potest Beneficium resignare , ex pluribus apud la Croix *l. 3. part. 1. num. 154.* Quomodo vero tempore morborum , seu pestis , debeat suæ valetudinis in Sacramento hoc ministrando curam habere , optime docet Chapeaville in *lib. de ministrandis tempore pestis Sacramentis* , nec pauca exposuit Castropalaus *tract. 23. disp. un. p. 19.* Demum quamvis , ut diximus , Parochus teneatur hoc Sacramentum ministrare , quando subditi etiam ex devotione illud petant , non proinde tamen sit , eum ad id teneri , quando subditi ex mera devotione illud petunt tempore , ac loco non opportuno , ex Suarez *disp. 32. sect. 1.* & Layman *l. 5. tract. 6. cap. 13.* siquidem tempore ac loco non opportuno non habent subditi jus illud petendi : unde etiam Parochos afficit prohibitio synodalis in aliquibus diocesis , qua cavetur , ne Confessiones mulierum excipiantur ante Solis ortum , vel post illius occasum , Item non tenetur Parochus ministrare , si subditus importune , & nimis frequenter confiteri velit ; quia non tenetur summam diligentiam adhibere , vel laborem , sed moderatam , & prudentem sollicitudinem . Atque hinc etiam sequitur , quod extra casus gravis , vel extremæ necessitatis , aut Jubilæi &c. si Parochus semel , aut iterum neget , vel differat audire Confessionem , non proinde peccat mortaliter , dummodo non sit dilatio nimia , ex Suarez *loc. cit.* , approbante , eumque contra Bonacinam defendente Card. de Lugo *disp. 22. sect. 1.*

65. Alii Confessarii , qui non tenentur ex officio , vel iustitia , ut supradicti , obligationem ministrandi hoc Sacramentum contrahunt vel ex obedientia ,

tia, aut voto, vel ex charitate. Ex obedientia tenentur ii, qui sub ea vivunt, quando, & quoties illis a Prælato id injungitur: qua in re attendenda sunt principia generalia præcepti, ac voti obedientiæ. Ex charitate, juxta generalia hujus virtutis principia, tenentur iidem, alique, quando proximus est in extrema salutis necessitate, vel quando est necessitas communis, licet non extrema, ex de Lugo *loc. cit.* & quidem in his casibus etiam cum periculo vitæ, deficientibus tamen cæteris qui subveniant: non est autem certum, quod hi teneantur in gravi proximi necessitate cum suo vitæ periculo, quamvis in deficientia aliorum id probabilissimum sit, ex eodem: ubi cum Suarez advertimus, ex necessitate tam grandi hujus Sacramenti facilius nasci obligationem charitatis ministrandi hoc, quam alia Sacramenta. Cæterum, abstrahendo ab his casibus, Sacerdos, qui non tenetur ex officio, potest recusare administrationem petitam hujus Sacramenti; at, si semel petitioni acquieverit, & Confessionem exceperit, tenetur Absolutionem concedere; vel negare, pro meritis causæ, ex Layman, Castropalao, aliisque: sicuti si infirmum audierit Religiosus, tenetur ex Constitutione Clementis X. certiorum illico reddere Parochum de Confessione facta ab eo infirmo, atque hoc potest præcipi ab Episcopo Regularibus sub pœna suspensionis a facultate audiendi Confessiones: sufficet tamen, ut certioratio hujusmodi fiat saltem per scripturam apud ipsum infirmum relinquendam. Qua in re examini, ac judicio sapientum relinquo 1. an id intelligendum sit de infirmo, seu morbo periculoso, non autem de quocumque? 2. an sufficiat certioratio facienda Parocho per ipsos domesticos, vel per ipsum ægrotum, quando hi sunt fide digni? Certe tale præceptum per se videtur obligare sub gravi.

66. Dixi, Sacerdos, qui non tenetur ex officio, potest recusare audire Confessionem petitam: id est, non peccat recusando; at certe non facit, per se loquendo, rem sanctam; & conformem charitati ac misericordiæ sacerdotali: quilibet siquidem Sacerdos rite instructus, juxta dicta, etiam non rogatus, munus tam sanctum audiendi Confessiones, Deoque tam gratum, haud ægre subire debet; quia, ut ait Ven. P. Ludovicus de Ponte, Confessiones audire est actus heroicus, cum in hoc ministerio, modo quodam speciali, cuncta misericordiæ opera tum spiritualia, tum corporalia exercentur, in eoque magis immediate, quam in aliis, Sacerdos plurimum conferat ad reducendas, & conciliandas animas suo Creatori, imo se ipsum in multis vincat, multas superet repugnantias, idque sine ullo prorsus applausu, qualis conciones sæpe circumsonant, adeoque sine vanæ gloriæ periculo. Videatur P. Tobias Lonher in *Instruct. præf.* hac de re disserens pie, solideque.

67. Ut vero timorem illum arceat, quo aliqui ab hoc suscipiendo munere deterrentur, putantes, se non posse illud prudenter, docte, pieque, ut par est, obire, meminerit Sacerdos, quæ doctissimi viri circa hanc rem sparsa in variis libris ediderint: nempe I. credi omnino debere, hoc Sacramentum non esse sic institutum a Christo Domino, ut difficillime administraretur, ex Francolino in *Cler. Rom. disp.* 5. II. rejiciendam omnino esse eam ministrandæ Pœnitentiæ praxim, ex qua sequeretur, quod hoc Sacramentum

evaderet maxime onerosum ejus ministeris, vel susceptoribus, & magis, quam ferat Sacramenti necessitas, licet ejusmodi praxis removeret non paucos a peccato; quia videlicet removeret etiam a Sacramento, ex eodem *ibid.* III. præsumendum Confessario posteriori, priorem esse bene functum officio suo, itaque accedente pœnitente, qui alteri confessus est, credendum, illum alterum satisfecisse suo muneri quo ad examen numeri, ac specierum, quo ad aperiendum onus restitutionis &c. nisi error deprehendatur, ex Formario, & Gobato: IV. non contrahi, adeoque non confitendam malitiam circumstantiæ mutantis speciem, nisi pœnitens, quando peccatum committebat, saltem dubitarit, an adesset talis circumstantia, & an contraheretur nova malitia; unde non est adeo timendum in excipiendis Confessionibus rudium, nec ipsi vexandi sunt interrogationibus, quas forte nunquam percipient, ex eodem: V. illos, qui sponte accedunt ad Confessionem, & eo fine, ut vere reconciliantur cum Deo, si non appareant satis dispositi, posse statim paucis, sed multum significantibus verbis disponi ad actum doloris, & propositi necessarij. esto non ad habitum, seu ad longam perseverantiam in his actibus, quæ non est requisita ad valorem: satis autem esse, quod Confessarius volens absolvere, habeat judicium prudens de prædictis actibus doloris, & propositi in suo pœnitente: tale vero judicium a Confessario sufficienter haberi, dum pœnitens aut exerceat ipso modo confitendi, aut signate dicit se habere talem dolorem, nisi sit præsumptio contra ipsum, ex Francolino, Suarez, aliisque: VI. demum ad hujus Sacramenti administrationem, sicuti non requiritur diligentia summa, sed dumtaxat mediocris, ex Lonher, ita non requiri scientiam summam, immo per accidens hanc sæpe esse minus utilem, quam mediocrem conjunctam cum naturali judicio, & praxi; qui enim ita subtiliter volunt omnia revocare ad apices theologicos, non raro se ipsos, & alios implicant scrupulis, aliisque difficultatibus, ex la Croix *num.* 1787.

68. His igitur, aliisque in memoriam revocatis, prompte, & alacriter Sacerdos, rite ut supra idoneus, munus tam sanctum suscipiet. Duo tamen præmittenda illi sunt: I. ut incipiat excipere Confessionem cum intentione aut actuali, & expressa, aut implicita, & virtuali, non tantum serio agendi, sed faciendi quod facit Ecclesia, seu quod Christus instituit; sic enim obviabit scrupulis nasci solitis post actum Absolutionis; ac præsertim in aliquibus casibus ea dari cum debeat sub conditione, eam implicite conditionate dabit, licet expresse non cogitaverit de conditione; siquidem in talibus casibus Christus voluit dari sub conditione, ipse vero habet intentionem satisfaciendi intentioni Christi, ex Gobato *tr.* 7. *num.* 272. II. ut renovet desiderium salutis animarum, & Divini honoris, per orationem, qua ante opus (licet breviter) petat a Deo gratiam pœnitentibus ad Sacramenti finem consequendum, & sibi ad suum munus rite obeundum, ex Polanco *cap.* 2.

C A P U T II.

De obligationibus concomitantibus actum excipiendi:

Confessionem.

69. **C**onfessario in excipiendis sacris Confessionibus tria potissimum incumbunt munera, scilicet iudicis; doctoris, medici, ex *Cap. Omnis utriusque &c. de remiss. & pan.* & ex Tridentino sess. 14. de *Pen. c. 2. §. 6. & 7.* Præcipuum tamen inter hæc est officium iudicis, quod indicatur aperte illis verbis Salvatoris *Joan. cap. 20. Quorum remisistis peccata, remittuntur eis; & quorum retinueritis, retenta sunt.* Propterea explicaturi, quænam ex unoquoque munere obligationes emanant, initium ex officio iudicis capiemus.

6. I.

De Confessario, ut iudice.

70. **C**onfessarius ut iudex debet 1. reum audire : 2. interrogare : ac deinde, cognita sufficienter dispositione conscientie pœnitentis, illum inuncta proportionata Satisfactione, & servatis servandis absolvere, vel differre, aut negare Absolutionem respective. Debet igitur I. audire reum, ac propterea non solum in eo requiritur potestas naturalis audiendi, ut patet, sed de facto intelligere, ac percipere debet quidquid pœnitens exponat, & sensum verborum ab eo prolatorum cognoscere; nam judiciaria potestas hoc postulat, ut, quod debet judicare, discernat, *Can. 1. Pœnit. dist. 6. §. Ca. 1. v. 1.* Hinc primo tenetur Confessarius dare operam, ne inter audiendas Confessiones distrahatur, aut dormitet; nam peccaret mortaliter, si per ejus dormitationem, aut distractionem fieret, ut aliquod mortale nec intelligeretur, nec posset ejus non intellecti repetitio exigi sine notabili molesta pœnitentis, ex Gobato *num. 491.* qui jure *ibidem* putat, Confessarium, catechu-
menum, & timoratum, non debere in dubio formare sibi scrupulum de pliusquam veniali negligentia in expellenda somnolentia, vel distractione: licet enim plene deliberata expellendis his non sit excusanda a mortali ob irreverentiam Sacramenti, & periculum non audiendi necessario audienda, rarissime tamen est hujusmodi negligentia plene deliberata. Addimus, quod, si pœnitens fuerit antea notus de constanti innocentia, difficultas erit gravior mala negligentia in removenda distractione &c. tum quia talis pœnitens minus ægre feret repetitionem eorum, vel ejus, quod exposuit, tum quia fere nullum subest periculum omitendi aliquod substantiale, ex eodem. Quod autem Confessarius animadvertit, se dormitasse, vel distractiones fuisse, tunc vel ipse est certus, se non percepisse id quod erat necessario percipiendum, vel dumtaxat est dubius, an perceperit? Si certus est, se non percepisse necessario percipiendum, jubeat, repeti a pœnitente vel totam Confessionem, vel

vel eam partem, in qua non percepit respective; quæ jussio fieri communissime debet, statim ac Confessarius comperit talem defectum, si nihil prorsus de peccato percepit; at si probe percepit genus illius peccati, non vero speciem, vel speciem percepit, at non numerum, facilius differet jussuonem repetitionis, seu interrogationem usque ad finem, ex de Lugo, & la Croix, aliisque: ubi notamus cum Dicastillo *tom. 1. in 3. part. disp. 3. dub. 6.* non fieri certum Confessarium de non sufficienti perceptione ex eo, quod ille hic & nunc ignoret, quid pœnitens dixerit, seu illius non recordetur; nam sapissime usu evenit, ut distractio ad alia sit tam tenuis, ut, ea stante, percipiantur vere verba pœnitentis, sed tam tenuiter, ut statim effluat memoria illorum. Si autem rationabiliter dubius est Confessarius, an percepit, vel an id, quod non percepit, fuerit mortale, necne? facile excusabitur a repetitione imperanda; tum quia non debet ob dubium incertum creare certam molestiam pœnitenti; tum quia in dubio rationabili, an percepit, debet, aut saltem potest præsumere se intellexisse, eo quod in dubio non sit præsumendus defectus moralis, sed potius omnia esse rite gesta, per *l. Merito ff. Pro socio*. Porro si Confessarius ex prioribus Confessionibus hujus, vel illius pœnitentis, sit moraliter certus, id, quod non intellexit, esse solum veniale, aut aliam materiam non necessariam, nec possit sine molestia, aut turbatione pœnitentis interrogare, tunc sane non tenebitur imperare repetitionem, ex Stoz. & la Croix *num. 1716.* Limites, nisi in casu, quo reliqua pars Confessionis tota caret materia sufficienti ad Absolutionem, ex Gobato *loc. cit.* Imo scrupulosus Confessarius sciat, ex eodem apud la Croix *loc. cit.* etiam in hoc casu se non teneri imperare talem repetitionem, & posse absolvere, dummodo concurrant hæ circumstantiæ: I. quod per experientiam noverit, hunc pœnitentem esse constantem peccati mortalis hostem, nec unquam illud in se admittere: II. quod per eandem experientiam noverit, hunc semper solere confiteri unum certum peccatum veniale, v. g. voluntariam distractionem, aut quid simile: quamvis pro praxi, quando Confessarius, absoluta Confessione, nullius peccati est memor, & moraliter certus est, non intellexisse, nisi venialia, censemus cum la Croix, aliisque, imperandam esse repetitionem unius certi venialis peccati, aut expositionem novam alterius peccati jam alias rite confessi.

71. Hinc secundo, nempe ex obligatione audiendi reum, fit; quod peccaret graviter Confessarius, si imperitus omnino alicujus idiomatis, vel semperitus exponeret se ad audiendas eorum Confessiones, qui eo utuntur, sine ulla prorsus necessitate: at, si urgeat necessitas, licite, & valide excipiet Confessionem illius, cujus linguam non bene callet, aut etiam omnino non callet, dummodo pœnitens unum, aut alterum peccatum, saltem veniale, saltem nutibus sic exprimat, ut intelligatur a Confessario, velitque omnia confiteri, & id facere conetur, ex Navarro, Sa, Reginaldo, Layman, aliisque. Necessitas autem hoc loci non accipitur solum pro articulo mortis, in quo clarum est Absolutionem impertiendam tradenti aliquod signum accusationis dolorosæ; sed accipitur pro casu, in quo urgeat præceptum

ptum Confessionis, nec Confessarius alius commodè haberi possit, qui pœnitentem melius intelligat, ex Bonacina *de Sac. disp. 5. q. 5. punct. 2. §. 4.* aliisque; imò non improbabiler cum Caltopalao *tract. 23. punct. 11. n. 2.* Navarro, Reginaldo, Sa, & Gobato, accipitur etiam pro calu, in quo non urgeat prœceptum Confessionis, sed pœnitens, ut consulat suæ conscientie, velit confiteri, & Confessarius alius commodè haberi nequeat: monendus tamen erit pœnitens, ut non intellecta aperiat deinde alteri Confessario linguæ perito. Unde bene advertit Gobatus *num. 485.* pro praxi posse Confessarium sine scrupulo audire pœnitentem extraneæ linguæ, qui forte ad illum accedat, si aliquo modo eundem intelligat, quamvis non bene omnia percipiat, si noverit, alium non adesse, qui melius, quam ipse, sit intellecturus peccata ipsius: & quidem, si aliquid ille fateatur, de quo, consideratis circumstantiis personæ, merito dubitet, an sit mortale, & per nullam circumscriptionem, vocabulorumque variationem intelligere queat, quid tandem illud sit; moneat, ut ante Communionem, si sine notabili incommodo fieri queat, alium quærat, cui integre conscientiam suam aperiat. Idem Auctor ex praxi virorum timoratorum, & doctorum, censet, nullum inferiorem debere vel detrectare, vel multum deprecari, si ipse peritus tantum unius dialecti in aliqua lingua, exponatur a suis superioribus ad excipiendas Confessiones utentium alia, admodum quidem, non tamen extreme diversa: quæ quidem opinio usus esse potest, ne quis, in defectu Confessarii periti talis non admodum diversæ dialecti, audiendis rusticorum Confessionibus subtrahat se se, causans imperitiam dialecti, modique loquendi valde alieni a communi usu.

72. Hinc tertio fit, quod Confessarius solum imperfecte percipiens nutus muti, non debet illi hoc Sacramentum ministrare, si alius Confessarius adsit, qui valeat probe intelligere ejus nutus, sed ad hunc debet illum dirigere, ex Diana *part. 5. tract. 6. ref. 3. & 4.* Si vero nullus alius adsit, qui mutum recte ex gestibus intelligat, tunc quilibet Confessarius poterit illi Sacramentum ministrare non solum in articulo mortis, sed etiam urgente prœcepto Confessionis (non improbabiler etiam in Jubilæis, & celebrioribus festivitibus), dummodo observentur hæ circumstantiæ: I. videlicet, quod, stante impotentia percipiendi ex ejus nutibus peccata in sua specie, doceatur Confessarius a domesticis & familiaribus muti, antequam suum ministerium aggrediatur, quibus ille signis soleat ostendere, se & dolere de peccatis, & petere christiane Absolutionem, atque indicare se peccatorem; eaque signa de facto a muto exhibeantur: II. quod, stante potentia percipiendi ex nutibus aliqua ejus peccata in sua specie, interrogentur (citra revelationem) domestici, & doceatur Confessarius, quid velit ille hoc, vel altero signo indicare, ex Diana, & Gobato *num. 476.* Hæc vero ab Auctoribus asseruntur, facta suppositione, quod mutus tempore prœcepti teneatur confiteri, & quidem vel nutibus, vel scriptura, cum nequeat verbis; ita enim fert satis communis sententia Doctorum apud Dianam *loc. cit. ref. 3.* verum cum eodem Diana obligationem in muto consistendi per scripturam non satis agnosceamus, cum non videamur

videatur verosimile, hoc Christum Dominum præcepisse. Obiter hic advertimus ex occasione, asseri a Lessio in *Conf. v. Confes. cas. 11.* non posse absolvi in magno populi confluxu surdastrum (& a fortiori surdos), qui imperfecte consentitur, nec nisi alta voce perceptibili a circumstantibus, ac prudenter suspicientibus agi de mortalibus, interrogari possunt; sed esse hujusmodi homines remittendos in aliud tempus, quo possint examinari, nisi forte essent in articulo mortis &c. imo notat Possévinus de *officio Curati cap. 7.* redeuntes tempore opportuno, esse audiendos in loco remoto, interrogandosque de solis pure necessariis in mortalibus, sine sua gravi, aut illorum defatigatione. Equidem pro praxi observarem, quod observabat eruditissimus Gobatus: nempe, quando suppeterent mihi peculiaris signa ex sexu, ætate, & conditione, vel ex propria experientia, quibus judicarem, hunc, vel illum surdum, aut surdastrum esse innocentes animas, nec adferre res graves, aut eas confiteri satis castigate, & prout oportet, admitterem eos ad Confessionem etiam publice, & in magno concursu populi, atque illis vel injungerem poenitentiam levem, etiam aliis forte audientibus, vel convenirem antecederet cum ipsis de signis indicantibus quantitatem, & qualitatem poenitentiae respective injungendam: non admitterem autem eosdem tali loco, & tempore ad Confessionem, si ob peculiarem rationem, vel inexperientiam timerem, ne adferret talia, de quibus & deberem eos alloqui, & equirem intelligi, nisi audientibus aliis, ac prudenter suspicantibus agi de mortalibus: unde accedentibus hujusmodi ad Confessionale, ipsi alta voce dicerem: *non possum tibi jam præbere aures; veni alio tempore.*

73. II. Interrogare, altera est obligatio emanans ex officio judicis, ubi expendemus I. an, & qualis sit talis obligatio: II. quinam interrogandi: III. circa quæ interrogandi: IV. quomodo interrogandi: ac demum V. quando interrogandi. Ac primo quidem Confessarius tenetur sub gravi aliquando interrogare poenitentem, nempe non solum quando ipse moraliter certus est, poenitentem non præmississe sufficientem ac debitam diligentiam in se examinando juxta suum captum, & possibilitatem, adeoque culpabiliter aliquid necessarium omittere, uti ab omnibus conceditur; sed etiam quando, licet probabiliter ipse judicet poenitentem præmississe sufficientem ac debitam diligentiam in se examinando, tamen probabiliter, & prudenter judicat, spectatis circumstantiis, poenitentem alicujus mortalis necessario ceteroquin manifestandi oblivisci, adeoque sive ob ignorantiam invincibilem, sive ob inadvertentiam inculpabilem, aliquid inculpabiliter omittere, ex Suarez, Navarro, Castropalao, aliisque communiter: & quamvis Medina, Sotus, Henriquez, alique censeant, Confessarium non teneri interrogare, quando prudenter judicat, poenitentem se sufficienter examinasse juxta suum captum, & possibilitatem, esto probabiliter simul credat, aliquod peccatum, vel circumstantias, ob inadvertentiam, vel ignorantiam non fieri, nisi quando cederet in detrimentum tertii; tamen hæc opinio, quæ a la Croix putatur improbabilis, a Vasquez vero *quest. 93. art. 3. dub. 7.* vocatur probabilis, ac talis, ut non facile possit falsitatis convinci, usui esse quidem

dem potest Confessario scrupuloso, ne nimis angatur, ut non est regulariter adhibenda; quia in iudicio hoc sacramentali non solum agitur res peccatoris, sed etiam suo modo agitur res Dei, & ideo tenetur iudex etiam partes Dei agere, & omnem Dei offensionem ad tale iudicium asferre, priusquam reus absolvatur, ex Suarez. Illud sane admittimus, hanc interrogandi obligationem in Confessario non excedere limites obligationis, quam habet pœnitens in se examinando: unde, cum pœnitens non teneatur, nisi ad diligentiam atque examen humanum, idest ex Card. de Lugo *disp. 16. sect. 15. tale, ut non generet ex se fastidium* (scilicet fastidium rationale, & non intrinsecum ipsi rei) & *tedium huius Sacramenti*, ita Confessarius non tenetur ad interrogandum, nisi moraliter, & humano modo; ac propterea, ex eodem de Lugo *ibidem*, debet Confessarius accommodare se pœnitenti, & notitiam peccatorum a singulis petere juxta capacitatem singulorum, subtiliorem a subtilioribus, crassiorē a crassioribus, breviorē ab infirmioribus: hæc enim est notitia, & interrogatio humana, quam solum hoc Sacramentum desiderat, ex eodem. Ex hac porro doctrina monent gravissimi Auctores I. ne cum nausea & tœdio pœnitentis numerus peccatorum quærat, si ex dictis pœnitentis moraliter, & probabiliter æstimari possit, ex Tannero *num. 83*. II. minus exacte quo ad species &c. interrogandum esse circa singula, qui plura habet peccata, quam qui pauciora, ex de Lugo *loc. cit.* quia alioquin foret ipsis molesta Confessio: III. sicuti non valet in pœnitente hæc consequentia: Si plus se examinaret, plurimum recordaretur: ergo tenetur plus se examinare: ita non valere in Confessario hanc: Si plura interrogaret, plura detegeret: ergo tenetur plura interrogare: sanctum est enim illud *Prov. 30. Qui vehementer emungit, elicit sanguinem*: ac semper Confessario præ oculis habendum est, ne Sacramentum fiat onerosum, sed sit facile remedium juxta debilem hominum conditionem, prout a Christo institutum fuit.

74. *Quinam sint interrogandi?* Omnes sunt interrogandi, qui aut non præmiserunt sufficiens examen juxta suum captum, & possibilitatem, aut, siue culpabiliter, siue inculpabiliter, certo ex circumstantiis aliquid necessario manifestandum alia quavis ratione omittunt, vel qui licet præmiserint sufficiens examen, tamen probabiliter ex circumstantiis aliquid necessario manifestandum omittunt, dummodo id fiat, absque eo quod Sacramentum reddatur odiosum, ex dictis. Nec habendus est respectus personarum; quia Christus, ut bene advertit Gobatus, non instituit peculiarem Theologiam pro Confessionibus Principum, & Magnatum, sed voluit, eos eadem lege teneri: cum autem ferme fiat, ut regulariter respectu aliorum pœnitentium vel nunquam, vel raro, vel frequenter detur certitudo, aut probabilitas talis omissionis provenientis siue ex defectu sufficientis examinis, aut hujusmodi, siue ex inadvertentia, aut ignorantia potest etiam præmissum sufficiens examen juxta suum captum; hinc sequitur, pœnitentes distinguendos esse in tres classes, & in prima reponendos viros honestos, doctos, v.g. Religiosos, Doctores Juris, studiosos Theologiæ, Canonum &c. in secunda viros bene quidem institutos, sed non satis doctos, nec multum in re morali peritos,

v.g. cives; officiales Principum; mercatores &c. in tertia homines rudes, vel indoctos, v.g. agrestes, famulos infimos, artifices &c. ex Lonher. Quo posito, I. non sunt regulariter interrogandi, nisi de iis peccatis, peccatorumque circumstantiis, de quibus ipsi se accusant, & fortasse non satis explicant illi, qui sunt in prima classe; quia præsumendum est, regulariter eos præmississe diligens examen, & habere scientiam sufficientem, qua possint circumstantias, & numerum necessario explicandum dignoscere, atque advertere: unde aliquando, si huiusmodi penitentes numerum in peccatis enarratis non addant, prudenter judicare poterit Confessarius, quod peccata a se enarrata, mortalia non sint; saltem propter circumstantiam, quæ ex mortali faciat per accidens veniale, ex Layman; Gobato, & Lonher. Notetur tamen diligenter illa particula, *regulariter*, aliquando. II. Penitentes existentes in secunda classe, sæpe sunt interrogandi, sæpe non: quia licet regulariter judicandi sint, præmississe diligens examen, tamen, quia posito diligenti examine dubium est, an potuerint ex propria scientia & advertentia indagare recte circumstantias, & numerum, hinc ex eorum Confessione deprehendendum id est; & si quidem in plerisque peccatis aliquis eorum sufficienter exponat numerum, species &c. præsumendum est, esse satis instructum, nec interrogandus regulariter, si vero scias, interrogandus ille est. III. Penitentes existentes in tertia classe regulariter interrogandi sunt; quia regulariter, ut inquit Lonher, sufficiens examen non præmittit, vel, etiam si præmittant, sufficientes ipsi non sunt sibi relictæ ad numerum, & circumstantias peccatorum indagandas: unde recte monet Gobatus, quod, etiam si huiusmodi homines testentur se probe examinasse, & nihil occurrere ultra ea quæ falsi sunt, tamen sunt iis faciendæ aliquæ interrogationes circa peccata; quæ huiusmodi homines patrare consueverunt: ubi notamus cum Card. de Lugo *disp. 16. sect. 14.* & Segneri in *Confess. instr.* non esse facile rusticos, & huiusmodi homines dimittendos ad cogitandum de suis peccatis cum maiori attentione; quia fere non est spes, quod sibi relictæ melius examen faciant, quam illud, quod, juvante Confessario, statim facere poterunt.

75. *Circa quæ interrogandi?* Certe non interrogandi sunt penitentes de inutilibus, tum ob reverentiam Sacramenti, tum ne Confessarius penitenti molestus sit, tum ne videatur potius curiosus inquisitor, quam necessarius investigator, ex Castropalao *tract. 23. p. 19.* Hinc Cardinalis de Lugo *disp. 22. sect. 2.* putat regulariter omittendas aliquas ex iis interrogationibus, quas Summiſſæ docent præmittendas esse a Confessariis, v.g. an penitens asserat dolorem, & propositum requisitum, an fecerit examen diligenter &c. quia ut plurimum erunt inutiles tales interrogationes: proderit tamen sæpissime, ut penitens ignotus interrogetur de tempore elapso ab ultima Confessione; quia id multum juvabit ad numerum peccatorum postea percipiendum. Hinc & ex Gobato, non interroganda sunt, quæ numerum substantialem, speciemque non variant, vel certe intra eandem speciem non valde graviter aggravant, minuuntque. Notes ly valde graviter: nam circumstantia valde graviter aggravans, etsi, per se loquendo, non sit probabiliter manifestanda a peni-

pœnitente, est tamen regulariter interroganda a Confessario, tum ob peccatorum multiplicitem, quæ eandem non raro comitatur, tum ob reservationem non raro eidem annexam, tum ad rite censendum de peccatis, & mendandum vulneribus pœnitentis: quæ stante interrogatione, tenebitur pœnitens eam aperire, ut inferitur ex *prop. 58. damnata ab Innocentio XI.* ac propterea pœnitens tenetur aperire Confessario interroganti consuetudinem peccandi, ex eodem Innocentio, etiam si pœnitens sit doctus, ac moraliter certus, se esse dispositum, nec intelligere consilio Confessarii, ex Cardenas in *2. Crisi diff. 37.* contra Moyam. De tali autem consuetudine non solum expediens sapissime est, sed sæpe ex obligatione necessarium, ut Confessarius interroget, ut pluribus in locis observant Segneri, & Pinamonti. Peccaret tamen graviter Confessarius, si ex mera curiositate eam indagaret, nec tunc pœnitens teneretur respondere, ex la Croix *L. 6. p. 2. num. 972.* ex curiositate autem præsumeretur indagari, ait idem Auctor, quando Confessarius ad singula peccata inquireret, *fœcissime hoc sæpius?* Hinc 3. interrogandæ sunt illæ dumtaxat species peccatorum, quæ vel solent committi ab hominibus ejusdem conditionis, ætatis, educationis &c. vel quas pœnitentem admisisse, probabile, aut certum est, ex Tannero, & Layman *cap. 13. num. 7.* unde non interrogandum quidquid possibile est fuisse commissum. Ordinarie tamen advertendum est Confessariis, non exponi a pœnitentibus 1. peccata omissionis in proprio officio: 2. cogitationes morosas, vel desideria: 3. scandalum, quod verbis, vel signis aliis datur: 4. positivam inductionem aliorum ad peccatum: 5. cooperationem ad alterius peccatum: 6. non impeditionem peccati, cum potuerint, & tenerentur: 7. approbationem peccati alieni, vel proprii, laudando illud, iactando &c. unde cautus, & industrius sit Confessarius in iis peccatis a suo pœnitente expiscandis. Hinc denum 4. non debet Confessarius nimis esse sollicitus in interrogando de Confessionibus factis, nec facilis in præcipiendo earundem repetitionem; non sunt enim obligandi Fideles ad iterandas Confessiones, ubi non constat evidenter de obligatione, ex Filiuicio *t. 7. num. 151.* Gobato, & Segneri in *Confess. instrukt.* Non constat autem evidenter, seu certo de obligatione, quando aut vere dubium est, an sit talis obligatio, aut vere probabile est, quod non sit. Contra tunc constat evidenter, seu certo de obligatione iterandi Confessionem, quando certo constat, intercessisse in priore, vel prioribus Confessionibus defectum substantialem sive ex parte Sacerdotis, in quo non fuerit iurisdicctio &c. sive ex parte pœnitentis, in quo non fuerit dolor &c. item quando, consideratis omnibus utriusque partis principiis intrinsicis, atque extrinsecis, rationabiliter dubium est, an interceserit talis defectus: ubi advertimus, tale dubium posse enervari aliquando, atque haberi pro non rationabili, reflectendo ad hæc duo principia, nempe 1. quod in dubio debet pro valore actus præsumi: 2. quod delictum non est præsumendum. Addimus præterea, quod si Confessarius advertat, pœnitentem rudem, propter rusticitatem, & ignorantiam non culpabilem, non rite expressisse numerum, nec distincte expoluisse speciem, sed tum numerum, tum speciem confuso, & inculto modo falsum esse in prioribus

R. 2.

Con-

Confessionibus, non debet cogere illum ad magis distincte explicandum tum numerum, tum speciem, ex Card. de Lugo *disp.* 16. *sect.* 14. *num.* 585. aliterque. Secus vero dicendum, si neque in confuto id omne expresserit, v. g. dumtaxat dixerit, *feci peccatum mortale*, nec addiderit, *multoties*, aut peccatum mortale *furti*, vel *odii* &c. quia sic nec numerus, nec species infima fuisset directe subiecta clavibus, sed solum fuisset directe clavibus subiectam prædicatum genericum, & indirecte species infima identificata cum eo prædicato. In hoc autem casu debet quidem Confessarius magis distincte expiscari tum numerum, tum speciem, sed non cogere pœnitentem ad simpliciter repetendas Confessiones factas, si quidem ob bonam fidem licite ac valide fuerint, & defecerit sane integritas materialis, non autem, ut suppono, aliquid substantiale.

76. *Quomodo interrogandi?* Utique discretè, caute, honeste. Discretio habebitur, si observetur id, quod diximus in numero præcedenti, ac præterea si aliquando Confessarius procedat ex præsumptione, etiamsi certitudinem habere possit a pœnitente; nam recte docet Layman, Confessarium posse prudenter præsumere, suum pœnitentem iudicasse de objecto, sicuti exigit objecti natura, & consequenter posse procedere ex hac præsumptione, dummodo non suppetat peculiaris ratio dubitandi, an hic & nunc fallat præsumptio: unde non erit cum tactu pœnitentis exquirendus numerus mortaliū, quando ex dictis pœnitentis potest prudenter, moraliterque æstimari: & mulier confitens fornicationem, præsumenda non raro est seducta, non autem seduxisse, ex Tannero; item Subdiaconus, vel Religiosus cognitus ut talis, confitens, se graviter peccasse contra castitatem, non interrogandus, an noverit, se patrasse crimen qualificatum ratione voti, sed id est plerumque præsumendum. Sic etiam Confessarius discretus, quando ad illum accedet pœnitens, quem novit horrere peccatum mortale, si talis confiteatur, se turpi cogitationi negligentè restitisse, prudenter præsumet, absque ulteriori interrogatione, negligentiam non fuisse mortalem: at quando noverit, esse illum valde facilem, & lubricum in his peccatis, sine ullo ulteriori examine poterit præsumere de negligentia mortali, ex Gobato *tract.* 7. *num.* 338. Cautio habebitur, si taliter pœnitens interrogetur, ut nullum ille peccatum addiscat, quod antea nesciebat, & neque ille, neque Confessarius ulli peccandi periculo exponatur. Hoc autem potissimum fiet non descendendo ad interroganda particularia peccata operis in re venerea, quando pœnitens nihil confitetur ad generalia quæsitā: item non interrogando in eadem materia de peccatis operis, quando pœnitens non agnoscit in se ulla peccata cordis; nisi forte pœnitens talis sit, ut ob ignorantiam non manifestaturus sit peccata cogitationum, nisi rogatus, & instructus, sed solum noverit manifestare peccata operis. Præterea in eadem materia non raro expediet sequi in praxi sententiam Reginaldi tradentis *lib.* 2. *num.* 34. non teneri Confessarium, nisi illa interrogare, quæ certo novit omitti a pœnitente, nec teneri interrogare, nisi consueti huius, vel illius conditionis hominibus, & communiter nota. Siquidem, ut recte docet Coninch *disp.* 7. *de Sac.* *dub.* 7. præstat

stat aliquando, Sacerdotem minus perfecte peccatum pœnitentis intelligere, quam vel sibi, vel illi aliquod scandalum creare, & esse nimium. In aliis vero materiis cautio Confessarii non mediocris erit, si ferme opposito modo se gerat, nempe interrogando, ut olim recte monuit S. Xaverius, non generaliter, v.g. an hic, vel ille habeat quidquam restituendum? quia ad hujusmodi interrogationes plerumque respondent pœnitentes negative, sive infamia, sive passione excacati; sed particulariter, v.g. an hic, vel ille merces ultra justum pretium vendat, an steterit conventioni factæ &c. Demum honestas in interrogando habebitur, si Confessarius utatur verbis modestis, gravibus, & quo ad aliquas materias brevibus, ita ut transeat, non immoretur.

77. *Quando?* Et si quo ad hoc valde inter se discrepent Auctores, asserentibus aliis, differendas esse interrogationes in finem Confessionis, ne terreatur, aut perturbetur pœnitens, aliis asserentibus faciendas in decursu ipsius Confessionis; censemus tamen, certam hac in re regulam tradi non posse, sed aliquando, v.g. in Confessionibus longis, & in casu, quo a pœnitente omitatur numerus, vel species infima, satius erit, ut in ipso decursu discrete & caute interrogetur pœnitens, ne id e Confessarii memoria effluat, ut bene docet de Lugo; aliquando vero, v.g. in brevibus Confessionibus, & in casu, quo novum aliquod, ac distinctum tum numero, tum specie peccatum per-confessari judicet Confessarius, satius erit expectare finem Confessionis: unde prudentiæ Confessarii, & experienciæ ejusdem id totum relinquendum videtur; ipse enim ex propria experientia facile intelliget, quinam sint, & qui non sint interpellandi, cujusmodi rei ipse sub finem meminisse possit, cujus non possit &c. His absolutis de hac Confessarii obligatione, sequitur in superiori propositione:

78. *Cognita sufficienter dispositione conscientie pœnitentis &c.* Hæc autem est tertia obligatio Confessarii, ut judicis: siquidem debet, antequam deveniat ad sententiam ferendam, habere judicium prudens de dispositione pœnitentis, ita ut probabiliter & prudenter judicet, pœnitentem esse dispositum ad Absolutionem recipiendam per actum doloris, propositi, & rite factam Confessionem, ex Suarez *disp. 23. sect. 2.* unde sub gravi necessarium est in Confessario tale judicium probabile, & illud sufficit, ex Francolino in *El. Rom. disp. 5.* Confessarius autem sufficienter habet tale judicium prudens, dum pœnitens aut exerceat in ipso modo confitendi, aut signate dicat, se habere talem dolorem, & propositum, nisi sit præsumptio contra ipsum, quæ ipsius attestationem elidat. Nec debet præsumi, quod pœnitens affirmans, se esse dispositum, dicat factum, ex eo præcise, quod est relapsus: ex Francolino *ibid.* imo nec semper id debet præsumi, ex eo quod sit frequens relapsus, nam causa per se relapsus, non est deficientia doloris, aut propositi, sed inconstantia voluntatis, & perseverantia ejusdem occasione sive intrinsecæ, sive extrinsecæ. Verum quidem est, ut bene observat idem Francolinus, quod si, qui est relapsus, non adhibuit post ultimam Confessionem ullum conatum, ullam industriam, ne relaberetur, non est judicandus habuisse in ea ultima Confessione, & consequenter nec habere nunc verum dolo-

dolorem, & propositum; nam qui serio, & efficaciter rem aliquam proponit, saltem procurat, ut illam assequatur aliquo saltem modo, ut observat de Lugo de *Pen. disp. 14. num. 160.* Is tamen potest dare specialia signa doloris in presenti Confessione, ita ut mereatur ei credi, saltem semel, aut bis post relapsum, ut infertur ex Instructione S. Caroli ad Pœnitentiariorum suos Sacerdotes. Si vero, qui est relapsus, serio saltem conatus est non relabi, jam ostendit, se habuisse verum dolorem, & propositum, cujus effectus fuit ille conatus: quare cessat jam præsumptio contra ipsam, debetque ei credi. Similiter dicendum arbitror, si relapsus redeat ad Confessionem post unum, vel alterum relapsum, juxta præscriptum illi datum a Confessario; siquidem talis reditus ex Confessarii præscripto ad Confessionem, videtur effectus doloris, ac propositi præhabiti, ex praxi S. Philippi Neri in *Vit. L. 2. cap. 6.*

79. Item neque datur talis præsumptio de indispositione ex eo præcise, quod poenitens indispositus ad confessionale accesserit, vel quod die antecedenti peccaverit, vel quod ex incitia & rusticitate non satis calleat formalitates scholasticas doloris, aut propositi; siquidem potest brevibus, ac solidis verbis disponi, & instrui poenitens taliter, ut vere doleat, se offendisse suum Divinum Benefactorem, & Creatorem, & nolit amplius illum offendere, & sic disposito, atque instructo debeat credi, affirmanti, quod doleat; nam conversio vera potest citissime fieri, ut bene habet S. Augustinus in *Psal. 63. Numquid consilii corrigendi, & mutanda vita mala in bonum, non est locus, non est tempus? Nonne si vis, hodie fit? Nonne, si vis, modo fit? . . . Ecce, cum loquor, muta cor, & factum est.*

80. E contrario debet præsumi regulariter, quod falsum dicat poenitens, asserens, se dolere, prout oportet, si ille id asserat frigide, si alias id asseruerit inutiliter, & sine ulla emendatione culparum etiam graviorum, si nihil eorum præstiterit, quæ illi Confessarius ad cavendum relapsum, vel minuendum culparum numerum præscripserat, cum moraliter ea præstare potuerit, si det signa animi parum solliciti de sua æterna salute, si ad Confessionem accesserit potius coactus auctoritate superiorum, quam sua pietate compulsus, ut sunt qui continentur solum in Paschate, quique in Collegiis, & Scholis ad Confessionem accedant iis solis diebus, quibus accedere ex lege tenentur, si concubinam domi suæ aliat, ut cum ea commodius peccet: is siquidem regulariter, nec semel fide dignus censendus est, utcumque promittat se ejecturum eam occasionem; si enim vere eam dimittere vellet, tunc dimisisset, cum proposuit confiteri, & exurgere e peccato suo; unde regulariter non est absolvendus, antequam ejusmodi concubinam domo sua ejiciat: demum si poenitens habeat aliquid alienum restituendum, id potuit restituere sine gravi difficultate, nec restituit, promissit in aliis Confessionibus id se facturum, nec promissis stetit; in tali siquidem casu, ut bene observat Suarez, ejus propositum non potest judicari efficax; quandoquidem convincitur ille esse in magna mora, & posse, & non facere.

81. Notetur autem diligenter, non esse necesse, quod Confessarius sibi per-

persuadeat, pœnitentem non esse relapsurum, ex communi Doctorum; tum quia nulla ratio id persuadet; tum quia vix potest unquam id sibi prudenter persuadere Confessarius, imo nunquam, cum pœnitens habet sola peccata venialia negligentia, iracundia, & similia: debet tamen Confessarius spem aliquam emendationis concipere, ex Viva. Hinc damnata est ab Innocentio XI. hæc propositio num. 60. *Pœnitenti habenti consuetudinem peccandi contra legem Dei, naturæ, aut Ecclesiæ, etsi emendationis spes nulla appareat, nec est neganda, nec differenda Absolutio, dummodo ore proferat, & proponere emendationem.* Hæc vero spes futuræ emendationis non tollitur in Confessario per vehementem timorem de relapsu; quia talis timor nihil aliud est, quam iudicium modale enuncians relapsum pœnitentis, non quidem absolute sic, *iste relabatur*, sed cum hoc, vel simili modo, *fortasse iste relabatur*: hoc autem iudicium modale, quamvis solido conceptum fundamento, non opponitur cum hoc altero iudicio directo enunciante sic, *iste emendabitur*, in quo consistit spes; siquidem illud iudicium modale solum negat certitudinem reflexam huius iudicii directi, *iste se emendabit*; & in sensu composito affirmandi emendationem futuram, potest optime stare negatio certitudinis reflexæ quo ad talem emendationem: unde timor non futuræ emendationis potest optime stare cum spe, licet non maxima, futuræ emendationis.

82. Efformato a Confessario iudicio prudenti de dispositione pœnitentis, quod diximus esse tertiam ejusdem obligationem, quatenus iudex est, debet ipse, ut aiebat supra posita propositio, iuncta salutari pœnitentia proportionata, & servatis servandis, pœnitentem absolvere, vel Absolutionem differre respective. Cum vero de Absolutione danda, aut differenda, de Satisfactione injungenda &c. satis dixerimus in alia Parte de Sacramento Confessionis, solum hic quo ad Satisfactionem insinuamus Confessariis observandum illud Paludani *dist. 20. quest. 2. art. 1.* nempe: *Nunquam debet imponere pœnitentiam, nisi quam credat quod ille velit, & possit facere; alias ponit laqueum, & non antidotum, sed venenum: propter quod non tantam imponat, quam ille desperans totam dimittat, sive propter debilitatem bonæ voluntatis, sive corporis: parvus enim ignis, & scintilla una, non est overanda multis lignis, sed paulatim fovenda, ne extinguatur.* Siquidem, ut optime notat Gerson citatus a Layman *cap. 15. num. 11.* tutius est cum parva pœnitentia, quæ sponte suscipitur, & verosimiliter impletur, mittere confessos ad Purgatorium, quam cum magna pœnitentia non implenda ad Infernum. Pro praxi etiam visum est insinuare pœnitentiam imponendam injusto homicidæ, juxta id quod scripsit Paulus Comitulus in *resp. mor. l. 4. q. 11. n. 8.* non quidem ut ea omnino, & non alia, imponenda sit, sed ut prudenti Confessario exemplar aliquod proponatur. Igitur citatus Auctor ait: *Homicidii pœnitentia salutaris esset veniam petere ab occisi propinquis, iisdem omnia damna resarcire, pro anima occisi per annum tria præstare: 1. singulis hebdomadis unam Missam curare celebrandam, aliquam elemosynam juxta homicidæ facultates pauperibus erogare, Litanias, vel Rosarium Virginis percurrere.*

II. præ

II. *præterea per eundem annum semel in hebdomada confiteri, semel in mensa communicare*: III. *semper tota vita quotidie unum Pater & Ave genibus flexis pro eadem anima occisi recitare*. Hæc ille.

83. Demum explicando illam clausulam, *servatis servandis*, dicimus; dandam esse operam a Confessario, ut ante, & inter absolvendum servetur debita intentio; ordo, ritus, attentio, & repetitio formulæ, si necessitas exigat; nequaquam vero, si talem repetitionem necessitas non exigat. Ac proinde *Intentio* debet esse vel actualis, vel virtualis, faciendi quod Christus instituit, uti supra innuimus. Ordo autem consistit in hoc, ut Absolutio censurarum præmittatur Absolutioni a peccatis; nam poenitens vel habet censuram excommunicationis majoris, vel censuram suspensionis, aut interdicti: Si primam, peccat Confessarius mortaliter, non præmittens Absolutionem ab hac Absolutioni a peccatis, ex Suarez de cens. disp. 10. sect. 2. Si secundam, rectius faciet Confessarius, absolvendo prius a suspensione &c. quam a peccatis; non tamen ullum peccatum. saltem grave admittit, prius absolvendo a peccatis, ac deinde a suspensione &c. ex Gobato, aliisque. Quod si Confessarius oblitus fuerit præmittere Absolutionem ab excommunicatione, teneatur (si præditus sit ea potestate) illam dare, & subscicere Absolutioni a peccatis; non autem in tali casu tenetur repetere Absolutionem a peccatis & excommunicatio quippe non officit Absolutioni a peccatis, nisi quatenus excommunicatus recipit hanc in affectu peccati mortalis, ex Suarez de Pen. disp. 31. non est autem poenitens in affectu peccati mortalis, quando ignarus; se nondum esse restitutum communioni Ecclesiæ, petit, recipitque Absolutionem a peccatis. Atque hic notamus, plerumque in ordinariis Confessionibus sine culpa omitti Absolutionem a censuris ex eo, quod reflectendo ad conditiones necessarias incurrendæ re ipsa censuræ, rarissime a personis præsertim secularibus, & plebejis illæ incurrantur. In casu tamen, quo poenitens eam incurrerit, & consequenter præmittenda sit ejus Absolutio, tunc, quando hæc Absolutio datur pro solo foro interno, sufficere proferre ea verba: *Absolvo te a vinculo excommunicationis &c.* ex Rituali Romano; quando vero absolvendus est quis pro foro quoque externo, dicendum erit: *Dominus noster Jesus Christus, & ego auctoritate ipsius, & sanctissimi Domini nostri Papæ, vel Reverendissimi Domini Episcopi mihi concessa &c.* prout extat in Rituali Romano sub tit. de Sacr. Pen. & si quidem excommunicatio major absolvenda fuerit, præmittenda erit satisfactio parti læsæ, vel transactio cum eadem, ex Cap. 2. de sent. excomm. in 6. Porro hæc satisfactio consistit in eo, quod præferatur id, quod exigit iustitia propter injuriam illatam, & in quantum fieri potest, servato juris ordine. Imo, si excommunicatio absolvenda incurra fuerit ob valde grave delictum, v. g. ob incendium, gravemque Clerici percussionem, necessario sub gravi culpa exigendum erit a poenitente juramentum de parendo mandatis Ecclesiæ, id est de abstinendo in posterum ab ejusmodi crimine: quod juramentum, ut docet cum Avila, Coniuchio, aliisque Castropalaus de cens. disp. 1. p. 7. non est ex obligatione exigendum in Absolutione excommunicationis, alteriusque censuræ incurræ ob delicta leviora.

84. *Ritus*. In absolvendo unusquisque recte procedet, inquit Gobatus, coram Deo, & hominibus, si observet morem notorium, & universalem suæ diocesis: unde sicuti defectu capite Absolutionem dandam consuetudo rite præscribit alicubi, ita alibi peccati non damnandus, qui sine scandalo Absolutionem impertit testo capite: curandum tamen quamaxime est, ut Ritualis Romani præscripto Confessarius quilibet se accomodet.

85. *Attentio*. In proferenda Absolutione Confessarium voluntarie distractum, etsi non improbabiler excusent multi graves Auctores a peccato mortali, dummodo ille propter habitum proferendi ea verba sine defectu essentiali securus sit non errandi, non excusamus tamen a gravissimo peccato veniali.

86. *Repetitio formula*. Hæc siquidem facienda est, quoties rationabiliter dubitat Confessarius, utrum eam protulerit, necne? sub conditione tamen vel verbis, vel mente expressa, ex satis communi Doctorum. Hæc vero obligatio est sub gravi, si Confessio facta fuerit de mortalibus: non videtur tamen sub tanto onere, si Confessio fuerit de venialibus, aut mortalibus alias rite confessis. Dixi, quoties rationabiliter dubitat; nam sine dubio rationabili circa existentiam, aut valorem Absolutionis, est ex suo genere peccatum grave illam repetere respectu eorundem omnino peccatorum in eadem Confessione: quæ assertio procedit etiam loquendo de Absolutione repetita sub conditione. Excusantur vero nonnulli in repetendo, ex eo quod non apprehendant vanitatem, & irrationabilitatem sui dubii, aut potius scrupuli: quæ sane irrationabilitas habetur, ut observat Gobatus, quando quis dubitat præcise ex eo, quod Absolutionem protulerit voluntarie, involuntarieve distractus, dummodo habitualiter sit solitus omnia essentialia proferre. Item contemnendum censemus scrupulum, quo aliquando quis angitur, ex eo quod, quando absolvit, nec confuse recordatur peccatorum, nec poenitentiae impositæ; siquidem tunc non est necessaria talis memoria, sed satis est recordari, poenitentem esse confessum, & latum esse de eo iudicium: at vero talis memoria, seu notitia status poenitentis, saltem in confuso, erat necessaria ante impositionem poenitentiae. Dixi, saltem in confuso; quia non est opus habere tunc distinctam memoriam omnium auditorum. Notitia autem in confuso necessaria & sufficiens, stat in eo, ut Confessarius saltem meminerit, plura diversæ speciei mortalia esse dicta, eaque in numero satis frequenti &c. ex la Croix num. 1717. Quod si contingat, ut poenitens post impertitam Absolutionem superaddat peccatum oblitum, tunc vel tale peccatum est certo, aut probabiliter, aut sub dubio mortale, vel est solum veniale? Si primum, repetenda est ex obligatione Absolutio, solum dicendo: *Absolve te a peccatis tuis &c.* Si secundum, licite quidem repeti potest Absolutio, ac probabiliter non semper necessario id fieri debet; quia non videtur esse semper intentionem poenitentis velle ad id obligare Confessarium, adeoque per omissionem Absolutionis in tali casu, nec illi, nec Sacramento fiet injuria: imo, fortasse non improbabiler, cum Sporerio docet la Croix num. 644. non solum id semper necessario faciendum non esse, sed nunquam faciendum esse; cum enim talis Absolutio necessaria non sit, videtur esse quædam irreverentia eam

Tom. III.

S

repe.

repetere : quæ quidem sententia ad praxim reducenda erit relate ad scrupulosos, aliquid semper novi, nec, necessarij, superaddentes post habitam Absolutionem.

§. II.

De Confessario ut doctore.

87. **C**onfessarius ut doctor tenetur I. ipse scire : II. pœnitentes docere : III. prudenter docere. Ac primo tenetur ipse scire ; nam, ut bene ait S. Bernardus *serm.* 18. *in Cant.* debet prius ipse impleri, & sic deinde effundere : quæ autem scire debeat, & sub qua obligatione, supra jam diximus *num.* 58. Cum vero scientia tum de peccatis in genere, tum de peccatis habentibus onus restituendi, vel denunciandi, tum de peccatis habentibus reservationem vel secundum se, vel ratione censuræ, sit valde necessaria, hinc breviter de his aliquid huic paragrapho adscribimus ; ac proinde dicimus

88. I. Peccatum in genere est *exercitium positivum, vel negativum libertatis contra legem positam agenti rationali*. Clarius : *est dictum, factum, vel concupitum contra legem Dei æternam*. Ita S. Thomas post S. Augustinum. Qua definitione etiam implicite describitur peccatum omissionis ; quia sub dicto comprehenditur non dictum ; sub facto non factum &c. Aliud est mortale, aliud est veniale : quæ duo in hoc differunt inter se, quod veniale leviter adversatur legi æternæ Dei, ac proinde pœnam æternam non meretur ; mortale graviter adversatur, ac proinde pœnas æternas inferni meretur. Utrumque tam mortale, quam veniale, dividitur in mortale, vel veniale ex genere suo, & in mortale, vel veniale per accidens. Mortale ex genere suo dicitur communiter ab Auctoribus id, quod graviter lædit charitatem Dei, vel proximi, vel sui ipsius : at, cum id ipsum inquiratur, quidnam sit graviter ex se lædens charitatem, propterea admittentes datam descriptionem ut veram quidem, sed tamen ut insufficientem, asserimus, mortale ex genere suo esse illud, quod semper est mortale manens intra suam speciem, v. g. furtum, nisi vel ex indeliberatione, vel materiæ levitate excusetur : veniale autem ex genere suo est illud, quod non potest fieri mortale, nisi addatur circumstantia mutans speciem, v. g. mendacium. Hinc mortale per accidens est, quando veniale transit in mortale ratione circumstantiæ adiunctæ, mutantis speciem : hæc vero circumstantia quintuplex enumeratur à Sylvestro, nempe circumstantia finis, scandali, contemptus, periculi, conscientiæ erroneæ, aut paratæ ad transgrediendum præceptum grave. Veniale per accidens est, quando mortale ex genere transit in veniale : hoc autem fit duobus modis, nempe ex indeliberatione, & ex parvitate materiæ, modo in eo genere peccati reperiatur parvitas (nam in odio Dei, infidelitate, perjurio, simonia, fractione sigilli sacramentalis, & re venerea, non datur parvitas). Dixi, ex indeliberatione, quæ provenire potest ex intellectu, & ex voluntate : nam ad peccandum graviter requiritur ex parte intellectus

I. quod

I. quod intellectus advertat malitiam moralem vel in actu, vel objecto, vel circumstantiis: II. quod ea advertentia sit in signo priori ad actum voluntatis, quamvis non semper sit causa physica, vel moralis illius: III. quod talis advertentia sit plena, & perfecta; quia peccatum mortale amicitiam Divinam cum dissolvat, & hominem æternis cruciatibus destinet, æquum non est, ob actum semiplena advertentia factum, hominem ita puniri, ex Sanchez l. 1. in Decal. aliisque. Hæc autem semiplena advertentia contingit, vel quando homo est semipositus, semiebrius &c. vel quando homo licet sit compos sui, tamen sive ob distractionem, quia alia objecta simul cogitat, sive ob repentinam, & vehementem impressionem appetitus agnoscit revera malitiam gravem, sed obscure valde, & quasi rem valde distantem, ex Ulloa disp. 4. de Anima num. 20. Item requiritur ex parte voluntatis, quod voluntas amplectatur objectum malum toto, ut ita dicam, actu, & non subreptione quadam, adeoque imperfecte, uti fere accidit in motibus primo primis, & secundo primis. Quamvis vero nunquam certo exploratum esse possit, fueritne hic & nunc, vel non fuerit plena advertentia, tamen conjectura valde efficax habebitur ex communiter contingentibus, quod non fuerit, vel quod fuerit respective. Hinc, si aliquis sit timoratus conscientie, peccatumque mortale communiter abhorreat, & evitet, præsumendus est non plene deliberate consensisse, quando ipse de consensu dubitat: secus autem dicendum, si aliquis sit perditis moribus, ex Sanchez, Castropalao, Bonacina, aliisque. Dixi etiam, ex parvitate materie. Parvitas vero, vel gravitas desumenda est ex triplici capite: I. ex re ipsa in se absolute spectata: II. ex comparatione ad totum: III. ex relatione ad finem, propter quem res præcipitur: cum hoc tamen discrimine, quod, quamvis primum, & secundum caput, aliæque circumstantiæ attendendæ sint, tamen ex tertio capite tota hæc conjectura principaliter desumi debet, ex Sanchez, Castropalao, Tamburino, aliisque. Exemplum habes ex Tamburino. Labor v.g. in die festo potest considerari I. an ex se absolute spectatus, sit modicum quid, vel magnum, non excedendo unam horam: II. an sit tale, comparatus cum labore totius diei: III. an sit tale, ut relatus ad finem vacandi Deo: scilicet an multum, vel parum noceat cultui Divino labor unius horæ: & his consideratis, judicanda est parvitas, vel gravitas; & in casu dubio, an graviter res conducatur ad finem, gravisque sit finis, præsumendum est, & esse finem gravem, & graviter ad illam rem conducere, ex Suarez, Castropalao, aliisque. Denum notamus, quod peccatum est numero unicum, si per unicum duret instans, & unico adversetur præcepto, & in unicum feratur objectum, ex Ulloa in Tract. de act. hum. Est vero numero multiplex, si per multa duret instantia: ex hoc tamen capite non multiplicantur peccata in ordine ad Confessionem, nisi detur interruptio moralis, consistens in eo, quod quis redeat ad idem, postquam voluntarie cessavit, aut efficaciter eum pœnituit peccati, aut talis detur interruptio physica, ut nonnisi nova advertentia & volitione, discernibilibus a prioribus, possit quis redire ad idem; sicuti contingit quando post peccatum quis dormit, & deinde redit ad

peccatum : vel si obiectum materiale sit multiplex, & non ordinatum suapte natura ad unum & idem (ut de actionibus impuris antecedentibus, concomitantibus, & subsequentibus copulam dici solet), sed unumquodque est disparatum respectu alterius. Hinc I. unica actione qui occideret duos homines, duplex peccatum committeret in ordine ad malitiam, & Confessionem, quamvis physice, & materialiter unum solum. Item peccatum est unicum specie, quando uni virtuti, nec eidem diversa ratione opponitur, ut infra : est multiplex specie, seu distinctum specie ab alio, quando opponitur diversæ virtuti, vel quando adeo diversa ratione, & malitia opponitur eidem virtuti, ut, quantum est ex natura, & ratione ejusdem peccati, non sit eadem facilitas, moraliter loquendo, in iis peccatis committendis, & qui propensus est ad unum eorum, non sit, attenta ratione ejus peccati, similiter propensus ad alterum. Hinc furtum, adulterium, homicidium &c. diversificantur specie inter se, quamvis eidem virtuti opponantur. Hinc II. merito ab Alexandro VII. damnata est hæc propositio *num. 24. Mollities, Sodomitia, & Bestialitas sunt peccata ejusdem speciei infimæ, ideoque sufficit dicere in Confessione, se procurasse pollutionem*. Hinc III. notandæ sunt circumstantiæ peccatorum : quarum aliæ sunt minuentes, ut si quis peccavit inductus; aliæ aggravantes intra eandem speciem, ut furtum in magna quantitate; aliæ mutant speciem, & tales sunt, quæ transferunt peccatum ab habendo oppositionem cum una virtute ad habendam oppositionem etiam cum alia, vel cum eadem diversimode, seu extreme, v. g. circumstantia loci sacri, personæ, & similes, quæ comprehenduntur hoc versiculo : *Quis, quid, ubi, quibus auxiliis, cur, quomodo, quando*.

80. Memineris hic, quod nullus metus tollit voluntarium simpliciter, ex S. Thoma, cum communi Theologorum sententia 1. 2. *qu. 6. art. 6.* Unde fit 1. quod, si transgressio legis sit actio intrinsece mala, & ideo prohibita, quia mala, nullus metus excuset a peccato; nam quod est intrinsece malum, nullo casu fieri potest non malum, neque metus tollit totalem circa illud libertatem, adeoque non excusat. Fit 2. quod, si transgressio legis sit contra bonum commune, metus damni particularis non excusat; quia stat simpliciter libertas, & bonum commune prævalere debet particulari. Fit 3. quod, si transgressio legis non sit intrinsece mala, neque præjudicet bono communi, metus damni gravis excusare possit; quia, licet stet libertas, tamen legislator non censetur velle obligare cum tanto incommodo, ex la Croix *hic*.

90. Dicimus II. Peccata habentia annexum onus restituendi, ut plurimum sunt illa, quæ sunt contra iustitiam commutativam : inter quæ communiora sunt tria : 1. iniustitia circa bona externa per furtum, & rapinam : 2. iniustitia circa bona corporis, ut vitam, & membra, per homicidium, & mutilationem : 3. circa bonum famæ per detractionem. Restitutio autem late, & stricte accipi potest. Late sumpta, est quælibet redditio, solutio, & satisfactio : stricte sumpta, est redditio illius, quod per læsionem vel formaliter, vel saltem materialiter injustam, ablatum est. Obligatio restitutionis nascitur

ex

ex duplici capite ; nempe ex re accepta , & ex injusta acceptione : quibus duplex diversa obligatio restitutionis correspondet : altera restituendi suo domino rem per actionem tantum materialiter injustam acceptam , vel retentam ; altera compensandi omne damnum , quod per actionem formaliter injustam proximo causatum est . Qui tenetur restituere ex re accepta , debet restituere suo domino rem ipsam vel in re , si ea adhuc extat , vel , si ea non extet , in eo , in quo ipse ejus causa factus fuit locupletior : si vero nec vel res amplius existit , nec ex illa reperitur factus locupletior , nihil restituere tenetur ; non enim debet de proprio jure quidquam detrahere , ut jus alienum sine sua culpa læsum in integrum restituat . Qui autem tenetur restituere ex injusta acceptione , debet restituere rem ipsam , in qua proximum damnificavit , vel in se , si adhuc extat , vel in ejusdem justo pretio ; item ejusdem rei fructus , non quidem mere industriales , sed naturales , aut mixtos , detractis expensis , vel in se , si existunt , vel eorumdem pretium ; item lucrum cessans , vel damnum emergens , quod dominus ex carentia suæ rei , & fructuum passus fuit . Quicumque porro adstrictus est onere restitutionis , sive ex re accepta , sive ex injusta acceptione , tenetur restitutionem statim facere . Illud tamen statim , non debet sumi mathematicè , sed moraliter ; ita ut statim commodam quis restituendi opportunitatem sine dolo , aut fraude quærat , aut oblatam non respuat : & quidem restitutio , per se loquendo , illi facienda est , cui damnum fuit illatum , vel illi , ad quem creditum talis restitutionis de jure devenit . Quia vero sæpe contingit , ut rei alienæ verus dominus ignoretur , in tali casu vel res est debita ex delicto , v.g. furto , vel potius ex contractu , aut ex inventione fortuita ? Si primum , restitutio faciendam est pauperibus in ipsius domini spiritualem utilitatem , ex *Cap. Cum tu &c. de usuris* . Si secundum , probabile censemus cum Filliuccio *trac. 32. num. 99.* faciendam esse diligentem inquisitionem pro rei qualitate , ut dominus reperitur , qui si , facta ea diligentia , non reperitur , nec supersit probabilis spes illum aliquando reperiendi , posse eam rem a possessore retineri , eamque in proprios usus converti .

91. Causæ excusantes a restitutione diversimode numerantur ab Auctoribus , & ab aliis plures , ab aliis assignantur pauciores . Breviter dico , alias esse causas , quæ omnino tollunt obligationem restitutionis , alias vero esse causas , quæ solum suspendunt ipsam obligationem restitutionis , ita ut restitutio ipsa differri licite possit , donec hujusmodi causæ removeantur . Et quidem primi generis sunt quatuor , nempe remissio debiti , compositio , compensatio , & legitima præscriptio . Secundi generis sunt tres : videlicet 1. impotentia , & quidem non solum physica , sed etiam moralis : 2. grave damnum , quod ex restitutione obvenire debet debitori : 3. damnum , quod ex ipsa restitutione secuturum prævidetur aut ipsi creditori . aut tertiæ alicui personæ . Circa causas primi generis notes , quod remissio non solum expressa , sed etiam tacita , quæ habetur , quando prudenter judicari potest , ac præsumi , partem læsam pro damno accepto nullam reparationem , aut restitutionem curare , sufficienter eximit debitorem ab obligatione restitutionis ,

ex

ex Sanchez in *Conf. l. 1. cap. 4. dub. 6. Molina tom. 3. disp. 68. Card. de Lugo disp. 21. de iust. sess. 4.* debet autem adesse triplex circumstantia, ad hoc ut remissio sive expressa, sive tacita excuset. 1. Debet esse libera, non per metum, aut fraudem extorta. 2. Debet esse ab eo, qui potest condonare. 3. Non debet fieri in casibus a jure exceptis, qui tres sunt: primus nempe, quando Episcopus in visitatione reciperet aliquid ultra sumptus nece sarios ad victum, *Cap. Exigit, de cens. secundus*, quando iudex delegatus aliquid reciperet a partibus præter esculenta, & poculenta, *Cap. Statutum §. Insuper, de rescr. in 6. tertius*, quando Inquisitores prætextu officii pecunias extorserint, ex *Clementin. de hæreticis in 6.* His accessit ex Tridentino *sess. 24. cap. 12. de reform.* casus de Canonicis, qui non adsunt Choro, & accipiunt distributiones. In his siquidem omnibus enumeratis circumstantiis non excusat remissio creditoris. Circa causas secundi generis notes, quod damnum grave, imminens debitori ex restitutione, esse potest vel in bonis ordinis superioris, ut famæ, vitæ, animæ, vel in ipsis bonis fortunæ: si sit in bonis ordinis superioris, valet regula tradita a Layman *cap. 12. num. 2.* nempe: *Bonum inferioris ordinis restituendum non est cum detrimento boni superioris in suo genere æque gravis*: si sit in bonis fortunæ, valet regula ex Bonacina *q. ult. p. 1. num. 19.* scilicet: *Debitor non potest differre restitutionem, quando damnum, quod patitur restituendo, est æquale damno, quod patitur creditor ex dilatione restitutionis.* In pari enim causa melior debet esse conditio creditoris innocentis.

92. Hæc quidem in genere de restitutione. In particulari vero dicimus I. pro facto homicidio, si occisus ante mortem non remisit, nec ipse occisus provocaverit v.g. ad duellum, vel fuerit aggressor, & homicida non excesserit fines inculpatæ tutelæ, teneri homicidam restituere expensas factas in curatione vulneris ante mortem; deinde teneri refarcire quantum utilitatis erat hæredibus (iis tamen, qui censentur una persona cum defuncto, ut parentes, filii, uxor, non autem alii) allatura vita occisi juxta moralem æstimationem faciendam a prudenti viro, detractis tamen expensis, quas ipse occisus consumpsisset in victu & vestitu. II. pro mutilatione teneri mutilatorem 1. ad expensas in curatione vulneris: 2. ad æstimationem spei illius lucris, quod mutilatus facere poterat detractis expensis: 3. ad æstimationem damni, quod ex hoc secutum fuit. III. pro stupro, si virgo libere consensit, stupratorem ad nihil teneri, juxta probabilem sententiam: si vi, fraude, aut dolo stuprator virginem ad peccatum induxit, teneri primo ad conjugium, si illud promissit; secundo ad reparationem damni ex stupro, quantum æstimabitur arbitrio boni viri; tertio ad dotem, si iudex ad id eum condemnaverit: ubi censemus, quod si virgo consensit sub promissione matrimonii, non potest juste, ipsa invita, refarciri tale damnum alia via æquivalenti, sed debet refarciri per matrimonium, quia mulier decepta acquisivit jus ad matrimonium, ex S. Thoma in 4. *sent. dist. 47. quest. unic.* IV. pro fama, asserimus, quod qui per detractionem fuit alteri causâ infamiæ, tenetur ad restitutionem famæ, quoties infamia non fuerit deleta, nec condonata, nec compensata, & ipse potest

potest talem restitutionem facere citra suum damnum majus. Detractio vero debet esse contra justitiam, ut talem obligationem pariat: est autem contra justitiam, quando violatur jus proximi ad famam, fundatum in eo, quod ejus defectus narratus a detractore, vel non sit verus, vel sit occultus: cum hac tamen differentia, quod carentia defectus dat proximo jus absolutum, & universale, ne infametur; occultitas vero dat proximo jus, ne infametur absque necessitate, qualis certe datur, ut consilium, vel auxilium capias a viro prudenti, dummodo cum minimo peccatoris damno id fiat; item ut impedias majus damnum communitatis, vel private personæ, vel ipsius peccatoris, & in aliis hujusmodi casibus videndis apud Layman l. 3. tract. 3. part. 2. cap. 3. Deficiente autem utroque titulo, nullum habet proximus jus, ne infametur: unde qui secus fecerit, peccabit fortasse aliquando contra charitatem, non autem contra justitiam; & consequenter ad restitutionem non tenebitur. Restitutio famæ in casu, quo est facienda, sic fieri debet. I. Ut qui crimen falsum alicui scienter, vel per errorem imposuit, id ipsum retractet aperte apud eos, quibus dixerat, & ad quos criminis infamia pervenit, ex Layman *ibidem*; quamvis qui per errorem, & bona fide alterum ita læsit in fama, non tam stricte ad id teneatur, sicuti qui scienter, & culpabiliter id fecit. II. Ut qui crimen verum occultum injuste prodidit, aboleat conceptam apud audientes criminis opinionem, quatenus fieri potest sine mendacio, dicendo v. g. se male dixisse, injuriam intulisse, deceptum fuisse &c. siquidem in omni peccato vere est deceptio. Et, si hoc non sufficiat ad resarciendum damnum, tenebitur detractor aliam infamato æquivalentem famæ compensationem facere, ut docet Layman *loc. cit. contra Lessium*.

93. Dicimus III. Peccata habentia annexum onus denunciationis, sunt plebæque, quæ sunt contra Fidem, & Religionem. Hinc I. quilibet sive mas, sive mulier, sive secularis, sive Monialis, aut alius quicumque Regularis, cuiuscumque gradus, & dignitatis sit, tenetur denunciare hæreticum, aliosque recensitos in Edictis Inquisitorum, & in variis Pontificum Bullis, sub pœna excommunicationis lætæ sententiæ, etiamsi ipse id probare non possit, ex decreto Alexandri VII. damnante hanc propositionem num. 5. *Quamvis evidenter tibi constet, Petrum esse hæreticum, non teneris denunciare, si probare non possis*: dummodo tamen ipse sciat, aliquem esse hæreticum, vel denunciandis criminibus obstrictum, aut habeat de hoc indicia sufficientia. Nomine autem denunciandorum per Bullas, & Edicta, memineris, non solum venire hæreticos, sed etiam de hæresi quomodocumque etiam leviter suspectos; ex eodem Alexandri decreto; item venire superstitiosos. Ad hoc autem, ut superstitio onus denunciationis pariat, duo requirit: 1. ut adit expressa, vel tacita dæmonis invocatio: 2. quod sit mortaliter peccaminosa, ex Lupo part. 3. lib. 15. art. 4. apud Felicem Potestatem. Hæc porro denunciatio facienda est vel Episcopis, vel Inquisitoribus, intra spatium unius mensis, qui incipit a die scientiæ delicti; & quidem etiamsi sciens delinquentem non corripuerit, vel emendatum cognoverit, vel inde timeat sibi grave malum, vel etiamsi ipsum non denunciare juraverit, ex Bonacina *loc. cit.*

94. Hinc II. quilibet, prout supra, tenetur ipsam denunciare Sacerdotem

tem sollicitantem, dummodo sollicitatio fuerit in Confessione; aut in Confessionario cum simulatione Confessionis, vel etiam sine tali simulatione, ut probabilius docet Diana *part. 1. tract. 4. res. 18.* cum aliis, contra Castro-palum, Lezzanam, aliosque: & in casu quo sollicitatio sit extra Confessionem, & Confessionarium; dummodo addit Confessionis prætexus, vel occasio, vel simulatio, aut sit immediate ante, vel immediate post auditam Confessionem, ex Bulla Gregorii XV. Nomine autem sollicitationis (quæ sane est peccatum valde grave, & licet non sit reservatum in jure, adeoque possit a quolibet Confessario absolvi, dummodo Ordinarius illud sibi non reservaverit, tamen est tale, ut in eo Qualificatores S. Officii anno 1661. censuerint non dari parvitatem materiz, & insuper reddat Confessionarium sollicitantem suspectum de hæresi), nomine, inquam, sollicitationis venit *quicumque actus, vel locutio turpis, seu venerea, facta a Sacerdote cum alio quocumque sive mare, sive femina, in Confessione, vel Confessionario, cum simulatione Confessionis, vel sine ea, aut extra Confessionem, & Confessionarium, ex prætenu, occasione, vel simulatione Confessionis, aut immediate ante, vel post Confessionem*: unde est denunciandus ex decreto Alexandri VII. Confessarius, qui in sacramentali Confessione tribuit pœnitenti chartam postea legendam, in qua ad venerem incitat, *ex prop. 6. damnata.* Et ex eodem Pontifice *prop. 7.* non est modus evadendi obligationem denunciandæ sollicitationis, si sollicitatus confiteatur cum sollicitante: siquidem hæc obligatio denunciandi sollicitantem, manifestanda est a quolibet Confessario suo pœnitenti sollicitato, etiam si ab ipsomet sollicitatus fuerit; ita ut excommunicationem incurreret ille Confessarius, qui pœnitentem absolveret, absque eo quod onus denunciandi illi significaret, *ex Bulla Gregorii XV. §. Quod si hoc officium &c.* imo ex edicto supremæ Inquisitionis tenentur Episcopi injungere Confessariis observationem Bullæ Gregorianæ, quando eos primo approbant: quo ad Confessarios vero jam alias approbatos relinquitur arbitrio Episcopi facere hujusmodi intimationem. Si vero contingeret, ut pœnitens admonitus de sua obligatione, nollet eam exequi, non esset absolvendus, utpote indispositus; esset admonendus de excommunicatione incurrenda propter transgressionem præcepti tam gravis, & de peccato, quod toties committet, quoties potens denunciationem negligat: quibus monitionibus si obsurdescat, recurrendum erit ex charitate ad Episcopum, vel Inquisitorem, vel ad ipsam Sanctam Sedem pro opportuno remedio ejus animæ, servatis servandis. Videndus hic erit Pignatelli *tom. 1. conf. 104.* dans instructionem Confessariis pro recipiendis Monialium denunciationibus, siquando occurreret, ut id minus illis committeretur ab Inquisitoribus, vel a supremâ Inquisitione. Videndus etiam Bened. XIV. in novissima Constitutione, quæ incipit: *Sacramentum Pœnitentis*: adversus Confessarios sollicitantes, *tom. 1. ejus Bull. pag. 50.*

95. Quoniam vero supra diximus, scienda a Confessario peccata habentia annexam censuram, hæc in jure sunt plura, videnda apud Toletum *lib. 1. Summ.* Ex his vero potissimum scienda sunt a Confessario, tum quæ continentur in Bulla Cœnz Domini, tum quæ in decreto Clementis VIII. tum quæ in *Can. Si quis suadente &c. 17. quest. 4.*

96. In Bulla Cœnæ, quæ est decretum quoddam, quod Papa omni anno in die Cœnæ Domini renovat, & ex declaratione S. Pii V. antiquum durat usque ad promulgationem novi, habent annexam censuram reservatam Pontifici viginti casus, omnino videndi infra, vel apud citatum Toletum: qui casus hoc habent peculiare: 1. ut, si in Jubilæo, aut alias tradatur alicui facultas absolviendi a casibus reservatis Sedi Apostolicæ, non intelligatur data facultas ad hujusmodi casus Bullæ Cœnæ, nisi exprimentur: 2. ut neque ipsi Episcopi possint suos subditos ab his absolvere, etiam quando tales casus sunt occulti, ex decreto Alexandri VII. quod pariter ex Viva intelligendum est de Prelatis Regularibus relate ad suos subditos, qui certe ex *propositione* 4. *damnata ab Alexandro VII.* non possunt in foro conscientie absolvere quoscumque seculares ab hæresi occulta, & ab excommunicatione propter ipsam incurra: 3. ut hujusmodi casus sint Papæ reservati propter excommunicationem annexam; unde non incurrit in his casibus reservationem, qui non incurrit censuram annexam, ex Sanchez in *Dec. l. 2. c. 8. 4.* ut quilibet Confessarius teneatur sub gravi, ex præcepto S. Pii V. & Urbani VIII. transumptum hujus Bullæ apud se habere: quamvis, ex Mendo, sufficiat Religiosis, si transcriptum sit fixum in loco publico monasterii; & Sacerdotibus secularibus, si habeant aliquem Auctorem, qui eos casus recenset: 5. demum ut qui sine speciali facultate absolveret ab his casibus, incideret in excommunicationem non reservatam; qui vero absolveret ab his prætextu privilegiorum, incideret in excommunicationem Papæ reservatam, ex decreto Clementis VIII. ut infra *Part. 3.*

97. In decreto Clementis VIII. edito die 9. *Januarii ann. 1601.* & per eundem Pontificem moderato 26. *Novembris 1602.* continentur, & reservantur Papæ intra Italiam extra Urbem subsequentes casus: 1. violatio clausuræ Monialium ad malum finem: 2. injicientes violentas manus in Clericum: 3. simonia realis scienter contracta: 4. confidentia beneficalis: 5. provocantes, & pugnantes in duello: 6. violatio immunitatis Ecclesiasticæ circa confugientes ad Ecclesias. Hi autem casus id habent peculiare, ut qui intra Italiam extra Urbem ab his absolveret prætextu privilegiorum &c. incideret in excommunicationem reservatam Papæ. Dixi, intra Italiam extra Urbem; nam sic statuerat decretum Clementis VIII. nunc vero ulterius attendendum ex decreto Clementis XI. edito anno 1711. non posse ab illo Sacerdote non habente specialem facultatem absolvi in Urbe extra articulum mortis hos casus, nempe 1. casum publicum violatæ clausuræ Monialium ad malum finem: 2. Presbytericidium publicum: 3. casum publicum violatæ immunitatis Ecclesiasticæ in terminis Constitutionis Gregorii XIV. *Cum alias*, & etiam occultum, si violatio secuta fuerit auctoritate publica.

98. In Canone *Si quis suadente &c.* continetur excommunicatio lata contra Clerici percussorem: pro qua sciendum 1. quod, si percussio fuit levis simpliciter in omni ratione tum percussoris, tum injuriæ, non incurritur talis excommunicatio, ex Layman: 2. si percussio fuit levis solum comparative ad percussorem gravem, vel enormem, aut fuit levis in ratione per-

Tom. III.

T

cussio

cussionis, non autem in ratione injuriæ, incurritur ea excommunicatio, nec potest ea a simplici Sacerdote Confessario absolvi; nam ex triplici genere percussio, levis, gravis, enormis, enormis semper reservata est Sedi Apostolicæ; gravis reservata est etiam eidem Sedi, exceptis aliquibus casibus videndis apud eundem Layman; levis, nempe comparative ad gravem &c. licet in jure reservata sit eidem Sedi, permixtum tamen est, ut absolvetur ab Episcopo, ex *Cap. Pervenit &c. de sent. excomm.*

99. His prælatis, altera obligatio Confessarii, ut doctoris, est docere pœnitentes tum quo ad ea, quæ spectant ad credere, tum quo ad ea, quæ spectant ad operari. Et primo quidem meminisse debet, damnatam esse ab Innocentio XI. hanc propositionem *num. 64. Absolutionis capax est homo, quantumvis laboret ignorantia mysteriorum Fidei, & etiam per negligentiam etiam culpabilem nesciat mysterium SS. Trinitatis, & Incarnationis Domini Nostri Jesu Christi*: ex qua damnatione infertur, graviter peccare eum Confessarium, qui advertenter absolvet pœnitentem nescientem sive culpabiliter, sive inculpabiliter, omnia mysteria Fidei, & qui etiam absolvet pœnitentem nescientem culpabiliter mysteria Trinitatis, & Incarnationis. Unde quilibet Confessarius tenetur interrogare pœnitentem de articulis Fidei saltem principalioribus, quoties præsumit, ab eo nesciri (quæ sane præsumptio non ita frequenter cadit in urbanos, & cultos, frequenter tamen in rudes, & pueros): & si per interrogationem reperiet, eum nescire, quæ scire tenetur, debet illum instruere ante Absolutionem, vel rejicere, donec ea didicerit, ex Bonacina. Quod si nec tempus suppetat eum instruendi, neo expediat rejicere, tunc illum instruat quo ad ea, quæ explicite credenda sunt de necessitate mediæ, nempe Deum esse, & remuneratorem esse, unum, & trinum esse, & hominem factum esse: nam probabilius est, etiam mysteria Trinitatis, & Incarnationis credenda esse explicite de necessitate mediæ: imo probabile est, saltem ex fundamento extrinseco Sanchez, aliorumque, eadem necessitate credenda esse explicite mysteria Nativitatis Christi, Passionis, Mortis, & Resurrectionis: unde hujus etiam sententiæ habenda est ratio a Confessario: deinde vero quo ad alia mysteria satis erit, ut pœnitens promittat, ac proponat ea discere quamprimum, & interim debeat de præterita negligentia, culpaque admixta in iis non addiscendis. Hujusmodi autem mysteria, sunt cætera omnia, quæ in Apostolico Symbolo continentur: hæc siquidem probabilius, ex Castropalao, Conincho, aliisque, explicite credenda sunt de præcepto, non vero de necessitate mediæ. Quod si fingatur casus, pœnitentem ita esse rudem, hebetem, & incultum, ut nullis prorsus etiam sæpius repetitis explicationibus aliquam de his mysteriis propriam notionem formare queat, tunc ille talis erit, saltem in articulo mortis, absolvendus sub conditione; quia, ut bene notat Tannerus apud Gobatum *trakt. 7. cap. 7. num. 311.* qui sunt adeo hebeti ingenio, sunt quo ad hanc rem annumerandi fatuis, & infantibus: non enim credibile est, quod Deus a quoquam exigat majorem horum mysteriorum notitiam, quam per vim intellectus consequi potest: pueri autem, & perpetuo fatui, possunt sine fide actuali

actuali justificari. Verum hic casus videtur ferme metaphysicus; nam difficilimum est, & vix continget, ut homo, sui compos, Dei adjuvante gratia; & adhibita proportionata diligentia, nequeat percipere juxta suam obligationem, & credere, prout oportet, hæc mytheria: siquidem scientia horum mytheriorum ea est requisita, & sufficiens, qua cognoscuntur hæc mytheria secundum eorum substantiam, & quantum ex verbis Symboli sic propositi eadem percipi possunt: v. g. de mytherio Trinitatis sufficit Fideli, ut tali, si sciatur, & credat, esse tres Personæ inter se distinctas, quarum quælibet sit Deus, nec obinde esse plures Deos, sed unum tantum: clarior autem notitia nemini Fideli, quatenus præcise talis est, necessaria est. Ita Castropalaus de Fide disp. 1. p. 11. aliique.

100. Quo ad operari instruendus etiam pœnitens a Confessario; quia ipse vel est Pastor, vel tenet locum Pastoris ex ejus delegatione: ad Pastorem autem pertinet docere subditos, quæ necessaria sunt ad servandam legem Dei. Propterea duplex in pœnitente ignorantia esse cum possit, altera vincibilis, altera invincibilis; vincibilis autem sit, quæ libere habetur, nempe quia homo potuit scire veritatem, advertit obligationem sciendi, & noluit, adeoque ipsa non excusat a peccato; invincibilis vero sit, quæ non habetur libere, nempe quia homo vel non habet modum assequendi veritatem alicujus rei, vel, si hunc habet, non tamen illi occurrit dubium, suspicio, aut formido prudens circa talem rem, vel, si occurrat, non tamen circa obligationem inquirendi veritatem rei, adeoque ipsa excusat a peccato: hinc dicendum nobis est 1. Quoties in pœnitente ignorantia est vincibilis, debet ea a Confessario auferri, ex de Lugo, aliisque; quia, ea dum perseverat, pœnitens est indispositus ad Absolutionem, nec per eam ignorantiam vitatur, sed causatur peccatum. 2. Quoties in pœnitente ignorantia est invincibilis, tunc distinguendum est: vel enim talis ignorantia est hic & nunc per accidens proficua pœnitenti, ex eo quod per ejusdem ablationem gravius malum illi eveniret, remedium dandum esset difficillimum &c. vel talis ignorantia non est, neque per accidens proficua pœnitenti. Si hoc secundum, debet ea a Confessario auferri, & sic debent edoceri pœnitentes, per errorem putantes, se graviter peccare, si jentaculum fecerint ante auditionem Missæ, si die Veneris a lactiniis non abstinuerint &c. Si vero illud primum, ea non debet a Confessario auferri, nisi interrogetur, sed dissimulandum illi est, ex de Lugo, Sanchez, Layman, aliisque: & ratio desumitur a S. Augustino homil. 41. inter 50. ubi ait: *Si scirem, tibi non prodesse, te non monerem, non te terrem.* Dixi, nisi interrogetur; nam Confessarius interrogatus tenetur veritatem aperire: licet enim aliquando propter bonum pœnitentis debeat tacere, vel dissimulare, nunquam tamen potest mentiri, aut suo dicto pœnitentem in errore confirmare, ex Suarez disp. 32. sect. 4. de Pœn. confirmaret autem, si pœnitenti interroganti non responderet, nisi taliter se gereret, v. g. fingendo, se non audivisse interrogationem, ut pœnitens remaneret quidem in sua bona fide, non autem Confessarii auctoritate confirmata, ex de Lugo. In casu vero responsionis curandum est Confessario, ut non

plus respondeat, quam a pœnitente interrogetur: v. g. si aliquis obstrictus voto simplici castitatis interroget, an possit reddere debitum, respondeatur *ita*, sed non addatur, eum non posse petere, quando non speratur utilitas.

101. Doctrina in hoc numero tradita triplicem habet limitationem. Limitatur enim 1. quando pœnitentis ignorantia redundat in malum communitatis, vel contra Fidem; tunc enim ignorantia invincibilis auferenda est a pœnitente, etiam cum ejusdem detrimento; quia bonum publicum, & bonum Fidei, præponderat bono privato pœnitentis. Limitatur 2. ut non procedat, quando licet de præsentis mōitio habitura non sit effectum, brevi tamen fructus uberrimus inde derivabitur. Limitatur 3. ut probabiliter non procedat, quando ignorantia pœnitentis invincibilis cedit in damnum tertii: quamvis non minus probabiliter graves Auctores, ut Sanchez, de Lugo *disp. 22. sect. 2.* censeant, procedere etiam in hoc casu, si quidem detur eadem ratio non sperandi profectum, & nocendi pœnitenti. In dubio porro, an edocere pœnitentem, futurum sit illi utile, necne? comparanda est utilitas dubia cum damno dubio, & quod præponderat, praxim instituit: quod si dubitetur de utilitate, nullum autem timeatur damnum, certum est, pœnitentem deberi edoceri, ex de Lugo *loc. cit.*

102. Tertia obligatio Confessarii, ut doctoris, est prudenter docere, idest recte doctrinam supra datam applicare casibus particularibus: pro quo exemplum adduco de Matrimonio. Si aliquis pœnitens ignoret invincibiliter, se habere impedimentum dirimens, tunc vel agitur de Matrimonio contracto, vel de contrahendo? Si de contrahendo, & sit aliqua spes persuadendi pœnitenti, ut ab eo ineundo abstat, vel dispensationem impetret, regulariter non est dissimulandum, sed veritas aperienda, ex Layman de Pœn. *cap. 13.* & Sanchez *l. 2. de Matrim. disp. 38.* Si vero agitur de Matrimonio jam contracto, aut de obligatione non petendi debitum, tunc Confessarius debet veritatem aperire, si ipse possit dispensare, aut alio modo facile remedium adhibere. Non debet vero rem aperire, sed dissimulare, si ipse non possit dispensare, nec remedio locus sit, vel sit quidem, sed cum gravissimo incommodo vel ipsius pœnitentis, vel alterius, v. g. prolis, ex Sanchez *l. 2. disp. 38. de Matr. num. 10.* In casu autem, quo Confessarius dissimulare potest, aut debet, censemus cum Castropalao, posse Confessarium consulere omnem eam actionem, quam, stante ea ignorantia invincibili, pœnitens non potest sine peccato omittere: unde posset Confessarius injungere redditionem debiti illi, qui ex ignorantia invincibili & dissimulanda est in Matrimonio invalido.

§. III.

De Confessario ut medico.

103. **C**onfessarius, ut medicus, triplicem pariter obligationem habet: nempe 1. scire tenetur remedia cuique vitio & peccato adhibenda, saltem potiora, & universaliora; ac præterea regulas communes, & gene-

generales, quibus excusari quis potest a peccato, ex Filiuccio: 2. præscribere pœnitenti remedia, quibus ille in posterum vel non amplius cadat, vel rarius cadat; ita ut graviter delinqueret Confessarius, teste Gobato, si negligens hac in re notabiliter fuerit: ubi limites cum Lonher, nisi prudenter præsumere possit, ipsummet pœnitentem hac in parte officio suo satisfacturum, & apta remedia sibiimet applicaturum: demum 3. præscribere remedia opportuna, aptaque tum relate ad tempus, tum ad personas; unde non omnes eadem methodo curandi, nec omnibus idem applicandum: ac propterea optime censet Lessius, contrariarum opinionum præfice probabilitium cognitionem esse commodissimam, & fere necessariam conscientię foro. Ad hanc etiam præscribendi opportunitatem & aptitudinem pertinet, ut remedia non semper præscribantur per modum pœnitentię ex obligatione adhibenda, sed aliquando dumtaxat innuantur, & proponantur per modum consilii, ut eorum aliquod pœnitens sponte sibi assumat: imo sapienter monet Filiucci, regulariter non esse pœnitenti remedia injungenda ex obligatione, nisi habito prius suaviter consensu pœnitentis; quia alioquin potius oberunt, quam proderunt.

104. Porro remedia optima pro unoquoque peccatorum genere curando cum exposuerit in suis aureis libellis Segneri in *Confess. instruct.* Polancus in *Directorio Confessionis*, & Lonher in *Instruct. pract.* non est, cur eadem referam, & excribam; facile enim ab unoquoque in iisdem videri possunt. Unde id dumtaxat præstabo, ut 1. de aliquibus remediis in particulari aliqua præmoneam; deinde ut particularium aliquorum peccatorum curationem ab iis Auditoribus omisam exponam. Et 1. circa remedium dilationis Absolutionis, quod aliquando, ut alibi dixi, est necessarium, aliquando expediens, præmoneo cum Francolino in *disc. pan.* esse illud adhibendum cum grano salis, & regulariter non cum illis, qui aut rarius post Confessionem lapsi sunt, aut conantur non labi; aut, ubi ea necessaria non est, ægerime ferunt hanc dilationem, futuram proinde ipsis perniciosam, adeoque disponendi a Confessario, & non rejiciendi; aut præbent majora signa doloris, & propositi, magnamque spem faciunt futurę emendationis; aut aliis modis, seu remediis de præfenti curari, & satis disponi possunt; siquidem hoc remedium valde anceps est, & plerique rejecti, vel dimissi, amorem Sacramentorum, suęque salutis veluti desperantes amittunt. Præmoneo 2. expediens aliquando esse, non differre, sed minari dilationem Absolutionis verbis suavisibus simul & gravibus, & pœnitenti deprecanti tantam pœnam, simulque iterum atque iterum promittenti, cedere tandem, & post multas preces disposito optatam Absolutionem impendere, sed edicere, eam omnino fore ultimam, nisi vere emendetur; ac interim præcipere, ut, si possit, post octo, vel quindecim dies redeat ad significandum statum animę suę, vel saltem ad id eum hortari. Præmoneo 3. quando judicatur omnino differendam Absolutionem, tunc hæc duo a Confessario facienda: primo verbis adeo blandis, adeo charitate plenis id agere, ut pœnitens intelligat, ex solo amore sui id fieri, & ex necessitate Divini præcepti: secundo differre ad breve tempus, non ad lon-

longum, v. g. per aliquam hebdomadam; quo tempore elapſo redux pœnitens amantiffime excipiendus erit, & quamvis non integram emendationem afferat, ſed aliquam tantum, abſolvendus, ut iterum redeat magis emendatus.

105. Circa remedium correctionis, ſeu reprehentionis, præmoneo, quod, quamvis hæc aliquando adhibenda ſit (nam, juxta ſacrum eloquium *Prov. 10. qui increpationes relinquit, errat*), abſtinendum tamen ab ea eſt, ſicuti & ab omni ſigno indignationis, admirationis, & impatientiæ, donec pœnitens omnem prorsus ſuam conſcientiam explicuerit: tunc autem uſupanda erit doctrina Polanci, ſcilicet ut verba accommodentur indoli, & diſpoſitioni pœnitentis: adeoque reprehentio durior adhibenda eſt cum agreſſibus ingeniis, ne contemnunt; ſapientiores vero, & in dignitate eminentiores, blande & cum dexteritate reprehendendi ſunt: nunquam autem conviciis afficiendus eſt ullus pœnitens; peccare enim mortaliter in hoc poſſet Confefſarius, ut bene notat Gobatus, ſiquidem convicia reddunt Confefſionem valde odioſam.

106. Circa uſum opinionum, & ſententiarum, præmoneo cum Leſſio, non debere Confefſarium uti laxioribus, etſi probabilibus, niſi quando alius animas juvandi modus non ſuperſit: adeoque, ex Gobato, non ſunt imitandi illi, qui ex propoſito ſectantur eas opiniones benignas, quæ habentur quidem a magnis viris probabiles, tamen ab aliis etiam gravibus viris putantur improbabiles; ſicuti nec imitandi, qui abſque gravi & peculiari cauſa inſiſtunt opinionibus ſingularibus, hinc enim facile ſcandalum enaſcitur, & in re morali, ut optime notat de Lugo, non facile a communi recedendum. Cenfemus autem, non reprehendendos eſſe eos Confefſarios, qui regulariter ſententias ferunt conformiter ad opiniones, non quidem laxas, ſed benigniores indubitanter apud omnes, vel fere omnes ſolide probabiles, dummodo non agatur de validitate Sacramentorum &c. nec ſint aliquo modo repugnantes juri tertii, receptæ conſuetudini, & ſtylo loci. Siquidem recte monet Honorius Papa, relatus in *Cap. fin. de tranſact.* in his, in quibus jus non invenitur expreſſum, procedas (æquitate ſervata) in humaniorem partem declinande ſemper, ſecundum quod perſonas, & cauſas, & loca, & tempora poſtulare videris. Univerſum autem in hoc Sacramento adminiſtrando meminiſſe debet Confefſarius, majus peccatum eſſe delinquere ex nimio rigore, quam ex nimia benignitate, & juxta communem doctrinam Patrum, tutius eſſe rationem reddere de miſericordia, quam de ſeveritate juſtitie. Demum meminiſſe etiam debet, ſe aliquando poſſe, aliquando etiam teneri accommodare ſe ſe opinioni ſolide probabili ſui pœnitentis, ex Layman, aliſque.

107. Cum vero ferme fiat, ut Confefſarii angantur circa remedium, & curationem eorum 1. qui imprecationibus contra alios ſunt dediti; 2. qui alios reſalutare recuſant; 3. qui mollitiei peccato ſunt obnoxii: idcirco quo ad imprecantes aliis malum, ſciat Confefſarius, tale peccatum eſſe quidem ex genere ſuo grave, nec fieri leve, niſi vel ex indeliberatione, vel ex levitate mali, quod proxima quis imprecatur: tamen communiter aſſerui a Theologia

logis moralibus, frequentissime hoc peccatum fieri vel indeliberate, vel saltem ex non plena deliberatione, adeoque frequentissime esse per accidens peccatum leve: quia tamen aliquando etiam sit deliberate, idcirco ad hoc dignoscendum placet regula assignata ab Escobar, scilicet plene deliberate plerumque illud fieri, & sic præsumendum, quando imprecationes prodeunt ex inimicitiae affectu, v.g. ex eo quod quis iniuste ab alio accusatus fuerit, vel fuerit percussus &c. cum autem in amicos exproferuntur, plerumque proferri sine plena deliberatione volendi tale malum proximo, sed solum ex perturbatione quadam, impatientia &c. & sic præsumendum. Proderit vero ad hoc vitium extirpandum in primis admonere poenitentem, quod maledictum frustra prolatum in quempiam, superveniet ei, qui protulit illud, *Prov.* 16. deinde præcipere eidem poenitenti, ut Deo se commendet, & quando in eo defectu lapsus fuerit, aliquam voluntarie subeat corporis afflictionem, aliquam elemosynam largiatur &c. Quo ad resalutare nolentes, sciatur 1. Confessarius, neminem, per se loquendo, teneri salutare inimicum, ex Suarez *disp.* 5. de char. *sect.* 5. per accidens vero teneri aliquando, v.g. si quis fuit offensus, si antea solitus erat eum salutare, si cæteros omnes cum inimico coexistentes salutet, si ex circumstantiis alii colligant, salutationem omitti propter injuriam acceptam &c. Limites, nisi quis adeo infamem accepisset injuriam, ut ejus æstimatio petat aulteriore vultum; quia tunc omisso salutationis, inquit Hurtadus apud Dianam, censetur esse, non ex odio, sed ex iusto dolore. Limites etiam, nisi cognita sit probata virtus alicujus, rixa, ejusque causa, ita ut ea omisso salutationis judicetur provenire ex levi quadam passione, & perturbatione, non autem ex odio, nec apta sit odium in altero causare. Sciatur 2. quemlibet, per se loquendo, teneri resalutare inimicum salutantem, & quidem sub gravi, ex Suarez: per accidens excusari, si salutans sit valde inferioris conditionis, vel ex sint circumstantiæ, ut odii indicium non sit. Hinc 1. Confessarius debet injungere in casibus dictis, non in aliis, salutationem: quam tamen injungere non auderem, si poenitens esset moraliter certus, inimicum cum debita resalutatione non responsurum; quia sic exponeret se periculo gravius invehendi in ipsum inimicum, & fierent pejora prioribus. Hinc 2. non facile credet eis, qui dicunt: *ego illi ignosco, sed salutare nolo, vel nolo amplius adire domum ejus*; quia, quando non habet poenitens aliam causam non salutandi, vel non adeundi ejus domum, quam injuriam acceptam, tunc ex Gobato adest morale signum latentis rancoris. Quo ad obnoxios peccato mollietiei, sciatur Confessarius, hos esse difficillimæ curationis, ex Toletio l. 5. c. 13. *Sum.* unde idem Cardinalis censet, vix aliud esse magis efficax remedium, quam frequentem Confessionem cum uno eodemque Confessario, ita ut hæc fiat ter in hebdomada, si fieri potest. Quod si hoc fieri nequeat, saltem singulis mensibus poenitens sacra Confessione se expiet. Aliquando etiam proderit explorare, ad quem Sanctum, vel ad quod mysterium vitæ Christi poenitens magis afficiatur, ac deinde injungere illi usque ad certum tempus, v.g. usque ad sequentem Confessionem, ut mane, & vespere flexis genibus sic oret: *Deus, qui flammam æter-*

nas preparasti omnibus libidinosi, statuo coram te, ac propono in honorem huius amantissimi Patroni mei, & Passionis Christi, me hac die, hac nocte abstinentium ab omni turpitudine. Certe Gobatus, Sporerius, & Drexellius in Nicata testantur, hoc remedium multis profuisse. Cum nonnullis remedium esse poterit, ut quotidie per aliquod temporis spatium vacent alicui piaz meditationi vel de pœnis inferni, vel de Paradiso, vel de Passione Domini. Singulis vero injungendum, ut, quoties urget tentatio, eliciant actum Fidei de præsencia Dei, & meminerint, se esse in conspectu sui Judicis: item ut custodiant sensus suos, & præcipue oculos, abstinendo se ab omni aspectu periculoso; facilius enim hoc incendium avertitur, quam avertitur. Demum moneat Confessarius, ut pœnitens, si iterum labatur, redeat quamprimum ad Confessionem, imo statim post lapsum sponte subeat aliquam corporis afflictionem, vel recitet flexis genibus Psalmum *Miserere*, vel sequenti die jejuset, vel flagellis se cædat &c. Illud vero maxime commendat, ut ille otium fugiat, & honestis incumbat exercitationibus; *multam enim malitiam docuit otiositas, Eccl. 23.* at e contra, ut docet S. Augustinus *lib. de decem vitiis*, *mente in spiritualia suspensa, atque ibi fixa manente, carnalis concupiscentia impetus frangitur, paulatimque compressus extinguatur.*

108. Obiter placet subungere remedium, quod non raro potest Confessarius adhibere suo pœnitenti per recursum ad sacram Pœnitentiarum, quando ipsum invenerit irretitum censuris, irregularitatibus, impedimentis votorum, & matrimonii, aliisque hujusmodi casibus. Itaque breviter dicam 1. quid sit sacra Pœnitentia Urbis Romæ: 2. quomodo ad ipsam recurrendum: 3. quis possit aperire, & exequi litteras sacre Pœnitentiariæ: 4. quæ, & quot sint observanda ab executore harum litterarum.

109. Et sane quo ad primum, sacra Pœnitentia est Tribunal Romæ constitutum a Summo Pontifice, cui præsidet unus ex sapientioribus ac magis piis Cardinalibus, qui tanquam Summi Pontificis Vicarius & delegatus excipit, audit vel præsentialiter, vel per supplices libellos, pœnitentes ad Pontificem ex toto Orbe recurrentes. Ita ex Clericato *de Pan. dec. 48.* Hoc autem Tribunal rehabilitat, condonat, dispensat pro foro tantum interno, id est in foro tantum conscientie, uti explicat la Croix *l. 6. p. 3. num. 952.* & quidem in omni impedimento matrimonii occulto juris tantum Ecclesiastici, etiam quando agitur de contrahendo matrimonio, excepto impedimento consanguinitatis, nam quo ad hoc tantum dispensat, quando agitur de matrimonio jam contracto, dummodo consanguinitas sit extra primum, & secundum gradum: unde dispensat etiam in primo gradu affinitatis, etiam ex copula licita, etiam pro matrimonio contrahendo, ex Krimer *num. 2304.* Potest vero ad tam primum Tribunal recurri etiam propter duos casus publicos non matrimoniales, quales sunt 1. si quis publice manus violentas sive percutiendo, sive occidendo, intulerit in Clericum: 2. si quis pugnavit, vel assistit quomodolibet complex in publico duello, ex Tiburtio Navarro *p. 3. cap. 1.* Imo ex eodem *p. 4.* hoc Tribunal habet facultatem quo ad Regulares, & volentes ingredi Religionem, si accedat consensus, & supplicatio superiorum Regularium, absol-

ven-

vendi, & dispensandi in multis etiam pro utroque foro, etiam in factis publicis.

110. Quo ad secundum, si forte Confessario obveniat occasio recurrendi ad sacram Pœnitentiarum, v.g. in causis matrimonialibus, observet primo diligenter, an revera adsit impedimentum matrimonii: ubi meminerit, quod in dubio, an matrimonium publice contractum, & in opinione vulgi subsistens, valeat, censendum est, valere, juxta ea quæ dissent Sanchez l.2. de matr. disp. 41. sicuti etiam meminerit, quod non potest Confessarius propter ullum licet evidens matrimonii impedimentum, quando illud sit publice contractum, & in opinione vulgi validum, etsi re ipsa invalidum, dirimere, & conjuges quo ad habitationem (quo ad torum enim ultro se ipsos re cognita dividere tenentur) separare; hoc enim Judicis Ecclesiastici publicæ sententiæ, ob vitandum scandalum, relinquendum est, ex Tannero tom. 4. d. 9. qn. 9. num. 169. Deinde observet, an tale impedimentum sit occultum: tale autem erit, quod a nemine, vel a tam paucis scitur, ut neque sit famosum, neque manifestum, neque notorium facti, vel juris, ex Tiburtio cap. 3. Introd. Postremo observet, an agatur de contracto matrimonio, vel de contrahendo, & quæ causæ allegentur pro dispensatione obtinenda: habita vero rei totius notitia, scribat casum in charta quocumque charactere, dummodo legi possit, & quacumque lingua sive Latina, sive vernacula, tacto nomine, & cognomine pœnitentis, & casum sic scriptum dirigat per communem tabellarium Romæ cum hac epigraphe: *Eminentissimo ac Reverendissimo D. Cardinali Majori Pœnitentiarum*. Significet tamen ad calcem epistolæ, qua via per postam respondendum sit; unde addat: *Dignetur E. V. scribere N. N. in Civitatem N. N. pro oppido N. N.* Et quidem, si in tali oppido non sit Confessarius Doctor in jure Canonico, vel Magister in sacra Theologia, aut, si adsit, pœnitens non de facili suam conscientiam ipsi aperire velit, eo quod alteri jam aperuerit, hoc ipsum significetur in litteris directis Majori Pœnitentiarum. Demum varias scribendi formulas sive pro dispensationibus matrimonialibus, sive pro votorum commutatione &c. videre poterit industrius Confessarius apud Felicem Potestatem, apud Tiburtium Navarrum &c.

111. Quo ad tertium, litteræ sacræ Pœnitentiariæ solent dari cum triplici diversa inscriptione; quarum prima est: *Discreto viro Confessario ex approbatis ab Ordinario per latorem presentium eligendo*: altera est: *Discreto viro Confessori &c. Doctori Sacrorum Canonum &c.* tertia demum, & usualis est: *Discreto viro Confessori Magistro in Theologia, vel Decretorum Doctori ex approbatis ab Ordinario &c.* Jam vero, si litteræ habeant primam inscriptionem, eas aperire potest, & executioni demandare quilibet Confessarius approbatus sive secularis, sive Regularis, etiam si nullo insignitus sit gradu, dummodo fuerit ad id electus a pœnitente: si habeant secundam inscriptionem, eas aperire potest de jure solus ille Confessor approbatus, qui Doctoratum in jure Canonico obtinuit in aliqua publica Universitate: si vero habeant tertiam inscriptionem, eas de jure aperire potest Confessor, qui disjunctive sit vel Do-

ctor in Jure Canonico, vel Doctor in sacra Theologia; & quidem ita stricte hoc intelligendum, ut quamvis gradus Licentiat in sacra Theologia, vel Jure Canonico, etiam ex mente Tridentini *sess. 22. cap. 2. de refor.* sufficiat ad Episcopatum, tamen non sufficiat ad talem effectum, sicuti nec sufficit publice Theologiam profiteri, nec Magistri nomen, ut moris est in aliquibus Religionibus, portare, sed requiritur verus Doctoratus, ex Tiburtio *lib. 1. cap. 2.* Dixi, de Jure; nam ex privilegio aliqui Religiosi possunt in certis circumstantiis aperire eas litteras, etiam si Doctoratus laurea ornati non sint: quales sunt Religiosi e Societate Jesu, habita ad id facultate a P. Generali, vel singulis vicibus a Superiore locali, ex privilegio Gregorii XIII. Notes vero; quod Confessor eligendus debet esse approbatus ab Ordinario, in cujus diocesi debet fieri earundem litterarum executio, & quod sit ex approbatis actu, idest quod non fuerit elapsum tempus approbationis ipsius, ex Tiburtio *cap. 2.*

112. Quo ad quartum, tria observanda sunt ab exequirente tales litteras, idest inquirere, insungere, & monere. Debet igitur inquirere, an revera præmissa, seu exposita, sint occulta, & an preces oratoris veritate nitantur; scilicet an causa finalis, propter quam petitur, & ob quam tantum conceditur gratia, & sine qua non concederetur, eo modo quo exponitur, verificetur: deinde insungere ea, quæ in litteris præcipiuntur injungi pœnitenti; ubi animadvertas, quod, quando in litteris præcipitur pœnitentia injungenda pro delicto, ea servanda est quo ad substantiam; sed quo ad quantitatem est locus discretionis, ita ut Confessarius possit eam temperare juxta pœnitentis sexum, complexionem, ætatem &c. ex eodem Tiburtio *ibid.* postremo monere: scilicet, quando Confessarius viderit, vera esse, quæ sunt exposita, & pœnitentem paratum ad præstanda ea, quæ in litteris sunt injuncta modo jam dicto, moneat illum, ut se ad Confessionem disponat (in sacramentali enim Confessione facienda est executio talium litterarum, ita ut, si fieret extra Confessionem, non esset valida executio, ex Tiburtio *cit. cap. 2.*), audiat illum confitentem, & præstitis iis, quæ præstare debet Confessarius, impertiat vel dispensationem, vel Absolutionem a censura &c. prout conceditur in litteris; monens pœnitentem de effectu sive Absolutionis, sive dispensationis, sive cujuscunque alterius gratiæ, quam in vlm prædictarum litterarum ei impertitur; ac ipse meminerit litteras, seu scriptum laniare: per laniationem autem intellige omnem illam corruptionem litterarum, per quam fiat, ut ex non possint esse usui pro foro externo, ex Gobato *tratt. 5. cap. 37.*

CAPUT III.

De obligationibus subsequen-
tibus actum excipiendi Confessionem
sacramentalem.

113. **P**ost auditam sacramentalem Confessionem, prima obligatio Confessarii est inviolabiliter servare sigillum: secunda emendare quidquid forte erroris occurrerit in Sacramenti administratione: tertia curare obli-
visci omnium auditorum in Confessione, molestaeque allatantes species pertransilire.

§. I.

De Sigillo sacramentali.

114. **S**igillum Confessionis est obligatio servandi sub strictissimo & perpetuo secreto ea, quae audita sunt in Confessione sacramentali: diciturque sigillum, deducta metaphora ex sigillo litterarum; nam, sicuti durante sigillo in litteris, ea non possunt nec legi, nec aperiri, ita, stante sigillo Confessionis, non possunt manifestari audita in Confessione. Primo igitur sigillum dicitur obligatio, non qualiscumque, sed tanta, ut in nullo casu, & propter nullum finem, etiam pro servanda tota republica ab quovis gravi malo sive spirituali, sive temporali, liceat violare tale secretum, ex communi. Et quamvis graviter controversatur inter Auctores, ex quo capite dimanet haec tanta & tam gravis obligatio, dicendum cum Suarez con-
sequens, hanc obligationem oriri ex injuria, quae fieret Sacramento, si aliquando revelaretur hoc secretum: injuria autem consistit in hoc, quod Sacramentum redderetur odiosum; unde peccatum violationis sigilli est contra religionem. Cum vero etiam ex aliis capitibus, v.g. iustitiae, & fidelitatis, Confessarius commissi sibi secreto servare teneatur, ex his etiam capitibus oritur quo ad illum obligatio tacendi, quamvis, praecise per haec, non ita graviter obligetur, ut in nullo casu cessare possit ejus obligatio. Dicitur secundo, *strictissimo secreto*; nam hoc secretum non potest aperiri, nisi de licentia, & facultate poenitentis: quae licentia debet esse expressa, & formalis, nec sufficit praesumpta, imo debet esse spontanea, & libera; non esset autem spontanea, & libera, si vi, dolo, aut metu reverentiae extorqueretur; nec immerito censet Diana, quod esset exposita periculo invaliditatis, si esset solum data ad petitionem Confessarii. Indubitatum autem est, quod data, est ad libitum poenitentis revocabilis, eamque ipse revocare potest, non solum quando data est intra Confessionem, sed etiam probabiliter contra Layman, aliosque, quando data est extra Confessionem. Dicitur tertio, *perpetuo secreto*; siquidem tale secretum servandum est, non solum durante vita poenitentis, sed etiam post ipsius mortem, & quamvis nulla infamia accessura esset ipsi poenitenti mortuo. Demum quarto & ulti-

mo loco dicitur in definitione, *audita ex Confessione sacramentali*, quæ est *qualibet accusatio peccatorum facta Sacerdoti præfenti, vero, vel probabiliter existimato in ordine ad Absolutionem*. Hinc 1. Confessio facta laico cognito, ut tali, vel Sacerdoti absenti in ordine ad Absolutionem accipiendam ab absente, non parit obligationem sigilli: eam tamen parit Confessio facta Sacerdoti probabiliter existimato tali a pœnitente, quanvis vere Sacerdos non sit; quod a fortiori intelligendum est de Sacerdote carente jurisdictione. Hinc 2. non habetur talis obligatio, si Confessio non fiat cum animo & intentione aliqua recipiendi Absolutionem: ac proinde non habetur ea obligatio ex ea Confessione, qua quis ad Sacerdotem accederet animo eum decipiendi, vel inducendi ad malum. Hinc 3. requiritur quidem ad obligationem sigilli, ut Confessio fiat in ordine ad Absolutionem; non requiritur tamen, ut de facto detur Absolutio: unde, si pœnitens, v. g. ob ejus indispositionem, non absolvatur, adhuc tamen consurgit obligatio sigilli. Hinc 4. patet differentia inter sigillum, & secretum naturale: nam secretum naturale potest in aliquibus casibus, imo debet aperiri; at sigillum Confessionis est tale secretum; ut nunquam, & in nullo casu aperiri possit: item in violatione secreti naturalis datur parvitas materiæ, ea autem non datur in sigillo; semper enim gravissime peccatur ex cujuscumque vel levissimi peccati revelatione, etiam si nulum damnum proveniat pœnitenti, & solum peccari in ea sigilli fractione posset venialiter ex ineliberatione, vel inadvertentia: demum violando sigillum, peccas contra religionem, justitiam, & fidelitatem; at violando secretum naturale solum peccas contra justitiam, & fidelitatem.

115. Obligatur tali sigillo citra omnem controversiam Confessarius. De quibuscumque vero aliis personis, etsi constat, eas teneri ad strictissimum secretum, dubitatur tamen, an teneantur sigillo proprie tali. Personæ autem hujusmodi sunt 1. interpres: 2. superior, ad quem delatus est casus reservatus: 3. Doctor de licentia pœnitentis consultus a Confessario: 4. ille qui vel casualiter, vel malitiose audit alienam Confessionem: 5. ille cui Confessarius revelavit Confessionem &c. In quo dubio asserimus, eas omnes personas teneri sacro sigillo proprie tali; amplectimur enim illud principium *Castropalai*, nempe *Omnes illi tenentur sacro sigillo proprie & rigore tali, qui licite, vel illicite, mediate, vel immediate, audierunt aliquam Confessionem sacramentalem*: & quamvis Card. de Lauræa neget, obligari ad sigillum, qui chartam legit, in qua pœnitens in ordine ad Confessionem scripsit sua peccata, extra tempus eam porrigendi Confessario, vel eidem legendi, tamen cum Card. de Buzo eum censens obligari; quia est illa charta veluti inchoatio, aut complementum sacramentalis Confessionis.

116. Ad cognoscendum, quamnam cadant sub sigillum, & quæ non cadant, tradimus duas regulas. Quarum prima est. *Omnia illa cadunt sub sigillum, quæ pœnitens manifestat Sacerdoti vero, vel existimato in ordine ad Absolutionem validam, vel etiam invalidam, nisi aliunde nota sint Confessario*. Altera est. *Omne illud cadit sub sigillum, quod in sola Confessione sacramentali cognitum potest merito Confessionem reddere gravem, & odiosam, si reve-*

revelatur : ex Valentia *tom. 4. disp. 13.* Hinc non solum peccata mortalia tum in genere, tum in specie, tum publica, tum occulta, tum facta, tum futura, non solum peccata venialia in specie, sed alia etiam, quæ non sunt peccata neque mortalia, neque venialia, cadunt sub sigillum, & secreto servari debent, aut certe non manifestanda persona pœnitentis; non enim censetur frangere sigillum, qui aliquid ex his dicere tacita persona pœnitentis. Limites, nisi pauci sint, qui confessi fuerint; vel nisi nominetur locus, & ille parvus sit; vel nisi nominetur Ordo Religiosus; vel nisi ex circumstantiis pœnitens dignosci possit. Siquidem

117. Duplici potissimum modo frangitur sigillum: 1. formaliter, & directe: 2. materialiter, & indirecte. Frangitur directe, & formaliter, quando Confessarius, vel quivis alius ad sigillum obligatus, sine expresso consensu pœnitentis revelat aliquid ex sola Confessione notum, & cadens sub sigillum, manifestando simul personam pœnitentis. Frangitur vero indirecte, & materialiter, quando Confessarius, vel quivis alius ad sigillum obligatus, sine expresso consensu pœnitentis aliquid facit, dicit, vel omittit, ex quo prævidet futurum, ut qui illud dictum, factum, vel omissionem, mediate, aut etiam immediate cognoscent, sint probabiliter iudicaturi, aut suspicaturi, quinam sit in individuo ille, quem Confessarius suo facto, dicto, vel omissione tangebatur; unde ad fractionem indirectam tria requiruntur: 1. ut aliquid fiat, dicatur, vel omittatur: 2. quod Confessarius prævideat, aut proxime prævidere debeat alios suspicatu-ros: 3. quod alii sint ex eo dicto, facto, vel omissione prudenter suspicaturi &c. Ex hac doctrina facilis est resolutio ad varios casus in hac materia.

118. Quamvis vero loqui cum pœnitente de auditis in Confessione extra Confessionem, non sit formaliter revelare, tamen cum eo loqui de iis, eo invito, est læsio sigilli: hoc siquidem, ex Castropalao, aliisque, obligat non solum tegere audita in Confessione, sed etiam ne pœnitens a Confessario exprobetur, aut pudore afficiatur. Si tamen Confessarius post impositam pœnitentiam, & datam Absolutionem, iudicet aliquid addendum circa dicta in Confessione, potest id facere; quia illud spectat ad complementum Confessionis. Potest etiam in sequentibus Confessionibus pœnitentem admonere de defectu aliquo in prioribus Confessionibus; non autem extra Confessionem: quamvis contrarium censeant graves Auctores in ordine ad errorem corrigendum, factum in præcedenti Confessione. Verum tamen per omnes est, quod, quando pœnitens ipse primus instituit sermonem de sua Confessione, potest Confessarius prosequi talem sermonem; quia censetur, expresse licentiam concedi a pœnitente.

119. Non licet uti noticia habita in Confessione ad actiones externas regulandas, quando adest directa, vel indirecta fractio sigilli, aut quando, nulla existente neque directa, neque indirecta fractio sigilli, adest gravamen aliquod pœnitentis, etiamsi ex non usu talis notitiæ gravamen multo majus eventurum sit pœnitenti, ex decreto supremæ Inquisitionis ann. 1682.

120. Quo ad penas pro fractione sigilli observandum est ex Gobato in

Qui-

Quinario tract. 5. num. 42. sect. 7. ubi ipse doctè ac juridice differit de modo formandi processum contra committentem tale crimen; observandum, inquam, est in primis, & ante omnia, obtinendam esse licentiam ab ipso pœnitente inquirendi, ac testes examinandi super fractione sigilli: quod si pœnitens recuset, nefas erit formare talem processum: quod si obtineatur dicta licentia, & probetur delictum fractionis sigilli, & Confessarius de hoc gravissimo crimine convincatur, tunc pœna ordinaria, in jure laturata, est, ut reus detrudatur in arctum monasterium: hodie tamen, ut ex multis notat Clericatus, est, ut reus mancipetur carceri, vel triremi: imo, si revelatio esset qualificata, esset degradandus, brachio seculari tradendus, ac morte corporali puniendus, ut cum Gobato notat idem Clericatus.

§. II.

De obligatione emendandi defectus.

121. **T** Ripliciter potuit ex parte sua Confessarius male administrasse Sacramentum: I. ex eo quod ipse oblitus fuerit dare Absolutionem, vel invalide dederit: II. ex eo quod errorem docuerit: III. ex eo quod monitionem debitam omiserit. Jam vero, quando Confessarius oblitus est absolvere a censura, quam poterat, & debebat absolvere, absolvat ab ea pœnitentem etiam distantem, quia Absolutio a censura non exigit præsentiam, ex Suarez *disp. 32. sect. 6.* Aliud esset, si quis solum haberet potestatem absolvendi a censuris in actu sacramentalis Confessionis. Non poterit tamen hoc remedio uti, quando oblitus est absolvere a peccatis, & pœnitens est taliter distans, ut non sit amplius moraliter præsens, ex decreto Clementis VIII. at poterit eodem uti, quando pœnitens sit ita distans, ut sit moraliter præsens: censebitur vero, juxta probabiliorē sententiam, esse moraliter præsens, quando nondum recessit a conspectu Confessarii, ex Bonacina, & Castropalao: quamvis tutius esset, imo ex Reginaldo, aliisque, necessarium, pœnitentem in tali casu revocare ad Confessionem, si possit sine gravi incommodo id fieri. Quod si pœnitens ita recessit, ut jam plures horæ elapse fuerint a facta Confessione, ita ut timeri possit, ne novo peccato se macularit, tunc Confessarius nequaquam poterit illum non præmonitum, etiamsi denuo præsentem, absolvere; sed monitus pœnitens de defectu commissio, si in eadem Contritione maneat, & voluntate recipiendi Absolutionem, absolvi debet. Idem ferme dicendum, si Absolutio fuit nulla ob defectum jurisdictionis; quo ex capite, ut bene notat hoc loci Castropalaus, raro erit invalida Absolutio: & si quidem opus fuerit loqui de auditis in Confessione, petat veniam a pœnitente; eoque illam negante, urgendus non est, ex Gobato, aliisque contra Suarez, sed Deo committendus.

122. Quando docuit errorem, tunc, si error fuit cum damno tertii, tenetur Confessarius, si possit, admonere pœnitentem de errore a se facto, extra Confessionem, petita ab eo venia loquendi; vel in alia Confessione, si ille redeat: non tenebitur autem ipse Confessarius resarcire damnum secutum, nisi

nisi illum errorem docuerit cum culpa sua gravi, proveniente vel ex malitia, vel ex culpabili graviter negligentia, & ignorantia. Si autem error fuit sine damno tertii, & sine invaliditate Sacramenti, tunc ad nihil eum teneri censet Filliuccius, raro obligari ad monitionem edocet de Lugo. Uterque ex Tamburino probabiliter: quod intelligas, si bona fide, & non malitiose, Confessarius processerit. Cæterum censeo cum Castropalao, teneri ex charitate in hoc etiam casu quemlibet Confessarium errorem purgare, & Parochum ex iustitia.

123. Quando monitionem debitam omisit, tunc vel Confessarius est Parochus, vel delegatus. Si delegatus omisit culpabiliter monere de restitutione, de fuga occasionis &c. & idcirco pœnitens id non fecit, tenetur probabilius ex sola lege charitatis ad monitionem faciendam modo prædicto, nempe vel extra Confessionem, obtenta a pœnitente venia, vel intra, si ille redeat: at, si Parochus id omisit, tenetur ex charitate, & ex iustitia; quia peccavit contra debitum sui officii, vi cuius adstringitur subditos ab erroribus liberare, ex Castropalao. Neuter vero tenebitur creditori restituere; quia neuter tenetur restitutionem v. g. pœnitenti significare ex debito iustitiæ respectu creditoris, sed uterque tenetur ex debito iustitiæ respectu pœnitentis, vel, ut aliis placet, ex solo debito religionis.

124. Demum, post auditas Confessiones, præsertim sub initium talis muneris exercendi, expedit cuilibet Confessario observare id, quod docuit Sanctus Ignatius: scilicet, ut Confessarius in se se diligenter inquireat, & examinet, numquid omiserit, vel neglexerit aliquid ad munus suum pertinens; & si quidem errasse deprehendat, doleat, & proponat emendationem; si nihil occurrat, Divinæ bonitati gratias agat, ex Gobato, Lonher, aliisque.

125. Curare debet Confessarius, ut audita in Confessione oblivioni tradat, nec fere unquam, præsertim apud imperitos & rudes, dicat, hoc, vel illud se novisse in Confessione: siquidem alterum ipsi Confessario nocere poterit, nempe audita sine necessitate apud se recolere; alterum pusillis non raro scandalo erit.



P A R S T E R T I A

I N Q U A

*Selecta ad Confessarii munus spectantia cum adnotationibus
proponuntur.*

ELENCHUS, SEU INDEX CENSURARUM;

Aliarumque poenarum canonicarum, reservationum, impedimentorum &c.

I.

C A S U S B U L L Æ C Œ N Æ.

1. **H**æretici cujuscunque sectæ, eorundem receptatores, fautores, defensores, eorundem libros hæresim continentes, vel de religione tractantes; scienter legentes, retinentes, imprimentes, defendentes, & Schismatici.
2. Appellantes ab ordinationibus; seu mandatis Romani Pontificis ad futurum Concilium, eorumque fautores.
3. Piratæ, cursarii, ac latroneuli maritimi, discurrantes mare Romani Pontificis, præcipue a Monte Argentario usque ad Terracinam, ac eorum fautores, receptatores, & defensores.
4. Naufragorum Christianorum cujuscunque generis bona, etiam in-litoribus inventa, surripientes.
5. Imponentes nova pædagia, & gabellas, vel eas augentes, præterquam in casibus a jure, seu ex speciali Sedis Apostolicæ licentia.
6. Falsificantes litteras Apostolicas, aut falso fabricantes.
7. Deferentes arma, aut alia usui bellico idonea ad Turcas, & alios Christiani nominis inimicos, vel hæreticos per Sanctæ Sedis sententiam expresse, & nominatim declaratos; vel ad Christianæ reipublicæ, aut Catholicæ religionis statum pertinentia, in ejusdem damnum illis annunciantes.
8. Impedientes eos, qui victualia, & alia necessaria Romam convehunt.
9. Ad Sedem Apostolicam venientes, vel ab ea recedentes, sua, vel aliorum opera lædentes, vel sine jurisdictione vexantes in Curia Romana commorantes.
10. Romipetas, & peregrinos etiam in Urbe morantes, vel recedentes, lædentes, & in his dantes auxilium, consilium, vel favorem.
11. Interficiendes, mutilantes, vulnerantes, percutientes, capientes, carcerantes, detinentes, vel hostiliter insequentes S. R. E. Cardinales, Patriarchas, Archiepiscopos, Episcopos, Sedisque Apostolicæ Legatos, vel Nuncios, aut eos a suis diocæsibus, territoriis, terris, seu dominis ejicientes, necnon ea mandantes, vel rata habentes, seu præstantes eis auxilium, consilium, vel favorem.

12. Occidentes, quovis modo percutientes, aut bonis spoliantes per se, vel per alios, eos, qui pro negotiis suis ad Romanam Curiam recurrunt, aut eorumdem Advocatos, Procuratores, Agentes, Auditores, vel Iudices super dictis causis deputatos.

13. Appellantes a gravamine, vel futura executione litterarum Apostolicarum ad laicam potestatem.

14. Executionem litterarum Apostolicarum, aut aliarum expeditionum impediētes, & prohibentes ad gratias impetrandas accedentes.

15. Iudices seculares, qui Ecclesiasticas personas trahunt ad sua tribuna- lia, quique Ecclesiasticam libertatem tollunt, aut in aliquo perturbant.

16. Impediētes Prælatos, ne sua jurisdictione utantur, quique illo- rum, & delegatorum judicia eludentes, ad Curiam secularem recurrunt, aut contra illos decernunt, atque in his præstant auxilium.

17. Usurpantes jurisdictiones, fructus, redditus, & proventus ad Se- dem Apostolicam, & ad quascumque Ecclesiasticas personas, ratione Eccle- siarum, monasteriorum, & aliorum Beneficiorum Ecclesiasticorum pertinen- tes, vel ea sequesrantes.

18. Imponentes decimas, & alia onera personis Ecclesiasticis, Ecclesia, monasteriis, aut eorum fructibus.

19. Iudices, & quilibet ministri, aut executores seculares, quomodoli- bet se interponentes in causis capitalibus, seu criminalibus contra personas Ecclesiasticas.

20. Occupantes, invadentes, aut detinentes bona, aut terras Eccle- siæ Romanæ immediate, vel mediate subjecta, & illius jurisdictionem usurpantes.

I I.

CASUS CLEMENTINI, PAPÆ RESERVATI IN ITALIA EXTRA URBEM.

Vid. pag. 145.

I I I.

*Excommunicationes, aliaque censura afficientes Confessarios
in casibus subsequentibus.*

1. **Q**uilibet præsumens absolvere ab excommunicationibus Bullæ sine de- bita facultate, ipso jure est excommunicatus, ejusque Absolutio est nulla: hæc tamen excommunicatio licet olim reservata fuerit, teste Cajetano *4. Excomm. cap. 77.* attamen nullam nunc continet reservationem, ex Suarez *disp. 21. de Cens. sect. 3.*

2. Absolvens a censuris Bullæ in Italia extra Urbem prætextu privilegio- rum a Sede Apostolica concessorum, incurrit excommunicationem Papæ re- servatam, ex decreto Clementis VIII. & declaratione Cardinalium edita anno 1601. die 9. mensis Januarii, quæ incipit *Sacra Congregatio*.

3. Quicumque item scienter præsumit absolvere a casibus Papalibus ex- tra Bullam, & a sex casibus Clementinis, & a reservatis Ordinario loci sine debita facultate, incurrit excommunicationem reservatam, tum ex *Extravag.*

Yom. III.

X

Doni-

Dominici &c. tum ex Decreto Clementis VIII. Quamvis autem ad eam incurrendam videatur requiri, ut Absolutio detur prætextu facultatum, & privilegiorum, uti expresse docet Bonacina *disp. 1. de Conf. q. 20. p. 3.* tamen Filiucci cum aliis *tract. 15. cap. 7. q. 8.* simpliciter eximat, ita absolventem a casibus Papalibus, sex Clementinis, & reservatis Ordinario loci, excommunicationem incurrere reservatam. Certum autem est, in provincia Mediolanensi ex jure particulari latam esse excommunicationem contra præsumptos absolvere a casibus reservatis, & suspensionem contra eos, qui hoc faciunt prætextu privilegii, ex Bonacina *disp. 1. q. 20. p. 3.*

4. Quilibet injuste impediens executionem litterarum sacre Pœnitentiariæ, aut prædicto impedimento auxilium, consilium, vel favorem præstans, excommunicatur ex Bulla Julii III. quæ incipit *Rationi congruit*: hanc vero excommunicationem putat esse Papæ reservatam Castropalaus *disp. 3. de Conf. p. 30.*

5. Confessarius, qui ob negligentiam mortaliter culpabilem non moneat pœnitentes, quorum Confessiones audit, de decimis solvendis, postquam a Rectore Ecclesiæ, vel illius Vicario fuerit requisitus, incurrit suspensionem a prædicationis officio; & si post incursum hanc suspensionem ausus fuerit prædicare, negligentia non purgata, cum ad illius purgationem commodam facultatem habuerit, excommunicationi subjicitur, ex *Clement. Cupientes, de panis, circa fin.* Hæc autem censura non extenditur ad Religiosos monasteriorum, vel Ecclesiarum Rectores decimas percipientium, *ibidem*.

I V.

Delicta, quæ Sancto Officio, vel Ordinário sunt denuncianda a scientibus illa extra Confessionem.

1. **H**æresis, & ea omnia, quæ hæresim sapiunt, v.g. favere hæreticis, eosque receptare &c.
2. Apostasia a Fide.
3. Blasphemia hæreticalis ex iracundia, aut sub conditione, v.g. non credo in Deum, nisi te interficiam, aut quæ per modum contumeliæ proferatur, v.g. *Al dispetto di Dio, Rinego Dio &c.*
4. Ex iracundia percutientes sacras Imagines.
5. Sortilegi, & malefici, videlicet, qui dæmonum ope occulta revelant, aut aliis nocent, necnon Astrologi judicarii.
6. Sacerdotes non consecrantes, & non Sacerdotes celebrantes, aut Confessionem excipientes.
7. Confessarii sollicitantes, vel non declarantes sollicitatæ obligationem denunciandi.
8. Frangentes cedulones.
9. Infordescens in excommunicatione per annum.
10. Comedentes carnes diebus vetitis.
11. Omittentes semel in anno Sacramenti Pœnitentiæ, aut Eucharistiæ suspensionem.

12. Impedientes quovis modo Sanctum Officium.

13. Contrahentes matrimonium post emissam solemnem Professionem, vel post susceptum Ordinem sacrum.

14. Contrahentes matrimonium stante impedimento ligaminis, idest vivente conjuge.

15. Retinentes, aut legentes libros hæreticorum hæresim continentes, aut ex professio de religione tractantes, sine debita facultate &c. juxta tenorem Edicti S. Inquisitionis. Ex quo, & ex variis Pontificum Constitutionibus alia deprehendentes delicta denuncianda, de quibus passim Doctores apud Vivam in *prop. 5. damnata ab Alexandro VII.* & in Summa Dianæ v. *Inquisitionum jurisdictio*.

V.

Pæne nonnulla ex præscripto sacrorum canonum aliquibus delictis annexæ.

1. **C**ontrahentes matrimonium non præmissis denunciationibus culpabiliter, subjiciuntur pœnis matrimonii clandestini, ex communi doctrina apud Castropalaum *disp. 2. de Spons. p. 13. §. ultim.* Pœnæ autem talis matrimonii sunt I. ut condigna pœnitentia eis imponatur, *ex Cap. Cum inhibitio, de spons.* II. ut, si conjuges prolem suscipiant, ignorantes se impedimento dirimenti laborare, ipsa proles, quæ alias a jure legitima esse concedebatur, legitima non sit: III. ut spe consequendæ dispensationis careant, *ex Tridentino sess. 24. cap. 5. de reformat.* ubi notes, quod Tridentinum nullum esse declaravit Matrimonium clandestinum; at pœnæ, quæ erant illi ex jure annexæ, remanent respectu contrahentium sine denunciationibus, nec sunt ab eo Concilio correctæ, teste Tamburino *l. 8. de Matr. tr. 3.* aliisque communiter:

2. Parochi, vel Sacerdotes ex eorum delegatione assistentes matrimonio, non præmissis culpabiliter denunciationibus, per triennium ab officio suspendantur, gravius puniendi, si culpæ gravitas postulaverit, *ex Cap. Cum inhibitio, de eland. desp.*

3. Adulterans amittit jus petendi debitum conjugale, in hoc sensu, quatenus conjux innocens, stante certitudine saltem per vehementem suspicionem de adulterio, potest negare debitum; non autem in hoc sensu, quatenus peccet ipso facto petendo debitum, ut bene cum Soto in *4. dist. 16. q. unic. art. 6.* advertunt Sanchez *l. 1. disp. 68.* Filliuccius, aliique. Unde la Croix *lib. 6. p. 3. n. 372.* ait, quod adulterans non potest quidem ab alia comparte innocente exigere tanquam debitum, attamen potest petere tanquam benevole concedendum; & quamvis dicatur ipso facto privari jure petendi debitum, tamen id intelligitur, si a conjuge innocente privetur.

4. Incestum committens cum consanguineis conjugis viventis in primo, & secundo gradu, amittit ante omnem sententiam jus petendi debitum, ita ut peccet lethaliter, si absque dispensatione petat debitum, ex variis textibus apud Sanchez *l. 9. disp. 27. de Matr.* Dispensat autem huic pœnæ Epi-

scopus, ex Sanchez l. 8. disp. 12. Advertas, quod idem incestuosus licet non possit petere, tenetur tamen conjugi innocenti reddere, ex Cap. Discretionem, de eo qui cognovit &c. apud Sanchez ibid.

5. Sodomitarum pœnæ omnes fere requirunt sententiam judicis, ut videre est apud Azorium p. 3. l. 3. c. 19. & Petrum Matthæum super Bullam S. Pii V. quæ incipit *Horrendum illud scelus &c.* Solum dubitatur de excommunicatione in Clericum sodomitam, an sit latæ sententiæ? Sed non videtur Tamburino esse latæ, at dumtaxat ferendæ sententiæ, ex Cap. Clerici, de excessibus Prælat.

6. Clericus excommunicatus, vel suspensus, vel interdictus, si exerceat solemniter sibi prohibitum actum Ordinis saltem majoris, irregularitatem incurrit, ex Cap. 1. §. ult. de sent. excomm. in 6. aliisque juribus. Excipe, nisi Divina celebraverit cum ignorantia probabili suspensionis suæ, ratione cujus excusaretur, non autem cum ignorantia crassa, supina, aut erronea; quia hujus generis ignorantia non excusat, ex Cap. Apostolica 9. de Cleric. excomm. deposit. &c.

7. Provisio, & collatio Beneficii simoniaca, est ipso facto irrita, & nulla; unde per hujusmodi provisionem jus nullatenus acquiritur, & sic recipiens Beneficium, non facit fructus suos, sed ad illorum omnium, quæ percepit, restitutionem sub animæ suæ periculo adstrictus est. Limites, nisi aliquis in fraudem eligendi, aut instituendi, ipso ignorante, pecuniam largiatur, ut eundem ad Beneficium inhabilem reddat. Item limites, nisi electus, vel institutus expresse contradixerit, aut prohibuerit, ne interveniret simoniaca datio, vel acceptio, quæ tamen, eo ignorante, facta sit, & ante acceptationem nesciverit, Beneficium simoniace esse obtentum. Quod si is postea simoniam ab alio factam ratam habeat, v. g. solvendo amico pecunias, quas pro se dedit, quasi approbando, & gratificando factum (secus esset, si solum solveret liberali animo, & ne ille detrimentum patiatur), peccat peccato simoniæ; sed valde probabile est, quod non incurrat ipso facto pœnam privationis Beneficii acquisiti, ex Suarez cap. 57. & ex variis juribus apud Layman l. 4. tr. 10. c. ult. §. 9.

8. Beneficiatus cum animarum cura, vel sine cura, si post sex menses ab obtento Beneficio Divinum Officium non dixerit, legitimo impedimento cessante, Beneficiorum suorum fructus non facit suos, pro rata omissionis Officii, & temporis; sed eos tanquam injuste perceptos in fabricas Ecclesiarum hujusmodi Beneficiorum, vel pauperum eleemosynas erogare tenetur, ex sess. 9. Concilii Lateranensis sub Leone X. & ex Bulla 138. S. Pii V.

9. Pœnæ contra alienantes bona Ecclesiastica extra casus, in quibus adit Ecclesiæ necessitas, & evidens utilitas, aut sine debitis solemnitatibus, sunt quatuor. 1. Nullitas contractus. 2. Excommunicatio latæ sententiæ tam contra alienantes, quam contra recipientes; quæ non est reservata. 3. Interdictum ab ingressu Ecclesiæ quo ad Episcopos, & Abbates, & post sex menses addita est suspensio a regimine, & administratione. 4. Privatio ipso facto Prælaturæ illius Ecclesiæ, cujus bona alienarunt, ex Extravaganti Pæ-

li II. *Ambitiosa*, aliisque juribus. Dicitur autem poenae non incuruntur a meris subditis, sed a Praelatis, Beneficiariis, aliisque administrationem habentibus, ex Felice Potestate t. 1. p. 2. c. 4.

10. Usurarius manifestus, praeter alias poenas, non est admittendus ad Communionem Altaris, nec Ecclesiastica sepultura tumulandus, si in hoc peccato decesserit: item non est admittendus ad Confessionem, sive Absolutionem suorum peccatorum, nec testamentum condere potest, nisi prius usuris satisfecerit, vel de satisfaciendo pro suarum viribus facultatum praestet idoneam cautionem, juxta modum expresse statutum in Cap. *Quamquam, de usur. in 6.*

11. Innoxios Sacerdotes apud Ecclesiasticos Judices falso sollicitationis per se, vel per alium insimulans, incidit in casum Papae reservatum, ex Constitutione *Sacramentum Penitentiae* Bened. XIV. tom. 1. ejus Bull. pag. 50.

Advertas, alias quamplures esse poenas pro variis aliis delictis, quas utpote de rariis contingentibus omittimus.

VI.

V O T A.

Quorum dispensatio vel communi jure, vel consuetudine, reservata est Summo Pontifici.

1. **V**otum Castitatis perpetuae.
2. Votum Religionis.
3. Votum peregrinationis Romanae.
4. Votum peregrinationis Hierosolymitanæ.
5. Votum peregrinationis Compostellanæ.

Hæc in generali concessione, sive indulto dispensandi in omnibus votis, non debent censi comprehensa, ex Layman *hic*: ubi advertas circa votum Religionis, ea omnia vota esse Papae reservata, per quæ quis sit Religiosus; qualia sunt Paupertatis, Castitatis, & Obedientiae in Religione emissæ; item quædam alia vota particularia secundum specialia statuta quorundam Ordinum, ex Suarez apud la Croix l. 3. p. 1. num. 566.

VII.

Impedimenta matrimonii.

Alia sunt mere impedientia, propter quæ scilicet prohibetur matrimonium; sed, si de facto fiat, valide sit, quamvis illicite. Alia sunt dirimentia, quæ ita vocantur, non quia matrimonium jam semel valide contractum dirimant, sed quia dirimunt matrimonium attentatum, seu impediunt, ne matrimonium valide contrahatur.

Primi generis licet antiquitus essent plura, nunc sunt juxta probabiliorum Sententiam quatuor: nempe 1. Ecclesiae vetitum & 2. tempus feriarum: 3. sponsalia & 4. votum simplex castitatis, ex Sanchez l. 7. de Matr. disp. 6.

Adverte 1. quod, ut bene notat Busembaum l. 6. tr. 6. c. 3. dub. 1. hæc reddunt illicitum matrimonium potissimum, sed non dumtaxat; nam, praeter illa, reddit illicitum matrimonium 1. omisso benedictionis: 2. omisso prævium procla-

ma-

mationum: 3. clandestinitas, ubi Tridentinum non est receptum; nam, ubi est receptum, clandestinitas reddit matrimonium nullum. Præterea non te lateat, quod illicitum redditur matrimonium per peccatum mortale, & per excommunicationem &c.

Adverte quod Episcopus potest dispensare in primo ex quatuor impedimentis, si prohibitio sit ab ipso, aut Parocho sibi inferiori: item potest in 2. ex universali consuetudine: non potest autem in sponsalibus, quia cedit in præjudicium tertii, nec in voto absoluto, & perfecto castitatis, quia est reservatum Papæ.

Impedimenta secundi generis sunt quatuordecim, quæ omnia his subsequen-
tibus versibus continentur:

*Error, conditio; votum, cognatio, crimen,
Cultus disparitas, vis, Ordo, ligamen, honestas,
Si sis affinis, si forte coire nequibis,
Si Parochi, & duplicis desit præsentia testis,
Raptave sit mulier, nec parti reddita tuta.*

Adverte primo, quod error dirimens matrimonium, est error circa substantiam, nempe quando judicas, eam, cum qua contrahis, esse Bertam, & ea revera non est. Non autem est error in qualitate: unde quamvis aliquis sive vincibiliter, sive invincibiliter, sive antecedenter, sive concomitanter erret judicans illam, cum qua contrahit, esse divitem, quando revera non est, tamen matrimonium est validum, ex Sanchez, & communi. Excipe, nisi error in qualitate redundet in substantiam, & nisi qualitas personæ apponatur in contractu tanquam conditio sine qua non: tunc autem error qualitatis redundat in substantiam, quando qualitas, in qua erratur, est talis, ut designet individuum personam, ex Felice Potestate.

Adverte secundo, quod crimen dirimens matrimonium, duplex est: nempe 1. adulterium conjunctum cum occisione conjugis, aut cum machinatione ejusdem occisionis, effectu subsecuto, aut cum promissione futuri conjugii acceptata ab altero conjuge per acceptationem externo aliquo signo factam, aut cum matrimonio attentato per verba de præsentibus: 2. occisio conjugis ex intentione contrahendi matrimonium cum conjuge superlito, dummodo ea occisio perfecta sit, & non mere attentata, & dummodo uterque copulari matrimonio volens cooperatus sit ad mortem alteri conjugi inferendam, ut cum superlito contrahatur; non autem, si unus dumtaxat ex illis mortem machinatus est absque alterius opera, vel consilio, ut probabilius docet Sanchez *disp. 78. lib. 7. de Matr.*

Adverte tertio, quod præsentia Parochi non sufficit, si sit mere materialis, & de facto, sed requiritur etiam moralis, ita & taliter ut sciat & intelligat quid agatur, ex Sanchez *de Matr. num. 3. disp. 39.* Attamen, ut bene notat Card. de Luca *disc. 2. de Matr.* id procedit, ad effectum ne coram Pa-

Parocho, & testibus dormientibus, vel ebriis, seu fatuis, aut alias rationis usum impeditum habentibus, seu aliud agentibus, ac non audientibus, vel alias nullo sensu percipientibus id fiat: secus autem, ubi Parochus naturaliter intelligat, sed studiose curet nolle intelligere, neque actum approbare, sed dissentire, vel fugere &c. ut pluries decisum fuit in Rota, teste eodem de Luca *disc. 6*. Quamvis vero etiam alius Sacerdos valide assistat matrimonio de licentia Parochi, vel Episcopi, seu Ordinarii loci, diligenter tamen observandum est, an licentia data Sacerdoti per Episcopum, sit data tanquam per speciem delegationis ad hoc, ut ille habeat assistendi potestatem, quam alias non haberet; aut sit data cum præsupposito, quod ille sit proprius Parochus ad diversum effectum, v. g. ad hoc ut licite solemnizet matrimonium non præmissis denunciationibus &c. Nam in primo casu valide assistet ille Sacerdos cum licentia Episcopi; in secundo vero non item, ut fuse ostendit Card. de Luca *disc. 1. de Matr.* Atque hic observent Sacerdotes, non esse regulariter credendum contrahere volentibus, dicentibus, se habere licentiam, ut alienus Sacerdos assistat, ex Sanchez *l. 3. disp. 37*.

Adverte demum, quod impedimenta dirimentia alia sunt de jure naturali, alia de jure Ecclesiastico. In impedimentis de jure Ecclesiastico potest dispensare Summus Pontifex: præter ipsum autem nullus potest dispensare ex jure ordinario; quia inferior non potest dispensare in lege superioris, nisi ab ipso, vel a consuetudine facultatem habeat. Dixi, ex jure ordinario; nam ex commissione Pontificis possunt Episcopi post matrimonium contractum, ratione gravissimæ necessitatis, quæ exiit concurrentibus his quatuor circumstantiis: 1. quod necessitas ita urgeat, ut non sit tempus, vel propter paupertatem non sit modus adeundi Pontificem, vel ejus delegatum valentem dispensare: 2. quod impedimentum sit occultum, idest secrete quidem notum tribus, aut quatuor, non tamen majori parti vicinæ: 3. quod matrimonium fuerit bona fide contractum: 4. quod conjuges nequeant absque gravi incommodo, vel scandalo separari, & si inseparati maneant, versentur in periculo incontinentiæ, donec Papa, vel ejus delegatus dispense, ex Sanchez *de Matr. l. 2. disp. 40. Barbosa de offic. & pot. Episc. allegat. 35*. Hæc autem Episcopi dispensatio in tali gravissima necessitate esset pro solo foro conscientiæ.

Antequam ineatur matrimonium, difficilior quidem datur talis necessitas, qua possit Episcopus dispensare in impedimentis: tamen Sanchez *de Matr. disp. 40.* quem sequuntur Palaus, Dicastillo, Bonacina, & Barbosa *de potest. Episc. allegat. 35.* ait dari in duobus casibus: 1. quando sponsa commisit fornicationem cum sponsi cognato in secundo gradu, nec suppetit ulla prorsus ratio differendi matrimonium, aut vitandi grave aliquod incommodum, nisi dispense, Episcopus: 2. quando quis morti proximus adstringitur ad matrimonium cum aliqua contrahendum, ut sic legitima reddatur proles antea suscepta, vel ut refarciatur honor puellæ, vel ut statim sedentur graves inimicitie. Hæc satis indicasse.

VIII.

Forma integra Absolutionis ex Rituali Romano.

Misereatur tui Omnipotens Deus, & dimissis peccatis tuis, perducatur te ad vitam æternam. Amen.

Indulgentiam, Absolutionem, & Remissionem peccatorum tuorum tribuat tibi Omnipotens, & Misericors Dominus. Amen.

Dominus noster Jesus Christus te absolvat, & ego auctoritate ipsius te absolvo ab omni vinculo excommunicationis, suspensionis (ly suspensionis circa laicos omittitur), & interdicti in quantum possum, & tu indiges: deinde

Ego te absolvo a peccatis tuis, in nomine Patris, & Filii, & Spiritus Sancti. Amen.

Passio Domini nostri Jesu Christi, merita B. Mariæ semper Virginis, & omnium Sanctorum, quicquid boni feceris, & mali sustinueris, sint tibi in remissionem peccatorum, augmentum gratiæ, & præmium vitæ æternæ. Amen.

P R A X I S

Pro Confessario infirmi extremo, vel gravi morbo laborantis.

Ex Polanco in Methodo pro adjuvandis iis qui moriuntur.

Infirmus, ad quem Confessarius vocetur, potest esse I. vel graviter laborans ob naturalem aliquem morbum, v.g. febrem: II. vel in periculo vitæ ob vulnus aliquod, aut gravem acceptam percussione: III. vel demum ob alterutram ex his causis ita affectus, ut sensibus videatur plane destitutus, ac brevi moriturus. Jam vero Confessarius ea in promptu habere debet, quæ pro triplici hac diversâ circumstantia sibi incumbunt, ut rite sancteque munus suum exequi valeat.

§. I.

AC primo quidem, si vocetur ad infirmum graviter laborantem ob naturalem aliquem morbum, ea debet ad praxim deducere quæ optime in sua Methodo tradidit Polancus, cujus ipse verba exscribam, & notationem ubi opus fuerit subijciam. Prudens itaque ac pius Auctor hæc habet in cap. 2. citatæ Methodi pro adjuvandis iis qui moriuntur: Cum primum fieri poterit, infirmum ad Confessionem adducat, & suam operam in redigendis ad memoriam peccatis promittendo, eam faciliorem agrotanti reddere conetur, & cum assensum ejus habuerit, semotis arbitris audiet, quæ ipse sciet, & volet dicere; deinde ipse juvet de iis, quæ sunt probabiliter omissa, percurritando & numerum, & circumstantias necessarias; quæ postquam habueris, quan-

tum

tum satis est, tunc ad Contritionem (si eam imperfectam animadvertit) hominem juvet: id tamen cum ea moderatione faciat, ne agrotus in dissidentiam, & nimiam animi dejectionem incidat Curet etiam, ut Contritio sit charitate informata, & non ex timore tantum, & ut firmum vite serio emendandæ propositum, si supervixerit, in eo sit, & tunc consolando eum spe veniæ, & reconciliationis cum Deo, Absolutionis beneficium impendat, servatis servandis, prout infra.

3. Notetur ex hæcenus a Polanco dictis, quod tria hæc Confessarius curare debet: primo ut quamprimum Confessio ab infirmo fiat: deinde ut ipsum adjuvet in Confessione faciendâ: postremo ut Contritio sit charitate informata. Et quidem quo ad primum Confessarius non debet facile credere domesticis negantibus adesse periculum, ex Gobato: imo, postquam amice infirmum salutaverit, & discrete quæsierit de morbo, de quiete &c. captata occasione statim insinuet, expedire Confessionem fieri, antequam vis morbi invalescat; tum quia repromissio nequissima multos perdidit; tum quia usus instituendi Confessionem sub initium morbi, illud etiam habet peculiare commodum, inquit Sylvester v. Medicus, ne infirmi, cum de Confessione admonentur, existiment, se jam esse in periculo, & sic tristitia afficiantur. Quo ad secundum, Confessarius debet quidem adjuvare infirmum, ut integre constiteatur, sed discrete id agat; etenim mihi est interrogandus æger, quam sanus, ex la Croix de Pan. num. 1750. imo, si infirmus ita sit gravatus, ut timeatur ei imminens mors, poterit Confessarius ante consummatam integram materialiter Confessionem illum absolvere, ex Suarez de Pan. disp. 23. sect. 1. nam in eo casu satis erit, ut ea a pœnitente dicantur, quæ pro temporis opportunitate, & ratione periculi poterunt ab ipso dici, ex eodem *ibid.* Observandum tamen erit ex eodem Suarez, ut dicatur, quoad fieri poterit, materia certa, & non dubia, item ut exponatur materia potius necessaria, si ea forte sit, quam non necessaria. Quod si deinde recedat periculum imminentis mortis, continuanda erit Confessio, donec integre fiat; eaque finita, iterum danda erit Absolutio; novum enim Sacramentum, & a priori distinctum efficitur. Quo ad tertium, licet Attritio supernaturalis sufficiens sit ad valorem Sacramenti etiam pro articulo mortis, ex communi apud la Croix, tamen ratione præcepti charitatis tum in Deum, tum in se ipsum, probabilius videtur, quod omnis homo, regulariter loquendo, teneatur pœnitere per Contritionem in articulo mortis, ex Suarez.

4. Pergit porro citatus Polancus in sua Methodo, ac docet quæ debeat Confessarius injungere infirmo pro Satisfactione sacramentali, & quomodo curare, ut reatus pœnæ temporalis in eo omnis, quoad fieri potest, deleatur: Si aliquis Indulgentias ei poterit impertiri, quam large licebit, impertiar, & ut patienter morbum, & ejus molestias, & mortem ipsam, si Deo placuerit, de manu ejus suscipiat pro Satisfactione suorum peccatorum, & ob Dei amorem, admoneat; & pœnitentia alia vel non injungatur (nisi brevissima, & quam possit facile peragere), vel, si injungitur alia major, nonnisi recuperata valetudine ad eam se teneri agrotus intelligat.

5. Notetur, incumbere Confessario, sollicitum esse, ut in infirmo non solum deleatur reatus culpæ per Absolutionem sacramentalem, sed etiam reatus pœnæ temporalis, tum per Satisfactionem sacramentalem, tum per acceptationem pœnarum, & mortis, tum per Indulgentias. Hinc obligatur Confessarius, quando infirmus non sit sensibus destitutus, pœnitentiam illi aliquam injungere, etsi levissimam, v. g. invocationem nominis Jesu ore, vel corde, voluntariam oblationem infirmitatis, & dolorum, aliumque similem pium motum. Quod si peccata ampliorem Satisfactionem requirant, imponenda erit major, sub obligatione, si convaluerit, exequenda, ex Layman lib. 5. *Summ. tract. 6. cap. 15. quæst. 1.* Deinde, quia satis probabiliter Doctores nonnulli docent, posse a Confessario pœnitentiam imponi infirmo, non ex præcepto, sed ex consilio exequendam, & sic impositam, sacramentalem esse, & habere effectum ex opere operato, Suarez disp. 38. *sect. 3.* Layman l. 5. *Summ. tract. 6. cap. 15.* Bonacina disp. 5. de *Pœn. q. 5. sect. 3. p. 2.* idcirco expedire censerem, ut aliquibus infirmis imponeretur, non quidem ex præcepto, ne scrupulus deinde subreperet, sed ex consilio in pœnitentiam, ferre patienter, quantum patitur humana fragilitas, dunturnitatem, ac molestias tum morbi, tum medicamentorum; sic enim infirmus non solum remissionem obtineret ex opere operato, sed etiam ex opere operantis, videlicet per suam patientiam. Demum curet Confessarius, ut infirmus eas Indulgentias acquirat, quas potest, ac propterea eum admoneat de eliciendis illis actibus, qui requiruntur ad lucrandas Indulgentias vel Rosarii, vel Scapularis, vel sacrorum Numismatum &c. Et quia possunt esse Indulgentiæ ita a Summo Pontifice concessæ, ut eas quis possit alteri applicare, ex Suarez de *Indul. sect. 7.* propterea Confessarius si eas forte habeat, non negligat eidem applicare &c.

6. Addit citatus Polancus, quomodo curare debeat Confessarius, ut infirmus ea adimpleat, ad quæ tenetur ex iustitia, vel alia virtute: Si habet aliquid, alicui quod restituere debeat, & statim possit, videat Sacerdos, an expediat differre Absolutionem, donec id opere compleat: vel, si non differt, quia promittenti se statim id facturum credit, urgeat, ut vivens id fieri curet. nec heredum arbitrio id relinquat, quod tantopere ad suæ salutem animæ pertinet. Hoc de rebus clare debitis intellige. Si res esset dubia, & ipso vivente declarari posset, an ad restitutionem teneatur (ut in habentibus negotia, vel administrationem bonorum alienorum accidere facile posset), primo quoque tempore id fiat. Si non ejusmodi res est, ut statim possit veritas elucescere, in testamento, vel codicillo decernat, ut, re declarata, cuique quod suum est reddatur; & tantandem fiet, si clarum est debitum, & tamen non potest statim restitui: & solet bonum esse consilium, ut hæredes aliqua pœna ad restitutionem tempestive faciendam, si statim non possit fieri, obligentur; sed valde optandum, & curandum est, ut statim fieri possit. Si cum aliquo intercedit inimicitia publica, non solum ut ignoret, sed, si fieri poterit, ut coram Notario, & testibus id confiteri, curandum est: & si ipse alium offendit, mitat ad veniam petendam, & satisfaciat offenso, ut oportet, & pax (si res id feret), dum

ægro

ægrotus vivit, conficiatur; secreta autem secreta, si quæ fuerint hujusmodi, transigantur. Si ad famæ restitutionem fuerit obligatus, eo modo, quo poteris per se, vel per alium, eam restituere curet verbo, vel scripto. Si excommunicatus esset infirmus, curetur, ut se submittat totis viribus Ecclesiæ ordinationi, ut beneficium Absolutionis consequatur.

7. Notes quo ad restitutionem rei; cum hæredes præsertim magnatum negligentes esse soleant in restitutione, vel in indaganda obligatione restituendi, idcirco, si homines in periculo mortis constituti possint sine incommodo gravi restituere, non sunt absolvendi, si obligationem illam velint rejicere in hæredes; sic enim exponunt creditores periculo proximo injustorum damnorum. Si tamen esset periculum scandali, vel infamiae, aut alia gravis causa, posset differri restitutio post mortem facienda per alium. Ita ex Molina, de Lugo, Tamburino, aliisque apud la Croix l.3. p.2. num. 357. Quo ad reconciliationem cum inimico notes, quod licet quis teneatur inimico non solum interius injuriam remittere, sed etiam externa remissionis signa ostendere, non tenetur tamen remittere satisfactionem pro damno, si ab eo sit læsus, imo potest juridice compensationem petere, dummodo vere deponatur odium, ex Busembaum de Charit. dub. 2. aliisque. Observat vero Layman de Charit. cap. 4. quod actionem criminalem contra offensorem licet possit quis ex amore justitiæ instituire ac prosequi, adeoque non videatur ex necessitate obligandus infirmus ad actionem injuriarum criminalem remittendam coram Notario &c. tamen id ferme periculo non vacat, & idcirco curabit Confessarius, ut infirmus talem remissionem coram Notario faciat &c. Accedit, quod, si infirmus læsus ab alio causam ipse lædendi dedit, v. g. si læsus fuit primus, & injustus aggressor, & ille alius ad se defendendum percussit, nec excessit moderamen &c. tunc infirmus læsus tenetur in conscientia actionem injuriarum coram Notario &c. remittere, ex Mancin. in pract. visitandi infirmos; nam ex reg. jur. in 6. *Damnum, quod quis sua culpa sensit, sibi debet, non aliis, imputare.* Postremo quo ad restitutionem famæ, notes, rem hanc, magnam prudentiam in Confessario exigere; & sicuti non facile debet credere famam vel non fuisse ablatam, vel fuisse jam recuperatam, ita, si revera nulla fuit infamia secuta, eo quod infamator esset nullius fidei (quod sæpe accidit), vel quia illi, apud quos infamavit, sciebant similia ita, ut infamia non fuerit notabiliter aucta, non debet tanquam ex necessitate urgere infirmum ad restitutionem faciendam, ex Lessio l.2. cap. 11. dub. 26.

8. At quid faciet Confessarius, si intelligat, infirmum habere concubinam vel domi, vel alibi? R. Si domi concubinam habeat, quam possit expellere, non debet illum absolvere, nisi illam ejecerit, cum propositum illam non admittendi amplius, nisi forte mors ipsa instet, desitque tempus ad ejiciendam; quia in tanta necessitate sufficere poterit firmissimum propositum dantis signa veræ poenitentiae, ex Reginaldo in practi. part. 2. q. 25. Si vero concubina fuerit extra domum, differenda quidem esset Absolutio extra casum periculose, & gravis infirmitatis; at in tali casu ea videtur danda post firmum propositum ad illam amplius non accedendi, & post exhibitum in re

signum aliquod hujus feræ voluntatis, v. g. per dilacerationem litterarum; quas ab illa acceperit, & per amotionem alterius omnis extrinseci incitamenti ad illam, si quod habuerit.

§. II.

9. **S**I vero Confessarius vocetur ad infirmum qui graviter decumbat ex accepto vulnere, distinguendum est. Nam vel graviter ille decumbit domi suæ cum periculo quidem futuræ, sed non imminētis mortis; vel decumbit in loco, ubi accepit vulnus, cum periculo aut certo, aut dubio imminētis mortis. Si primum, erunt a Confessario observanda quæ dicta hæcenus sunt de infirmo graviter laborante ob naturalem aliquem morbum. Si secundum, statim ac ad talem infirmum accessit Confessarius, eum hortetur, ut dolorem de offensis Dei habeat, & confiteatur sua peccata; deinde, semotis arbitris, curet, ut infirmus unum, vel alterum suum peccatum pro temporis opportunitate, & ratione periculi explicet, vel ipse eum interroget de uno, vel altero ex iis, quæ secundum statum ægotantis in eo probabiliter locum habent, atque, eo annuente, se illa commisit, ac de iis se dolenter accusare, Absolutionem eidem impendat. Interim, dum hæc agit, præmonitos habeat, qui vel sanctissimæ Eucharistiæ, vel extremæ Unctionis Sacramentum ex Parochia adferri curent. Postea, si tempus suppetat, continuetur Confessio, donec integre fiat &c. Ita ex Suarez de Pen. disp. 23. sect. 1. & ex Polanco in cit. Method. cap. 16. Advertas, quod, si sit periculum in mora ita, ut instet præsentissima mors, sufficiet, quod infirmus det signa pœnitentiæ, & Contritionis, ad hoc ut Confessarius præfens det illi solum sub conditione Absolutionem, ex Toledo lib. 3. cap. 8. aliisque communiter,

10. Dubitabis, an Confessarius vocatus ad talem infirmum graviter decumbentem ex vulnere recens accepto, debeat statim illum monere, ut veniam det suo offensori, a quo vulnus accepit? R. Tamburinus ex Azorio, Filliuccio, Trullench lib. 5. cap. 5. dub. 5. non esse coarctandum offensum, ut statim ac injuria illata est, veniam dare teneatur, sed tunc satis esse, ut negative se habeat. Sufficiens igitur tempus prudentis Confessarii arbitrio elabatur, antequam fiat vulnerato talis monitio; est enim supra humanam fragilitatem, recenti vulnere, ne dum sedata animi perturbatione, offensum cogere ad positivam reconciliationem: certe cum ipse olim ad ejusmodi vulneratum accurrissem, eumque ad Contritionem hortarer, nescio quis de populo eidem dixit, ut veniam inimico daret; cui vulneratus reposuit infrensens ira & odio in suum offensorem, adeo ut difficile mihi admodum fuerit eum ad Absolutionem disponere.


§. III.

11. **P**ostremo si Confessarius vocetur ad infirmum ita affectum, ut videatur sensibus destitutus, ac brevi moriturus, interroget eum, qui vocavit, vel assistentes infirmo, an ille petiverit Confessarium, aut alia dederit signa poenitentiae (quae sane in periculo mortis praevisto censi debent data in ordine ad Absolutionem). Et, si respondeant affirmative, tunc Confessarius praesens infirmo existenti in eo mortis articulo impertiat Absolutionem saltem sub conditione. Ita ex communi apud Vivam, Dianam, aliosque, & ex Rituali Romano. Quod si negent dedisse talia signa saltem certa, tunc Confessarius appellet variis modis aegrotum, &, si opus sit, voce elata, ut excitet eum; &, si evigilabit aliquo modo, vel utcumque signum dabit, quod intelligat ea quae dicuntur, eum hortetur ad poenitentiam, & Confessionem: eoque annuente, interroget, seu proponat aliqua peccata, exclusis circumstantibus, quae verisimile fuerit in ipso locum habuisse, &, si annuat ea admisisse, ac de iis dolere, det Absolutionem; quod si tempus non ferat fieri talem interrogationem, sed infirmus dederit Confessario signa certa poenitentiae, det Absolutionem saltem sub conditione &c. Ita la Croix cum aliis l. 6. p. 2. num. 1156. At vero, utrum possit dari Absolutio sub conditione eidem infirmo, quando licet non constet, tamen prudenter dubitatur ex circumstantiis, quod vel praecesserit, vel de facto praestetur ab eo aliqua Confessio sensibilis? vid. la Croix loc. cit. & nos supra diximus pag. 86. atque etiam dicemus breviter hic: unde:

12. Dubitabis, an, quando Confessarius perspectam habet pietatem moribundi, possit eidem in extremis agenti, ac externis sensibus destituto dare Absolutionem sub conditione, etiam si non constet, eum actualiter dare signa poenitentiae, aut petere Absolutionem, dummodo tamen id saltem dubie praesumi possit? R. Antiquiores fere omnes, ac plures recentiores stant pro sententia opposita: nihilominus plures alii recentiores videndi apud la Croix loc. cit. apud Cardenas part. 2. Crisis disp. 48. apud Vivam in Thes. de Confess. & Absol. §. 1.1. docent partem affirmativam. Ratio illis est; quia non videtur irreverentiam irrogari tali Sacramento, si illud administretur sub conditione, quando prudenter dubitatur, aut praesumitur, infirmum signis externis illud exposulare quantum potest. Atqui, stante notitia de pietate moribundi, non imprudenter dubitari potest, an ille petat Absolutionem per illam anxiam respirationem consuetam moribundis, aut aliud sensibile signum non apparens Confessario. Ergo &c.

13. Certe a viris timoratis id vidi ad praxim deduci: at quidem non facile id usurparem, nisi urgente gravi necessitate, nempe quando infirmus sine praevia Confessione subito destitueretur sensibus, v.g. ex apoplexia, nec posset alio modo ille juvari in eo extremo. Ceterum, si jam antea in eo morbo fuerit confessus paucis ante diebus, atque aliis Ecclesiae Sacramentis rite munitus, non ita facile id auderem; siquidem non potest negari, te-
nuem

nuem esse eam probabilitatem, qua judicatur, infirmum per eam anxiam respirationem &c. petere Absolutionem: tenuis autem probabilitas non sufficit ad operandum prudenter, nisi in casu urgentis necessitatis, quæ non videtur esse, quando infirmus omnia paucis ante diebus Sacramenta suscepit. Neque dicas, possibile esse, quod ille tunc indigeat; nam hoc nimis probat, siquidem omni momento posset indigere, & sic quolibet momento esset danda Absolutio. Adde, quod Rituale Romanum præscribens modum assistendi infirmis, nunquam meminit hujus Absolutionis dandæ sub conditione, nullo a pœnitente exhibito certo signo, postquam infirmus fuit expiatus Sacramentis: quod forte non omisisset, si fieri id posset, & esset adeo necessarium, ut contendunt nonnulli. Fateor tamen, consilium optimum esse, ut Confessarius in decursu morbi conveniat cum infirmo de signis ab eo dandis in extremo agone ad petendam Absolutionem; iisque ab eodem exhibitis, Confessarius assistens impertiat Absolutionem.



CONFESSARIUS RECIDIVI,

S E V

DE DANDA, VEL NEGANDA, AUT DIFFERENDA
ABSOLUTIONE RECIDIVO,

OPUSCULUM VI.

§. I.

Quis sit, ac dicatur in acceptione theologica Recidivus ?

1.



Recidivus apud Theologos Morales, abstrahendo ab occasione extrinseca, & scandalo, is est ac dicitur, qui idem peccatum mortale pergit committere post propositum emendationis, postque plures peractas Confessiones eodem, vel majore numero lapsus. Quamvis enim communiter dividatur Recidivus in simplicem, & consuetudinarium, notat tamen Gobatus tract. 7. cas. 16.

Theologos, quando tractant, utrum impertienda sit, necne, Absolutio Recidivi? loqui ordinarie de consuetudinario, non autem de simplice; idest loqui de eo, qui frequenter relabitur post plures Confessiones, non de eo qui bis, aut semel intra aliquod notabile tempus relapsus est post unicam factam Confessionem, quamvis spectato etymo hujus vocabuli *Recidivus*, etiam iste in rigore talis dicendus sit. Constat hoc ex lectione talium Theologorum, ac præcipue ex Card. de Lugo de *Pæn. disp. 14. num. 166.* ubi Recidivitas sic describitur: *Frequens reincidentia in eadem peccata post multas Confessiones, absque ulla emendatione.* Quod sane videtur animadvertisse P. Paulus Segneri in suo *Christiano instructo p. 3. disc. 22.* ibi enim acturus doctrinaliter de Recidivi, profitetur, sermonem sibi esse de iis dumtaxat, quos priori loco nos exposuimus. Do ipsius Italica verba: *Io intendo di ragionare d'un'altra razza di Recidivi, e sono coloro, che dopo la Confessione tornano subito alle medesime colpe senza veruna emendazione, e senza veruno studio per emendarli.* Id ipsum sentit religiosissimus & doctissimus vir P. Fr. Ludovicus Granaten sis Ord. Præd. qui in sua Concione secunda de *Pœnit.* ubi docet, qualis sit pœnitentia falsa, sic habet: *Talis (idest falsa) eorum pœnitentia esse videtur (notes, quos ipse Recidivos intelligat), qui ubi primum scelera sua hoc tempore confessi fuerint, in eadem protinus relabuntur, neque de prava consuetudine, & licentia jurandi, pejerandi, mentiendi, detrahendi, maledicendi, maleprecandi, atque concupiscendi quidquam remittunt, nec ullum virtutis, ac pietatis officium amplectuntur, sed iidem omnino permanent, qui antea fuerint.* Hactenus citatus religiosissimus Auctor. Quare tria requiruntur ad constituendum Recidivum in hac acceptione theologica: I. frequens relapsus post plures Confessiones. II. relapsus in eadem specie peccata: III. defectus omnis, etiam inchoatæ emendationis.

2. Et

2. Et primo quidem requiritur frequens relapsus post plures Confessiones; nam, si unica dumtaxat Confessio præcesserit unum, vel alterum relapsum, non proinde, inquit Platelius *num. 327.* communiter loquendo, sufficienter colligitur inefficacia præsentis doloris, ac propositi, ad negandam Absolutionem. Addas, nec inde præcise inferri, quod prior Confessio fuerit invalida; nam S. Thomas 3. p. q. 84. art. 10. ad 4. recte docet ex relapsu, idest ex eo quod quis postea peccet vel actum, vel propositum, non excludi, quin prima penitentia vera fuerit: saltem si non statim a Confessione fuerit relapsus. Propterea non loquuntur ordinarie Theologi de Recidivo juxta talem hypothesim.

3. Requiritur deinde relapsus in eadem specie peccata, quæ antea penitens confessus fuerat, nec sufficit relapsus in nova, ac diversa peccata; nam, ut optime notat Carena *part. 2. tit. 2. §. 5.* verbum *Recidivus*, seu *Relapsus*, considerando particulam *Re*, videtur referri ad actum reiteratum ejusdem speciei, ex l. *Verbum ff. de verb. signif.* Accedit, ex novis, ac diversis peccatis non resultare in Confessario judicium prudens de eo, quod penitenti defuerit verus dolor, ac propositum in priore Confessione, ut bene advertit la Croix *lib. 6. p. 1. n. 1731.* Ratio est; quia ex relapsu frequenti in idem specie peccatum infertur quædam adhesio voluntatis ad illud determinate peccatum: unde sit locus suspitioni, & aliquando etiam judicio, nisi contrarium aliunde colligatur, quod occulta aliqua peccati approbatio comitata fuerit, vel comitetur priorem, vel præsentem ejus peccati detestationem, atque idcirco hæc fuerit, vel sit respective insufficiens, & inefficax ad salutarem penitentiam. Secus contingit respectu relapsus etiam frequentis in novum, ac diversum peccatum; ex eo quippe non infertur ulla adhesio voluntatis ad unum determinate peccatum, sed sola infertur voluntatis inconstantia in bono proposito, quæ non repugnat cum eo, quod quis olim rite proposuerit: etenim propositum sufficiens ad Sacramentum Penitentiae, non exigit, ut ipsum sit efficax effective pro omnibus instantibus subsequenteribus, sed quod sit ipsum pro instanti, in quo est, inconjungibile cum actuali animo unquam in posterum peccandi, & consequenter vi sua excludat pro eo instanti omnem prorsus affectum unquam peccandi, ut bene cum aliis ostendit Villosa de Pæn. *disp. 5. cap. 4. n. 81.* Hoc autem potuit verificari, etiam si deinde quis denuo peccet, sive id fiat ob humanæ libertatis volubilitatem, sive ob novas occurrentes occasiones &c. Passim enim contingit etiam in aliis materiis, inquit citatus Auctor, quod homines mutant voluntates, quas antea firmiter, & ex toto corde conceperant. Addas, facile posse judicari eum hic & nunc serio redire ad cor, qui lapsus est, non quidem ex habitu in idem specie peccatum, sed ex passione in nova ac diversa: docet enim S. Thomas 1. 2. q. 78. art. 4. quod passio, quæ inclinat voluntatem ad peccandum, cito transit, & sic homo cito redit ad bonum propositum, penitens de peccato. Quare ad Recidivum proprie talem, quando inquirunt Theologi, utrum danda, necne, sit Absolutio, requiritur relapsus in eadem specie peccata.

4. Postremo requiritur defectus omnis etiam inchoatæ emendationis; nam

cX

ex tali defectu dubitant Theologi, utrum Recidivus absolvendus sit, necne: ac propterea inquiebat Layman *lib. 5. tr. 6. cap. 4. n. 10. Interdum vehementis est suspicio, & iusta præsumptio, propositum emendandi simulatum, aut non sufficiens esse, si videlicet penitens post duas, aut tres Confessiones eandem peccati speciem eodem, vel majore numero afferat, & NULLUS emendationis conatus antecessisse videatur.* Quod pariter docuit Reginaldus in *Praxi cas. conse. p. 1. q. 12.* ubi negat, Absolutionem impertiendam Recidivis, quoties nulla emendatio, aut emendationis inchoatio (sunt ejus verba) præteritis vicibus extitisse observaretur. Hic profecto Recidivus dubitationi locum facit de sua indispositione, ut optime advertit idem P. Fr. Ludovicus de Granata *loc. cit.* Fateor, inquit, hanc certam scilicet Confessionis conjecturam, & argumentum non esse; fieri enim potest, ut vera quidem Confessio, & penitentia præcesserit, & tamen incautus homo, sibi quæ partim prospiciens, partim prava prioris vitæ consuetudine perurgente, partim diabolo suggerente, in pristina statim vitia corruat. Sed frequentius tamen hoc provenire ex eo puto, quod talium Confessio fuerit (ut Theologi loquuntur) informis. Hactenus P. Fr. de Granata. Unde cautus sit Confessarius in danda huic Recidivo statim Absolutione, nec illi eam impertiat, nisi vel post aliquorum dierum experimentum, vel saltem post verum dolorem, & propositum, quod ipsemet Confessarius cum Divina gratia in eo suscitaverit, propositus cum fervore & mansuetudine rationibus, quæ movendo ad penitentiam peccatori idoneæ fuerint: dignoscet autem Confessarius hunc in suo penitente verum dolorem ex ipsiusmet, quam facit, Confessione, scilicet spontanea, humili, obediens, & seria, in qua nempe penitens non sibi contradicat: observat quippe Doctor Angelicus in *suppl. qu. 9. art. 1.* sic: *Confessio, secundum quod est pars Sacramenti, sic ordinat penitentem ad Sacerdotem, qui habet claves Ecclesiæ, qui per Confessionem conscientiam consentis cognoscit.* Hæc de Recidivo primi generis.

5. Ceterum, si Recidivus fuerit alterius generis, nempe talis, qui, non statim, sed post tempus non breve in eadem peccata relapsus fuerit, conatum aliquem adhibuerit ad emendationem, qui demum peccatorum numerum imminuerit, tunc rationabile adesse fundamentum putant communiter Theologi de eo, quod ille sit hic & nunc rite dispositus, & capax Absolutionis (abstrahendo ab occasione extrinseca proxima, & a scandalo). Audiatur laudatus Layman *loco supra citato: Verumtamen Confessarius in tali homine, qui idem peccati genus, ad quod pronus solet esse relapsus, v. g. fornicationem, voluntariam pollutionem, blasphemiam, sæpius ad Confessionem adfert, attendere debet, utrum ille conatum aliquem emendationis adhibuerit, quod his signis cognosci poterit: 1. si post proximam Confessionem varius, quam ante solebat, lapsus sit: 2. si mediis usus est, quæ ipsi contra peccati recidivam a Confessario imperata erant: 3. si occasiones extrinsecas peccandi, quas removere debuerat, & pollicitus erat, re ipsa amovit. Quod si talia præstitit, haud dubie absolvendus est.* Hactenus Layman, cui adherent Card. de Lugo de *Pæn. disp. 14. sect. 10. Sanchez tom. 1. Summa l. 2. cap. 32. Platelius de Pæn. a n. 319. & seq. Gobat tract. 7. cas. 16. la Croix*

l. 6. p. 2. n. 1734. Segneri in Opusculo qui inscribitur *Il Confessore istruito*, cap. 4. ac novissime duo graves Theologi, alter ex Ordine Minorum, alter ex Ordine Prædicatorum, scilicet P. Fr. Felix Potestas tom. 1. part. 4. num. 3668. & P. Fr. Ildephonsus Manrique, qui docet, absolvi posse blasphemum consuetudinarium, si eam consuetudinem curet emendare. His omnibus præverant Navarrus in *Man. cap. 10.* Azorius tom. 1. lib. 2. cap. 3. q. 4. Card. Toletus l. 3. *Sæmæ* cap. 18. n. 6. P. M. Fr. Ludovicus Lopez in *Instruct. Confe. cap. 21.* aliique quamplures, qui bene callebant Scripturas, & Patres.

6. Quare non assentimur Merbesio, aliisque ejusdem scholæ Doctoribus, qui, ut infra videbimus, exigunt integram, & stabilem emendationem, operibus pœnitentiæ, & charitatis antecederent probatam, ad hoc ut Recidivus possit absolvi. *Non absolvendus est peccator* (inquit citatus Merbesius pag. 141.) *statim atque rarius in peccata, peccandi consuetudine, altius infixæ cadit, in quæ tamen identidem relabitur: nam illi in peccata lethalia relapsus, etsi rariores, hanc hominem nondum in pristinam sanitatem restitutum esse, liquido declarant*: perinde ac si Sacramentum institutum a Christo pro mortuis: sit jam suscipiendum a sanis, nedum a vivis.

7. Non assentimur itaque huic doctrinæ (quantum est ex obligatione, & necessitate Sacramenti) ; quia Christus Dominus non ita hoc Sacramentum instituit, ut conferretur soli non relapsuro, aut soli ei, de quo non timeretur futurus relapsus, sed voluit conferri dispositis, nempe legitime confessis, & habentibus actu sincerum cum vero dolore propositum, ex Concilio Tridentino sess. 14. cap. 3. de Pœnit. simulque præbentibus spem emendationis. Potest autem id totum haberi, etiam si pœnitens non fuerit adhuc longo temporis experimento integre sanatus nec pravos habitus enervaverit, aut radicitus extirpaverit, unde timeatur, vel etiam prævideatur ex communiter contingentibus, illum esse relapsurum. Probo hoc; quia in primis pœnitens in eo etiam statu potest ex corde dolere, & sincere proponere, non enim illi deest libertas, nec sufficiens gratiæ auxilium ad eos supernaturales actus eliciendos: deinde, stante eo dolore ac proposito, spem facit emendationis; potest quippe Confessarius, attento hoc dolore ac proposito (dummodo sibi satis constet) sperare fore, ut ille absolutus primo rarius cadat, adeoque aequaliter emendetur, inde emendetur penitus: experientia quippe docet, innumeros esse qui emendantur quidem, at non statim penitus emendantur, sed post aliquot spatium temporis, præsertim si Sacramenta frequentaverint: ergo etiam si pœnitens non fuerit integre sanatus, nec pravas consuetudines, aliasque peccati reliquias omnino exuerit, potest hic & nunc esse rite dispositus, & capax Absolutionis.

8. Confirmo hoc ipsum ex Rituali Romano in ordine ministrandi Sacramentum Pœnitentiæ, ubi expresse fit sermo de Recidivo: non adhuc integrè emendato, eique in remedium præscribitur consulenda frequentatio Sacramenti Pœnitentiæ, & Eucharistiæ. En verba: *In peccata facile recidentibus utilissimum fuit consulere, ut saepe, puta semel in mense, vel certis diebus solent*

solemnibus confiteantur, & si expediat, communicent. Ergo ex Rituali Romano possunt Recidivi adhuc non integre sanati ad Sacramentum Pœnitentiæ accedere, idque illis utilissimum est, ut ab ipso Sacramento ad totalem ac stabilem emendationem roborentur. Hinc contra exigentes in pœnitente præviam illam integram sanitatem, argumentor sic.

9. Remedium a Christo ordinatum contra peccata futura, nulli illius capaci est de necessitate Sacramenti negandum. Atqui sacramentalis Absolutio est remedium a Christo institutum non solum ad delenda peccata præterita, sed etiam ad præcavenda peccata futura, & Recidivus adhuc non integre sanatus, aliquando est, propter dolorem ac propositum, illius capax. Ergo ea non est illi de necessitate differenda, vel neganda, quando dolet &c.

10. Quod si quis replicet, sine prævia totali, ac stabili emendatione, operibus ad longum tempus comprobata, non posse Confessarium prudenter judicare suum pœnitentem esse dispositum, idest actu dolere, ac sincere proponere, ideoque non posse illum absolvere; contra est: nam Confessarius potest id prudenter judicare ex eo, quod pœnitens non præfice ore proferat, ut olim dicebat propositio 60. inter proscriptas ab Innocentio XI. sed ex animo affirmet, se dolere, ac proponere, nec sit præsumptio in contrarium, quæ ejus affirmationem elidat; ita enim expresse docet S. Thomas in 4. dist. 17. q. 3. quæst. 5. ad 2. ubi loquens S. Doctor de cognitione, qua Confessarius debet cognoscere pœnitentis dispositionem, sic habet: *Quantum ad hanc cognitionem, non potest majorem certitudinem accipere, quam ut subito credat; quia hoc est ad subveniendum conscientie ipsius: unde in foro Confessionis creditur homini pro se, & contra se.* Intelligas, nisi sit præsumptio in contrarium. Non est autem præsumptio in contrarium, quando constat ex aliqua prævia emendatione, ex aliquo conatu ad novam vitam, pœnitentem non amplius diligere suas misérias, velle laqueos prævæ consuetudinis exuere, & idcirco vires ubiores ad id præstandum quærere ex susceptione Sacramenti. Tunc certe habet locum doctrina Angelici Doctoris: ac propterea Suarez illi inhærens tom. 2. de Relig. tract. 5. lib. 3. cap. 8. loquens de Recidivo, dixit: *De quo proposito credendum est pœnitenti, non obstante quacumque præcedenti frequentia, & inconstantia.* Hoc tamen totum velim intelligas, quantum est ex obligatione, & necessitate Sacramenti, ac spectato dumtaxat in Confessario munere Judicis; non enim inficior, spectato medici munere, obligari aliquando, sed raro, Confessarium differre Absolutionem, etiamsi cognoscat pœnitentem dispositum, idest actu dolere ac proponere; aliquando, nec raro, esse consilium eam differre, quod pendet ex Confessoris prudentia, teste Sanchez in Decal. l. 2. cap. 32. His præmissis, prævio veluti quodam prolegomeno, superest, ut rem hanc ipsam paulo latius tractemus, indicando contrarias inter se recentiorum Doctorum sententias, & significando, quamnam ex illis magis nobis placeat.

§. II.

Quid, & quomodo agere debeat Confessarius cum Recidivis, juxta nonnullos Auctores, qui scripserunt sæculo XVII. jam elapso, & sæculo XVIII. adhuc labente?

11. **P**ostquam vidimus, quis, & qualis sit Recidivus in acceptione theologia / quando tractatur, utrum danda, vel neganda sit illi Absolutio; superest videre, quid, & quomodo agere debeat cum illis Confessarius, si eorum aliquis ad ejus confessionale accesserit. Profecto Auctores aliqui, qui scripserunt circa medium sæculum XVII. jam elapsam usque ad hæc nostra tempora, severe admodum agere volunt cum illis Confessarium. Nam in primis generatim negant, fas esse absolvere quemlibet poenitentem statim a Confessione, sed cuilibet differendam Absolutionem ad aliquod tempus. Hinc dicunt: *Praxis mox absolvendi post Confessionem criminum, est praxis & Moralis diabolica*. Ita apud Abgidiu Gabr. in *Mor.* pag. 154.

12. Deinde ajunt, semper, aut ordinarie differendam esse Absolutionem Recidivo, ex eo præcise quod sit Recidivus, donec notabili tempore a peccato, in quod aliquoties reincidit, abstinuerit; putant enim, ex recidivitate necessario inferri, non fuisse veram priorem conversionem: de ratione siquidem veræ conversionis docent esse stabilitatem, & constantiam, aut certe non aliunde illam nobis innotescere, nisi per stabilem, & constantem emendationem. Ita apud Juenin *diff. 6. q. 7. cap. 4. art. 7.* ubi de consuetudinario, & in terminis Opitracet pag. 204.

13. Postremo docent, negandam omnino esse Absolutionem Recidivi consuetudinarii, qui non adhuc sustulerint, aut certe enervaverint pravorum habitus, & pravam consuetudinem, ac tamdiu illos inabsolutos relinquentes, quamdiu non ita vixerint, ut affirmari possint: *vitam mutarunt, liberi sunt ab omni pravo habitu, & consuetudine*: quod sane plurimum mensium, aut etiam plurimum annorum opus est, ipsomet talium Doctorum judicio. Ita apud Juenin *loc. cit.* Addunt, quod poenitens, cum ex se judicare nequeat, quandonam pravam consuetudinem vel sustulerit, vel debilitavit, debet quidem redire ad Confessarium, non tamen certo absolvendus, etiam si per aliquot hebdomadas in idem peccatum non reinciderit, & in actibus Fidei, Spei, & Charitatis se exercuerit, sed iterum audiendus, an se bene gesserit. Ita apud Genet de *Pæn. tract. 6. cap. 7.* & apud Opitracet in *Pæn. bono* pag. 204.

14. P. La Fontein' ad propositionem LXXXVI. inter proscriptas a Clemente XI. originem severioris hujus doctrinæ refert ad fontes valde lutulentos; sic enim ipse scribit cap. 18. *Inquirendum superest, quibus potissimum progenitoribus hic sive error, sive rigor in lucem editus esse videatur: ac statim subdit: Primus est Petrus de Osma, cujus opinio, ut supra meminimus, hæreseos damnata est a Sixto IV. anno 1479. Bulla, quæ incipit Licet ea &c. Pontificis sententiam præcesserat judicium Synodi Complutensis: quo gemino error percussus anathemate, emortuus mansit, donec resuscitari capie*

cæpit ab infami apostata Marco Antonio de Dominis lib. 5. de Rep. Christ. cap. 7. num. 29. & seq. cuius vestigiis insistere non puduit Quæsnelli Magistrum Antonium Annaldum lib. de freq. Comm. p. 2. a cap. 7. usque ad 19. &c. Hactenus P. la Fontein loc. cit.

15. Verum, quidquid de hoc sit, & quidquid etiam sit, utrum Auctores omnes recentis huius scholæ easdem expresse asserant conclusiones, illud videtur certum, doctrinam de differenda pœnitentibus, ac præcipue Recidivis, Absolutione, omnibus hisce esse communem; quandoquidem omnes eadem stabiliunt principia de difficultate veræ conversionis, de illatione falsæ conversionis ex relapso, de firmitate ac stabilitate iustificationis, & ejusmodi.

16. Contra hanc doctrinam, generatim & universaliter traditam, quo ad negandam, vel differendam pœnitentibus Absolutionem, stant duo Decreta Romanorum Pontificum, alterum nempe Alexandri VIII. alterum Clementis XI. siquidem

17. Alexander VIII. inter propositiones a se proscriptas hanc damnavit num. xvii. *Per illam praxim mox absolvendi, ordo pœnitentia est inversus.*

18. Clemens XI. hanc aliam proscripsit num. lxxxvii. *Modus plenus sapientia, lumine, & charitate, est, dare animabus tempus portandi cum humilitate, & sentiendi statum peccati, petendi spiritum pœnitentia, & Contritionis, & incipiendi ad minus satisfacere iustitia Dei, antequam reconcilientur.* Cujus sane propositionis consecutaria, & pessimas inde consequentias ingenti cum animarum detrimento, fuscæ ac doctæ exponit citatus P. la Fontein loc. cit. quem videas, si lubet.

§. III.

Quid, & quomodo agendum sit Confessario cum Recidivis, juxta ferme communem aliorum Doctorum sententiam.

19. **C**ommuniter ferme Doctores omnes, aliter agendum esse a Confessario cum Recidivis, hætenus tradiderunt, ac tradunt. Equidem proferam primo eorum doctrinam veluti in compendium redactam a R. P. Fr. Ildephonso Manrique ex Ordine Prædicatorum: deinde eam specialem, & enucleatam praxim agendi cum Recidivis ostendam, quam scriptis consignarunt ad Confessariorum instructionem gravissimi quatuor viri, de quorum integritate, scientia, ac notitia tum Scripturarum, tum Conciliorum, ac Patrum, nemini crediderim esse dubium. Hi sunt eximius Suarez, Eminentissimus de Lugo, P. Paulus Segneri, & Illustrissimus Episcopus Abelly. Agens porro.

20. Synopsis quædam totius doctrinæ de modo agendi cum Recidivis, strictim & paucis, sed clare ac solide habetur apud P. Fr. Ildephonsum Manrique. Hic in sua nupera Summa morali Romæ edita anno 1726. sic loquitur: *Sunt ne absolvendi, qui ex mera fragilitate (intelligas, sine extrinseca occasione proxima) in eadem peccata sæpe relabuntur? Respondeo. Certum est, etiam præcise loquendo, Absolutionem illis dari posse toties, quoties in*

in ipsa peccata relabuntur, dummodo cum vera Contritione, & firmo proposito non amplius peccandi ad penitentiam accedant, ut declaratum fuit in Trident. sess. 14. c. 3. quia, ut ait Navarrus in *Manuali* c. 3. frequens peccati recidiva non est semper argumentum necessarium, quo judicari possit, penitentiam, seu Contritionem non esse veram; sed est tantummodo maxima fragilitatis, & inconstantia: nec ad recipiendam Absolutionem requiritur, ut penitens non amplius in futurum peccet, sed ut amplius peccare nolit. Dico secundo. Quamvis hæc ita se habeant, nihilominus debet Confessarius prudenter attendere, non tantum quid absolute loquendo possit, sed potius quid sit ipsi penitenti magis conveniens & aptum; multa enim licent, quæ aliquando non expediunt. Debet igitur coram Deo attente considerare, num frequens usus Confessionis talibus personis utiliter suaderi possit, ut earum fragilitati consulatur, & voluntatis infirmitas ac aegritudo, crebra huius Sacramenti susceptione, quasi remedio sapius iterato, sanetur: num e contra frequens Confessionis usus illis nocivus sit, v. g. si inde sumant occasionem peccandi liberius, si potius ex consuetudine, quam ex vero Contritionis motivo, aut emendationis proposito ad penitentia tribunal accedant: unde pro ratione dispositionis penitentis poterit illum interdum Absolutione privare, vel in aliquot dies differre, & interim pia opera illi injungere, vel ipsum de frequentia huius Sacramenti admonere. Quæ omnia potius ex interiori Spiritus Sancti illustratione, & diuturna in administratione huius Sacramenti experientia, quam ex certis regulis, aut præceptis, dignosci possunt.

21. Hactenus P. Manrique recte compositæque communem Doctorum hæc super re doctrinam in breve coegit. Huic præverat P. Bartholomæus Fumus in sua *Summa*, vulgo *Armilla*, v. *Confessio*, ubi indefinite ait: Recidivantes non tenentur reiterare Confessionem, secundum Thomam 4. *Sentent. dist.* 22. q. 1. nisi forte per accidens, ut Confessarius aliquod remedium, vel penitentiam consueti adhibeat. Præverat etiam laudatus P. Fr. Ludovicus Granatenus, qui in citata supra Concione 2. de Pœnit. loquens de peccatore pravis habitibus, & inveterata consuetudine involuto, fatetur quidem, hunc facere fictæ Confessionis conjecturam, & argumentum; addit tamen, fieri posse, ut vera Confessio, & penitentia præcesserit, & tamen incautus homo, sibi quædam parum prospiciens, in pristina statim vitia corruerit. Ex quibus plane constat, peccatorem recidivantem ex mera fragilitate, etiam ex consuetudine, & pravis habitibus (abstrahendo tamen ab occasione proxima extrinseca), non statim & necessario ex vi præfixæ recidivationis iudicandum esse indispositum, & cogendum ad repetendas anteriores Confessiones.

22. Specialis nunc praxis exhibenda, quam illi quatuor supra citati gravissimi Auctores late ac distincte ad Confessariorum informationem accurata admodum ac minuta diligentia proposuere. Et primo quidem P. Franciscus Suarez *tom. 2. de Relig. tr. 5. lib. 3. cap. 8. in fin.* agit de dispositione requisita, & de modo disponendi ad sacramentalem Absolutionem Recidivum consuetudinariam in perjuriam, idque generale esse ait ad alios quoslibet Recidivos consuetudinarios, loc. cit. ubi sic: Denique, inquit, quod ad dispositionem spectat, tota difficultas est in vero proposito, & remedio contra talem consuetudinem: nam
sine

sine dubio necessarium est propositum tollendi illam, & vitandi tale periculum, quia pertinet ad statum peccati mortalis, ut ostensum est. Quia vero propositum hoc solet esse valde instabile, & consuetudo quodam modo transiit in naturam, & ita periculum est quasi intrinsecum, & naturale, ideo difficile est judicare, quando sit sufficiens. Verumtamen difficultas generalis est ad alias consuetudines peccandi, quæ difficillimam reddunt peccati correctionem, maxime quando non pendet lapsus ex occasione extrinseca, sed quasi ex innata fragilitate, & infirmitate. Primum ergo supponendum est propositum absolutum, & de se efficax emendandi consuetudinem, & non jurandi, nisi cum magna consideratione, & veritate: de quo proposito credendum est penitenti, non obstante quacunque præcedenti frequentia, & inconstantia ejus; quia, sicut potuit mutari in malum, ita etiam in bonum, & ipse est sui accusator, defensor, & testis. Supposito autem tali proposito, observandum est, ut, si homo habet aliquas externas occasiones moraliter inducentes illum ad temere jurandum, illas auferat, alioqui non sufficienter disponetur, si proxima sint, & sine magno incommodo auferri possint. Deinde, si sæpius proposuit emendari, & non fecit, adhibenda sunt remedia convenientia, quæ ipse tenebitur acceptare judicio Confessoris, qualia sunt, frequentius confiteri, aliquam elemosynam, vel orationem brevem facere pro singulis juramentis temere prolatis, vel similia. Denique, si hæc non sufficerent, interdum erit utile differre Absolutionem per aliquot dies, in quibus cogatur attentius vigilare, & contrariam consuetudinem aliquo modo inchoare. Et in his non est scrupulose procedendum, sed, facta morali diligentia, illa cum proposito censeri debet sufficiens; quia non oportet, ut Confessor judicet illum non amplius pejaturum, sed satis est, quod judicet, illum in præsentem habere tale propositum, & facere, quod moraliter potest, ut efficax sit: nec hujusmodi humana infirmitates efficacius curari ab homine possunt. Hæcenus eximius Suarez.

23. Audiatur nunc Eminentissimus Card. de Lugo, qui disp. 14. sect. 10. n. 166. hæc habet: Restat ergo nunc, ut dicamus aliquid de illo ultimo puncto, seu ultimo capite cognoscendi defectum propositi efficacis, nempe ex frequenti reincidenti in eadem peccata post multas Confessiones absque ulla emendatione: in quo puncto doctrina communis, & vera est, si Sacerdos hic & nunc, non obstante consuetudine præterita, judicet, penitentem habere verum dolorem, & propositum non peccandi, posse eum absolvere; quia dispositio sufficiens est dolor, & propositum præsens, non emendatio futura: atque ita poteris absolvi, licet judicetur relapsurus. Secundo certum est, quando Sacerdos, attenta consuetudine præterita, & propensione, aliisque circumstantiis, judicat, penitentem non averti sufficienter ab illo peccato, non posse eum absolvere, quantumcumque penitens dicat, se dolere; quia, si Sacerdos id non credit, non habet iudicium requisitum ad conferendam Absolutionem. Tercio ad iudicium ferendum de dispositione præsentem deseruit, si peculiaris signa doloris ostendit, item si jam adhibuit curam aliquam ad consuetudinem extirpandam, si nunquam admonitus fuit de mediis adhibendis ad tollendam consuetudinem, nunc autem admonitus, libenter ea suscipit, & proponit adhibere ea media. Denique aliquando utile erit differre Absolutionem per aliquot dies,

dies, ut appareat correctio, & observatio propostii. In hoc conveniunt Auctores communiter, quos refert, & sequitur Thomas Sanchez lib. 2. in decalog. cap. 32. num. 45. & lib. 3. cap. 5. num. 18. Suarez tom. 2. de Religione tr. 5. lib. 3. de juramento cap. 8. in fine, Reginaldus in praxi tom. 2. lib. 18. n. 87. Henriquez lib. 4. de Sacram. cap. 24. num. 4. & alii, quos ipsi adducunt. Huculque Card. De Lugo.

24. Tertio P. Paulus Segneri Theologus Sac. Pœnitentiariæ, & Sac. Palatii Apostol. Concionator, in suo aureo Libello, qui inscribitur *Il Confessore istruito*, quique ab Italiæ Episcopis ad usum suarum respectivè diœcesum sæpius typis consignatus, Parochis, & Confessariis commendatus est, hæc docet cap. 4. loquens de Recidivis: *Se voi prudentemente stimate, che alcuno d'essi abbia propostio vero di mutar vita, voi potete a lui dare l'Assoluzione, ancorchè temiate, che debba facilmente tornare al vomito, e ancorchè sappiate, che come cane putridissimo vi è già per addietro tornato, non una volta sola, ma molte, e molte. La ragione è, perchè la risoluzione presente che ha di emendarsi, è materia del Sacramento, non è la emendazione futura, che col favore Divino pur è possibile ancor ad un incoostante. Potens est enim Deus, come l'Apostolo dice, statuere illum. Ma se per contrario a voi paja, che alcun di loro non detesti la colpa con efficacia, e che posseduto da' suoi tirannici affetti o d'interesse, o d'impurità, o di furore, non volga quanto dovrebbe il suo cuore a Dio, allora non vi è permesso d'assolverlo in modo alcuno, non ostante ch'egli asserisca d'essere contrito: de Lugo de Sacram. Pœn. disp. 14. sect. 10. num. 166. Perchè in questo Tribunale voi siete il Giudice, e però a voi si appartiene ancor giudicare, chi sia disposto, senza rimettervi in questo al detto del reo, a cui ben dovete credere, come a quello, che ancor è testimonio, ma non allora che una più forte presunzione del fatto si oppone alla protesta delle parole: Ant. Perez de Pœn. disp. 3. cap. 4. num. 64. Conynck de Sac. Pœn. disp. 8. dub. 17. num. 132. Ma qui sta tutto il punto, direte voi, avere qualche regola buona d'affidarsi, quando si debba alle promesse di costoro dar fede, e quando negare. Rispondo: se un tal peccatore nell'accusar se medesimo mostra segni di dolore non ordinario; se viene a confessarsi, non per usanza che n'abbia, ma per trovar rimedio a quella sua colpa, che fuor dell'uso lo inquietava; se porta con esso se qualche emendazione, o se almeno egli ha posto qualche sollecitudine, qualche studio, per emendarsi; se non essendo stato avvisato altre volte del suo mal grave, adesso riceve in bene l'ammonizione, che voi gli fate, e si risolve di usar quei preservativi che voi gli prescrivete a non ricadervi: in tutti questi casi dovete credergli, e così proscioglierlo ancor come disposto: de Lugo loco cit. Layman lib. 5. tract. 6. cap. 4. num. 10. Ma se per contrario non vi reca avanti nessuna di queste disposizioni, ma più tosto una soma di scelleraggini più eccedente, senza risentirsi del peso, e senza punto però pensare a scuoterlo, nè a scemar lo, con che prudenza lo giudicherete voi per contrito?*

25. Demum, ne quisquam contra tres ultimos Doctores excipiat tantquam Jesuitas, idcirco illis adjungo e Clero Gallicano Illustrissimum Episcopum Ruthenensem Ludovicum Abelly, qui in suo de *Pœnitentia tractatu* sic

sic habet: In primis certum est, denegandam esse Absolutionem iis, qui statum peccati relinquere nolunt, quales sunt, qui nolunt inimicis reconciliari, restituere alienum, cum possint &c. similiter etiam iis, qui nolunt occasiones proximam peccandi relinquere, cum possint, & debeant: tales siquidem non censentur veram Contritionem habere de peccatis commissis, aut verum propositum de peccatis in posterum non committendis. Quod vero spectat ad eos, qui ex mera fragilitate (intelligas, abstrahendo ab occasione proxima, & aliis, quæ faciunt præsumptionem de indispositione) in eadem peccata sæpe relabuntur, certum est, etiam præcise loquendo, Absolutionem illis dari posse toties, quoties in ipsa peccata relabuntur, dummodo cum vera de illis Contritione, & firmo non amplius peccandi proposito ad Pœnitentiam accedant: declaratur enim in Concilio Tridentino sess. 14. cap. 2. pœnites per Sacerdotum sententiam non semel, sed quoties ad Pœnitentiam tribunal confugerint, posse ab admissis peccatis liberari. Et Navarrus in Manual. cap. 3. loquendo de personis illis, quæ sunt in proxima peccati occasione, quam tamen ob aliquam causam rationabilem relinquere non possunt (quam quidem causam, utrum talis revera sit, serio expendere debet Confessarius) dicit, personas illas posse, si reciderint, absolvi, non tantum semel, bis, vel septies, sed etiam septuagies septies &c. Quamvis autem hæc ita se habeant, debet Confessarius prudenter attendere non tantum quid, absolute loquendo, possit, sed potius quid ipsi pœnitenti sit magis conveniens & aptum; multa enim licent, quæ aliquando non expediunt.... Itaque pro ratione dispositionum illarum pœnites ipsos utiliter interdum poterit privare beneficio Absolutionis, vel illud in aliquot dies differre, & interim pia, & religiosa quædam opera, & pœnitentiæ exercitia ipsis injungere &c. Hæc habent graves hi Doctores: quibus, aliiſque, uno commemorato Filliuccio, adhærebat Auctor Opusculi, cujus titulus *La Pratica di Confessare*, Aſculi primum de mandato illius Episcopi, deinde Venetiis editi anno 1737. ubi is monet, non oportere, ut Confessarius sit excessivè difficilis in danda Absolutione Recidivis habentibus verum dolorem, ac propositum.

26. Idem etiam allegati Doctores, alique conveniunt in eo, quod Recidivi, qui dicuntur labi ex vi præcise solius habitus, non idcirco censentur labi necessario, & sine libertate indifferentiæ: nam, quod quis peccet ex vi præcise solius habitus, non est, quod peccet indeliberate; etenim ipsa etiam consuetudo, ut docet Suarez de iur. cap. 7. dat facultatem ex parte intellectus ad apprehendendum, & deliberandum: & S. Thomas 1. 2. q. 78. expresse docet, quod peccata ex habitu, sunt peccata ex certa malitia, idest, ait Baldellus, ex certa notitia, & advertentia malitiæ. Quocirca peccare ex vi præcise solius habitus, est, quod quis peccet sciens & volens, nulla tamen passione allectus, nec ab externo aliquo motus, ut notat Vasquez in 1. 2. q. 79. art. 2. & 3. sed unice ex impulsu habitus, cui potest physice & absolute resistere, si velit; eligit enim ipse peccatum. Quare nulla prorsus apparet læsio libertatis. Nec quisquam replicet, hanc potestatem resistendi intelligi homini sublatam, quando is peccat ex vi præcise solius habitus in circumstantia, qua ille antecederet fecerit quantum in se erat ad

eum habitum evellendum, & nunc proponat facere quantum in se est ad ipsum vincendum. Non, inquam, id quisquam replicet; nam ex eo quod is peccet, qui ante lapsum conatus fuerat quantum poterat ad evellendum habitum, & nunc post lapsum proponit facere quantum potest ad eum vincendum, infertur quidem, quod habitus, seu prava dispositio ad peccandum, sit illi hic & nunc involuntaria, nec reputetur tanquam dispositio libera, sed necessaria; infertur etiam, quod ea consuetudo versa sit quodammodo in naturam, nec jam sit in potestate hominis illam tam cito extirpare, ut bene advertit Suarez 1. 2. *disp. 3. de volunt. sect. 3.* at nullatenus infertur, quod physice & absolute nequeat homo resistere, si voluerit, impulsui, & inclinationi talis habitus, seu pravae talis dispositionis: nullus siquidem obex positus est, qui antecederet impossibilitet voluntati talem resistantiam. Hinc late atque erudite Raynaudus *tom. 3. Mor. diss. 2. q. 3. art. 4. pag. 326.* ostendit, ex nullo habitu acquisito, etiam intensissimo, etiam confirmato, ladi libertatem indifferentiae: *Quia efficacia*, inquit ipse, *habitus advenientis voluntati, hoc non fert, cum non consumat, nec minuat vim innatam libertatis, sed tantum conferat illi facilitatem eliciendi actum, posito quod ipsa ad operandum se determinet*; & ut docet Suarez 1. 2. *Metaph. disp. 14. sect. 4.* aliquo modo, utique non irresistibili, inclinet illam ad se determinandum.

27. Cæterum hic modus loquendi: *peccare ex vi solius præcise habitus; pertrahi ad illicita ex solo habitu; compelli ex prava consuetudine ad malum* &c. non est modus loquendi novus, & inusitatus apud Patres, & Theologos, ut docet Azorius *tom. 1. lib. 1. cap. 9.* sed valde usitatus; & per talem loquendi modum non significatur, quod vere & proprie fiat vis, aut vere compellatur voluntas ab habitu, sed solum significatur, quod voluntas alioquin non vellet, non operaretur, non peccaret, nisi adesset habitus. Hoc autem qua ratione fiat, optat S. Bernardus *Serm. de septem donis Spiritus Sancti*, ab omnibus ignorari. Verba sancti Doctoris hæc sunt: *Quemadmodum misera nimium, & miserabilis humana fragilitas sine pruritu concupiscentiae, aut impetu desiderii SOLA CONSUETUDINE IPSA ad illicita trahatur, utinam omnibus liceat ignorare.* Explicasse id videtur Suarez *tom. 2. de Relig. l. 3. cap. 7.* ubi ex Scoto advertit, sæpe ex consuetudine & habitu provenire, ut homo citius deliberet, quam si habitum non haberet: ex quo contingit, ut qui adhuc retinent habitum vitiosum, quamvis antea detestati fuerint peccata, imo etiam nunc cupiant ex animo emendationem, tamen in aliqua temporis circumstantia, oblata occasione, relabantur in idem peccatum, non quia impellantur impulsu irresistibili, nec quia non satis advertant illicitem actionis, sed quia subito deliberant, quod non facerent, nisi habitum haberent. Proinde in hoc sensu verificatur, quod ii trahantur a sola consuetudine, quod compellantur, quod peccent ex vi solius præcise habitus, idest quod non operarentur, non peccarent hic & nunc, nisi haberent habitum, siquidem maturius considerarent rationes retrahentes, ac ferius deliberarent. Quod optime expendit etiam P. Segneri in *suo Christiano instructo p. 1. disc. 1. n. 6.* En verba: *Ora quest'abito malvagio siccome nasce da molti peccati già fatti, così ne presagisce ancora molti da farsi*

farsi nell'avvenire: e la ragione è, perchè egli accresce prima le tenebre della nostra ignoranza &c. Hinc quis cito & facile deliberat & eligit quod malum est, etiamsi advertat illicitum esse.

28. Non est itaque, cur redarguatur Auctor præfati Libelli *Practica di Confessare*, veluti Janseninum sapiat, propterea quod supposuerit, Recidivos aliquando peccare *ex vi præcise solius habitus*. Utique non errarent Janseniani, si solum id docerent: & valde miror, Recentiores hunc redarguentem, hac in re plus æquo sollicitum esse de libertate indifferentiæ, cum ipse docuerit justificationem Christianam infusam per Sacramentum Pœnitentiæ esse (ita pag. 182. & 183.) firmam, constantem, ac stabilem, ideoque communiter non contingere, ut vere justificatus relabatur, & si id contingat (nescierim, qua vi, aut impulsu), illum statim inter gemitus, & pœnitentiæ resurgere: quod profecto utrum, & quatenus cohereat cum Scripturis, cum Tridentino, & cum ipsa libertate indifferentiæ, judicium sit penes alios. Certe Calvinianus error de firmitate, & inamissibilitate justificationis; omnibus illis non adversatur. Videatur Bellarminus de *Justif. cap. 14.* & Suarez de *Gratia lib. 11. cap. 1.* ubi invenies, justificationem infusam, idest gratiam sanctificantem, & charitatem, in statu viæ esse corruptibilem ex parte subjecti, licet de se non habeat principium corruptionis; & contrarium asserere, esse obnoxium errori primum Joviniani, ac deinde Calvinii: unde inferitur, non recte affirmari, justificationem infusam esse absolute stabilem, firmam, & effective efficacem ad excludendum peccatum pro instantibus subsequens. Veritas dumtaxat ea est, quod justificatio infusa non habeat de se principium corruptionis, & quod qui eam habet, non possit, ea retenta, peccatum lethale committere; qui enim potest quis simul esse justificatus, & prævaricator, ut bene monet Bellarminus *loc. cit.*

§. IV.

Quenam ex relatis his duabus diversorum Doctorem sententiis in praxi tenenda sit?

29. **V**alde diversus est modus agendi cum Recidivis, quem præscribunt Doctores prioris sententiæ, ac sit modus cum iisdem agendi, quem tradunt Auctores posterioris nuper recensitiæ opinionis, ut perspicuum unicuique est. Etenim illi generatim volunt dilationem Absolutionis, & non raro per menses, & annos: hi vero pœnitentes ex pravis habitibus, & longa consuetudine ad vitia inclinos, aut relapsos, si veri dent signa doloris, ac propositi, capaces Absolutionis existiment, eosque nec semper, nec ad longum tempus inabsolutos dimittant. Quenam igitur in praxi ex his tenenda sententia est?

30. Respondeo, meum non esse legem ferre. Hoc unum dumtaxat dico. Ex duabus relatis sententiis placet hæc posterior Suarez, Card. de Lugo, P. Pauli Segneri, ac Illustrissimi Abelly, aliorumque quos citavi; quam, ut supra referebam, in compendium redegit P. Fr. Ildephonsus Manrique Dominicanus Antiprobabilista, quamque ipsemet hic brevissime tribus

propositionibus complector: videlicet I. Recidivos, quantum est ex obligatione, & necessitate Sacramenti, (abstrahendo ab occasione proxima & scandalo) posse statim absolvi toties, quoties ipsi actu vere dolent, ac proponant, spem faciant emendationis, ac legitime confessi fuerint: II. tunc prudenter judicari a Confessario, eos vere actu dolere, ac proponere, atque idcirco spem facere emendationis, quando ipsi, non ore dumtaxat, sed ex animo dixerint, se dolere, ac proponere, & nulla fuerit præsumptio in contrarium, eorum dictum elidens, uti non est, quando aliquam attulerint vitæ emendationem, vel conatum aliquem ad emendationem adhibuerint, juxta Layman, aliosque citatos: III. consilium esse, spectato munere Confessarii serviendi majori utilitati animæ poenitentis, differre Recidivi quantumvis dispositis ad breve tempus Absolutionem, quando discretus ac prudens Confessarius eam dilationem ad id judicaverit opportunam. Addo, præceptum videri esse, eandem differre iisdem, quando Confessarius prudenter existimet, Absolutionem, statim & faciliter impertitam, futuram esse per accidens occasionem poenitenti, ut iterum relabatur, vel quando prouideat, dilationem esse medium hic & nunc unicum ad ejus emendationem.

31. Placet, inquam, posterior hæc sententia; tum quia communissima ea est inter Theologos; tum quia plurium sæculorum usu ac praxi, teste Francolino *lib. 3. de disc. Pen.* ea est in Ecclesia Dei firmata; tum quia opposita sententia docens generatim differendam Absolutionem cuilibet poenitenti, item differendam semper, vel ordinarie Recidivo, ex eo præcise, quod sit Recidivus, item Recidivis consuetudinariis differendam omnino Absolutionem esse, donec ipsi pravos habitus exuerint, & integre ac perfecte fuerint emendati: hæc, inquam, sententia valde displicet, propter gravissima inconvenientia, quæ inde derivari, late ac solide demonstrat la Fontein *ad propos. 87.* inter proscriptas a Clemente XI.

32. Verum, ut id, quod est, ingente fæat, idcirco præcipue placet posterior illa Suarez, Segneri &c. sententia, quia sanctissimi viri, procurandæ animarum saluti quammaxime dediti, hanc in praxi adhibuerunt. Antiquiores, S. Chrysostomum nempe, S. Malachiam, S. Medardum, S. Damsianum, aliosque, qui poenitentibus etiam relapsis statim, aut certe non longum post tempus, Absolutionem sacramentalem impertiebant, piget hic referre; nam facile est eos videre, si lubet, apud P. la Fontein *ad propos. 87.* inter proscriptas a Clemente XI. Recentiores aliquos proferam, qui proximis superioribus temporibus floruerunt. Et in primis

33. S. Franciscus Xavierius, Indiarum Apostolus, non solum benigne excipiebat sceleratissimos quosque, etiam relapsos, & consuetudinarios, sed eos rite dispositos aut statim, aut certe post aliquot dies absolvebat. Hinc Religiosum sibi socium in administratione Sacramenti Poenitentiae erudiens; docet, utile plerumque esse Recidivos, & consuetudinarios non continuo absolvere, sed agere cum illis, ut boni consulant per duos tresque dies piis commentationibus vacare, & hac ratione ad fructum uberiorem ex Confessione suscipiendum se disponere. Ubi notes, non docere, id esse necessarium ex obligatione, & necessitate Sacramenti; imo oppositum a se exilimari

uari facto ipso ostendit: cum enim navigationem ipse suscepisset, id dumtaxat spectans, ut perditum ac facinorolum militem Christo lucrificeret, postquam inter navigandum comitate ac benevolentia sibi eum devinxerat, sciscitatus ab eo est, quamdiu a sacra Confessione abstineret? Cui ille, plurimos jam annos in flagitiorum caeno habere se ait sacra Confessionis expertem (sunt hæc historici Tursellini verba lib. 3. cap. 15.), magis id adeo aliena culpa, quam sua; quippe ante classis professionem, sibi certum fuisse conscientiam tot flagitiis, & sceleribus, exonerare, sed confesso ABSOLUTIONEM a Vicario NEGATAM; nec jam spem ullam salutis ostendi. Tum Franciscus, medicus animorum unicus, mirari se dicit tantam illius Vicarii SEVERITATEM, si quidem ipse rite confessus esset, inde bono illum animo esse jubet, faciles se aures daturum pollicens, ac monito, ut peccata omnia ab ultima pueritia, quoad ejus consequi posset, in memoriam revocaret, facilem, commodumque præscribit modum. Quod ille ad spem salutis erectus per aliquot dies fecit libenter, seduloque &c. Multis ergo in terram egressis, Franciscus quoque cum milite descendit. Ibi remoto ab arbitris loco operam dare consentienti capit. Et veram esse penitentiam ostendebant crebri gemitus, ac lacrymæ Confessionem subinde interpellantes. Quæ tandem peracta, Franciscus eum ABSOLVENS, Pater, & Ave semel orare jussit, se de cætero pro illo satisfactorum Deo. Ubi vides, sanctum virum non expectasse, ut penitens per longum temporis spatium suam operibus conversionem probaret, non distulisse Absolutionem, donec ille integre emendatus appareret &c. Vides etiam, ex negata, vel dilata Absolutione illud non raro evenire, quod huic militi contigerat, ut nempe sic rejecti, vel dimissi, amorem Sacramentorum, suæque salutis, veluti desperantes, amittant.

34. S. Philippus Neri in curandis animi morbis, & in extrahendis e peccatorum caeno hominibus peritissimus, Recidivos, & consuetudinarios; non semel ad rectum salutis iter stabiliter reduxit, non dilata, aut negata Absolutione, sed eadem iteratis illico post relapsum Confessionibus impertita. De hujus rei exemplum ex descripta a Baccio sancti viri historia petitur lib. 2. cap. 6. cujus Italica verba hæc sunt: *Andò per confessarsi da lui un penitente così immerso in un vizio, che quasi ogni giorno vi cadeva, a cui il Santo non diede quasi altra penitenza, se non che quando avesse commesso qualche errore, subito senza prolungare niente, tornasse subito a confessarsi, e non aspettasse di cadervi la seconda volta. Obbedì il penitente, e Filippo sempre l'assolveva, replicandogli quell'istessa penitenza, e solamente con questo l'aiutò in maniera, che in pochi mesi rimase libero non solo da quel peccato, ma da molti altri ancora &c.* Notes proinde, Recidivos posse toties quoties absolvi, quando actu vere dolent, ac proponunt. Id Confessario innotescit ex aliquo ad emendationem conatu, qualis certe est reditus ad Confessionem ex Confessarii præscripto: ac propterea iidem spem faciunt futuræ tandem stabilis conversionis.

35. S. Franciscus Salesius, sapientia, discretionem, ac suavitate mirabilis, iis quidem nolebat Absolutionem impendi, qui versarentur in occasione proxima, si alias moniti, ab ea se minime distrahissent, ut promiserant.

rant. Cæterum alios ipse poenitentes cujuscumque generis, ex remotissimis etiam partibus ad se venientes, vel dispositos absolvebat, vel dabat operam, ut Absolutioni disponderentur, & rebus animi compositis, cum Deo reconciliati ad proprias domos redirent, ut late in *cap. 9. lib. 3. Vita*: imo suos instruens Confessarios, tunc illos docet a se inabsolutos dimittendos esse poenitentes, quando ii traxerint necessariis dispositionibus, nec ipsi assequi potuerint, ut eos disponderent, *lib. 3. cap. 8. Vita*. Nunquam legimus, ipsum inabsolutos eos dimisisse, aut dimittendos docuisse, qui non flevisset diu, vel qui pravos habitus longa emendatione non enervassent.

36. S. Andreas Avellinus, in quo, testantur Lectiones Breviarii Romani, in Confessionibus excipiendis miram pietatem, & prudentiam entuisse, consuevit quidem poenitentes per annos complures odiis, impudiciis, aliisque vitiis coinquinatos, eosque vel nunquam ex illis sordibus egressos, vel sæpius in eisdem relapsos, admirabili charitate excipere, atque, ubicumque se daret opportunitas sive in itinere, sive in agris, sive in pagis, sacra Exomologesi expiare; at memoriæ nusquam; quod sciam, præditum est, eos rejecisse, qui operibus satisfactoriis suum dolorem, & conitans propositum non probassent, aut incapaces Absolutionis simpliciter eos censuisse, qui soliti fuerint post varias Confessiones in eadem, vel diversa peccata sæpius reincidere: quinimo accepimus, ipsum tum Placentiæ, tum Neapoli statim absolvisse inveteratæ malitiæ homines, qui ejus commoti adhortationibus, dolentes sua illi peccata sacramentali Confessione exposuerant.

37. Ad extremum celeberrimus Dei Servus, ac primus in Christo filius S. Ignatii de Loyola, P. Petrus Fabri, vir utique pietate, doctrina, ac prudentia insignis, quem maximi facit, ac summis laudibus exornat S. Franciscus Salesius, cum traderet Confessario cuidam præcepta ad homines a vitiis extrahendos, hæc habet apud Orlandinum in *prima Soc. Jesu Historiarum parte*, & in *Vita lib. 2. cap. 20. Super omnia caviè*, inquit, *ne tedium capiat te tam sancto in opere, in quo Christum representas peccatum mundi tollentem. Supercilium quoque detestare Pharisaicum, qui mansueti Christi locum tenes: erit quidem interdum agendum duriter; sed videndum est, ut exitus dulcis sit, ac ferme, nisi forte cum obstinato, qui nequaquam absolvendus sit, agas, nemo ita dimittendus, quin libenter sit rediturus*. Hactenus ille. Quæ sane omnia quomodo convenient cum eorum doctrina, qui Recidivos quosque sive in eadem, sive in nova, ac diversa peccata, inabsolutos semper, ac diu rejiciendos existimant, haud satis intelligo. Enimvero haud libenter redituri sunt, qui certo sciverint, post unicum etiam relapsum Absolutionem se minime impetraturos. Atque idcirco aiebat Leander a Murcia Capuccinus: *Frequentem usum differendi Absolutionem Recidivis, bene cæteroquin dispositis, noxium plerumque esse, experientia docet.* (inquit ille *lib. 2. disp. 1. resol. 14.*) *eo quod differre Absolutionem, non est remedium, sed potius medium, quo in desperationem ruant, vel quo odiosa reddatur eis Confessio. Hanc experientiam, quam ego habeo, multi graves viri, qui Confessionibus audiendis frequenter vacant, similiter habuisse retulerunt.*

38. Haud equidem ignoro, a Doctoribus severioris sententiæ vocari in illius

illius patrocinium Sanctum Carolum Borromæum : sed perperam id fieri pluribus ostendit P. la Fontein *ad cit. Prop. 87. cap. 17.* Etenim S. Carolus sic ait in suis primis Instruct. *Consultum est differre Absolutionem, donec evidens appareat emendatio in iis, qui tametsi dicant, & polliceantur, quod se eximent peccato, tamen Confessario probabilem metum faciunt, ne contrarium contingat.* Jam vero hæc S. Caroli doctrina nihil favet præfatis Doctoribus, sed potius favet Doctoribus secundæ sententiæ. Probo hoc. Nam in primis Sanctus Carolus non ait, necessarium esse differre Absolutionem, sed consultum esse, & quidem non omnibus prorsus promissæ pœnitentibus, nec per longum tempus, donec se integre emendaverint, uti contendunt Doctores illius primæ sententiæ, sed relapsis consuetudinariis in ea circumstantia, qua ii Confessario faciant probabilem metum de non futura emendatione simpliciter, ne aliqua quidem, & inchoata, ideoque de eo, quod non se eximent peccato. Explicat deinde idem Sanctus Archiepiscopus, non semper eos facere talem probabilem metum Confessario, sed in his certis casibus a se enumeratis, ac similibus : nempe *si peccatores, cum toto anno in peccatis haerint, Confessionem differant, contra ejus mandata, ad ultimos Quadragesimæ dies ; si multis annis in peccatis perseveraverint, NULLA adhibita opera in emendationem vitæ ; si occasiones vitare non proponant ; si, cum propoſuerint, & promiserint, fidem in Confessione datam de illis dimittendis fregerint, præsertim sapius ; si concubinam non dimittant ; si contractus contra ejus consilia initos non resciderint ; si Episcopali monitorio super rebus deperditis non paruerint.* In his igitur casibus, & non in aliis dissimilibus, putat S. Carolus, pœnitentem facere Confessario probabilem metum de non futura simplicitate emendatione, ac tunc expedire, seu consultum esse, ut illi differatur Absolutio, & sic procuretur indicium securius doloris, ac ferri propositi. Dixi, in his casibus, & non in aliis dissimilibus ; nam tritum est apud jurisperitos axioma, teste quodam docto Lovaniensi apud citatum la Fontein, quod *ubi Legislator regulam suam multorum coactione exemplorum explicat, regula ista intra istorum, & similium limites contineatur, & modificetur.*

39. Quare liquido constat, ni fallar, juxta S. Carolum non oportere ex obligatione, ac necessitate Sacramenti, ut semper differatur Absolutio Recidivis, qui non fuerint integre ac totaliter emendati, sed sufficere, ut aliquam afferant emendationem, vel aliquam adhibuerint operam ad emendationem : præterea utile esse, consultum esse, ut aliquando differatur illis Absolutio, quando scilicet Confessarius, ut medicus, prudenter credat, non expedire hic & nunc, ut statim detur Absolutio, ac proinde dilationem Absolutionis esse hic & nunc remedium utile ad illius pœnitentis emendationem, vel quando tales sunt in pœnitente Recidivo circumstantiæ, quæ prærequirant Absolutioni signum securius conversionis, prout sunt in casibus supra a S. Carolo enumeratis. In quo toto nihil est contra Doctores secundæ sententiæ, multum vero contra Doctores primæ sententiæ : unde perperam in sui favorem isti allegant S. Carolum. Vide plura apud P. la Fontein *loc. cit.*

40. Neque obstat propositio sexagesima ex damnatis ab Innocentio XI. quæ aiebat : *Pœnitenti habenti consuetudinem peccandi contra legem Dei, naturæ, aut Ecclesiæ, etsi emendationis spes nulla appareat, nec est neganda, nec differenda Absolutio, dummodo ore proferat, se dolere, & proponere emendationem*. Non obstat id, inquam; nam Theologi secundæ sententiæ nunquam id affirmant, sed affirmant duo valde diversa: nempe 1. prudenter a Confessario judicari pœnitentem consuetudinarium esse dispositum, quando ille, non ore duntaxat, sed serio, & ex animo dixerit se dolere, ac proponere, nec fuerit præsumptio in contrarium, ejus dictum elidens: 2. non esse hanc præsumptionem in contrarium, quando pœnitens afferat aliquam vitæ emendationem, vel aliquem ad emendationem conatum adhibuerit &c. Utramque hanc partem erroris expertem, & sanæ doctrinæ congruentem esse, ostenditur; tum quia prima pars est communis Doctorum, & expresse traditur a S. Thoma pluribus in locis, ac præsertim in 4. dist. 17. quæst. 3. quæst. 5. ad 2. tum quia propositio damnata affirmabat pœnitentem consuetudinarium absolvendum esse, etiam si Confessarius non habeat spem futuræ emendationis, id est etiam si Confessarius non judicet prudenter, non credat, ipsum vere dolere ac proponere, siquidem ex defectu talis judicii deficit spes futuræ emendationis, & tale judicium vulgari, ac metonymica locutione appellatur *Spes*: hæc duo affirmant Theologi secundæ sententiæ; unde non opponuntur Decreto Innocentii; siquidem volunt, quod pœnitens non duntaxat ore, sed serio & ex animo affirmet, se dolere ac proponere, & volunt, quod Confessarius habeat spem emendationis, id est judicet, pœnitentem vere dolere, ac proponere; addunt præterea hoc judicium prudenter haberi a Confessario, quando nulla est præsumptio in contrarium, pœnitentis dictum elidens; id quod contingit, quando pœnitens assert aliquam emendationem vitæ, aliquem conatum adhibuerit ad emendationem, occasionem dimiserit, ablatum restituerit; non vero si quid minimum fecerit, puta, semel recitaverit unicam salutationem Anglicam, ut irrisorie objiciunt Adversarii; nam ly *aliquis* non semper verificatur in minimo, ut docent Juristæ, sed ejusmodi dictio accipienda est secundum subjectam materiam, ut expendit Barbosa ad hanc dictionem.

§. V.

Brevis Conclusio totius Opusculi.

41. **H** Abes ex dictis sententiam, quæ in materia de danda, vel neganda Recidivis Absolutione magis placet: habes etiam fundamentum, cur illa magis placeat. Unde primum est colligere, non errasse fortasse, si quis docuerit, non oportere Confessarium esse admodum difficilem in absolvendo Recidivum, qui vere doleat ac proponat emendationem, idque ei constet ex aliqua ipsius pœnitentis emendatione, aut alio ejusmodi solido indicio, una cum ejusdem sincera asseverantia de eo, quod ipse vere doleat, ac vere proponat. Docuisset is quippe sententiam, in qua (teste Card. de Lugo disp. 14. sect. 10. num. 166.) communiter conveniunt Auctores, quamque sancti

Sancti viri, ut supra ostensum est, recentibus hisce temporibus inter excipiendas Confessiones in usu habuere; antiquius vero a Conciliis; & Patribus traditam esse, fuscè ostendit toto ipso capite ad propositionem 87. P. la Fontein, dum olim statim a Confessione, pœnitentibus contritis impertitam sine dilatione fuisse Absolutionem ibi demonstrat.

42. Quod præclaro exemplo & ratione confirmatum, accepimus in Actis Sanctorum apud Bollandianos; nam ibi narratur S. Vitalem Abbatem, qui floruit sæculo reparatæ salutis decimo, non verbo dumtaxat, sed etiam exemplo benignitatem ejusmodi inter Sacramentum Pœnitentiæ administrandum alios docuisse. En ipsissimæ Historici verba ibi: *Ad sanctissimum virum plures undique confluent, & peccata, quæ fecerant, sibi humiliter confitentur. Ille humana natura imbecillitatem pia consideratione videns, cuiuscunque morbo, secundum quod eum ferre posse cognoscit, curationem adhibet salutarem, & ne succumbat oneri, quæ gravia sunt, leviori tritura modatur, impotentes absolvit, allevat aggravatos, providens, ne propter onera gravia, & insistentia, sicut diversa multorum hominum mentes, in profunda perdantur ignorantia, & a desperationis damone pertrahantur. Qui dum tanti Patris exhortationes admittunt, monitis acquiescunt, declinantes a malo in bono Pœnitentia se confirmant, & confirmati ad propria cum gaudio revertuntur. Ex vicinis ergo Regularibus duo sanctissimi Patres, Leontius de Petra, & Hilarius de Galasio, talia audientes, fuerunt non modice admirati, quoniam modo B. Vitalis tantam remissionem indulgeret illis, qui sunt in gravioribus culpis: existimantes autem illum tanquam idiotam, iter ad eum direxerunt, volentes interrogare, qua ratione ita solvit eos, qui sua sibi, confitentur peccata. Tandem in speluncam, in qua Sanctus manebat, pervenerunt, & salutatione ad alterum facti, vir Dei plenus Vitalis causam itineris intellexit: gavisus est ipse, & benedictionis atque latine gratia mensam is ad prandium paravit, & de his, quæ solitus erat ipse comedere, elixando decoxit, & illis apposuit, qui contingentem inde vaporem, & odorem perpeti nequeunt, a mensa protinus recesserunt. Hoc cum vidisset B. Vitalis, dixit ad eos: sicut ferre non potuistis cibi hujus odorem, ita & impositas homines gravis pœnitentiæ leges nequeunt sustinere, & plurima iis exempla de hac eadem materia proponebat. Admirantes autem illi spirituales hujus viri sanctissimi voluntatem, viam, qua venerant, adierunt, Omnipotenti Deo laudem, ac gloriam referentes. Hactenus Bollandiani. Unde, benignitatem Confessarii facere, ne Confessio sit odiosa, & ut ea magis plerumque prosit pœnitentibus, quam nimius rigor, satis constat.*

43. Enimvero Scripturis eum magis adhærere, & ab errore eum magis abesse crediderim, qui cum Navarro, Toletio, aliisque talibus id senserit; quam qui oppositum cum Merbesio, Opstraet, Juenin, aliisque hujus notæ contenderit. Quamquam de hoc satis. Duo nunc supersunt, quibus unumquemque ad calcem monitum velim. Alterum est, ne quisquam facile se abripi sinat fuco quodam purioris ethicæ, ac veteris, ut in ore nonnulli habent, instaurandæ disciplinæ, & probitatis; sed cautus, Fideique Catholicæ tenax, sedulo perpendat, num speciosa quædam asserta, ut notat la Fontein

ad prop. 87. cap. 5. viam sensim aperiant. opinionibus doctrinæ non sanæ. Audi quis, ex. gr. non esse absolvendos prava consuetudine laboantes: videat, ne brevi gradus inde fiat ad sententiam, pravum habitum (ut de fomite concupiscentiæ docuerant hæretici): non solum esse peccati effectum, sed peccatum, quo actualiter manente, absque dubio poenitens justificari non potest: Audi, relapsos non facile absolvendos, sed rejiciendos a Confessario: caveat, ne res eo tandem a nonnullis feratur, ut persuaderi velint, Sacramentum Poenitentiae esse veluti Sacramentum Baptismi, quod iterari non potest, præsertim si ii utantur eo argumento, quo olim utebantur hæretici de incorruptibilitate charitatis: Audi rursus, poenitentem ante Absolutionem diu flere, amarissime conteri, poenitentiae, ac perfectæ charitatis actibus exerceri debere: videat, ne id eo spectet, ut clam is error doceatur, ab Sacerdote non remitti peccata jam antea fletu, & actibus sinceri amoris, perfectæque Contritionis remissa, sed ejus Absolutionem esse nudum ministerium, quo declarentur remissa peccata; atque idcirco Sacramentum Poenitentiae sacram quamdam ceremoniam esse, significantem, gratiam fuisse restitutam, nec propterea esse illud ad peccatoris justificationem necessarium. Videat, inquam, hæc diligenter, quisquis ea audit aserta, & ut Vincentii Lirinensis verbis utar, pertimescat, ne sub Divinæ legis umbraculis errores occulti latent, qui deinde serpent.

44. Alterum est, ne quis facile eos Sanctorum Patrum textus ad rem, de qua agimus, opportune allegatos existimet; nisi prius ex regulis theologicis apud Canum *lib. 7.* genuinam eorum Patrum mentem is fuerit assecutus. Constat quippe ex Petro Lombardo *lib. 4. Sent. dist. 14. 10.* & ex S. Raymundo in *Summ. lib. 3. §. 1.* nonnullos olim abusos fuisse auctoritate Patrum, nempe S. Augustini, S. Gregorii, aliorumque, ad probandam, veram non esse poenitentiam ejus, qui postea relabitur; ipsi enim duo gravissimi Auctores explicant, quo sensu Patres locuti fuerint, quando aiebant: *Vera poenitentia est anteacta deslere, & flenda non committere.* Mirum proinde credas, quod adhuc recentiores aliqui asserant eosdem textus, velintque, eos accipi in sensu rejecto a tam gravibus Doctoribus. Quare cavendum unicuique est, ne statim, ut dicebam, per complures allegatos textus id a Patribus significatum judicet, quod eos allegantes iisdem significari contendunt.

45. His apposite, nisi fallar, monitis, illud omittendum non est, ut Sedes Apostolicæ correctioni, ac iudicio plenissime subijciam quidquid hætenus disserendo, atque opinando potius, quam itabiliendo, ac definiendo a me dictum est. Id enim unum in scribendo spectavi semper; ut Ecclesiasticorum eruditioni consulere, animarum bono pro viribus prospicere, & a præceptis, institutisque sanctæ Matris Ecclesiæ, ne transversum quidem, ut ajunt, unguem scilicet discederem.

INDEX

MATERIARUM.

A

Absolutio quid sit. 88. Requisita in Ministro ad ejus valorem. 88. *& seq.* An necessario debeat exprimi verbis. 89. Quæ verba sint de essentia, quæ de præcepto. *ibid.* Quinam sit sensus Absolutionis. *ibid.* An, & quando dari possit sub conditione. *ibid.* An sub conditione de futuro. *ibid.* Cui danda, aut neganda, vel differenda sit. 90. *& seq.* Dilatio, & negatio Absolutionis, in quo differat. 90. Advertentia circa remedium dilationis. 149. An graviter peccaret Confessarius pœnitentem rite dispositum sine Absolutione dimittens. 90. An valida sit Absolutio data absenti, qui per litteras, vel internuncium Sacerdoti constitetur. 86. Aut absenti, post Confessionem in præsentia faciam. *ibid.* Vel etiam præsentis post Confessionem factam in absentia. *ibid.* Quando danda sit Absolutio. 91. An ejus verba debeant aliquo modo conjungi cum Confessione. 91. *& seq.* Ritus in Absolutione servandus. 137. Attentio in ea proferenda. *ibid.*

Absolutio a censuris. 97. *& 136.*

Absolutio a reservatis. *V. Reservatio.*

Absolutio infirmi graviter decumbentis. 97. *& seq.* 168. *& seqq.* Moribundi. 86. *& 173.*

Absolutio recidivi. *V. Recidivus.*

Adoratio quid, & quotuplex. 4. Quamnam debeat Eucharistiam sacramento. *ibid.*

Amor purissimus non prærequiritur ad celebrandum. 49.

Angeli Christo ministrant in Eucharis-

tia mysterio. 4. Credibile est Angelos aut semper, aut frequentissime in Templis adesse. 61.

Approbatio quid sit, & quotuplex. 100. *& seqq.* Requiritur in Sacerdote ad valide absolvendum. *ibid.* *& 104.* Quomodo differat a jurisdictione. 100. An, & quando irrita sit Approbatio simoniace obtenta. 101. An irrita sit, data Religioso a suis Superioribus non præsentato. *ibid.* A quo habenda sit Approbatio. 104. An per examen præmissum. 101. Quinam censeantur approbati per collationem Beneficii Parochialis. 103. *& seq.* An valida sit Approbatio falso putata. 104. Vel ea, quæ fuit petita, & injuste negata. *ibid.* An petenti possit ab Episcopo denegari Approbatio. 109. An possit limitate concedi. 110. An semel concessa possit revocari. 101. 110. *& seq.* Approbatio quo ad Moniales. 108. *& seq.*

Approbatio quo ad Regulares inter se. 105. *& seq.*

Attritio quid sit. 77. An sufficiat naturalis, modo honesta. *ibid.*

B

Banniti a quolibet Sacerdote absolvi possunt. 99.

Benedictioni SS. Sacramenti Interestium utilitas. 20. Nonnullorum quo ad hoc abusus. *ibid.* Quid de Interestibus Benedictioni ejusmodi ex sola consuetudine. 21.

Beneficiatus ad quid teneatur ex omissione Divini Officii. 164.

Beneficii collatio simoniace facta est irrita. 101. *& 164.* Per collationem

B b a Be-

Confessarius infirmi. 163. & seqq.
 Confessarius Monialium. 108. & seqq.
 Confessarius recidi vi. V. *Recidivus*.
 Confessarius Regularium. V. *Regulares*, & *Reservatio*.

Confessio sacramentalis. 75. & 81.
 Ejus necessitas. 81. Quando incit illius obligatio. *ibid.* & seq. Quinam ad eam teneantur. 82. Quo anni tempore ejus præcepto satisfiat. *ibid.* An per Confessionem voluntarie nullam. *ibid.* Vel per Confessionem factam Regulari, Episcopo quidem præsentato, sed ab eo injuste repulso. 86. Qualitates Confessionis sacramentalis. 83. Quale sit peccatum in ea mentiri. *ibid.* Confessionis integritas. 84. Quale examen ad eam prærequiratur. *ibid.* An Confessio per accidens dimidiari possit licite, & valide. 85. An aliquando possit fieri in genere. *ibid.*
 Ordo, quem habet sacramentalis Confessio. 86. An quis aliquando teneatur Laico confiteri. *ibid.* An, & quomodo per interpretem. *ibid.* An liceat confiteri Sacerdoti absenti. *ibid.* Confessio fieri debet Sacerdoti approbato. *ibid.* Quid veniat nomine Confessionis sacramentalis. *ibid.* An in Confessione liceat revelare complicem. 87. & seq. An causa ad id sufficiens, sit necessitas servandi integritatem materialem Confessionis. *ibid.* Vel correctio ipsius complicitis a Confessario facienda. *ibid.*

Conjugati quo ad usum frequentis Communionis. 15. A quotidiana repellendi non sunt ex eo præcise, quod sint conjugati. 17. Sanum consilium est, ut se mutuo abstinuant ante Communionem. *ibid.* Limitatio. *ibid.*

Consuetudinarius. V. *Recidivus*.

Contritio quid sit, & quotuplex. 77. Ejus qualitates. *ibid.* An debeat præcedere Confessionem. 78. An nova requiratur, si perseveret habitualiter,

vel virtualiter prior. *ibid.* V. *Dolor*.

Correctio quomodo a Confessario facienda poenitenti. 150.

D

Debitum conjugale. 163.

Defectus in Confessione qui, & quomodo a Confessario emendandi. 158.

Delicta Inquisitoribus, vel Ordinario denuncianda. 162.

Devotio quamvis substantialis sit, quam accidentalis. 63. An utraque major sit in audiente Sacrum in Templo, quam in domo privata. *ibid.*

Dispositio requisita ad Communionem quotidianam. 26 Ad quotidianam Missæ celebrationem. 55.

Dolor de peccatis vel est perfectus, vel imperfectus. 77. Alteruter ex his est necessarius ad valorem Sacramenti Poenitentiae. *ibid.* An sufficiat dolor mere existimatus. *ibid.* Aut dolor reflexus de eo, quod non doleat. *ibid.* Non requiritur dolor de omnibus peccatis singulatis. *ibid.* Nec ad dolorem necessaria est aliqua graduum intentio, vel mora temporis determinata. *ibid.* Qualitates doloris requisiti ad Poenitentiam. Sacramentum. V. *Contritio*.

E

Eelemosynam dare mulierculis cum onere, ut pro hoc, vel illo communicent, an expediens. 19.

Eleonora Neoburgica Imperatrix, quanti fecerit res ad Eucharistiam cultum pertinentes. 8.

Erroris in Confessione qui, & quomodo emendandi a Confessario. 158.

Eucharistiae Sacramentum latræ cultu adorandum est. 1. & seq. Eidem de sacro tenemur cultum hujusmodi

B b 3 inter-

interdum præstare ex præcepto affirmativo. 2. An tale præceptum obliget infideles. *ibid.* Quando, & quomodo. adimplendum sit tale præceptum. 3. *& seqq.* Quenam fiat de præcepto, vel consuetudine Ecclesiæ, constituta ad cultum Eucharistiæ. 4. *& seqq.* An Eucharistia deferri possit ad infirmos, qui nequeunt illam suscipere, ut saltem ab iis adoretur. 7. Ad infirmos deferenda non est, nisi cum decenti forma. 13. An dari possit infirmo non jeiuno, qui intra eandem ægritudinem semel Viatico refectus fuit. 44. Ss. Eucharistiam deducere, cum deferatur ad infirmos, pium valde ac salubre est. 18. An ea possit publicæ venerationi exponi sine licentia Ordinarii. 7. *Expositio* valde frequens an expediens. 19. Quo apparatu, & cultu exponi debeat. *ibid.* *& seq.* An peccatum sit, & quale, consulari de rebus indifferentibus coram Venerabili exposito. 9. *& seqq.* An liceat Eucharistiam ministrare sine lumine. 14. An suppellex sacra ad usum, & ministerium Eucharistiæ, debeat de præcepto esse munda. *ibid.* An Equites ex Ordine militari decenter accedant ad Eucharistiam accincti ense. 15. An peccent foeminae ad eandem accedentes cum ornatu superfluo, & immodesto. *ibid.* Quenam vitanda sint ab iis, qui Eucharistiæ Processioni interfunt. 16. An reus ejusmodi Processioni se immiscens, gaudeat immunitate. *ibid.* Visitatio, & adoratio quotidiana Eucharistiæ, quanti facienda. 17. *& seq.* Benedictioni Sacramenti interessentium utilitas. 20. Nonnullorum quo ad hoc abusus. *ibid.* An facere aliqua ad cultum Eucharistiæ ob consuetudinem, sit laudabile. 21. *& seq.* Examen quale præquiratur ad Confessionem. 24. Examen an præquiratur ad appro-

bationem Confessarii. 101. An Sacerdoti Regulari possit Episcopus admissionem ad examen negare. 109. Quid de Sacerdote seculari. *ibid.* Excommunicatio percussoris Clericorum quomodo intelligenda. 149. *& seq.* Excommunicationes Papæ reservatæ per Bullam Cœnæ. 145. *& 160.* Excommunicationes aliquæ efficientes Confessarios in aliquibus casibus. 161. Excommunicato vitando Ecclesia denegat jurisdictionem. 99. Hinc Sacerdos publice denunciatus, vel notorius Clerici percussor, invalide exciperet Confessionem. *ibid.* Limitationes. *ibid.* *& 27.*

F

Famæ restitutio quando, & quomodo facienda. 142. *& seq.* Quomodo agendum cum infirmo ad famæ restitutionem obligato. 171. Fervor, & devotio actualis, an requiratur ad gratiæ sanctificantis augmentum per sacram Communionem. 37. Fervor Christianorum primitivæ Ecclesiæ. 38. Fidei mysteria ignorans an capax sit Absolutionis. 146. Quenam explicate credenda sint necessitate mediæ. *ibid.* Quenam eorum scientia requiratur, ac sufficiat Fideli, quæ præcise talis est. 147. Forma Absolutionis ex Rituali Romano. 168.

G

Gratum intentio aliqua determinata non requiritur in dolore in ordine ad Confessionem. 77. Gratia status an sufficiat ad hoc, ut sacra Communio pariat in subiecto augmentum gratiæ sanctificantis ex opere operato. 37. An, & quando requiratur in Confessario ad licitam

tam Sacramenti administrationem .
117. An ad tale ministerium teneatur Confessarius gratis statum procurare per Confessionem . *ibid.* Quot peccata committet , si extra ejusmodi statum plures Confessiones continuatim audiat . *ibid.*

H

Hæresis denuncianda est Inquisitoribus , vel Ordinario . 143. Quando & sub qua pœna . *ibid.* Quid veniat nomine Hæresis denunciandæ . *ibid.* Quid , si quis grave malum sibi timeat ex denunciatione . *ibid.* Vel si non denunciare juraverit . *ibid.* An Prælati Regulares quoscunque possint absolvere ab Hæresi occulta in foro conscientie . 145.
Homicidium conjugis an , & quando dirimat matrimonium . 166.
B. Hyacinthe de Mariscottis opera , ut Eucharistia perquam magnifice exponeretur . 20.

I

Ignorantia quodplex sit . 147. Quenam excuset a peccato . *ibid.* Vincibilem semper debet Confessarius a pœnitente auferre , & quare . *ibid.* An , & quatenus etiam invincibilem . *ibid.* & *seq.*
Impedimenta matrimonii quæ , & quot . 165. & *seq.* Quis possit in iis dispensare . 166. & *seq.*
Indulgentiæ pro comitantibus sacrum Viaticum . 18.
Infirmus diversimode consideratur in ordine ad Absolutionem . 168. Praxis pro Confessione Infirmi naturali morbo graviter laborantis . *ibid.* & *seqq.* Pro Confessario Infirmi ex accepto vulnere graviter decumbentis . 172. Pro Confessario Infirmi sensibus plane destituti , ac brevi morituri . 173.

Intentio quæ , & quomodo efformanda a Confessario . 124.

Interrogare an , & quando teneatur Confessarius . 128. & *seq.*

Judicium prudens de dispositione pœnitentis requiritur in Confessario , antequam illum absolvat . 123. Unde illud sufficienter habeat Confessarius . *ibid.* & *seqq.* Relate ad recidivos . 177. 182. & *seqq.*

L

Licet nec in extrema necessitate potest sacramentalem Confessionem excipere . 96. Quid , si hæc fiat de solis venialibus . *ibid.*

Latrinæ cultus debetur Eucharistiæ sacramento . 1. & *seq.* Datur præceptum affirmativum de hujusmodi cultu eidem interdum præstando . 2. Non solum Christus sub speciebus existens , sed etiam totum Sacramentum visibile , ut ex Christo , & speciebus constat , unico Latrinæ actu adorandum est . 1.

Litteras sacræ Pœnitentiariæ quis spectare possit , ac exequi . 153. & *seq.* Observanda ab illarum executore . 154.

M

Matrimonium . V. *Impedimenta* . Quenam Parochi præsentia requiratur , ac sufficiat ad ejus validitatem . 166. & *seq.*

Mendicantes nequeunt absolvere a casibus Episcopo reservatis . 90.

Metus an tollat voluntarium simpliciter . 140.

Minister Sacramenti Pœnitentiæ quis . 96. Debet esse distinctus a suscipiente . *ibid.* An quilibet Sacerdos sit Minister pro venialibus . 97. An quilibet in articulo mortis possit absolvere . *ibid.* & *seq.* Quid veniat nomine articuli mortis . 98. & *seq.* Requisita ad valide ministrandum Pœ-

Pœnitentiæ Sacramentum. 99. *¶* *segg.* Ad licitam ejusdem administrationem. 117. *¶* *segg.* Ministri obligationes. *V. Confessarius.*

Missa & est Sacrificium, & habet maximam quamdam excellentiam, & dignitatem. 52. Ad quid nobis datum sit hoc Sacrificium. *ibid.* *¶* *segg.* An teneatur Sacerdos ex vi Ordinis aliquoties in anno celebrare. 45. *An.* & quatenus licitum, & conveniens sit Sacerdoti quotidie celebrare. 46. *¶* *segg.* Celebrare quotidie est per se magis expediens, & consulendum. 47. *¶* *segg.* Aliquando religiosum erit abstinere. 47. 49. *¶* 51. Aliquando etiam obligatorium. *ibid.* Missæ quotidianæ obligatio in Cappellano, quomodo intelligenda. 50. Missæ Sacrificium quomodo nobis remittat peccata. 53. *¶* *segg.* Disponere se debent Sacerdotes ad quotidianam illius celebrationem. 55. Quomodo se disposuerint pii Sacerdotes. *ibid.* De jure ordinario in sola Ecclesia, vel loco sacro, licet celebrare. 57. *¶* *segg.* ex necessitate tamen in quocumque decenti loco. 58. Item in Oratoriis privatis ex privilegio. 59. Quomodo temperandus sit hujus privilegii usus. 60. Qui, & quot sint Missæ Sacrificii fructus. 61. An ex opere operato uberius sit fructus Sacrificii in loco sacro, quam in Cappella privata. 62. *¶* *segg.* An etiam ex opere operantis. 64. *¶* *segg.*

Moniales quo ad quotidianam Communionem. 25. Monialium Confessarius quis, & a quo debeat approbati. 108. *¶* *segg.* Monialium Choro asservari nequit Eucharistiæ Sacramentum. 6. Nec ejusdem custodiam clavis iis debet committi. *ibid.*

Moribundus an, & quando possit absolvi. 86. *¶* 173.

N

Navigantes an, & quando possint a quolibet Sacerdote absolvi. 99. Negotiatores quo ad frequentiam Communionis. 24. *¶* *segg.* Notitia habita in Confessione an, & quatenus uti liceat ad externas actiones regulandas. 157. Novitii an valide absolvi possint a Sacerdote seculari. 106.

O

Occasio peccandi quæ, & quotuplex. 79. *¶* *segg.* An, & quatenus teneatur pœnitens relinquere occasionem proximam peccandi lethalliter. *ibid.* Quid de occasione proxima venialium. 81. Quid agendum Confessario cum infirmo concubinario. 172. Opinationum usus relate ad Confessarios. 150. Quando benignioribus uti debeant. *ibid.* Oratorii privati usus pro Missa, licet quidem ex privilegio. 59. Ejus tamen frequens usus nec decet, nec expedit. 60. Limitatio respectu Episcoporum, ac Prælatorum superiorum. 70. Oratorii facultate uti debent privilegiarii parce, discrete, & cum causa rationabili. 72. Intra quos fines consistat hujusmodi discretio, ac parcimonia. 74.

P

Parochus excommunicatus an, & quando valide excipiat Confessiones. 99. Est approbatus tam respectu secularium suæ Parochiæ, quam respectu totius diocesis. 103. An ubique eligi possit ab eo, qui privilegium habet eligendi Confessarium. *ibid.* An audire possit Confessionem sui subditi in aliena diocesi. *ibid.* An, & quando possit revocari ad examina

men

men ab eodem Episcopo, a quo examinatus, & approbatus fuit in concursu. 102. An, & quando ab eius successore. *ibid.* An possit sibi eligere in Confessarium non approbatum ab Ordinario. 105. An simplicem Sacerdotem exponere possit ad audiendas suarum ovium Confessiones. *ibid.* An Parochus ordinariam habeat potestatem. 112. An eam delegare possit Sacerdoti approbato. 105. & 117. An, & quando teneatur Sacramentum Pœnitentiæ ministrare. 121. & *seq.* Quenam Parochi præsentia requiratur, ac sufficiat ad validitatem matrimonii. 166. & *seq.*

Peccatum in genere quid sit, & quod simplex. 138. Distinctio numerica, & specifica peccatorum. 139. & *seqq.* An metus excuset a peccato. 140. Quenam peccata sint materia necessaria, quanam sufficiens Sacramenti Pœnitentiæ. 76. Nec originale, nec solum ætiale commissum ante Baptismum, sunt materia sufficiens talis Sacramenti. 75. An teneatur ponitens fateri peccata negativa, dubia. 76. Quæ peccata habeant annexum onus restitutionis. 140. & *seq.* Quæ habeant annexum onus denunciationis. 143. & *seq.* Quæ habeant annexam censuram. 144. & *seq.* Peccata, in quibus non datur parvitas materiæ. 138. Quenam peccata de facto soleant reservari. 113. *V. Reservatio.*

Pœnæ canonicæ aliquibus delictis annexæ. 163. & *seq.* Pœnitentia. *V. Satisfactio.* Pœnitentia Sacramentum. 75. Ejus partes, & effectus. *ibid.* & *seq.* Materia remota, & proxima. *ibid.* Forma. 75. Necessitas Sacramenti Pœnitentiæ. 76.

Pœnitentiariæ Romanæ tribunal quid sit. 151. Quomodo, & pro quibus casibus ad illam recurrendum. *ibid.*

& *seq.* Inscriptiones litterarum sacrum Pœnitentiariæ. 153. Quis possit eas aperire, & exequi. *ibid.* & *seq.* Observanda ab illarum executoribus. 154.

Prælati Regulares exempti, sunt ordinarii Pastores animarum suorum subditorum. 120. Debent parati esse ad eorum Confessiones audiendas, si ipsi velint illis constiteri. *ibid.* Hoc tamen Confessarii munus personaliter, & per se exercere ordinarie non possunt. *ibid.* Hinc tenentur sub gravi propriam jurisdictionem alteri delegare. 121. An etiam ad reservata. *ibid.*

Propositum in ordine ad Sacramentum Pœnitentiæ quid sit. 78. Verum Propositum compatibile est in pœnitente cum probabili iudicio reflexo formidoloso de relapsu. 79. Requiritur tum ad effectum, tum ad valorem Sacramenti. *ibid.* An requiratur formale, & expressum. *ibid.* Ejus qualitates. *ibid.* An debeat extendi ad occasiones vitandas. 79. & *seq.* An requiratur in Confessione venialium, & quale. 80. An in venialium Confessione requisitur etiam Propositum expressum vitandi mortalia. 81.

Quadragesima Horarum Oratio quando Romæ initium habuerit, vel incrementum. 20.

Qualitates Confessionis sacramentalis. 83.

Qualitates requisitæ in Confessario. 117.

Recidivus quis sit, ac dicatur in acceptione theologica. 175. Quenam requirantur ad constituendum Recidivum consuetudinarius. *ibid.* & *seq.* An, & quando, ex frequenti

151a-

relapsu inferatur inefficacia præsentis doloris, & propofuit, ad negandam Abfolutionem Recidivo. 176. & *seq.* An ex eodem inferatur priorem Confessionem fuisse invalidam. *ibid.* Unde habebit Confessarius iudicium prudens de præfenti difpofitione Recidivi in ordine ad Abfolutionem. 177. 182. & *seq.* An ad Recidivi Abfolutionem requiratur in eo integra, & ftabilis emendatio. 178. An neganda fit Abfolutio Recidivo confuetudinario, donec liber fit ab omni pravo habito, & confuetudine. 180. An Recidivo ex eo præcife, quod talis fit, femper, aut ordinarie differenda fit Abfolutio. *ibid.* Vera, ac fanior doctrina de modo agendi cum Recidivis. 181. & *feqq.* An Recidivi, qui dicuntur labi ex vi præcife folius habitus, cenfeantur labi neceffario, & fine libertate indifferentie. 185. & *seq.* Praxis Sanctorum circa Recidivi Abfolutionem. 188. & *seq.*

Regulares, a quo habeant iurisdictionem ad Confefiones audiendas. 100. An ejusmodi iurifdictio in iis fufpendatur per meram fui Prælati prohibitionem. *ibid.* Ut validam obtineant approbationem, præfentari debent Epifcopo a fuis Superioribus. 101. Semel approbati an, & quando poffint ab eodem Epifcopo ad examen vocari. *ibid.* & 111. An ab ejus fucceffore, quando illimitatas habent licentias. 101. Regulares non indigent approbatione Ordinarii ad Confefiones, quas Ipsi faciunt inter fe. 105. Hinc Prælati Regularis poteft exponere fuis fubditis Confefſarium non approbatum ab ullo Epifcopo. *ibid.* Qui in ordine ad id fuit fubditi talis Prælati. *ibid.* Confefſarius Regularis approbatus ab Epifcopo, non autem a Prælato Regulari, excipere nequit Religioſorum Confefiones. *ibid.* Regularis facul-

tatem habens a Prælati eligendi Confefſarium, an & quatenus poffit eligere ſecularem, etiam ab Epifcopo non approbatum. 106. An Regulares vi Jubilei poffint eligere Sacerdotem non approbatum ab Ordinario loci. *ibid.* An ab eo approbatum, ſed extraneum, & non approbatum a Prælato Regulari. *ibid.* Omnes ſimul unius Conventus Regulares nequeunt ab Epifcopo fuſpendi ab audiendis Confefſionibus. 112. *V. Reservatio.*

Relapsus. *V. Recidivi.*

Remedia pro illis, qui imprecationibus ſuis dedit. 150.

Remedia pro illis, qui reſalutare non ſunt. 151.

Remedia pro illis, qui ſe frequenter polluant. 151. & *seq.*

Reservatio caſuum quid ſit. 113. **Finis Reservationis.** 114. Quis habeat poteſtatem reſervandi. 113. Quis abſolvendi. *ibid.* & 90. Quænam peccata de factis reſervari ſoleant. 113. An Reservatio extendatur ad caſum dubium. *ibid.* An Superior reſervans teneatur ſub gravi ſubdito per ſe, vel per Confefſarium petenti, facultatem concedere, ut alteri conſtitatur. 113. Facultas abſolvendi a Reſervatis quandocumque cenſeatur conceſſa. *ibid.* An ſimplex Confefſarius teneatur adire Superiorem pro obtinenda facultate abſolvendi illius ſubditum a Reſervato. *ibid.* An, ſi adeat, teneatur & caſum, & perſonam reſicere. 113. & *seq.* **Quid agendum Confefſario, ſi hujusmodi facultatem ei Prælati denegat.** 121. In mortis articulo nulla eſt Reservatio. 97. Nec poenitens in tali articulo abſolutus, teneatur poſtea comparere Superiori pro Reſervatis. *ibid.* Limitatio quo ad cenſuras reſervatas. *ibid.* Religioſi itinerantes, vel extra clauſtra de licentia exiſtentes, an, & quatenus abſolvi poſ-

possint a Reservatis . 106. *& seq.*
 Restitutio quid sit , & qui ad eam te-
 neantur . 140. Cui debeat fieri . 141.
 An , & quid restituendum sit ex re
 accepta . *ibid.* Quid ex injusta acce-
 ptione . *ibid.* Quando fieri debeat
 Restitutio . *ibid.* Quid restituendum
 pro homicidio, mutilatione &c. 143.
 Quid pro illato stupro . *ibid.* Pro
 fama . *ibid.* *& seq.* Quid agendum
 Confessario cum infirmo ad restitu-
 tionem rei , aut famæ obligato . 170.
& seq. Causæ a Restitutione excu-
 santes . 141. *& seq.*

S

Sacerdos cum pari dispositione ,
 potest frequentius celebrando com-
 municare , quam Laicus , & quare .
 40. *& 51.* Ratione Ordinis habet
 auxilia quædam gratiæ ad rite cele-
 brandum . *ibid.* Quandonam deberet
 aliquando a Sacro abstinere . *ibid.*
 Ratione officii aliquando celebrare
 tenetur sub gravi . 45. Quando ta-
 men , & quoties in anno . *ibid.* An
 licitum , & conveniens sit Sacerdoti
 quotidie celebrare . 46. *& seqq.* An ,
 si Superior prohibeat sacrificare , te-
 neatur subditus obedire . *ibid.* An ,
 & quatenus possit esse religiosum ,
 aliquando a Sacro abstinere . 47. 49.
& 51. An , & quatenus etiam obliga-
 torium . *ibid.* Obligatus ad quotidia-
 nam celebrationem propter Cappel-
 laniam , an & quoties poterit va-
 care . 51. Qua ratione se comparare
 possint , ac debeant Sacerdotes ad
 quotidianum Sacrificium . 55. An ,
 & quæ censuræ eos arceant a jure
 sacrificandi . 55. *& seq.* An Sacerdos
 perfecte contritus , nondum tamen
 absolutus ab excommunicatione ,
 licite peragat Sacrum . 56. *V. Missa.*
 Sacerdos , prout est Minister Sacramen-
 ti . *V. Minister .*
 Sacramentalia quæ , & quot . 76. Quo-

modo per ea fiat remissio venialium
 extra Sacramentum . 77.

Sacramentum Pœnitentiæ . *V. Pœni-
 tentiæ Sacramentum .*
 Sacrificium . *V. Missa .*

Satisfactio sacramentalis quid sit . 92.
 An causet effectum remissionis pœ-
 nite ex opere operato . *ibid.* An ejus-
 modi remissio conferatur Satisfa-
 ctionem ex-quenti in lethali , aut
 obicem ponenti . *ibid.* An Satisfactio
 habeat vim impetrandi gratias præ-
 venientes , & auxilia pœnitenti . 93.
 An eadem causet gratiam ex opere
 operato . *ibid.* An Confessarius te-
 neatur pœnitenti Satisfactionem in-
 jungere . *ibid.* An peccaret graviter
 non imponendo peccatis proportio-
 natam . *ibid.* Quando poterit mino-
 rem imponere . *ibid.* Qualitas ope-
 ris injungendi pro Satisfactione . 94.
 An necessario debeat esse opus ex-
 ternum . *ibid.* An injungi possint
 preces , vel alia pietatis opera præ-
 standa pro defunctis . *ibid.* Quando
 injungenda sit Satisfactio . *ibid.* An
 pœnitens teneatur eam acceptare .
ibid. Quando urgeat obligatio eam
 exequendi . *ibid.* Quid , si pœnitens
 Satisfactionis injunctæ obliviscatur .
ibid. Quis eam possit commutare .
 94. *& seq.* An inferior commutare
 possit Satisfactionem a Superiore
 pœnitenti impostam pro reserva-
 tis . 95. Pro Satisfactione optime
 imponitur Confessionis frequentia .
ibid. raro tamen expedit pœniten-
 tem obligari ad constendum cum
 eodem Confessario . *ibid.* Adverten-
 tia circa impositionem Satisfactio-
 nis . 135. Quanam imponenda sit
 infirmo gravi , vel extremo morbo
 laboranti . 169. *& seq.*

Scientia quæ , & quanta requiratur in
 Confessario . 117. *& seqq.*

Sigillum sacramentale quid sit . 155.
 Quanam cadant sub sigillum . 156.
& seq. Qui ad illud teneantur . *ibid.*
 Quot

Quo t modis fiat fractio Sigilli. 157.
 Poena infligenda Confessario de Si-
 gilli fractione convicto. 158.
 Sollicitantes Confessarios denunci-
 andi onus. 143. & seq. Quale pecca-
 tum sit, innoxium Sacerdotem fal-
 so sollicitationis insimulare. 169.
 Surdi, vel Surdascri Confessio ubi, &
 quomodo excipienda. 128.

T

Tabernaculum pro asservanda Eu-
 charistia quomodo custodien-
 dum. 5. Hujus clavis committenda
 non est Monialibus. 6. Ejus orna-
 tus. 7.
 Templi ratione consecrationis specia-
 lem efficaciam habent ad excitan-
 dam devotionem. 62. In iis credi-
 bile est aut semper, aut frequen-
 tissime Angelos adesse. *ibid.* Item
 abesse Demones. *ibid.* An uberior sit
 fructus Sacrificii in Templo, quam
 in Cappella privata. 61. & seqq.

S. Theresie sollicita pro Christo in
 Eucharistia vigilantia. 3.

V

Venialia sunt materia sufficiens
 Sacramenti Pœnitentiæ. 76. Eo-
 rum remissio quomodo fiat etiam
 per Sacramentalia extra Sacramen-
 tum. *ibid.* & seq. Venialium Confes-
 sio an tunc fiat simplici Sacerdoti.
97. An saltem valide. *ibid.* An
 peccata venialia possint reservari.
 113.
 Viaticum an iterum dari possit infirmo
 non jejuno intra eandem ægritu-
 dinem. 44.
 Visitatio quotidiana Eucharistiæ quom-
 o ti sit facienda. 17. Ejus utilitas.
ibid.
 Voluntas confitendi, & recipiendi Ab-
 solutionem, an sufficiat ad valorem
 Sacramenti. 77. Quid, si Confessio
 fiat de solis venialibus. 78.
 Vota Papæ reservata. 169.

FINIS LIBRI TERTII ET ULTIMI.